

壞敗頹恒倚夕陽
故宗霜業為張
皇車宿舍新西
羅馬大地山乃
最懸傷

羅馬懷古寫寄

任弟

以美

光緒二十六年
五月也于羅馬

家近有祿君六十

別事忽三十三年

技亦棠棣花開慶

花好何妨人月圓

仲產二弟忽別三十三

年

去拓之以初兄更姓

壘嶂虫底寒

系千松杉接因

推徑想為帶花

放山地晚車負

為花事晏然

戊子臘月舊宅

寄于幹弟

更姓

斷山駭浪天蒼際，落日
泉臺暮冢乙深西北。忽驚
棋劫陸東南，竹莽陣雲
陰。祀曾此夢憂天頂，生
見神如遂陸沉。愛雨翻
雲羨與廢臺高，負手
一沉吟。

天籟亭次半晚坐更生



鳩巢鳴在樹，鍾真游在溪。
柳視吼豕，豕豕吃豕。西暖地，在可橫。
布豹白，後嘶山鬼，獨脚。馳射狼，列群。啼危崖，拍蘿。夜絕壑，深夜。踏飛沙，執皆。冥大霧，途日迷。雨橫而風狂，天黑道。無蹤。以時出，臨艱。我行憂悽，歲在癸丑。暮春之初，幽行迷途。更生。茂賦。

康南海先生詩集目錄

延香老屋詩集 卷一

汗漫舫詩集 卷二

萬木草堂詩集 卷三

明夷閣詩集 卷四

大庇閣詩集 卷五

須彌雪亭詩集 卷六

逍遙遊齋詩集

卷七

寥天室詩集

卷八

避島詩集

卷九

漪漣詩集

卷十

南蘭堂詩集

卷十一

懋園詩集

卷十二

納東海亭詩集

卷十三

美森院詩集

卷十四

游存廬詩集

卷十五

康南海先生詩集 目錄

四

延香老屋詩集

康南海先生詩集卷之一

後學東莞崔斯哲手寫

吾有先人敝廬在西樵山之北銀塘鄉深處號
曰延香老屋外為七檜園澹如樓吾三十歲前
讀書其間少頗吟詠十不存一緝叢殘逸名之
曰延香老屋詩集記祖德也諸歌辭弁焉凡詩
一百六十五首

大同書成題詞

千界皆煩惱吾來偶現身獄囚哀濁世飢溺為斯人諸
聖皆良藥蒼天大不神萬年無進化大地合沉淪
人道祇求樂天心惟有仁先除諸苦法漸見太平春一
一生花界人人現佛身大同猶有道吾欲度生民
廿年抱宏願卅卷告成書衆病如其已吾言亦可除人
天緣已矣輪劫轉空虛懸記千秋事醫王亦有初

梁任公曰先生演禮運大同之義始終其條理折衷羣聖立為教說拯厥濁世二十年前略授口說於門弟子辛丑壬寅間避地印度乃著為成書啟超屢乞付印先生以今方為國競之世未許也

斯哲謹案南海先生於清光緒十年本禮運之旨著大同書其書分十部甲部入世界觀東苦乙部去國界合大地丙部去級界平民族丁部去種界同人類

戊部去形界各獨立己部去眾界為天民庚部去產
界均生業辛部去亂界治太平壬部去類界愛眾生
癸部去苦界至極樂書成既而思大同之治非今日
所能驟幾驟行之恐適以釀亂且以今為國競之世
因秘其稿不肯以示人故先生禮運注曰若未至其
時強行大同強行公產則道路未通風俗未善人種
未良且貽大害故祇得因其俗順其勢整齊而修明

之故禹湯文武周公之聖所為治化亦不出此未能
行大道也不過選於亂世之中較為文明而已其文
明之法皆在隆禮由隆禮而謹修之故於五德之運
未能至仁運智運而僅當禮之運而已不獨未能至
仁運智運也即義運信運亦未之至但以禮為經而
著其義考其信而已南海先生之言如此彼持急激
主旨大亂之後尚未底定欲一驟而幾於大同焉其

流弊何可勝道哉

愛國歌

登地頂崑崙之墟左望萬里曰維神州東南襟滄海西
北枕崇丘嶽嶺環峙川澤匯流中開天府之奧區萬國
莫我俾

我江河浩浩萬餘里其餘百川無涯涘江南十里必有
川深廣可以泛汽船新頭恒河與密士夫必淺窄僅比

我小泉來因多鏡太吾士先河泰擺皆是短小流涓涓
幼發拉的底格里兩河難比江河之長源萬國無我水
利專

巨山廣澤大野深林原隰陵衍江湖溪澗千百里間必
備崇深相彼印度與北美萬里平原無寸岑埃及波斯
阿拉伯沙漠沉沉地形自歐洲之外兮無與我並駕而
犗

地兼三帶候備寒暑川嶽含珍原野平楚五金薈萃萬
寶餘膺以花為國榮爛天府橫覽大地莫我能與

鳥獸昆蟲果窠草木億品萬彙物產繁赫羽毛齒草錦
繡珠玉衣食器用內求自足五色六章袷絲為服飲饌
百品美備水陸冠絕萬國獨受多福

藝：我祖懿惟黃帝天啓神靈創始治世監視萬國無
如赤縣地自崑崙西東從臨莅時巡鎮撫師兵營衛有

苗蚩尤鐵額銅頭是戮是平乃統九州力牧開闢風后
宣猷倉頡制字文明休休

惟我文明曰五千年歷史綵遠莫我先埃及金字塔中
絕文不傳印度九十六道微渺隱不宣惟我聖作文字
遠而存堯舜讓帝創民主孔子改制文教宣漢唐開闢
益光大東亞各國皆我文化權希臘興周末文章盛賀
悔羅馬更是強漢世皆祇當我雲來孫何況歐洲諸國

之後生島陸羣蠻種屬更何言

我同胞兮祖軒轅世本族譜百世傳皆諸侯大夫遺子
孫金枝玉葉布中原于今兄弟五萬萬同一源地球之
大姓莫我遠原萬國之人民莫我庶繁

中華地大比全歐全國同文宰亞洲日本高麗安南皆
我語言文字之遺留雖有閩粵音稍轉十六省語能通
郵印度文二十語言分四流歐洲十餘國國語文殊

異難搜求奧國十四文德國內六分英之威路士與愛
爾蘭語言殊異難請聞彼徧設鐵路尚如此我無鐵路
乃能同語文大地同化之力無如我神

神禹開華夏秦漢大一統長城萬里壓龍從張騫西域
遠鑿空漢武唐太鞭四夷南朔東西皆入貢郭侃百日
滅波斯天朝自古諸蠻重亞洲國土我獨尊上國之人
眾所奉至今安南印度稱阿赫二千年內神威動

我人相好端金色我人聰明妙神識我國制作最先極
據几著袴持箸食突厥印度埃及號文明不袴手食坐
地席英用刀匕二百年倍根之世尚不識惟我聖賢豪
傑多如鯽文化武功如交織我心忡忡起感激大地文
明世家我第一

我若生高麗兮一時脅罷兵而止噫我若生阿富汗暹
羅之小國寡民兮雖自厲而無能強噫我若生印度兮

久為奴而無鄉噫我若為波斯突厥之人兮教力壓而
難揚噫我即為荷蘭比利時瑞典丹墨之國民兮最爾
強善而難張噫我又為德法奧意諸強之民兮爭雄於
歐而難逞大力於太平洋噫方霸義之相競兮非有廣
土眾民難迴翔惟我有霸國之資兮橫覽大地無與我
頡頏我何幸生此第一大國兮神氣王長
我之哲學色東西我無壓力無所迷我欲自強兮一號

而心齊大呼而奮發氣銳神橫飛

我速事工藝汽機兮可以歐美為府庫我人民四五萬
萬兮選民兵可有千萬數我金鑊生殖無量兮我軍艦
可以千艘造橫絕五洲兮看黃龍旂之飛舞

愛國短歌行

神州萬里風泱泱崑崙東南海為疆岳嶺回環江河長
中開天府萬寶藏地蒸三帶寒暑藏以花為國絲為裳

百品雜陳飲饌良地大物博冠萬方

我祖黃帝傳百世一姓四五孩兄弟族譜歷史五千載
大地文明無我還全國語文同一致武功一統垂文治
四裔入貢懷威惠用我文化服我制亞洲獨尊主人位
今為萬國競爭時惟我廣土衆民霸國資徧鑿萬國無
侶之我人齊心發憤可突飛速成學藝與汽機民兵千
萬選健兒大造鍊艦游天池舞破大地黃龍旗

文成舞辭

嗚呼鮮民予惟生多艱遘世屯危予區域分爭歲役兵
車膏塗陵津惟天降鑒哀我下民以師代君誕於尼山
師代君一成

尼山嶽峯猗彼魯東霧麟吐書亶縱睿聰智周萬物道
與天通脫然世表豈不雍容乃心朕：寔哀氓蒙誓言
拯之共其吉凶 尼山聖二成

乃顧四國駕言周游其車揭：其馬秋：嗟彼狡童不
即我謀污塵濫天豈不思休哀我生民懷我東周
游三成 四國

兩河舊都天下之中朝多都美其野荔豐猗與三代未
至大同不可而為誰知余衷依我磬聲南北西東
磬四成 徧擊

我歲晏兮我車搏兮天命攸滔不為君子歸歟歸歟吾

黨之多狂簡乎四方彼從朋三千乎徒屬六萬儒僉僉
乎教日昌大條柎弥天乎 創儒教五成

惟昔之制失其綱惟今之制立其常天命在吾疇敢即
康改制立義託諸先王造作文字經列緯張繙以十二
分之陰陽道備天人莫敢不在範圍百世寔惟素王 經
改制六成

惟彼麟乎昌王道乎王道之明游我藪圃乎今非其時

來何故子天命有德徵蒼素子吁嗟麟子傷美人之遲
暮子人知春秋之改制子不知堯舜之得路子獲麟筆

七 成

惟儒教師仲尼大弟子凡八支根條昌專附葉離披匪
彼貴勢惟行道之知國立博士人誦書詩凡彼九流亦
我附枝厥道闕行為天下師傳儒統八 成

炎漢興用孔制春秋學以經世絕異端一統治三雍湯

湯逢掖萬方帝者執經夷裔持裳凡二千年懷我三綱
三統遽嬗三世並張方行據亂猶用小康俎豆莘莘仁
治日張曰夫子之文章受孔治孔成

干城學校歌

臨睨太平洋兮迴望神州兵氣不揚兮感國是憂強敵
磨牙而爭噬兮瓜分日謀我同胞被魚肉兮逐辱可羞
我忍為奴隸馬牛兮夜沈々而神愀

相彼猶太子如喪家之狗無所依噫視彼波蘭印度永
奴之噫我若無國兮被逐何歸噫我不急時奮起子既
落難復飛噫

叢尔曰太子我種我曹地大如吾四川兮人短不高能
捨身家兮衛國土能習武事子學兵韜能勝強俄子萬
國仰其英豪豈有他哉武明是號嗟乎處競爭之世子
有兵則文明無兵則蠻髦

況我萬里之廣土予五百兆之人民五金萬寶之咸備
予萬國無倫我可以選十萬之民兵予為一大軍舞我
黃龍旗予橫絕地球春

我奮我武我警我心誓言學兵執劍森；我買戎衣不
惜兼金我持鐵鎗步伐岑；山立揚休蹈厲不侵

酷日侵我擦於兵場汗透重衣不敢怠違校長有令夜
走大荒曰言遠赴急理戎裝豈不愛我工豈不畏勞傷

我決衛國貧苦皆忘

惟我情伍或中道棄我心傷之力不宏毅彼戀工貫乃
忘國事國既不保家於何寄願言諫止我僚奮厲

既已學兵以國自荷馬革裹尸誓死得所何況勞苦其
何以躲銅像義義他日視我

我先輩之韓信子半歲而平八國班超之滅鄯善子以
三十六人而敢作郭侃郭寶玉父子兮百日掃波斯之

城郭環大地無此將才子惟我華人之獄：我後起之
英傑子當退步其先覺

僅學兵伍我豈自安當入武學將才桓：兵行如水兵
法如山閱歷變化大敵乃單西定東征威震瀛寰勿笑
我為卒請看田單振我中華視我忠肝榮我華民視我
忠肝

侍連州公登城北畫不如樓

先祖諱贊修號述之以舉人官連州訓導贈教授祀昭忠祠吾少孤携於官舍教之聖哲大義高行暇則從游山水此樓為唐劉夢得遺跡俯視郭外山石松泉至佳勝時年十二始學為詩有觀競渡二十韵矣僅存此以記祖訓

萬松亂石著仙居絕好青山畫不如我愛登樓最高處
日看雲氣夜看書

讀書西樵山白雲洞

吾鄉居西樵山北山有白雲洞最幽勝少日頗讀書於此

瀑流千尺射龍蹙巖窅幽浚隱綠茸日踏披雲臺上路

滿山開徧杜鵑紅

高士祠中曾小住 捫蘿日上妙高臺
白雲無盡先生去

洞口雲飛我又來

初祀明何白雲先生倚山壁立百磴
皆曲上通妙高臺吾昔居初中日一

登臺呼
吸雲霞

僊館清空讀道書 黃庭寫罷證真如
放生記較周顛態
池上雲泉看巨魚

三湖院外步長堤：下三湖印月低
西北月同南月影

證從指月夜提攜

延香老屋率幼博第曝書

延香老屋為先曾祖通奉公室衛府君遺宅自

高祖榮祿公炳堂府君及先祖連州公先考知縣公少農府君四世書藏於是先師朱九江先生代購全史社詩皆佳本多遺盡食幼侍先君每夏日檢曝後培諸弟燕勞累日培前梅一樹為設父葬仲康文公手植吾日推奉其下

百年舊宅贖楹書舊史曾傷付蠹魚一樹梅花清影下

焚香曬帙午晴初

餐霞吟

我師長桑子隱山已成道本是餐霞人偶為世網誤世
事已可知道法固宿好去去三千年人民皆非故哀哉
長太息著我看雲履且訪地肺山行入藍竹路朝與中
黃期暮与淩陽遇仙人羽衣裳白鹿供騰馭再拜求道
術誠勤得所事授我朱英丸子我玉函素雲母有五色
合藥世可度金紫丹已成龍虎駕可御仙官青龍車旌

撞迎我去蓋殿何鬱：紫雲騎無數侍女騎鳳皇雙飛
珠玉樹四壁光熠：符書靈若著酌我紫霞杯飲之顏
長駐一杯壽萬歲天地為旦暮仰手弄星辰飛足宿雲
霧身體有光耀噓氣凌虛步未忘生民疾聊向人間住
從者仙鶴姿招雲問何處儻肯從我游五行記當告石
粟熟異香金液注丹露上得形骸解下得神氣固無為
思人間馨香此真齋

碧月

碧月出滄海，隱躍江波間。
清輝翳微雲，流光自澹閑。
星辰爛然明，河漢有薄寒。
感彼高樓人，循階獨盤桓。
俯仰萬古事，喟然悽心肝。
豈獨傷別離，頗惜良會難。
急欲慷慨舞涕出，已沈瀾。
下帷且歸眠，久寐不能安。
伏枕屢輾側，哀感已萬端。
夢見素心人，紫衣而錦襴。
撫琴共笑言，永誓結古懽。
贈我青玉函，憐我縞衣單。
魂夢方歡娛，天

雞夜已闌攬衣起徘徊長夜浩漫：仰首視玉衡俯首
倚闌干

秋登越王臺

秋風立馬越王臺混：蛇龍最可哀十七史從何說起
三千劫幾磨輪迴腐儒心事呼天問大地山河跨海來
臨眺飛雲橫八表豈無倚劍嘆雄才

澹如樓讀書

三年不讀南朝史，瑣豔濃香久懶熏。
偶有遁逃聊學佛，傷於哀樂遂能文。
懺除綺語從居易，悔作雕蟲似子雲。
憂患百經未聞道，空階細雨送斜曛。

初游香港觀歐亞各洲俗 己卯冬月

靈島神皋聚百旂，別峯通電線單微。
半空樓閣凌雲起，大海艨艟破浪飛。
夾道紅塵馳騷裏，沿山綠圃闌芳菲。
傷心信美非吾土，錦帕蠻鞞滿目非。

登粵秀山頂五層樓

登山縹緲又登樓，風起雲飛攬九州。
滄海有時經燼劫，布衣何處不王侯。
袖中納盡乾坤易，眼底芒星漢渾。
雲水此身頻出入，珠江花發又扁舟。

送張十六翰林廷秋先生還京

先生名鼎華，又號
善子，番禺人，神識

絕人學問，杜博少以神童名，十三歲登科，曾直
軍機三十二，乃入翰林，則已類矣。祠館不娶妻
者，惟先生一人。過沒累年，談學
最多，博聞妙解，和詩至深也。

文采周南太史公每因問訊向西風
謬逢倒屣知王粲
敢論忘年友孔融憂道海濱傷獨立
思元天外若為通
秋風每賦感知已記得樵山花又紅

才調如公孰比稱賈生老矣不峻嶒
於今翫世同方朔
最是憐才似彥昇家在故鄉仍是客
身留一髮不如僧
天涯我動龍蛇感秋雨相過共一鐙

草長珠江碧似螺鷓鴣聲裏怕離歌
滄溟日出消黃霧

島嶼風迴長白波多病宜為醫藥計
長途莫厭寄書多
韓康甥舅聞同住為訊新詩近若何

贈張客子先生行兼呈鄧鐵香給諫

一出修門已六春帝城騎馬故閑身
近聞臺諫開言路
又聽公卿起舊臣
草野有占望雷雨
華夷無界動星辰
中興樹業爭宏達
莫使清流作黨人

不及三年安南敗
後諸公同去幾成

語識

泛海至天津入京復還上海

萬里煙波迴紫潮五雲宮闕聳丹霄
津沽形勝曾全覽京國名流頗見招
方朔長安徒索米子胥吳市又吹簫
側身天地素衣薄載酒江湖綠鬢飄

游揚州久經兵燹名園盡毀繁華無覩
愴然賦詩千年形勢詎維揚
蒼翠坡陀作蜀岡舊日名園皆瓦礫
只今環郭賸垂楊孤臣雪嶺梅花墓
賢守平山芍藥堂

廿四橋頭又明月不堪回首更平章

由揚州出鎮江瓜洲渡江大風雨望金山寺捨已

夕小舟甚危思親綦切

羣山杳：隔岸暝孤塔蒼：峙水流應想北堂念游子
滿天風雨渡瓜洲

登金山妙高臺寺僧出東坡玉帶相示摩挲久之
秋老長江起暮波夕陽光射塔嵯峨摩挲玉帶千年事

獨倚高臺問大羅

登鎮江北固樓

山圍城郭南徐鎮石撼潮湍北固樓天入長江生遠浪
風吹落木下清秋山川第一供憑吊國土三千放遠遊
無限霸才成底事怒濤滾滾向東流

游金陵明故宫及孝陵秦淮舊板橋

夕陽老柳板橋樓頽盡明宮落瓦秋虎踞龍蟠猶有夢

摩抄翁仲立螭頭

止觀自證

媽紅姹紫滿山春採藥尋香欲贈人
曲徑危橋都應徧出來依舊一吟身

蘇村卧病寫懷

蘇村又名銀塘
吾五百年世居

少年心事本擎雲南望樵山日又曛
賣畚何慚王景略畫簷故是范希文
擬經制禮吾何敢蠟屐持籌事未分

稷契許身空笑尔，稻粱不及鷺鷥羣。

蛙蛤羣鳴草澤中，莓苔綠上釣磯東。
登樓俛仰古人往，展卷徘徊夜夢空。
遲日供多病黯，虛名負此翁。
偶過小園問芳訊，落花飛盡賸殘紅。

縱橫宙合一微塵，偶到人間閱廿春。
世界開新達進化，賢師受道愧傳薪。
名山渺莽千秋業，大地蒼茫七尺身。
南望九江北京國，拊心辜負總酸辛。

夜：登樓望大星，紫微帝座故焚；山河兩戒誰能考，
廟社千秋尚有靈。道喪官私惟帖括，政蕪兵食盡虛名。
虞淵墜日憂難挽，漆室幽人泣六經。

除夕荅從兄沛然秀才時將入京上書

爆竹聲中歲已闌，忽來書札夜漫漫；新詩付與子由定，
資斧能憐范叔寒。鼎：百年言笑速悠；萬里別離難。
明朝檐馬林烏鬧，擬典衣裘盡一歡。

二十年來同筆硯讀書常共一燈光
機雲對住三間屋
軾轍頻聯半夜床
應笑馬生多大志
最慚韓子逐名場
澹如樓上披籤軸
京洛何堪憶故鄉

落拓燕臺橐筆行
飄零書劍路千程
海疆萬里兵戈戍
春色一年鶯燕聲
才士例應住京洛
幽人何解事公卿
素衣深恐緇塵浣
豈敢投繻入帝京

龍編戰士戈難息
鳳社樓船海正波
敢道投竿追郵鄆

正愁輓粟少蕭何東方索米終難飽同甫陳書不厭多
只是青楓江水湛春心極目怕聞歌

感事

時馬江敗諸關
上書請變注

上帝清明閭闔開紛紛抗議上雲臺
嘆名豈料皆敗浩受祿誰能似介推
玉斧畫圖分水地金滕作冊隱風雷
治安一策知難上只是江湖心未灰

聞鄧鐵香鴻臚安南畫界撤還卻寄

山河尺寸堪傷痛
鱗介冠裳孰少多
杜牧罪言猶未得
賈生痛哭竟如何
更無十萬橫磨劍
疇唱三千勅勒歌
便欲板輿常奉母
似聞滄海有驚波

為鄉人陳煥鳴書扇

曾作東和萬里游
天風吹月照琉球
使星闇：滄溟闊
鳳靡鸞吼有幾秋
二十班生已振奇
象胥文字解侏離
五千老學能藏晦

卅六國事可通知，壯志故應懷馬革。
妙年何遽隱鷓皮，英雄湖海多沈蕩。
寄語休栖惡木枝。

梁星海編脩免官寄贈

去歲春明聽曉鶯，歸來遽賦可憐生。
抗章都忘牛衣泣，斥去真回馬仗鳴。
莫使微之移晚節，不妨韓偓擅詞名。
布衣老大傷懷抱，憂國無端有歎聲。

山居日挂地圖看，久卧清漳等懶殘。
閉戶尚憂天下事。

舊游常作夢中懽飛泉白石雲淙隱鐵馬戈船溟海寒
花發越臺重把酒不須悲瘵詎時艱

聞張廷秋編脩典試閩中遂病居煙澣樓自蘇村

寄懷

蕭散金華客風流第一人微言申夜旦接衆喪精神已
薄人間世相憐病後身今朝烟澣上誰與送殘春

寄梁大編脩

今代梁觀國風稜似左楊
謫官猶愛國教授不還鄉
負戴吾何恨飛騰子莫量
分飛丹穴鳳且莫夢含香

星海自京還詔京華舊游而
崔夔典編脩淪謝矣

夔典聞吾將復入京埽室以
待追念厚意悵舊

感懷

一別三年京國秋冬殘相見
慰離憂伏陳北闕有封事
醉卧西風賸酒樓芍藥翻紅
春欲老杜鵑啼碧澗之幽

繁花零落故人往惆悵當時舊輩流

送春

盡日傷春：已歸殘花誰與惜芳菲
黃鸝接葉嘯難歇
紫蝶尋香故自飛
感舊京華成夢：送人流水更依：
王孫未用歌招隱
芳草山園願不違

答黃秀才

黃童名譽早騰飛
慷慨陳書事是非
衛玠風神窺玉潤

裴遐名理自珠霏紅樓聽雨春同醉碧海看潮暮共歸
柳絮吹綿張緒去他年煙澁記依稀

絕憐裙屐多幽怨若有真靈證妙華秋玉風流能好事
漢鏞才筆合看花荷衣蕙帶吾常佩白水青松尔莫嗟
自笑子雲甘寂寞多君載酒侶侯芭

梁小山中書愛姬隕落述其美德清節悼之至痛
以此塞其哀

重璧臺前萬玉鳴，連宵風雨撒芳馨。
人間第一柰何事，况復多情孫子荆。

女師德象擅情，婉孌如聞絡秀琴。
無賴華年傷錦瑟，月明怕省玉谿吟。

才子從來愛遠游，強持久病待歸舟。
傷心半月纔相見，絮落花飛空一樓。

檢書問字叩香囊，舊事玲瓏總斷腸。
早是左家嬌女去，

何堪失母更神傷

死別生離入恨天
桃花落去總茫然
斷魂幽夢長相憶
悟徹華曇是九泉

元臣溫嶠好錢癖
名士王戎鑽李心
天女散花超脫甚
口無阿堵玷德音

戲簡某納姬

昨夜西風一棹歸
聞歌桃葉是邪非
石崇家婢饒新麗

不用真珠費百琲

擊臂曾聞付絳紗
重盟歡折碧莢花
從今紅燭脩新史
便有添香萼綠華

葛氏綺琴曾識字
王珉團扇總相宜
喜聞姪婦津無雨
三蒂江蘭並一枝

樊肥蠻瘦各相宜
桃李昌羊舞柘枝
盡日樓臺垂柳靜
東風添補冶春詞

乙酉除夕病卧蘇村

匆：時序去如煙卧病江村更惘然避債並無癩可賣
祭詩幸有稿成編老妻解誦送窮作壽母分將壓歲錢
正欲團樂尋劇飲不堪枵觸送華年

紅白梅花次第新明朝元日恰逢春桃符燈火明終夜
竹爆兒童鬧比鄰壯志常懷千古恨流光易老百年身
無多笑語催殘漏坐聽林鳥噪嚮晨

謝陳逸山農部見贈

嶺外文章破大荒萬山趨海關雷陽一時豪傑陳同甫
九牧知名盛孝章老去雄心歸畫稿閑來逸事付詩囊
田疇竟向無終老長作耕夫卧醉鄉

我詩不及逸山詩海內傳聞潘老辭嘉道波瀾都不染
黃陳宗派許相師將軍玉塞秋屯帳少婦璇閨曉掠眉
雄渾新鮮歸老筆風流只合屈梁知

萬竿脩竹一茅堂
熟計生涯隱逸長
約共南山卜鄰宅
願同北郭老耕桑
江山搖落空憂國
湖海飄零獨臥床
樗散畫師聊自遣
英雄養晦是何鄉

題荷花畫幀

世界偶然留色相
生涯畢竟託清波
明璫翠羽人曾識
碧漢紅塘夢侶過
殘月照來裳佩冷
曉風墜後粉痕多
城南詩客頻相問
怡悵朱顏易老何

題從父竹孫廣文公畫蘭

九畹京蕪楚客悲
况教蕭艾滿當時
屈原已往羅含去
懷哀芳馨欲與誰

衆香雜進近何如
辟芷辛夷與揭車
綠葉紫莖空委露
秋山花放媚三閭

題吾友梁鐵君俠者畫竹

生挺凌雲節
飄搖仍自持
朔風常凜冽
秋氣不離披
披亂

葉猶能動柔枝不受吹只煩文與可寫照特淋漓

假寓花隸值氏福蔭園兩月亭池靜麗已而遭從

兄子勛喪哀感徘徊而去

好春忽：已三月幽鳥時：聞一聲花隸樓臺成夢幻
白雲丘壠換公卿此身已拚束高閣發願從今依化城
華月不來靈雨暮淒涼誰與問三生

題黃季度畫贈著色折枝荷花

絕代容華絕代姿
風鬟霧鬢見翻疑
可憐照水好顏色
披瀝江波賸折枝

舟出銀河至樵山
竟日遇雨時
三妹塔游湘琴新
喪三妹瓊瑤旋逝觸目感愴

斜風兼冷雨吹我出銀河
世界看泡影華年歎逝波
離憂樵樹遠客夢楚雲多
前路無空闊天涯更若何
漠漠樵雲暗滅
江雨微行人問水驛舟子扶蓑衣生

死誰堪託行藏事盡非因風吹浪海回首息塵機

感舊酸辛頭風凌逼入西門求醫

自此下皆首疾游道之作

陀城千古跡蕩；此西門屢堞凌雲迴街衢帶雨昏軒
車自古過名姓幾人尊軋；籃輿入低頭不欲言

七夕淫雨竟夕不寐

冷雨飄鴛瓦連宵滴到明人天多恨事風露况秋聲河
漢清難越江湖老此生迢；看碧落惆悵是多情

粵城七夕有乞巧筵窮渴奢麗借李度往觀士女
喧闐盈衢溢巷

華堂深夜巧筵開鳳瑟銀燈待幾回既是天孫經歲別
一宵那得破閒來

少日工夫織錦裳虛名浪得繡鴛鴦老來頭白眼花暗
愧謝靈芸費繡腸

璇闈扇影鬪粧新士女衣香動比鄰老鈍先生無可乞

也隨人踏六街塵

虛憶黃姑是洛神
星河黯淡看難真
迢迢碧海青天夜
多少人間未了因

河漢清微夜
寂寥星轉微
度月生潮九華鏡
下分明見珠珮
雲裳記昨宵

八月十四夜香港觀燈

空濛海月上金繩
又看秋宵香港燈
曼衍魚龍陳百戲

參差樓閣倚高層，怕聞清曲何堪客。
便繞羣峯也似僧，懽來獨惜非吾土。
看劍高歌醉得曾。

八月十五夜月

最是團圓夜，偏當寂寞時。
題殘青鳳紙，淒絕紫笙詩。
玉宇寒高處，明璫夢阿誰。
馬纓門外樹，怡悵月關遲。

飛紅

青鳥能無信，黃鸝自蹋春。
銀櫳溫繡被，珠館屑香塵。
低

黛頻羞鏡飛紅欲墜人回頭見華月華月更鮮新

裙帶路 香港舊名

鑿石為馳道宮堯直上天大斫山頂馳飛綫海中傳蓄
水潭分管區邱樹若田登峯數樓閣參錯十洲僊

香港席上口占送余鼎三庶常之潮州

趙德祠邊堪覓句昌黎廟下可尋碑歸來檢點詩囊好
應有青蓬扇底詞

夜跨輪船

浩：天風吹大瀛，平生意氣愛縱橫。
老枝無那曾同照，海艦翻愁動遠征。
了絕色空難作，達銷磨豪氣是多情。
如絲春夢知何續，贏得淒涼對月明。

過虎門

粵海重關二虎尊，萬龍轟鬪事何存。
至今遺壘餘殘石，白浪如山過虎門。

月夜過黃埔

萬里天風吹月行飛舲浩杳破長鯨海山重複環黃埔
故壘連山燈火明

重九夜登高上太平山

重陽登高晝不秋夜作太平山頂遊籃輿迴出闌闌稠
樓閣上與五雲浮千門萬戶若懸旒銀鐙揜露依松楸
山石聲確松一邱馳道岑堯曲百周斜若緣橦曲若鉤

拗折迴出林之幽中天鶴鶴林下猴哀鳴應會和成謳
輿夫嗷氣汗欲流先生豪氣冲斗牛叱馭疾上無少休
登跨絕頂風颺：月華清澈纖雲收星斗爛：明雙眸
海氣蒼茫見十洲欲問飛仙不可求處：銀燈明重廬
別島竒峯難盡搜蓬瀛羽客時淹留恍如神山海中球
我登絕頂生百憂問天無語聲啾：閨風何所騁驂駟
便欲乘風據上游被髮大荒何可由歸路茫：碧海頭

題畫扇二首

桃花似識鄭圓：春暖文鴛得靜便借問扇中雙女士
校量顏色孰為妍

夜：焚香拜女牛紅氍闞盼冷清秋兒家自有羅敷在
涼月蕭：燕子樓

冶秋詞十四首

銀鐙錯落走驂駟夾道珠簾盡上鈞最是太平山下路

玉笙吹徹小紅樓

華鬢寶曆自嬌嗔
翩尔凌波誤洛神
靈風神雨無心事
不分桃花忽惱人

聞風吹下許飛瓊
珠作根芽玉作英
為問護花青鳥使
種將紅藥為誰生

夢回檀枕玉搔頭
鮫帳垂：紫鳳鈎
繡被堆雲香玉膩
海棠春睡冠香麝

圍繞雛鬟珠箔垂
曲師高坐教新詞
雲華半擘櫻唇啓
正是新鶯初轉時

碧玉嬌嗔細
聲愁紅恨紫
付瑤英卻憐華月
殷勤甚
陪伴銀缸照到明

華簪委髮翠盤鸞
玉面珠光筆畫難
猶記鏡華開滿月
水晶窓下捲簾看

半惱佯羞帶笑癡
春雲如夢正迷離
桃花開盡無言處

消受芳馨語阿誰

餘香深夜在熏籠三尺華雲委墜紅檀枕半欹新睡覺
明河欲曙隔屏風

綽約荃枝露蘸秋芙蓉乍斂卻含羞照來照畫三分肖
不數盧家有莫愁

綠鬢香羅著綉鞋玉容傅粉手親描背人對鏡私偷語
昨卜金錢事可諧

綠楊低拂隔紅塘
紫燕呢喃傍杏梁
他日相思山下路
銀鐙挑盡記平章

銀雲淫滯月華圓
花氣氤氳膩醉眠
無那西風催別急
不堪回首在歸船

亦識人間終別離
最難排遣是當時
多情卻是無情好
怊悵三生杜牧之

香雲曲

香雲滯淫已十日柔春如絲不可說朔風忽尔作厲烈
吹入高樓歸意決籃輿咿噯三夫疾回首相望更淒絕
海雲浩邈浪如雪飛輪騰烟轉倉卒山頂煙暝吐華月
今夕月圓無少缺美人容華隔天末樓臺燈火半明滅
漸為海波所吞沒愁如迴颿心如結櫻桃花開應早折
不然落向芳菲節安得夸娥假大力海濤澆胸心猶熱
竟夜攬衾眠不得縱觀山海茫無色巡船倚闌待天白

珠江艇子題畫

天邊清露瀉芙蓉玉液瓊漿取次逢
偶尔輪迴到人世
不知神女最高峯

已了人天信色空不應怙悵對花叢
芳馨一片憑誰寄
腸斷孤蓬明月中

贈何比部

鳳靡鸞叱客偏於異域逢
誦詩銀鑿落把劍玉芙蓉
濠

鏡沈寒月香江聞曉鐘
綠華有心事條脫贈從容

月夜游太平山

白沙馳道絕山腰
山斷紅闌接石橋
最是萬松燈下過
月明山海望深宵

沿山闢路夾青松
樓閣溪橋曲
逢夜月明橋上立
飛泉浩：劈中峯

月明山路冷生冰
馳道孤遊記得曾
碧水碧山烟霧裏

玲瓏樓閣萬枝鐙

靈霧神風跨鶴游蒼茫海嶠認蓬洲欲挾飛仙過東海
瑤臺雖好不淹留

香港觀賽球會開歐戲遂游濠鏡觀馬戲為見歐
俗百戲之始

香江陸海感蒼茫濠鏡山川對夕陽若問先生果何見
詭竒馬戲及蠻裝

袁方亮貞外兄

華岳峯尖秋草高，天生劍氣不能韜。
讀書螢死秋風冷，陋巷招魂太怨騷。

登輪舟

海氣拍天白浪浮，秋風策策生高樓。
行人解纜少顏色，客子華鬢生離憂。
美人容華渺天末，芙蓉淒露香玉愁。
飛輪浩：破雲去相思，咽斷銀燈篋。

思元詞

高柳紅樓日夜垂含烟和露幾多枝深宵被酒新迴面
盡日垂簾細畫眉滴得蠟珠拚作淚穿來藕綫未成絲
官奴寫帖誰分付誤卻青蓮是歎之
畫屏掩處隔紅綃神雨靈風夢未迨斜指牽牛盟錦臂
雙騎紫鳳協瓊簫油車有待迎蘇小金屋猶難貼阿嬌
若得雲英移玉杵不須銅雀鎖雙喬

櫻桃開半已春深，杜牧傷春試再尋。
舊日玉梅遲結子，中宵綺帶縮同心。
靈芸香唾成紅玉，瑤母真丹碎紫金。
紅燭他年照脩史，無題記疊蟪蛄吟。

閨風縹馬幾何年，忽聽霓裳第一絃。
秋夢那無飛作雨，夜吟一任化為煙。
綺寮熏被香難滅，珠館飄鐙影尚圓。
從此芳心抱寒玉，便能銷歇總淒然。

秋病頭風連日買舟與梁小山游花埭半塘諸園

晚至河南萬松園主人殷勤乞留題

日：看花上畫船秋來多病遺清眠竹絲陶寫多哀樂
池館流連感歲年近水松篁籠晚日隔溪亭榭蘼寒煙
重來感舊知何日消受香風萬柄蓮

伍氏萬松園觀鬥蟋蟀

風流猶是半間堂碧瑣朱闌鬪蟀場千古雌雄竟誰是
紅棉笑殺賈平章

何易一神識至仁有冒僞識吾者與貸易一即捨
青氊並贈金馬以書相告嘲之

白傳有大裘其長千萬丈欲衣被寒士使之懷挾續吾
妾竊名字顧非能儻蕩雖志杜陵履卻之元震藏嗟尔
落難士胡為採虛望謀稱識文舉引誼相愚誑吾友何
易一大仁情盡：愛及丈人烏青氊慨捨讓加餽斗酒
資飛書告助相以此黔婁貧供彼博徒浪三族猶號寒

坐視不為諒較量厚薄間雖厚未得當君乃墨者學寬
親同一樣未行捨身志先作駭骨况徧告天下士飢寒
吾惆悵下及鷹虎類我亦割肉養君雖孰能仁君身肉
幾兩伸紙相視笑遇仁得無慙鄰翁辱見過告我近公
案兄子乞斗糜閉門閉帷帳坐茲興大訟三世戈相向

題七檜園唱和集

七檜荒僵幾百年倚臺臨水飽風煙讀書檜下收殘葉

煮茗談詩月上天

羯末封胡羣季秀池塘草色綠春晝吟過二萬卷書樓
竹徑摻：笋將透

春蘭秋菊不同時桂子天香折幾枝摘艷採芳愛題處
紅荷花後白梅枝

玉簫

玉簫諧笑與誰春零落韋郎歎素塵天涯誰解知文字

大捨憐才竟有人

重遇王明府於海上
追感金陵同游
遇承招待贈
之

十年久別江湖夢
萬里重為汗漫游
閨徧春花紅
過眼頗驚秋鬢白
盈頭月明三五傷
違夜劍倚東南看
幾州更問新詩添
幾許肯來寄我卧
滄洲

自題三十影像

像法流傳海外圖偶來山澤現癯儒禮堂寫像應相覓
麟閣圖形竟可無犀頂龜文何骨相雷光泡影認眉須
他年把玩應非我散帶斜簪認故吾

吾粵先人有敬廬
雲衢書屋久為墟
銀塘祠宅曾亭後

花墟田園只歎歎
瑞典南湖懷避島
須磨東海記幽居

昔經子之來以多憂
室處之却掃以
申江賃產笑愚公

榮宮之克編戶同
自起山河域內
亦迴日月入房中

華嚴樓因行觀
化拓殖方疆
雄俛視霸王看
石

蟻古憑戶牖納天
龍
面都脊野起樓臺

草抄風煙極坐迴
開徑嚴灘後白石
種花鄧尉芳紅梅

頽金邱壑日煥性
創造園林也試才
草去度亦生意綠

日携婦子步蒼苔
小園四十丈深深
溪壑萦迴繞翠

林可後可塵
臨
大 道 中 間 曲 為
夷 幽 岑 菊 松 三

徑日沙趣杖履
支橋日醉吟日
有天游入如忘
默

存獨樂始于以

辛酉冬月後三日
化人



汗漫舫詩集

康南海先生詩集卷之二

後學東莞崔斯哲手寫

吾五游京邑七次上書皆旅於宣武門外米
市衚衕南海會館：別院回廊有老樹巨石
小室如舟吾名之為汗漫舫愛其幽勝與野
人之質為宜頻歲居之讀碑洗石著藝舟雙
楫在此簿錄京師舊作皆壯歲七八年中者

都之為汗漫舫集其出入京師便道所游作
者亦珣烏上書發憤放浪銷憂以託進退無
常或躍在淵之時焉歲久每佚今緝得如干首

戊子秋夜坐晉陽寺驚聞祈年殿災今五百年
矣始議明年歸政

古佛無靈僮僕無聲先生獨坐長夜五更轉大地于
寸竅噫萬籟於碎瑛滄海飛波黑山橫帝坐炯：接

長庚鼻孔噴火滅日星羲娥纏走為之停因感百怪
踏萬竊天龍血戰鬼神驚神鼠蹶倒雙玉瓶金輪忽
放大光明萬千世界蓮花生先生開眼但見秋蟲唧
唧佛殿燈焰青

贈盛伯熙祭酒

高帝神靈日月懸宗臣憂國對諸天桂冠神武方強
歲縣肘醫方遺莫年子政流傳封事稿靈均欲賦遠

遊篇桃花明照鬱華閣金石應傳集古編

戊子吾以諸生詣闕上萬言書首請變法諸公格
不達盛公特為祭酒黃仲弢編修與友善為介焉
先生慨然代遞遂遇引爰頻館其家所居鬱華閣
藏金石萬千先生年方四十一不得於恭醇二王
遂辭官欲出遊而以宗室例不能出京三十里晚
適以醫藥自遣不談國事庚子京破以憂卒先生

系出太祖宗室之英滿洲之士通博忠義無與比
惜乎有劉子政而不竟其用也

翰林院編脩記名御史張延秋先生哀詞五首
平子才名久如何中道推玉棺文字累繡斧壯心哀
賈誼傷無命公明恨子才旅魂滯不反淒絕向金臺
仙骨長源秀風流北海高胸中羅雅故眼底悉人豪
憂國腸弥結遺身氣太騷淒然遺總帳蕪沒掩蓬蒿

嵇康亦託嬾何點更無妻耽酒中年遣燒書物論齊
人天緣黯：江海志栖：慧業應消盡三生無再啼
平生論交舊知我莫如君好譽常寬假清言每側聞
十年尊酒詆九日矮檐文歲莫空相憶哀思動斷雲
從此西門路羊曇不復過淒涼簫寺帳哽咽白楊歌
聞遂悲難已披帷覩若何羈愁兼感舊清淚豈辭多

題黃仲弢編修龍女行雲圖

風鬟霧鬢現天人下界騎龍轉法輪不嫁娉婷真可
惜空將雲雨泣乾坤

日射金鱗片：開仙人初出蕊宮來吸將四大海水
盡洗滌天河無寸埃

為仲弢題吳彩鸞騎虎圖

天風林外振鳴珂一嘯千峯落葉多伏虎將軍是神
女從容晞髮向陽阿

秦臺仙在吹簫暖唐韻詩成下筆難紅尾鳳皇白額
虎一般駕作駑駘看

再游宣武門棗花寺題青松紅杏園我國朝二
百年名士殆題徧矣示沈乙盦刑部索和
過來名士多如鯽開落楸花去似煙此是慈恩題記
事重來繫馬一茫然

識諫垣多楚北人屠梅君侍御仁守洪右臣給

諫良品 皆吾至交 遇從甚密 侍御以忠 鯁抗
疏去官 欲給諫 救之贈以詩

楚北諫垣多直節 龍岡一老久不除 海內競傳星變
疏人間留得古文書 等身著作晨鈔紙 好士風流夜
走車近惜梅君三黜去 欲將懷抱問三閭

過蘆溝橋望西山

連山疊翠啟皇州 萬里雲嵐動素秋 地落平原開德

棟天分中外作并幽
渾河浩蕩連沙轉
香界深巖接漢浮
蕭撼西風催落日
羸驢馭我過蘆溝

潭柘梵宮精麗而山水平迤無足觀者賦此騰

嘲

人言西山潭柘美
言游潭柘當清高
棗林稀蕭初日
黃山石磴確曲徑
長路旁柿熟葉帶
霜羣峰攢天飛
雲翔萬松翠擁培
塿岡半紅微露琳
宮墻石橋中引

通長廊毘盧樓閣妙巖莊殿前銀杏叅天蒼千載金
元闕滄桑妙樂公主趺蹟雙佞佛故事先林房括柏
森繞少師室病虎形容猶想望我游名山經海外岫
壑瓌詭不可量茲山澗洞皆平迤石不峭秀泉不芳
老柘美竹死削盡惟有藍剎爭輝煌胡為都人交口
譽勞我車馬尋山荒寺僧延午憩一夢清琅玕山靈
朱衣揖我言君之持論未通方金門名士不識字偷

竊著述名譽光草元子雲老寂寞姓字聞留不出鄉
茶山雖無洞壑美丹泉翠嶂煥奎章延清有閣駐玉
輦至今常宿親藩王時恭邸頻
日來游貴人履齒踵趾接從
無詬謗祇稱揚惟君移文騰嘲笑陳義雖高毋乃狂
敷社再拜謝山靈豈儂愚固增恐皇但欲手移窮荒
好岩谷鏗鑿雲根來帝旁長嘯奮靈震山寺蕭々翠
竹生清涼

夜宿沙河

幾年塵土長安道
往昔青衫化緇素
長安道號軟紅
塵冠蓋輻集衛霍門
勢官飛車豪俠馬
青絲紫鞵雙
關下先生塵土滿
征衣借問適從何
處歸
曉起看山
西陵去百里
大隄煙柳路北風
忽作捲沙飛
眯人雙
目不知處
沙河荒城帶落日
懸車束馬入土室
華雲
淨洗流素月
千里駝鈴動
蕭瑟羣卧土
銜無人語
獨

立長橋倚天北只愁明朝霜冷山石滑
馬足蹇縮人面栗

入沙河城

北路畿疆壯西山夕照黃荒城帶秋水壞殿掩殘楊
飛控兒能健無譁俗自良柳塘看浴鴨誤記到江鄉
沙河驅車出視長城回睇平原蒼翠極目俛仰

增喟

朝宿黃花鎮暮望紫荊關太行何巖薛勢若蒼龍蟠
隔絕漢與胡天作長城垠坡陀落昌平萬柳翠如屯
長原極寒廓乃識天地寬聖武廣覆冒卵翼育兩藩
漁陽擊鼓絕民居禾黍繁仰首懷有熊俛首念金元
愴慨視大宙立馬興長歎

明陵哀

天壽百七里峰嶂聳樓閣豁序開堂戶森聳出邱壑

固壘儼拜伏信是帝王宅英雄隻眼巨豈假王廖擇
鬱：十三陵神輿盤松柏幽城何崔嵬佳氣葱鬱：
當其營隧時魚膏熒鐙碧玉棺藏九殿南山為石槨
宮監日進膳翠輦來獻酌茶哉政事失興廢易三恪
聖朝隆仁厚禁樵飾丹墀功德屹豐碑亭：侵窳廓
寢殿儼天扃宮垣壯如昨昔者宋諸陵僧伽溺骨虐
金魚喪玉匣冬青淒霜薄迺知今代仁恩厚不能約

我來覽天關華表雙嶽：翁仲陳夾道列像如踴躍
武將劍甲猛文吏冠袍博獅虎象馬羊或伏或立搏
巨大數丈餘皆用一石鑿廿里道相望大工何磊落
萬國陵墓壯無如長陵卓歐人多瞻望我華色不削

過昌平城望居庸關

城堞逶迤萬柳紅西山岑嶺霽明虹雲垂大野鷹盤
勢地展平原駿走風永夜馳鈴傳塞上極天樹影透

關東時平堡堠生青草欲出軍都弔鬼雄

由明陵出居庸

鋪弦老死不聞聲身是漁陽戍卒營胡婦琵琶傳大
漠并兒勅勒倚長城帝陵千嶂秋盤馬玉塞平沙曉
閱兵百里盤崖紅柳路騎馳到驛月微明

登萬里長城

秦時樓堞漢家營匹馬高秋撫舊城鞭石千峯上雲

漢連天萬里壓幽并東窮碧海羣山立西帶黃河落日明且勿卻胡論功績英雄造事令人驚

漢時關塞重盧龍立馬長城第一峯日暮長河盤大漠天晴外部數畫封清時堡堠傳烽靜出塞山川作勢雄百萬控弦嗟往事一鞭冷月踏居庸

由居庸關登長城還

澗道飛陰雪羣山亂夕陽關城生白草亭堠雜垂楊

立馬千峯紫盤鷹大漠黃時平關路治百里月蒼涼
行居甯關五十里兩崖聳翠壘嶂飛青老柳巨
石雜還澗中時方深秋岩花崖樹盤曲弥望
蒼翠無盡至月出乃策騎還襍書所見得二
律二絕句

千曲盤飛嶂連天對壁崖翠巖松倒挂錦石柳低搭
關驛緣雲上人家截嶺排并兒歌馬上澗水共潛：

百盤坡埭曲蒼翠入無窮
柳驛依雲表松關踏月中
峻崖紆白日疊嶂逼蒼穹
迴望巖高闕泉澌萬柳紅
關城盤亘萬峰迥紅樹蒼
崖錦石坡騎驢斜日屋庸
路寫作先生出塞歌

縱觀大漠跨明馳馬上琵琶帶怨多
曾游絕塞歸來者曾有深山與大河

秋尋碧雲寺失道夜宿田家

暮色落疲驢荒郊暝綠蕪看山迷大野失道問樵夫

土銼煙俱寂荆扉夜獨呼人生原逆旅鐙語慰窮途

斯哲謹案第一句舊本作日落動秋色任公抄本作暮色落疲驢今從任公抄本

碧雲寺有石塔高矗霄漢三成四阿乃印度式

刻鏤佛經像皆工絕明魏忠賢物也九秋登

塔高吟

高揖躡碧霄青雲僥下浮西山來千里蒼翠橫晚收

燕齊碎厯塊海岱盪遠眸側手攀星辰北極正當頭
垣腹容德棟一点著皇州門以玉泉峯帶以渾河流
是時萬里霽薊門正清秋抗首念神堯萬國獻琛球
校獵出長楊鳳蓋時來游至今舊行殿水石鬱松楸
咄彼明熹宗童昏失遠猷東廠假其材遂貽社稷憂
鞭石聳茲塔百丈成三休金輪轉烈風高跨飛鳳樓
闌干綴瑤玉佛像窮雕鏤連華青獅座羅漢五百周

經鐫天竺文花鏤斧藻旒精文與臚理神工不可求
國步既阡危民膏已窮搜侈此紺宇觀豈顧宗廟謀
壯士覽山河長風動人愁

碧雲寺

朱祀金鋪殿七重丹廡窈窕壓中峯天龍神鬼圖千
相寶珞華幢隱萬松泉繞離宮開澗壑天來經閣散
梵鐘伽藍作記傷珠塔感慨山川幾戰龍

出碧雲寺望靜宜園

羽獵長楊重上都冠山抗殿網周陸排雲但見金銀
闕著色翻疑青綠圖輦道村官朱植鬢圓城校尉玉
都盧上林望幸誰能賦竒字楊雄是腐儒

靈光寺

雪塔明初日皚皚壓翠微築池因澗壑開館入郊畿
巖岫丹為壁雲嵐翠上衣買山未成隱悵望倚郊扉

秘魔巖

余本栖霞者盧師學大丹秘魔巖下路翠袖拂雲看
山荔枝樓結海棠秋館殘遺碑披蘚讀天寶字斑漫

卧佛寺人跡罕至古樹數十皆千年前物也後

為行殿有松山僧謂乾隆廿六年有鳳栖焉

西山百餘寺卧佛號樹巖秋風吹飛髻落日在塔尖
古柏夾道立千年鬱蒼隙殿前娑羅壺離披盈畝陰

殿後羅松栝翠霞挺百尋壽命閱金元葆此西山岑
澗水縈其前盤陀偃屢歛九夏來清坐霜雪疑相侵
紺閣何輝煌先帝費千金是時萬方晏羽蓋紆登臨
祇今瞻帳殿輦路曲以深長廊夾廣堂方池隔精藍
冠巖抗高閣縈道竦長林木末翼方亭石笏環圓戶
長松如羽葆翠枝蟠麓琴寺僧與我言乾隆致鳳吟
豈伊十全功帝制不再斟我儀虞舜韶賀世鳴德音

白雁作新聲清奏古至今循階撫玉砥感望彤庭簪

西山游恭王別墅見其寫像題詩

恭王帝子天人姿長眉隆準骨相竒建寧才氣恩寵
絕寶刀早賜侍龍墀咸豐季年龍蛇厄西鄰背盟犯
郊畿天子秋為熱河狩公卿攀髯士庶隨都邑空虛
都人走塵餘夷吾作監守是時江淮盜弄兵諸侯勤
王棄小醜地軸轉移震慘黯或疑遷都依遼右廣平

仗劍出議和坐鎮大都定山河扶立成王負黼扆掃
 滌黃巾肅瓊戈祇今梁園雪花落願從佛土謝軍國
 別墅時留旌蓋游題墨乃存哀草作惜哉晚節太守
 蓋京園落暉誰所構龍種英多更幾人摩挲寶劍撫
 遺塵平分功罪在千春王題詩有可憐若草成哀草
 政十年怨思至矣然晚節再出寔以守蓋誤國瑜瑕
 難掩也梁任公曰此詩成於戊子之秋其時恭忠親
 王正投閑天下想望風采篇末數語殆後此補作也
 初宣宗鍾愛王屢欲付以大業蓋王之器量雖遜文

宗而早年寔以雄武顯也故有建寧才氣恩寵之語
 光緒初年失政後寧格不可自聊哀草落暉之感當在
 彼時及甲午喪師王以物望所歸復起補政然閩世既
 深頗兢：保持祿位無復當年俊偉之氣矣丁酉戊戌
 之交德宗銳意維新頗為王所尼常熟翁相國言此每
 太息蓋王之再出常勢与有力及晚節以變法之議与
 常毅大不相能也戊戌三月王薨四月而定國是之詔
 始下

遊湯山溫泉瞻行宮靜寄山莊

湯山峻巖業累代營行宮樓閣鬱崔嵬
 槐間長松渚曲凋荷花掩映蘆葦聚新蒲
 與老柳深秋雜黃紅

行殿引長廊敗瓦積苔茸石池注溫泉沸氣可激衝
玉輦昔行幸妃主如雲從春寒賜沐浴肌膚寫恩醲
聖主勤政事翠華閑游龍紅垣長日閑淒涼迴天風
惜不徧人間禁火煩天工人事有遺代悵望古今同
素月大如甕光盪曠野中回首望五雲視柏鬱青蔥
夜宿湯山行宮旁野店無可食新月方吐引酒
對之陶然大樂

朝作居庸游暮作湯山宿就食酒家胡石磴蔭茆屋
高柳低拂簷豆棚花已熟素月度河漢娟娟花若浴
野店無長物白麵與酸菽引盃對月酌頽然醉幽獨
興酣忘旅羈高歌動鄰曲土人走相驚羣出視以目
引踵就溫泉卜坐且濯足人生多苦憂此樂未易續
北首望行殿禁木鬱森肅仰睇躡華雲俛視愧懷祿
得意在適然豈貴絲與竹

偕陳鎮南編脩羅擇林兵部梁橙里上舍過法
源寺與寺僧清霖講經聽橙里鼓琴生清淨
樂賦詩寫與僧

百劫精藍在深秋杖履尋碑幢敬翠楹殿閣翳蒼林
龍象驚談法香花碾入琴一合龍余夙願長聽海潮音
戊子除夕設酒醞張迺秋侍御于京城西偏長
椿寺而哭之

卻憶西樵捧杖時，滿山紅徧杜鵑枝。
城南渥酒春聽雨，江上敲樓夜闕詩。
論議時窮天外事，聰明妙解腹中疑。
傷心萬里來相見，總帳朱棺豈尔知。

除夕與鎮南對酌

世味由来薄似霜，何堪燕市送年光。
經過人事成流水，無限江山付夕陽。
四海舊交半墟墓，百年此夜幾壺觴。
六街喧爆看鐙去，又作京華夢一場。

飲酒城南

飲酒城南劍氣疎
鷺飛柳老竟如何
芙蓉城主饒供
養日看羣蒼夜聽歌

貼地氍毹萬玉聲
迴環哀艷日斜明
舞衣乍解依人
坐垂柳枝：總有情

浪打桃花怨暮春
畫船簫管已成塵
神旗縹緲傷心
處不分重逢洛浦人

香夢如絲欲化烟
堯花樓閣不成眠
芳心已作沾泥絮
猶觸前塵一惘然

贈張季直孝廉
謫兼呈沈乙盦刑部

天池日蛙黽仁者意云何
龍鳳難潛逸耕漁且隱歌
側身思俊及落日睨山河
且上金臺望排雲問大羅

贈陳鎮南編修兄

太邱古長者溫德如潤玉
叔度自遠量曼容善知足

優游喜淡泊澄撓莫清濁昔游禮山堂大師妙陶泚

梁任公曰朱九江先生講學處曰禮山草堂編修蓋與先生同受學於九江也曾共執經業

飲我醕酒穆郭泰見顏子烏得不起肅狂生志儻蕩
久為世所傑席帽走長安仍預文場逐三十無所成
乾坤莽翻覆許身不自量竊比稷契屬顧懷憂國念
上書忍自鬻虎豹守九關無自達鞶鼓落拓莫市中
窮愁寄歌哭頗欲尋屠狗更自訪擊筑祢衡幾見殺

梁鴻行自獨歎君薦交舊情親不徇俗底寒依晨夕
裹飯共饋粥雖感故人惠弥增賤子惡人情日惡薄
相待視位祿津路據勢要趨謁看眉日落魄行路隅
誰肯加齒錄交游何足道甚且施骨月君得徐邈中
寒熱不增縮孤生性廓落飛遯甘隱伏久視世味薄
枯若寒山木未敢忘冥報失言以相祝

贈龍岡先生

諫議清聲占上游，真靈慧業又全收。
百卷遺書定不朽，七十老翁何所求。
勿為童鳥摧壯氣，若為霜隼擊高秋。
似聞外有諍臣論，王室卑微涕泗流。

送張季直下第還山

天時日榛塞無事，戀微波浮海材。
應取藏山事孰多，收身合屠釣。
回首張山河與尔，將偕隱煙波。
行醉歌屠梅君侍御謝官歸索詩為別敬賦六章

大道久凋敝，羣蠢啄其真。華瑣相摩抑，氣節淪不存。
慷慨思所由，在逸程朱藩。屠公古豪傑，粹德冠人倫。
中和得天倪，殷之溫且醕。學術宗紫陽，近與張陸親。
豈僅曰言行，至誠為之根。百鳥爭嘍噪，一鳳歸獨尊。
雲霧布杳冥，雷聲動地垠。吁嗟道不喪，任之有斯人。

其二

四方際無事，宸居涉豫游。三山修舊苑，長廊開危樓。

聖母經艱虞晚節怡林丘下臣豈不諒顧懷抱新憂
削牘數千言痛切涕泗流下言夷禍鑒上為國本謀
哀號述先帝碧血灑松楸閭闔為動容土木輟不修
至誠動天地孰謂直不收臺諫久寂寞一鷄擊高秋
巧官雖見容寒蟬良足羞

其三

虹霓蔽白日太微亂天經北斗綰樞衡金鏡蕩其名

王母宴瑤池惻愴白玉京天龍多修羅猙獰窺太清
僂官三萬籍斂手空屏營香案有下吏學道受血誠
綠章夜上奏欲罄三垣星華蓋接句陳耿々露光精
徐々見貶謫仍許遊赤城雖插塵寰脚氣象震百靈
多謝紫皇恩猶作釣天聽

其四

君國骨肉際盈廷莫開口奏劄瘡剗切忠誠肝肺剖

曠讀先正集國朝未之有惜哉未見行太平遂芻狗
叔季何多求聖明顧已厚

其五

南海有黃鵠毛羽初未成若懷四海志撫翮入杳冥
河閣有鸞鷟歸昌吐英聲延頸思羣匹比翼得歡情
冲天振羽翰長唳萬人驚九霄鸞鵠翼黃鵠欲從征
巢枝雖難同願言相和鳴

其六

儒者立人朝從古未見久開門坐請德此道尚或有
况時寡師儒人才日廢朽雜學與夷學視儒若芻狗
公為紫陽嗣正宜繼絕紐趙復入關中康坐隱江右
遂開元明學一代闕治否聞公往潼關又或謁曲阜
華陰節義重麾下聖澤厚士氣皆馴良大義易導牖
煌煌遺書在但須在堅守或者得數子斯道已有後

學案曾商定此是儒林藪議論有異同願以示下走
公其愛玉體耕道若農耦會命千里駕就聽師子吼
移居汗漫舫

數月京華卧幽棲似故山鳥聲常在樹石勢獨當關
洗竹為奴課看花帶客還日斜烹苦薺天許幾時閑
上書不達謠議高張沈乙盦黃仲弢皆勸勿談
國事乃卻掃汗漫舫以金石碑版自娛著廣

藝舟雙楫成浩然有歸志

上書驚闕下閉戶
隱城南洗石為僮課
攤碑與客譚
著書銷日月憂國自江潭
日步回廊曲應從
面壁參

論書絕句十五首

隸楷誰能溯
濫泉句容片石獨
竄然若從變
處搜靈廟
應識崑崙在震遷
句容有吳萬府君碑額為正書第一古石渾厚質穆亦自絕塵
真隸楷之鼻祖
靈廟碑在隸與楷交變之間
意狀奇古若從欲變之始
言之則楊震張遷二碑寔開隸楷

之意
矣

受禪應為衛覬書邯鄲章誕比何如瓘恒世受真傳

法一脈踰河走傳車

受禪碑顏真卿以為鍾繇劉禹錫徐浩以為梁鵠今從其同時

人間人年準衛敬侯

碑文定為衛覬書覬與邯鄲

並以古文名子瓘瓘恒

世傳筆法恒傳崔悅至宏浩

為北書之宗又傳江瓊

至式故北書率衛派也

元常法乳知誰在珍重豐碑有枳陽文質踰跚關石

闕始知晉法有傳方

晉枳陽府君碑豐厚茂密在文質之間今傳元常諸帖字體猶

有其意真元常嫡嗣也太祖文皇帝神道稍
加姿美然亦魏晉正傳善學者當能會之

鐵石縱橫體勢奇相斯筆法孰傳之漢經以後音塵

絕惟有龍顏第一碑宋鑿龍顏碑渾厚生動兼茂密

李斯篆畫若鐵石體
若飛動可以形容之

餐霞神采絕人煙古今誰可稱書仙石門崖下摩遺

碣跨鶴驂鸞欲上天石門銘體態飛逸不食人
間烟火書中之仙品也

琅邪茂密集書成郝閣衰斜章法精能戒熹平變踈

遍僅傳古法彥雲銘

秦斯瑯瑯石刻茂密極矣漢隸

意熹平以後隸法大變今楷出焉

惟鞠彥雲墓志獨有郝閣之法

衰斜分法知誰繼瘦硬應推弔比干風蕩齊碑成一

律修羅雄峻獨為難

弔比干文瘦硬無正出于衰斜齊碑百餘種皆以瘦硬取勝然

無雄峻秀韻之味惟隹修羅碑獨峻拔耳

銛利森：耀戟鉞始興碑法變鍾傳率更後出書名

擅誰識先師貝義淵

率更書有武庫劍戟森：之氣竇泉以為出於北齊劉珉想以

其峻峭處近之其寔信本南人南碑中貝義湖所書始與王碑與率更皇甫君碑無二乃知率更所從出

然南碑無不員渾者此則先變鍾法矣

骨適血瑩態豐穠懷令青二秀一峯變化方員盡奇

麗光芒鱗甲若游龍

懷令秀超墓志骨血奇峻結撰精麗變化無端兼備方圓與張

猛龍皆為結體無上上品也

子建遺碑獨擅場衛家體質貴雄强大刀斫陳稱無

敵沉著偏兼痛快長

昔人稱中郎骨勢洞達後世惟曹子建碑有之雖體雜篆隸致

謂百衲衣然沉著痛快中有渾穆氣象

是般若正傳也其開爽則啟唐人矣

異態新姿雜筆端行間妙理合為難誰人解作蘭亭

意君起浮圖仔細看

唐馬君起浮圖記字裡行間姿態百出詭製妙理變化一新而

不失六朝法度猛龍之後未多見鍾司徒意外巧妙絕倫多奇於此有焉

魯公端合辨香薰茂密雄強合眾芬章法已傳郝閣

頌更開草隸裴將軍

魯公書舉世稱之罕知其佳處其章法筆法全從郝閣出若裴

將軍詩健舉沉退以隸筆作之真可謂之草隸矣

南宮書評妙難量跳擲偏兼對越莊靈慶池邊遺石

在神鋒峻立獨迴翔

韋縱書靈慶池碑體格不出唐人是歐虞新體然龍跳虎卧兼

莊若對越俊若跳擲之長且筆畫完好深可寶也

山谷行書與篆通蘭亭神理蕩飛紅層臺緩步脩二

遠高謝風塵屬此翁

宋人書以山谷為最變化無端深得蘭亭三昧至其神韻絕俗

出於鶴銘而加新理則以篆筆為之吾目之曰行篆以配顏楊焉

歐體盛行無魏法隋人變古有唐風千年皖楚分張

鄧下筆蒼茫吐白虹
自隋碑始變踈朗率更專講結
出獨鑄篆隸治六朝
而作書近人張廣卿起而繼之
用力尤深兼陶古今
渾灝深古直接晉魏之傳不復
允為書法中與矣
璠唐人何有宋明

苦蚊行

吾生多園居雅性愛水木
謁來居宣南高參饒槐竹
林薄既森翳叢蔓並爭育
蚊虻浩輻湊薨：滿耳目
大者如蒼蠅虎飛食人肉
嗟此翹椅桐臺閣交陰曠

祇許白鳳皇飛鳴括其足么麼尔何物乃亦此巢宿
誓當聚火焚掃除命僮僕穢草皆捐滌絕汝憑藉屬
大扇搖清風卧簟書可讀

出都留別諸公

吾以諸生上意請受法開
國未有聲疑文集乃行

滄海驚波百恠橫唐衢痛哭萬人驚高峯突出諸山
妒上帝無言百鬼獍豈有漢廷思賈誼拚教江夏殺
彌衡陸沉預為中原歎他日應思魯二生

天龍作騎萬霜逆獨立飛來縹緲峯懷抱芳馨蘭一
握縱橫宙合霧千重眼中戰國成爭鹿海內人才孰
卧龍撫劍長號歸去也千山風雨嘯青鋒

表海神旗啟大都西山王氣未榛蕪百年感愴伊川
髮萬里蒼茫屬國圖原廟幽靈呵彷彿釣天廣樂聽
模糊無端又作觚稜夢醒視扁舟落五湖

兩載京華久滯留無終從此老田疇安排行集成千

參料理芒屨出九州天下英雄翰問舍地中山海徧
登樓只愁莽：乾坤大無處滄浪著釣舟

一曲蒼茫奏水仙霧飛鬼嘯一千年木公虛擁扶桑
日金母高居紫燄天雲雨不興龍似睡波濤暗涌鯨
流涎祇今東海霧鼉吼哀怨如聞廿五絃

去國吟

平生浪有回天志今日真成去國吟回首五雲宮闕

迥柴車側：愴余心

此去東山與西山白石齒：松柏頑或勸蹈海未忍
去且歌惜誓留人間

東山白雲日夜飛西樵山下拓桑肥百畝耕花：埭
宅先生歸去未應非

古今碑刻三千紙行裝細大如牛腰澹如樓中七檜
下攤碑淪茗且聽潮

出都夜餞有二伶撥琵琶促柱哀音遂有白傅
青衫之感明朝行

銀燭傲：夜五更鳳城秋夢未分明不堪酒渴微雲
後一曲琵琶帶別聲

上海徐園留題

蕭風撼雨墨模糊強病重游秋氣蘇去國情懷存寶
劍尋花心事落當壚過橋鴛鴨頻相惱登閣棠梨暫

借扶碧海消，通是處墜紅消息豈真無

西湖謁岳武穆祠墓

後殿有岳王夫婦像諸子配焉祠後有秦檜跪像

西湖秋水綠沄，散入樓霞日又曛。北狩哀，念車
駕南枝鬱，慘風雲空階鏡像生青蘚。舊史金陀寫
碧文一樹冬青淒絕後枉將冤獄結紛：

西湖雜詠

蘇隄萬柳鎖蘼蕪。穿荻漁舟或有無。湖光山色涵幽

綠誰解尋幽領裏湖

翠蓋紅裳蕩碧漪平湖亭榭到蘇祠他年再訂西湖
約記取荷花大放時

僵屋萬木少人經絕愛東岡放鶴亭積雨磴陰填落
葉夕陽柳下繫游舫

百畝荷花占十洲裏湖深處結紅樓琉璃世界饒消
受更傍蘇堤擢小舟

風篁嶺龍井寺

秋風來問風篁嶺二老遺踪不可尋
野竹半生池館廢只餘龍井一泓深

佛堂新築半寮初病廢殘僧亦獨居
茗罷劫餘空歎息辨才當日果何如

韜光寺

深：萬竹一峯圓磴道盤青欲上天空翠
濕衣山雨

合身行雲霧作飛仙

天竺寺

萬山深碧裏天竺數重迴
落木秋峯見分香山市開
淒涼寶掌寺零落客兒臺
只有鐘聲咽三生又再來

謁于忠肅公祠

華夷漸無界社稷賴斯人
慘獄同鵬舉公才遇太真
秋山落桑柘湖水潔蘩蘋
冒雨求祠墓莊嚴拜大神

西湖經亂後前賢祠館多廢中興諸將祠宇如
雲左蔣二公故應俎豆吾家中丞公平浙之
功不少不得配享其間劉典冒功儼然崇祠
矣

溯水當年平寇盜中興諸將占湖山吾家不少兜鍪
力但覺劉公頗厚顏

歸過蘇隄登橋望西湖綠波邈然明日行矣低

佃久之

蘇隄柳色雨模糊十里明漪浸綠蕪
怡悵明朝蕩舟去晚烟橋上望西湖

自杭入蘇

淒淒菰蒲秋水生扁舟載酒數郵程
不堪去國懷鄉客夜孤篷聽雨聲

過石城

苦雲百里路肥桑與大柳菰蒲夾一川大舸鳴柁走
時：見飛橋卧波矗左右城廛何盤：苔莓封之厚
沿溪繞曲：帆檣在前後云此是石城小邑萬家有
淫霖已兩月禾稻芽已朽縣市米驟騰民飢何以救
斯誠有司憂羈客寤獨否夜雨打孤舟愁絕不得酒
一燈照寒江擁被傷懷久

夜泊石城忽思今日已十月朔矣感懷無已

冷雨終宵打草蓬石城小泊夜聞鐘南來北去成何
事屈指今朝已孟冬

湯游蘇州名園多廢只餘宋蘇子美滄浪亭元
倪雲林獅子林其虎丘霧巖莫不零落惟明
拙政園尚無恙耳不勝閱劫之感

滄浪亭外荷花夢師子林中石洞深誰記名園紅劫
後徘徊拙政感余心

真孃墓側桃花落短簿祠中香火繁一舸闌紅出閭
闔淒涼秋草虎丘山

游廬山宿海會寺贈老僧至善蓋廬山經亂九
十九寺盡燬至善苦行結茅於此遂成大藪
林今年八十矣

開士誅茆五老峯手植匡山萬壑松蕩雲盡吸明湖
水招月來聽海會鐘初地雨花馴白鹿陰崖石氣隱

蒼龍讀書頭白歸來晚桂樹幽：千萬重

廬山謠

紫漢吹落青芙蓉隨風飄墮江之東
瓣開四面花玲瓏化作碧玉千百峯
倒影翻湖黛色濃突兀萬丈絢
青紅層巒重阜築為宮五老拄杖碧雲中
子孫諸峯咸侍從爾來一萬四千歲
白頭昂首嘯鴻濛我來倏喪亂
九十九寺皆在劫中瀑泉又已枯
秀色減昌

丰惟有重崖與疊嶂蒼翠合匝轉無窮陶謝妙述作
幽人不可逢長卧龍潭石醉欲騎蒼龍青鸞未能馭
白鹿已無蹤夜投東林訪遠公殿宇侈剝瓦礫封誠
懸北海殘碑在古佛露坐似慙居尊無寸功長蘿蓋
山林蒙茸天黑虎嘯蕩驚風萬籟笙竽瀉青松墻鈴
夜語不聞鐘宵深月出山徑白虎溪之水鳴潺淙似
聞山鬼說法談空：

廬山望湖

廬山四面壁山開十里陂田溪水回若使開湖多種
柳西冷何獨擅樓臺

謁白鹿洞紫陽書院二首

凌曉發海會朝暎屈白鹿曾厓紆磴道重阜翳古木
對嶂夾青松澗水瀉深綠岫合露飛橋壁開出重屋
丹閣冠崇岡赭壁壓中麓紫陽啟精廬弦歌遺芳躅

緣溪擬青萸登堂撫翠竹菁莪有遺賦斂纓可循讀
宋室喟南渡儒風轉敷暢江右爭朱陸晦菴寔太上
煌煌遺規在吾道有蘄嚮芳沫邈千祀英聲播九壤
我來謁松柏掬泉薦菊釀循墻視黌舍問俗觀禮讓
佚々衿纓子兔園挾花樣文學止舉業殿堂羅寶盞
章句猶未知况辨義利尚荒哉晦翁統無後誰能諒
安得大雅才發矇一昭曠小生獨對亭臨風浩怡悵

再題

澗曲松風長峰回洞門闕山揜七八重泉繞堂階地
山水幽以深橫舍清而麗書院閱千年創自李唐季
歐人矜古校最古無我遶紫陽光大之象山來倚袂
請學流美談一言辨義利漢宋有晦翁集成學為至
理氣窮太極治行高揭屬心性揮精微訓詁新義例
餘事：詩文旁及參同契滂博無不該精麤無所滯

居敬以窮理中正豈有弊大學與中庸純粹有次第
孟子配論語洙泗心傳繼五經失微言四書發大義
八百年學風無出新安制寔為新教主後聖範一世
大鑿易佛法路得改耶系三子大力人鰲負搖地勢
大道雖未聞太平法尚蔽此乃劉歆罪難為考亭喟
仇：走胄子俎豆捧堂陞惜僅習八股學業陋以廢
殿庭羅寶盞鹽醬陳瑣細吁嗟此名校一旦至此穢

學問皆掃盡良由求富貴中華號文明媿觀汗流袂
有司豈無罪振興誰為替應開大學校心物羅根蒂
西江後英起道術猶有繫

棲賢寺

李生讀書處松柏滿山麓澗道石齒小噴泉冷可掬
栖賢營梵宇金輪青漢直及茲經喪亂敗垣倚灌木
天主闢教宗來此叢林毒佛法雖有劫豈不動根觸

羅漢披古圖境靜氣良穆五老時回頭多情似眷屬
何日買山還枕流期對宿

宿歸宗寺

匡廬四大刹各擅幽勝處棲賢與秀峯石泉窮竅與
澗流作深碧交樹不可渡亂山漸合沓蒼翠紆無路
嶺開見歸宗昭曠豁雲霧高標跨金輪寶塔疑神造
倒影入南海長風灑印度精宇漸增修梵唄搖天暮

一節苾芻厨山藪亦可茹我佛發金篦人天作導護
達哉貫休僧共參玉版悟我最愛趙州竒特發妙趣
此心如頑石入地若可住願懷清淨理宗風亦不誤
曉發問蓮社遠公應我顧

通遠驛

迢遞羣山曲崖開又有村人稀山市冷地僻驛官尊
高柳低溪碧顏碑道路存夕陽亂峯外合沓轉平原

東林驛

夜投東林宿古寺已廢圯居人十數家願言借栖止
云此有驛館可以憩行李往來輜車使駐節皆在此
聞言起肅栗獵纓轉歡喜仰首瞻椽桷飛瓦迺頽矣
屋矮限尋丈垣破補荆杞入門左右顧竈突雜筐筥
土壁置繩床積草厚為底蛛絲網四壁虵蟲上長几
地窪榻忽傾案欹杯乍毀深夜撲蝠蝶列隊出鼯鼠

巡廊且入室糞土卧雞豕前觸碓磨頭後礙耒犂尾
呼僮翦燭炮執帚躬除理敷席吐：呼擁衾吁：起
簪者豐盛世驛舍皆經紀庖酒亦精潔池館且羅綺
閑閑杳崇深什器有雕靡物力既豐碩官司能修治
今此當孔道館室大殊矣匪敢告司存聊用備游紀

九江贈曹朗川太守文

江州古雄郡湖山控襟帶大舸咸走集長江扼形勢

丈人未剖符清風灑蘭蕙六綱持安靜獄市自無弊
境俗崇朴讓士學知雅製滋彼桃李繁茂此桑麻隨
中朝惜才賢良用歎淹滯顧覽江山勝廬阜枕嶮端
煙水饌空濛雲霞藹鬱蔽南樓徇高興溢浦縱遙睇
漆園庶止足山陽久傷逝雖歎華顛雪勿濕青衫涕
卧作東陽治會存桐鄉祭

過彭澤

彭澤之縣臨江隈環山三面作壁壘窪深如白浮如
盃城堞緣山薄雲表蜿蜒如蛇曲折繞疊嶂崩崖轟
水峭扼茲天壑為地沼吁今時平靜堡烽沙洲十里
垂柳紅小邑不及萬家室樸讓猶有陶令風緬想元
亮種秫地遺愛及今走兒童此去柴桑塵百里解帶
束裝易為理想見晉宋時選吏擇近地方今移官千
里外就道玆月如編置言語不通俗尚殊客入主家

難為治過此懷古浩長歎不如歸去躬耕誠有味

十一月三日曉霧冥濛輪舟將至大通不行

漫：天大霧江雨散空明煙樹都同色波濤但有聲
雲開辨洲渚天黯失江城波路愁空闊飛舫不敢行

登黃鶴樓

浪流滾：大江東鶴去樓燒礮已空巫峽雨雲捲朝
暮漢陽煙樹帶青紅萬家樓閣隨波遠百戰山川扼

勢雄極目暮天帆
應亂中原萬里對西風

京師晉陽寺下車傷足陳簡持庶常黃湜生孝

廉為吾裏藥賦謝

康子下車傷其足
夜投蕭寺求一宿
扶墻跛躄行不得
頽臥匡床如枯木
樂心逃憂病有色
漢高捫趾錯云腹
提婆達多與我有
宿業瞿曇高座難
免酷黃生跋報為
裏藥簡持磨丸如
削玉詰曉步履可
歸來嗟我故人

情誼篤天下，璧者有萬千。安得君等勤，起枯偏我有。
藥丸服之，可以為神仙。願謝公等，至長年。

秋心五首

峯巒無數著樓臺，老木荒僵春氣回。夜讀道書晨叩齒，
秋心忽見萬紅開。

神女流雲不可招，舊時月色落寒潮。無端誤入華鬢會，
一樹紅萼倚碧簫。

開落紅棉一夢中
酒醒昨夜又東風
十年白上蕭郎鬢
不分桃花新舊紅

中天縹緲化人臺
百萬蓮花瓔珞開
我是吞針老羅什
夢中一醉碧霞杯

吹劍可曾聞一呖
散花誰更辨雌雄
神仙上界頻相問
手鞞青鸞夜御風

示任甫

神鬼天龍日夜圍時：說法萬花飛金輪千轉相不動
紫府燈光寶鼓微

華嚴國土時：見大地光明無語言只是衆生同一氣
要將悲憫塞乾坤

示孺博

鯤鵬變化且隨風出入千重雲水中行到光音應少駐
鏗鏘天樂海雲紅

萬花飛舞妙音天
大醉騎龍過日邊
未解吞鍼盡一鉢
遂應面壁度千年

示任父孺博及曾重伯翰林

三千劫裏橫金翅
二六時中看白牛
終日散花忘結習
諸天聞樂少淹留
脫將纓絡親貧子
故入泥犁救重囚
丈室百千師子座
金身偶現不須收

為某僧書扇

浩風無量劫所應知幾舍三十有二相現示隨變化偶
披垢膩衣來稅人間駕說盡千萬偈漆鐙明暗夜

題張樵野尚書三洲游記

波濤大瀛海拔劍問狂瀾鱗介歸王會冠裳覩漢官乘
槎游浩蕩運甓濟艱難州國圖能畫感旻取次看

登第釋褐謁辟雍釋奠文廟摩抄石鼓門外進士
題名碑千百乙未新題名碑已立

黃瓦崔嵬古柏森，
辟籬鐘鼓聽愔愔。
宮牆瞻望樞衣拜，
圖寫陳經演孔心。

石碑數百泐題名，
進士應今元与明。
若問中華大掌故，
此為闕劫千佛經。

石鼓摩挲有十存，
深簷覆蓋蓋置楹。
門中華古物銷磨盡，
寶護應同日月尊。

東事戰敗聯十八省舉人三千人，
上書次日美使

田貝索稿為人傳鈔刻徧天下題曰公車上書
記是時主和者為軍機大臣孫毓汶眾怒甚孫
畏不朝遂辭位

海東龍泣艦沈波上相輜軒出議和遼臺撫：割山河
抗章伏關公車多連名三千數相摩聯軫五里塞卷遇
臺人號泣秦檜歌九城謠謀徧網羅杠棺摩拳擊鼓三
搥檜避不朝辭位畏訶美使田貝驚士氣則那索稿傳

鈔天下墨爭磨嗚呼椎秦不成奈若何

為徐計甫編脩寫扇兼呈高理臣給諫變曾王佑

遐侍御鵬運

計甫名受廉清潔好學
惜早死不竟其才志

萬生本天地一家同越秦秦刀傷小指痛楚徹全身繞
線通微雷萬里語相親大地為一體萬物同一輪大雪
壓城闔重裘凍不溫氣脈本相連鴻溝苦難分四海雖
汗漫先由方寸春民生多憂患志士多苦辛登高望燕

樹飲水識河源
高樓隔楊柳
流鶯聞比鄰
願為明月光
照徧窮蒼人

順德二直歌

美兵部主事何添翔禮部主事羅鳳華聯名抗疏劾軍機大臣孫毓汶主

和議也

諫草之堂何巍
三百年来過者
頭皆低順德之
館何鬱
中有樹山人不
識分宜不過佞
臣耳不斬國事
無損益豈如賣
國賊不斬割地
無終極朱雲已
矣孔融死

誰歟請劍申憤抑吐哉兵部何羨翔華嶽峯尖金晶光
巖雷爛：夜騰霜抗跡斬奸劍吐銜同志禮曹羅鳳華
義填胸臆照虹霞白雕蒼鷹比翼出追逐無禮憤氣加
首請遷都定國是次請拒日絕使槎末請斬佞論鞿鞜
存亡繫此誰開牙事雖不成壯人氣蹴踏雷電飛風沙
昔何維柏効嚴嵩萬衆拈香羣歎嗟今者生見胡邦衡
對面不識或掄擲作詩告凡百君子不式順德之南館

焚香林山遺宅何為耶

梁任公曰此事主之者實為何君：字翹高又字某士志行芳

二十年来朝士罕見其以自孫無注當國度黷貨之風驟長國事敗壞實由於此甲午難作朝野咸集矣合肥而毓注方炙手可熱莫之敢指君此語寔與論：導致先生美之

割臺行成後與陳次亮郎中熾沈乙盦刑部曾植

丁林衡編脩立鈞王幼霞侍御鵬運袁慰庭觀

察世凱沈子封編脩曾桐文道希學士廷式張

葵之編修孝謙徐菊人編修世昌張君立刑部

權楊赫嶠中書銳同開強學會於京師以為政
黨嚆矢士夫雲從御史褚成博與大學士徐桐
惡而議劾有夜走告勸解散者是時袁徐先出
天津練兵同志夜餞觀劇適演十二金牌召還
岳武穆事舉座咸歎李玉坡大理至泣下即
席賦此呈諸公未幾余亦告歸留門人梁啟超
任之

山河已割國搶攘憂國諸公欲自強復社東林開大會
甘陵北部預飛章鴻飛冥冥天將黑龍戰沈沈血又黃
一曲歎歎揮涕別金牌名岳最堪傷南遷與張孝達替
部黃澍南侍郎及
其子仲張編修梁星海太常黃以度觀察再開張學會
海內士夫若屠梅君侍御陳伯潛國學顧漁溪通政先
生咸應馬卒被御史楊崇
伊所劾而封禁坊記於此

游西湖館錢塘縣吳李清明府德瀨署李清神識清
妙深悟大證哲子鐵樵中道奄逝行時索詩賦此

五濁世界中我曾八千返與君善世會握手知幾轉億劫舊相識神交亦良遠熏香浸肌骨誓發大悲願黔首同肺腑忍視啼哀怨人王与帝釋馬牛与雞犬化人萬千身無宅亦無戀總以悲閨心了救度本

君從眩摩天來領蓮花界偶現宰官身蒼生知所賴本以聞思根現此同一剎簿領豈拘檢神往靈鷲會或游香積中或往阿閼外或空渴悲華或見得大勢忽上中

天臺不離人間世子孫亦蒼生來去安無滯况魂無不
之又已證大慧与我轉金輪更駕聯雲袂垢衣不須脫
漆室亦不開蒼：抱明月金燈永夜繼

己丑上書不達出都

落魄空為梁父吟英雄窮暮感黃金長安乞食誰人識
只許朱公知季心

海水夜敲黑風獵杜鵑啼血秋山裂虎豹爭守九關

帝閣沉：叫不得

斯哲謹案右二首任公寫本漏載今據新聞叢報
所刊補入

長天渺里嘯秋風
京國芙蓉始落
木也，傲二蘆
中人去也
芙蓉花開
到夕陽紅

白菰居士于戊戌八月尾題菰蘆圖廿餘年舊好
以稱芙蓉真開到夕陽紅矣車云云日康有為

轉床喘

嶼杭丹

霄浪燭

昔辛年

抱早躬

妙載重

夫仁

精凝萃

差了控

柏菊二

西寬介

游暇和

因修

仁者敬草

早亂地裁

燈寫五

坤定上弟

兼九為

萬木草堂詩集

康南海先生詩集卷之三

後學東莞崔斯哲手寫

吾授徒於粵城所居曰萬木草堂自憂國上書
首請變法事既奇創不達而歸絕意時事以講
學著書自娛及所著新學偽經考被劾先遭焚
書避地而游於羅浮桂林又再講學於桂門人
每進焉自庚寅至丁酉八年間隱居粵中及游

桂之作都為萬木草堂詩集所作既少散佚尤
甚此集與都中之作同在壯年一歲中每相出
入但以地別以記行藏志事之殊焉凡得八十
三首

自都歸鄉黃季度別駕以詩慰問奉次原韻

上書痛哭歎中原豈意窮山卻掃門已淨萬緣隨念盡
更無一法與人言講堂漫有青紗帳春信偏知黃葉村

時事近來都絕口，只將風月共君論。

先祖連州府君卜居象岡號象台鄉前對靈洲山

峙江流中喬木深翳山有寶陀寺東坡嘗題詩

焉吾歲省墓必到此時方重修而老僧死矣感

賦

歲：金山寺扁舟一度來，老僧圓塔出初地。寶幢開花
雨，聞天樂。江湖帶晚雷，人天無限意。獨立妙高臺。

故太子少保工部尚書前軍機大臣潘文勤公挽
詞三首

弱國思才相中朝失俊人道消明月墜運極大星淪世
業承平韋公才邁庾穀張華號博物未得展經綸

侘僚無聊意高官等布衣士皆傷不遇公豈忍言歸供
奉文空老經帷見亦稀祇餘萬龔鼎金石散光輝

憶昨秋風起叢書送我行豈聞知貢舉下逮一諸生好

士如文舉憐才愧長卿孤寒齊下淚豈獨故人情
先是京兆試畢吾以八月十七日出京時公為監
監先於八月十六日以所刻功順堂藪書贈行公
事至殷而能不忘一士誠可感也

門人陳千秋曹泰梁啟超韓文舉徐勤梁朝杰
陳和澤林奎王覺任夢孟華初未草堂問學
示諸子

聖統已為劉秀篡政家並受李斯殃大同道隱禮徑在
未濟占成易說亡良史莫如兩司馬傳經只有一公羊
羣龍无首誰知吉自有乾元大統長

示門人陳千秋隨生曹恭著偉潘蒸鑑鏡涵三子
者皆學道勇猛證澈生死者兼示韓雲臺

相輪示現應萬億世界往來經八千偶入銀雲光大地
更騎金翅過諸天陶輪一擲何嘗動葉睫三飛自栩然

七日裝成千萬劫水流花放不知年

送門人梁啟超任甫入京

道入天人際江門風月存小心結豪俊內熱救黎元憂
國吾其已乘雲世易尊賈生正年少誅蕩上天門
登臺惟見日握髮似非人高立金輪頂飛行銀漢濱午
時伏龍虎永夜視星辰碧海如聞淺乘槎欲問津
悲憫心難已蒼生疾苦多天人應上策卻曲怕聞歌水

雪胎終古雲雷起大河
繫辭終未濟吾道竟如何

門人陳千秋禮吉德慧才博窮理知命卓然任道

寫付之並書團扇寄梁任甫曹著偉徐君勉

人與天通有父有宗孔子主仁注心大同養我神明救
我氓蒙推極識界諸天無窮區：大地豈有西東先愛
同類無忘族邦

禮吉二十六歲短命死矣德業為門人冠著偉才

學文思奇奧二十四歲死追思為慟

龍姿鳳逸竟誰同傳道吾云易已東從古奇才多短命
叢蘭早敗慘秋風

右陳千秋禮告

深思好學似揚雄奧字奇文誰與通若為創教思明勝
訪道羅浮歎落紅

右曹泰著偉

梁任公曰禮者儀皆南海人萬木草堂之龍象也
先生請學數年門人口進授業若不編述而兩君寔
為都請答問析疑悉當師說草堂後進受其裁成者
過半禮吉又字通父晚更自號隨生幼治戴段二王
之學年十一著廣經傳釋詞律三書高郵陸氏還類
語熟應朝掌故善為駢散體文以及詩詞靡所不工
與余共居粵秀山中兩年余治考據典章之學皆君
為大導師及南海先生以上意蒙誘此人欲殺君首
造得相與往溪澗難如心齊之於陽明焉既天感服
乃北面執弟子禮且請先生設講堂萬木草堂之創
立寔自君也是時君聲譽藉甚者宿見者無傾倒既
及先生之門則盡棄其舊政治者而從事於宋明義
理之學且曰慷慨言當世務俛輩共說笑之而君
德業益進先生著大同書其條理悉與君商推其它

門弟子莫能與也嘗小試其經世之學於一鄉以居
西樵鄉二十餘萬人賭盜極熾君以諸生攝鄉局事
一年修志禁絕之又年初學校及歲盡樛用新法以
辦保甲即今之警察也初受事誘怨山積未期年而
頌聲作而君亦以此積勞逝至今鄉人思其德猶祠
其主于局云君之初任鄉事也余屬以牛刀割雞止
之勸其留身以效於國君謂事無大小法無揀擇昔
人所謂堯舜事業不過太空中半點浮雲如曰鄉事
小也則國事寔何曰非小吾惟隨現以行吾心所安
而已曰自號曰隨生余二十年来幾盡至海內名士
求其學向文章道德才氣能如君者蓋未之見也著
偉少而喜騁奇眇之思為瑰璋傲詭之文每以著述
奇奧至不可句讀而所陳義亦固不驚流俗蓋惠施
公孫龍之流也既受業于萬木草堂則皈依佛法苦

行深造既乃欲研究密宗圖羅淨有異僧往訪：遇
痛而卒西君之才皆不可一世而性各有所近陳：君
尊寔踐而曹君富理想故至雖極薦而議論往往：不
相容又各皆辯才無礙每休暇輒相與論學于梅：堂
主客往復累百十次同：學百數十輩圍繞靜聽莫：能
贊一詞陳每發一義聽者以：為曹必莫能難及曹：之
答則又以為陳必莫能難也而：兩君之富卒未或窮
故同：學中受益于兩君者不可數量皆起則亦兩：君
最：夙而獲補仁之賜最多者也曰：略述其行誼以寫余：哀

勉學者

大地飛來偶現身中原靈氣日華新天心民命講堂在

擔拯瘡痍救我人

屬刻同門功課簿繫詩四首

萬木森：散萬花垂珠連璧照紅霞好將遺寶同珍護
勿任摧殘委瓦沙

秋實春華各自賢幾年傷逝化風烟偶登羣玉山頭望
百萬珠璣總可憐

萬木森：萬玉鳴隻鱗片羽萬人驚更將散布人間世

化身萬億發光明

斷壁零珠照絳霞
妙香散落委塵沙
東風好與勤呵護
頃刻顛開千萬花

梁任公曰四詩編定本失載據舊抄本補入其第一首與第四首語意多複當有一為未定稿姑兩存之又曰草堂同學讀書日有劄記名曰功課簿率經先生批點者也先生於丁酉秋冬間命同學

輯印之作此四詩同人旋將積年所記彙集存置
草堂之書藏中未及編定而戍戍之難作書藏所
儲悉付一炬塵沙散落竟成語讖他尚不足惜而
陳曹二君遺著遂無一字傳於後世斯最痛心也

游羅浮

羅浮雲氣接蓬萊紫霞照耀方丈壘青綠畫圖似海島
疑自十洲僊山來女媧補天多罅漏銀河瀉落九天開

句漏丹砂猶可得野人黃精自掘回琅玕白鳳自飛舞
獨騎神虎相追陪石梁模糊可徑度天外三峯鸞鶴哀
夜聞天樂紫溪上仙人招手瑤石臺乘風飛雲頂上立
吸吐日月謝塵埃

登羅浮飛雲峯頂

萬峯走神僕絕頂立飛仙俯視但雲氣山丘盡茫然迷
濛難見日呼吸欲通天白帝如能問蓬萊駕紫烟

由白鶴觀往蘇寮道中作

千盤澗道水淙淙
風雨行看四百峯
各占一邱開寺觀
經過卅里盡杉松
綠茸夾坂路三折
藍翠四圍山萬重
啞虎不來胡蝶舞
萑蒲何處紫雲封

羅浮雜詠

雲氣頻來往溪流無盡窮
澗花雜黃白山果結青紅
惟樹危峯底孤筇萬壑中
金丹可成就欲問葛仙翁

茶山寺

野人采藥千年去，摘取鋤芝萬壑重。
南岫松深龍掩蔽，古僊符驗虎無蹤。
瀑泉映日成飛練，雲氣穿林遇別峯。
採得菖蒲眠白石，一筇山路聽梵鐘。

遊羅浮四百峯畢

羅浮風雨半離合，四百峯巒合不成。
只有飛雲千尺雪，萬年常帶雨風聲。

華首臺

青山若現莊嚴相
白水時聞清淨音
盡日孤青常說法
諸天華雨萬重深

萬綠壓山松徑深
白雲繚繞碧陰陰
時從樹杪窺飛瀑
夜：梵聲悟到今

與幼博弟再游羅浮先至華首臺

石徑聲確鬱萬木
密纏棕櫚盤松竹
枕榔倒挂依巖壁

菖蒲橫生出澗谷，洞門幽闕瀝霜雪。
華首高臺踞其麓，飛雲廣長瀉飛瀑。
夜：說法龍虎伏，山僧採藥鋤附子。
鋤得寶塲供尊宿，景泰宗風猶可希。
頑石合掌受戒囑，蝙蝠不來胡蝶飛。
諸天花雨長霏：華鬢會上散珠璣。
半月龕中孤坐，微夢入梅花一笑歸。

梧州四詠

時以所著新學偽經考被按劾，梁大鐵君招游梧州，日與飲酒訪山水，輒成詠。

南漢鐘

渺：蒼梧雲忼慨王霸業鐘聲能感人浩蕩經千劫

漫泉

元次山
北名

天地浩漫：漫叟將何游我亦汗漫人齒：枕清流

冰井寺

千秋常侍并飲此挹寒冰夕照紅墻下棕笠見高僧

聞今

寺見毀矣佛教之大豈區區人力所能壞然亦浩劫哉庚戌正月補記

戒石

黃山
谷書

素餐矜寡遇其罪遇貪吏欲煩涪翁筆大或叢勝字

鴛江船上飲酒聽歌者阿銀歌嚶亮淒楚別梁鐵

君

鴛鴦江上水夜：蕩銀雲容易傷離別桃花逐浪分

鏡君惠沙田柚盈舟詠袖以贈鐵君惜其才俠不

見用也

嘉木出南方碧幹有潤理翦珪以為葉芳澤綠几几荆

揚充禹貢山海為益紀其實巨如斗碩大莫与比秋風
霜雪繁黃金壘；儼木杪翩欲墜質重不能舉摘來供
寢廟芬芳溢庭几剖分若蜂窠比櫛孕多子懷香既芳
溢清絕沁牙齒尚有辣氣存頗与紫桂似色相具莊嚴
質實又備美百果茲冠冕一切可奴婢惜老蒼梧桀未
登朱陛篚頗聞南海荔傳驛紅塵起時世貴穠媚瑰姿
宜委棄

過昭平

紅樹青山添白屋，清江錦石走帆船。
山城好處誰人領，畫本天然逐幅傳。

昭平江上作

冥濛細雨濕空江，亂石堆灘急溜降。
烟水捕魚誰盡取，青山缺處記停艘。

過平樂

去家十五日乃始到平樂看山舟行緩吾意不厭惡巨
石亘中流与水相激搏樓船載千斛小舟先纜索上流
繫石底轉軸行寸尺竹纜或中斷陡然千丈落吾航輕
以駛數篙翩已躍馬峽最險絕龍門尤詭錯恠石千重
列若規八陣略或列若魚飛或立如鶴鶴或哮如虎豹
或蹲如鳥雀或如袍笏立或如甲冑擢空曲入盤突迷
眩吞牙角誰云上灘難吾行得至樂

灑江雜詠

石瀨濺、立鷗鷺綠杉瑟、隱茅廬清溪縹碧竹排溜
紅樹青山問賣魚

錦石竒峯次第開清江碧溜百千迴問余半月行何事
日讀天然畫本來

峭壁千峰摩頂圓淨無塵土立風烟峻增倒影晴江上
疑是身游兜率天

拍：清灘起鷺鷥蕭：疏竹繞臺池灘江清絕誰人領
入我扁舟一卷詩

十二月二十七日抵陽朔山城斗大石峯環其三
面一面臨江城中亦有石峯峭立者其市廛皆
在山腰林木蔚如有鑑光寺者倚石壁臨江敲
門不得入光景幽絕

山峯擁出萬蓮華紅葉山城倚翠霞拄笏看山到陽朔

不須句漏訪丹砂

遇陽朔有村曰巫山倚峯臨水紅樹百千靈山樓閣幽勝在畫圖中不啻桃源也不知居者何如耳

千峯拄笏石青；木葉深；灘水清紅樹千株露樓閣碧峯深處有人行

泛灘江到桂林

灘水一千里，縹碧滃清絕。錦山帶危石，兩岸青未歇。崖障千萬曲，應接勞目睫。烟雨捕魚圍，鷺鷥百出沒。人家倚谷口，有若仙居結。綠杉徧蒙茸，晚霞映明滅。崔嵬鬱崇巘，萬丈隔天日。度峽湍溜急，石氣蒼龍發。瀑布瀉懸崖，灘流互應會。小橋度澗曲，野廟綴木末。英、龍鬚草，浸泉生氣溢。亂石插急流，疑陣排魚復。行、到陽朔石峯何突兀，蒼、碧玉筍拔地千萬出。有若龍象蹲，有若

屏尊列員庫玉碗覆尖卓浮屠揭天馬忽騰空蹉蹌不
可繫透迤遠含態勇直猛自拔前盼忘後來左顧慮右
失百里開平原山勢疾而伏遙知是桂郭近望藏萬室
泚：桂水清幽：桂樹直吾行半天下佳境此為極未
詢民生艱且尋招隱客應有嵇阮徒同游著蠟履支筇
足雲霞採薇栖巖穴顧謝螻蟻輩弋風何所得

和臨桂周敬卿翰林有感

兵甲滿天地蒼生竟若何
蹉跎夢金馬感愴泣銅駝
避地梁鴻去憂時杜牧多
只愁好春色無處著烟蘿

謝方山觀察以詩稿屬點定步原韵題還之且約

遊山

曉來但覺嚼冰雪游入方知有洞巖
後世斯文誰識悟此中真味出酸鹹
君家蠟屐齒未折我輩詩筒口不緘
為問應官聽臘鼓可能風雪上青巉

乙未元日次八十老人周慕陔同知元旦十疊韻

詩

一萬鶯花轉麗春三千關塞念邊人石頭事業無溫嶠
谷口沉淪有子真繩戶著書徒得謗金仙傳道未能親
重：桂樹歌招隱乞指蓬萊道路新

上元夕桂垣藩署黃植庭方伯丈招觀燈即座口
占桂垣燈火燦爛雲龍數十舞隊數百京師吾

粵所無也。然是時日本破鳳皇城。

鈴閣重開照錦袖，上元燈火桂垣新。魚龍曼衍蓮華界，

鶯燕招邀金粟輪。百戲雲霞煊彩仗，六街裙屐擁香塵。

乘和飲酎同民樂，猶憶吾家舊日春。

先中丞公同治年
間曾官布政使居

此署

京華走馬記當年，豈意來看八桂煙。漫：紫霞移舞隊，
傲：紅燭擁飛仙。五雲雜沓龍華會，七寶光明燕子楸。

一萬鶯花開醉眼忽驚烽火念三邊

在桂林得佳石示桂中學者

我本滄海客慣看島嶼日出沒斗室不合繞雲霞峯巒
光恠捧紅日壯士有奇懷天地為細物星宿羅諸胸邱
壑瀉諸筆竭盡碣石盪渤海青：齊魯驟盤鬱須彌反
覺芥子寬無芥不知方丈室不須足登秦岱顛割取烟
雲几案前桂林片石一枝秀領袖八桂諸才賢擔將手

植萬樹桂魏：玉立蒼梧邊海岱能壽舒何況二三佳
士之翩：桂山轟：桂樹直神秀啓闢必有先會見降
嶽出豪雋義：入室光炎天泰山之仰在於此何時突
兀覩此齊州煙青眼為君歌此篇嗚呼何時突兀覩此
齊州烟

門人龍贊侯龍左臣胡治堂黎曉峯龍積之況晴
泉周伯雅王仁長夜餞余於枕霞閣贊侯積之及

李小浦凌晨追送余至水月洞乃別卻寄

枕霞閣上送歸船水月洞中生曉烟
天使看山行兩載人同聽雨話千年
關河金鼓頻憂國黎赤瘡痍欲問天
多謝灘江夜相送景風回首總淒然

吾兩月來寓疊
綵山景風閣

張安甫廉訪為余道陽朔畫山之勝廿三日過此
約權差馮達夫太守游畫山則過五十里矣此
外無可游者桂林山水還觀陽朔即未見佳處

夫招飲即席畱別並示同席劉大令蒙廣文

山川陽朔負虛名巖洞無多峯又傾料得清貧饒太守
曾經滄海笑山靈

令尹風流今孝綽廣文才筆是蒙症一般管領佳山水
醉我扁舟繫綠楊

正月廿四日歸舟至平樂過此五十八日矣

嶺岼蒼玉列門屏攬勝亭前昔繫船六日中鴻雪過

山痕依舊抹天青

廿五曉發長灘度古勞峽午至大龍灘

綠蘿白屋著青峯別嶺分畦種竹松倒行緩放扁舟下
懸溜驚波過大龍

雨後泊舟山下

雲冢茸碧山下澄潭綠霏霽況經新雨後青蘿洗嵐黛幽
篁結石上倒映妙水繪桂棹潑清波鱗鱗紋散碎茅屋

倚巖幽青杉殊翁蒼樵歸汲清泉漁於夕煙晦佳趣在
抱領即事多可愛妙悟無小大濠濮冥所會

龍門灘

灘江三百灘吾最奇龍門綿亘石十里中流截驚湍橫
排飛雁魚檣貞成鷺鶴萬里亂流濟銜枚聲不喧昂首
噴洪濤千頭駢如龜箕張以翼舒變幻初無端小舟穿
其中曲折千百盤忽驚蛟龍掣卑若帝豹蹲義：冠裾

立翩：委珮繁旌旗暗雲霓立馬陳脚翻羊腸徑紆迴
迷茫出路難堆疊作山邱團：亭蓋斑五洲及十島萬
丈愁躋攀中豁地中海靈靈迴紫瀾昔人魚復圖風雲
變千般天工巧排造遊戲現此間開閉斷復續驚眩出
間闕我欲鑿之去平江浩漫：移置吾林塘幽賞足壑
山不數滄浪亭羞死雲林顏

丙申人日奉太夫人與張夫人携同薇同璧女泛

艇花埭買花

烟雨井邊春最鬧
素馨田畔懼方回
千年花埭花猶盛
前度劉郎今可來

春波艇影滿珠江
買得繁花載一艘
花氣波光天上坐
神仙兒女倚蓬窗

吾新村居靈洲山
西童時來游輒擬小隱
廿年南
北未成山居每有希
文圭峯月下之歎自強學

會散而歸丙申三月偕幼博及羣季游金山寺
僧出紙索書寫與

歲三春明十丈塵故鄉一日得閑身廿年未了山中約
三宿真為桑下人大海潮來龍聽法諸天花散佛聞因
靈洲山色遠清淨坐數風帆過幾巡

游三水城

三十六江水羣流大會歸危樓雄攬勢橫石翠爭飛稅

重乘田少民愚學術微登陴攬千室鶯鳴弄斜暉

以千秋瓦鼎湖藤杖為葉蘭臺郎中文七十壽丈

六十自軍機謝歸主講越華書院足跡不入官

府

慧業最難兼壽相熟官誰肯賦歸田右丞圖書真清絕

二傅風流定有傳秋夢不妨絲竹寫夫有秋春風應徧

李桃妍鼎湖古杖千秋瓦日見靈光更歸然

蘭臺先生賦詩酬會步韵再呈

詞館才華四十年，朱霞晚路望如仙。龐公州府絕無跡

若士歌詞舊託緣。寫畫名流成不死

梁任公曰：蘭臺先生嘗手寫名人畫

像數百通每聞才士輒生憐，百年佛相宜添入。願竭駑駘作

鄭箋

譚彤士太守自日本還之官桂林，遇於香港酒樓

彤士索詩，即席述舊游，送之並示謝方山觀察

二首

曾作東瀛萬里游，袖中詩卷壓滄洲。
順風送到桂林好，碧溜青山晚放舟。

吾在桂林城，得二洞，未有名，因自據之。一曰康巖，一曰素洞。

康巖素洞，足烟霞桂樹幽。吾所家，埽石尚勞賢地主。
班春應識徧天涯，買山錢之慙真隱。賃廡春來託妙華。

梁任公曰妙華張夫人小字也

寄語東山謝安石

謂方山

爭墩好事可

相誇

寄贈王幼霞侍御

幼霞名鵬運臨桂人清直能文章填詞為光緒朝第一時欲修

園明園幼霞抗疏爭或被戮幸翁常熟為清得免然後為榮祿所棄誤劾常熟以故幼霞後我告幼霞後幼霞卒幼榮祿引去附注於此

脩羅龍戰幾何時王母重開善見池金翅食龍四海水

女床栖鳳萬年枝燄摩歡樂非：想博望幽憂故：疑

大醉釣天無一語王郎拔劍我興悲

此詩作于丙申然
金翅食龍四海水

一語竟成戊
戌庚子之識

丙申臘耳入桂林除夕泊舟小傑度歲

三十九年事流雲擾：過扁舟有天地短髻看山河
絲竹哀傷寫黎元疾苦多著書空老大海角已蹉跎

其二

南去北來何所事海雲漠：江流：舊山芳草幾多綠

故國殘花爛漫紅渺，羅浮曾見日消，灘水自生風。
梅花零亂雪消散，卧聽濤頭打短篷。

除夕夜泊小傑與門人潘藻鑑鏡涵飲酒鏡涵新
得梅花顧而歌之

今年未嘗見梅花，荒江飄泊船為家。除夕為懽空歎嗟，
徒見晴峯插昊霞。藻鑑健者天機妙，徒步野落簇龍嘯。
江樹垂垂見野梅，折得拱把供索笑。飄飄縞袂入船來。

忽若飛瓊落瑤臺
繁花倚蓬點窗檻
霓裳羽衣舞裊裊
大地與月一枝樹
眾星爛：萬花開
龍伯大人吳質斧
斫花散入手中杯
國土得失教起滅
花藥開落不足哈
桂園山水盡綠碧
小有園池水中石
佳時泛舟來賞游
不聞神仙傷飄泊
夜深風冷蕭：迫寒
灘落潮聲不息
飛花忽散冷香襲
高歌倚撓酒有力
野廟燈紅天色白
丁酉元旦行舟平樂
河青山作壁碧水為
毯如此

華屋誰人受賀以為生平未有也

桂園小棹自翩；花地來游四十年
山海蒼茫堂凸凹
雲林圖畫客神仙欣；萬物皆無我點；微塵各有天
別啟華筵賀元氣青山碧水上吾船

黃牛灘

黃牛山下石直豔；標碧青溪漾行覆空山十里不見人
但有鳥啼長杉綠

看山

禽蟲草土本如：大地原來一樹餘
陰陽識得同元氣
只看青山不著書

將至桂林望諸石峯

香山履道得一石作詩驚喜誇絕殊
倪迂獅林少奧詭
高廟歎慕力追摹我好林泉尤愛石
園林無石不為妹
昔游燕吳讀園記每見疊石輒懽呼
穿雲穴洞不自己

出沒坐卧皆為娛天愍至誠割然府擲之桂林西南隅
上自全州下平樂千里之圍擘青腴峯巒竒聳百萬億
海之濤湧雲之鋪羣山奔走爭占地不開原野供官租
彝鼎琳琅陳几席丈室豈有小隙乎方員徒橫間尖曲
如植杖芴覆瓶孟曉日穿雲射峯影諸天旌蓋落清都
沙漠大將列部伍帳屯隊列擁萬夫廣殿設朝班仗立
裳冕劍珮相磨扶靈山大會天龍鬼獅象夜叉集眾徒

而我游戲於其間說法紛々點頭顛但割栖霞獨秀與
風洞玲瓏竒聳天下無改名石林昭其實號為吾園久
自私恨無錢路縮大地復泛扁舟看畫圖貴人園林少
久住如吾再到豈為誣昔游舊影入夢寐每思輒作十
日吁縹碧青溪過陽朔羣峰雜沓來迎吾今日桂林落
吾手丈人兒孫紛走趨或拜或撫吾豈厭勝於折腰向
紫朱康巖素洞久據此羨絕南宮驚倪迂行將築室老

於是天許桂海為衡虞

吾分工部
得虞衡司

重居風洞

浩：天風吹蓬萊兮一洞崖壁拓天宇嶙峋萬靈貢飛
翠瀉疊綵樓閣倚其縫昔我來高卧雲霞日供奉負嶠
當窓立瀛海排闥送烟嵐紛白氣清江俛碧凍帆檣挂
日影嬉水娛幽弄諸峯數百億羅立似徒眾峭聳露頭
角先後相附從天樂時敲來空翠歎軒棟崢嶸時登涉

想像入寐夢扁舟重汗漫榻榻再受用寄語謝山靈應
無移文諷

謝方山觀簪迎贈詩章次韻奉和

碧水青山數驛程幽々桂樹最多情每念名山思再宿
重來摩石認三生萬言伏闕知何補一卷驚人想遠行
喜有宣城詩將在預陳旗鼓遠相迎

桂林風洞与門人曹仲儼龍贊侯况晴暮黎少峯

湯覺頓看雪懷梁卓如兼示麥孺博時二子皆
在上海卓如將為美游

前年海上看飛雪，
藪：園林厚盈尺，
同踏雪者惟梁麥。
登樓白盡天地色，
劃雪題詩嚼野梅，
花下小影留相憶。
今年看雪風洞中，
千巖飄：香霧濛，
蒼崖碧草映紅樹。
青山變作白頭翁，
已知人生無去住，
頗感行腳如轉蓬。
送我清游同感歎，
諸生况黎湯曹龍，
卻念征人折楊柳。

霏：雨雪落孤蓬海上舊游忽入夢梅花雪影應相同
麥生佳句富文采臨江應指海雲東

孫博弱冠有詩云
晏歲坐聞山鬼嘯

臨江東有
海雲生

梁生隨節使絕域海濤浩：吹天風龜鼉不

吼白日靜鮫鯨暗怒翻波紅東渡扶桑觀日出蓬島新
開列仙宮望洋漸作太平想合衆國土期大同甌瓠神
瀆地肥食被髮美好士女丰剌利峴率覩善見諸天世
界千年逢會當登天攬日月徒看橫地走山峯鄉人同

類殊可憫何當去禁令交通他時對雪華盛預輜軒所
采傳詩筒

再游桂林居風洞之景風閣大雨屋漏床篋盡溼

作詩報蔡仲岐廉訪而廉訪即命匠人來矣岐仲

名希邨為廣西第一循吏感惠流聞且工詩與
吾同開桂學會主持最力相待至厚感念殊深

我昔游桂林高卧景風閣屋瓦頗參差命匠補葺楠
采重粵席山如舊媚樂僧言去歲風屋瓦之而作深春

雨連日淫雷勢歎薄中夜萬馬聲袞袞濕沾著呼僮遷
羣書囊篋又相撲賓座頗華嚴當頭如注落畫屋亟收
拾繞行無可託朝來客無席言談同蹉跎天道或難言
困我跡如削欲為樂天趣頗怨穹隆虐顧念四海家塗
炭無救藥平生同患志旅麴長行腳陋室尚云銘豈敢
厭困約况經賢使君勒工視屋角不必呼匠人自能催
將作農家急東耕破塊望留穫俛視萬家室濛：烟樹

幕霖雨徧蒼生吾更引觴酌

丁酉元夕前臺灣總統唐薇卿中丞夜宴觀劇出

除夕詩見示即席次韵奉和

妙音歷盡幾多春往返人天等一塵偶轉金輪開世界
更無淨土著天親黑風歛海都成夢紅袖題詩更有神
誰識看花皆是淚雄心豈忍白他人

是日所演劇有
看花淚一曲

羽衣雲帔想蓬萊無礙天風引去來種菜英雄看老大

念奴歌舞費新裁起居八座猶將母壇席千秋起異才
絲竹東山賓客滿不妨顧曲笑顏開

曲劇皆公自撰自教者

二月六日岑雲階太常夜宴即席呈太常及唐中

承蔡廉訪

九華燈色照朱櫻千里鶯花入桂城萬玉哀鳴聞寶瑟
一枝穠艷識花鄉芙蓉城遠神仙夢芍藥春深詞客情
新曲應知記頑艷從來側帽感三生

是夕演唐中丞撰新劇芙蓉詠

九日向子振觀察夜宴將鄙人前日律詩登之樂
府被以管絃命妙伶唱之即席賦謝

一曲紅韞樂府新官衙燈火桂城春黃河高唱廣陵散
再寫旗亭付後人

丁酉四月携門人龍積之龍贊侯龍左臣湯覺頊
王濬中等十餘人騎馬游龍隱岩摩撫黨人碑
刻跋題名其下

媪相熏天錮黨人一時黨獄遂千秋
龍隱巖前路卻為遺碑動馬塵

大書深刻錮金門蘇馬英名草木尊
一事便宜坳驥者千秋留得姓名存

石菴剔蘚重摩抄佛塔燈微劫已多
我是清都淪謫客

蕭條異代竟如何逾年戊戌黨禍遂作鄙人妄以罪魁

此三詩或為識計後來好事必有以三詩刻黨人碑後以成古今一大公案者亦為目錄也

贈日本駐港領事上野季三郎

橫飛金翅決青岑不信神州竟陸沈
龍戰玄黃翻海水鯤圖南溟動潮音
岱宗靈氣連負嶠帝座星輝豁太陰
擊楫感君相濟意共看腰劍作龍吟

梁任公曰此詩編定本失載據舊鈔本補入

明夷閣詩集

康南海先生詩集卷之四

後學東莞崔斯哲手寫

自政變出奔日本元老隈伯為適館授餐居
東半年名所館曰明夷閣自戊戌蒙難走英日
為秦庭之哭既不可得則自開口口會於美歸
省母病遂圖勤王起戊戌終己亥兩歲幽憂之
作都曰明夷閣詩集凡九十九首

戊戌元旦朝賀是日日食上避正殿散朝遇于晦
若禮部同游諸殿口占

日射觚稜暈紫環黃衣避殿散朝班記得曾携于晦若
中和殿上望西山

膠旅割後各國索地吾与各省志士開會自保末
乃合全國士大夫開保國會集者數千人累被
飛章散會謝客門可羅雀矣

八表離披割痛傷
羣賢保國走徬徨
從知天下為公產
應合民權救我疆
八俊三君自鉤黨
周鉗來網巧飛章
書門幸免誅臣罪
明聖如天賴我皇

劾章上上曰會名保國何罪之有不

以白太后乃得免否則竟獄先起矣

懷翁常熟去國

膠慶上書不達思為本草堂學者於十一月十九日東裝將歸先是

常熟已力荐於上至是聞吾決行凌晨乘南海
館吾卧未起排闥入汗濕舫留行遂不獲歸及
常熟見斥身又決行公榜上亦奉：萬不可行
感遇變法且累知已未知天無何如也

膠州警近聖人居伏闕憂危數上書已格九關空痛哭
但思吾黨賦歸歟早携書劍將行馬忽枉軒裳特執紼
深惜退亡蕭相國天心存漢果何如

八月九日在上海英艦為英人救出得偽旨稱吾
進丸弒上上巳大行聞之一痛欲絕決投海寫
詩繫衣帶後英人勸阻謂消息未確請待之派
兵船保護至香港

時英總領事璧利南語在廣
州久慕我講學故力請救至

感其
意

忽灑龍鬚翳太陰紫微移座帝星沈
孤臣辜負傳衣帶

碧海波濤夜

心梁任公曰戊戌之變羣賊自始欲甘心于先帝故六月間日與北言帝

疾大漸相驚以內各府已查大行典禮又熱惡民仇教

之邪說謂南海先生曾以一丸進帝服之遂為所迷惘

此等謠詠徧布華數併為一譚寧不可破其虞心積慮

則在還獲有海先生以旋即執帝歸罪于先生而誅

之故逮捕時由旨稱帝已大行其時上海道蔡鈞以此

佈旨徧示各國領事各領事無不見之故各國報抵咸

振我固郵英領事往救先生即挾此佈旨行文申明有

八月初五日大行皇帝遇害上賓之語先生親見之一

痛然絕此詩所以有帝星沈之句也而先生為英人所
 救事出羣賊意外憚西鄰責言未敢遽行弒逆而收捕
 黨人又苦無名乃一交而為謀國頭和國之說此說起
 于八月初十日以後初其難時無有也此詩根于英領
 事此持偽旨寔為本素鐵証今者先帝已矣而憑几末
 命猶未免杯弓蛇影微聞今修寔錄無一人敢存直筆
 先帝之冤將永不能白于天下汝此矣謹寔記此見聞
 以告良史

戊戌八月紀變八首

今佚其三乃懷徐東海及哀詠於參也

緹騎蒼黃徧九關飛鷹追逐浪如山我橫滄海天不死
 猶在之罟拾石還

吾乘英船名重慶者往上海道出之罟泊船吾登岸徜徉拾石而返登萊

青道彭某奉追電時登輿往膠劉膠省電急返烟台而
吾船已笑乃命驅逐水雷艦飛鷹隼來追以乏煤中
道返○梁任公曰先生以八月初二日奉命諭命出京
初四日復由林墩谷京卿傳口詔促行初五日遂行初
六日而難作閉城大索而先生猶在天津也初六日午
乘重慶船蒞大沽其後之架上海兩處名捕竟脫於難
若或使
之焉

奪門白日閉幽州東市朝衣血倒流百年夜雨神傷處

最是青山骨未收哀亡第幼博

國西夫子恒霍高博聞強記人之豪忠憤誤譚五王事

千秋遺恨崑崙奴

哀楊潯川侍御○梁任公曰侍御忠

在臺中屢以言相銛冀得擢煽口寔一日訪侍御力言

東朝沮撓新政聲淚俱下曰慷慨道唐五王事侍御信

之極獎其肝胆未幾文悼遂捏詞入告劾侍御有異謀

此亦月間事也雖上燭其奸黠之然蜚語日中卒至釀

變

澧蘭沅芷思公子桂酒瓊茅祭國殤絕世英靈魂魄毅

鬼雄請帝在帝旁

哀譚復生京卿

抗疏維新冠九卿慙將薦剡累先生最憐七十老宗伯

沙磧冰天萬里行

懷李忠園尚書

戊戌八月國變記事

應：維新夢分明
百日中在嚴對宣室
哀痛起桐宮
旣水滔中夏
堯臺悼聖躬
小臣東海淚
望帝杜鵑紅
遮雲金翅鳥
啄食小龍飛
海水看翻立
旻天怨式微
哀哀呼后土
慘：夢金闈
千載龜黎恨
王孫有是非

吾君真可恃
哀痛詔頻聞

梁任公曰戊戌七月二十四日王諭云全國人民皆上

之所昇祖宗之所遷非悉傳之康樂和親朕躬未定維
未為盡職又云使天下臣民共知其君之可恃

新業先傳禪讓文中原皆沸鼎黨獄起愁雲上帝哀臣

罪巫陽筮子魂

南宮慙奉詔 梁任公曰先生當國交將作時曾兩次奉
詔筆密詔第一次乃七月二十九日由四

品卿銜軍機章京楊銳傳出者第二次乃八月初二日
由四品卿銜軍機章京林旭傳出者兩詔既起皆獲恭

讀其第一詔由楊銳之子于宣統二年詣都察院呈繳
宣付實錄館其第二詔末數語云爾其愛惜身體善自

保衛他日再勤馳驅共
與大業朕有厚望焉
北闕入無軍抗議誰曾上勤王

竟不聞更無敬業卒空討武墾文痛哭秦庭去誰為救
聖君

住香港半月日本總理大臣伯爵大隈重信招游
令前駐中國公使矢野文雄電告九月十二日
乘河內丸遂東

海水排山通日本天風引月照琉球獨運南溟指白日
龍鼉吹浪渡滄洲

梨洲乞師曾到此勃胥痛哭至於今
泛來福水堪流涕不信神州竟陸沉

浴伊豆熱海登魚見磯

魚見磯頭孤嶼青冥：雲水見漁船
茫：身世雙筇杖
莽：乾坤一草亭
熱海湧煙衝地上
怒濤捲石帶梵聽
太平洋遠天
遂近夜：驚波卻不平

同梁任甫羅孝高遊箱根宿捨之澤環翠樓浴温

泉

晚秋楓葉落紅翠滿山谷溪流蕩松風洪濤翻萬木長
橋卧澗坂湍激石碌：密林滴濕翠深碧不可濁紅橋
應幾重樓閣枕巖腹當暑士女游裙屐炫川縵我来已
孟冬夜就塔澤宿温泉療百疾我心不可浴電光夜獨
照芳流清可掬秋心不能收隨之聽飛瀑

登箱根頂浴蘆湯

天地大逆旅家國長傳舍斯人吾同室疾苦誰憐借萬
方凝秋氣閉戶誰能謝既入帝網中重：纓絡絳荆榛
蔽大道澗谷起寸蘗解脫非不能垢衣吾敢卸化身曾
八千惻怛又稅駕仲尼本旅人瞿曇乃乞者我生亦何
之應劫更多暇信宿席不煖去住心無挂灰飛滄海變
時放光明夜

荒山走寒雲極目但白草莽：峰萬重悲風號日莫木

落樹枝枯冬深石骨老十里不見人但見鼉鼉舞忽覩
一壑松青：点孤島白屋傍中麓紅屢臨大道其顛二
千尺冰雪早寒苦登高望東海白波揚浩：日月所出
入大地渺吞吐抗首向天語上帝為吾顧茫：晚故國
悵：非吾土山鬼躑躅行美人迷徑路溫泉豈能煖冰
心誰可告僕夫感跼踟信宿指歸樹

蘆湖樓望富士山

山顛積雪冬夏不化雲在中峯
在下倒影湖中澄鮮出坑誠異

觀也 日主
行宮在馬

箱根山頂浴蘆湯山荒草白雲茫；石徑犖确馬難步
下馬忽見明湖光清漪縹緲落山影如見西湖浸葛嶺
湖上人家湖畔樹扁舟容與走馬路繫馬上湖樓富士
正當頭峯巔積雪照白日高入青天一萬尺雲容；兮
在中央芙蓉碧瓣在下旁倒入明湖景奇絕黛色波容
共明滅有如白頭僊人擁玉女縞衣羽裳飄；舉白銀

宮闕現華嚴金沙寶楮善見處諸天游戲墜白帽世人
那知藍竹路絕頂山湖絕頂樓欲長幽隱洗我愁惜非
吾土難淹留王孫芳草空幽：

自宮之下溫泉冒雨下山仍宿塔之澤環翠樓

冷霧暝前林凍雲端近山不知雨冥：但恠失碧鬟寒
風中人肌欲歸與已闌靈泉浴明珠無以解愁顏終已
非吾土豈得長盤桓冒雨命中車泥滑行路難盤紆坂

百折志決下匪艱青崖滴翠濕蒼碧雜紅斑草樹爛蒙
茸澗流鳴潺潺逝欲揭厲涉無梁不可攀俛見環翠廡
明燈照寒灘夜聽嗚咽聲夢魂繞長安

環翠樓浴後不寐夜步迴廊

雷燈的：照樓臺夜徠游廊幾百回明：如月光難掇
渺：微塵劫未灰風葉一秋疑積雨瀑泉竟夕隱驚雷
曉珠斗大盈懷抱倚徧銀屏數去來

三宿環翠樓

東澗流泉西澗瀑南山飛雨北山晴
高樓絕頂成三宿
卻憶華清夢未清

閱報見德人賀得膠周歲事又得楊漪川獄中詩

題其後

膠海輸人又一年
維新舊夢已成烟
山河殘破成何事

大鳥飛來但黯然

傳言剛毅至楊公原籍
聞喜縣見大鳥驚死

附獄中詩三首

楊深秀

久拚生死一毛輕
臣罪偏由積毀成
自曉龍逢非佞
物何嘗虎會敢徒行
聖人豈有胸中氣
下士空思身後名
縲綆到頭真不怨
未知誰復請長纓

八月十一日

長鯨跋浪足憑陵
靖海奇謀媿未能
安耻口邊多下策
當思殿武有中興
孤臣頃作湟中鹿
酷吏終羞殿
下鷹平日敢言成
底事覆盆秋水已如冰

十二日

□□□□□□□□□□孤忠畢竟待天扶
絲綸閣下千言

盡車蓋亭邊一字無
經授都中愧盲杜詩成獄底學

髯蘇朝來鵲喜頻
送尚憶塢東早晚烏

十三日

聞意索三門灣以兵輪三艘迫浙江有感

淒涼白馬市中蕭
夢入西湖數六橋
絕好江山誰看取
濤聲怒斷浙江潮

俠者梁鐵君聞余蒙難棄家逃亡同居日
本日夜

相共偶与圍棋感事聯句

偶向人間似奕碁鐵君一枰黑白到今疑更生關心自

有旁觀者鍊君若問輸贏渾未知更生

日本內務大臣品川子爵以吉田松陰先生幽室

文稿及先生墨跡見贈題之松陰為維新先河

出其門品川子名孫二郎松陰衣鉢
弟子譽吾為中國之松陰相待至厚

孔學在成仁春秋通國身拱噲為巧宦中庸託妄人全

軀保妻子秦越視斯民儒術久矣喪安問起傳薪霽水
簇高躅寓公搏染濱大道重扶輪學派盛彬：軒動神
國波大業輝維新王政忽復古三島翹慶雲元功在誰
手抗慨松陰君正學宗洙泗高蹈抗丘墳鼎：宏大道
軒：表蒼旻弟子同激昂大師國所尊首創尊攘義誓
心埽武門：：何赫：政柄八百春天王寔守府生殺
惟將軍急激發義唱豈不憚禍艱救國心既苦殉道勇

所重遂使羣處士奮起摑血痕前覆後軌繼大獄慘酸
辛終能覆霸圖版籍奉元君千年革霸命礮礮壯乾坤
豈知一士志誓死奮所聞創業伊絕偉道義窮其根固
知下無學不足振國羣我今讀遺書正氣照千春一讀
生慚悚再讀起輪囷諸夏媿無士東國存斯文

日本國民黨領袖佐：友房以所撰戰袍日記見

贈賦謝

佐：君為維新勲臣嘗送西
行陸盛拳兵日記即此事

仗義清君側誓身雪國耻君國已何与称戈乃為死何
不戀妻孥保軀日燕喜丈夫有壮志馬革固常耳千金
裹餼糧百戰逆知己但厲憤俠氣違計成敗理大業雖
未濟至誠驚天地堂：南洲翁明月碎於此讀君幽囚
作壯氣起頑鄙回首顧神州堯臺囚聖主金輪成北朝
誰為勤王起奄：待國亡愧此健男子

日本學者荏原和著新學偽經考辨以書寄贈並

承問訊不意舊著遠到雞林且有駁辨益徵好
學喜而賦答

去國曾懷趙江漢說經誰識吳草廬海東好事能著辨
合與洪朱併案書

洪右臣給諫良品朱夢生侍御一新
皆有專書駁辨日卒乃亦有人為之

詢佳
話也

庸觀異同淡古難古文真偽自來爭天遺老夫猶不死
又來東國識經生

鳳靡鸞叱經幾劫春蘭秋菊各芳馨徂徠新井後來秀
多謝殿勤問管甯

冬月夜坐

門徑蕭條犬吠悲微茫淡月挂松枝紙屏板屋孤燈下
白髮逋臣獨詠詩

前外務大臣伯爵副島種臣設中國饌相款並出
示詩文集談竟日以扶助中國自任感贈

副島
伯孫

蒼海為維新元功漢學領
袖曾使中國情意殊親

富士蒼：東海邊白頭一老枕花眠
我來望岳餐元氣
但見飛雲滿九天

王猛遺言哀晉室謝安垂老卧東山
控于六國知誰極
春草生兮怨未還

明夷閣與梁鐵君飲酒話舊事竟夕

鐵君名尔煦
順德人二十

年老友少游侯擊劍既乃折節讀書好玉學佛
學工畫業鹽於梧州聞吾蒙難遂棄家從出助

吾等盡卒死國事近
世烈侯未見其比

春夢婆娑亦已空繁華逝水說何功只今贏得明鑑照
頭白昏：數落紅

影事前塵二十年舊時月色幾回圓千紅萬紫都看徧
可是華胥了宿緣

冷吟狂醉到天明舞劍聞雞意氣橫海外九州久漂泊
強為歌嘯不成聲

伯爵日野秀逸招宴出示藏書畫古物甚富伯爵
誦節堂太子母舅也為王朝公卿八百年多談
西京舊俗可資文獻即席賦贈並示天野為之
博士

王孫愛客酒微醺喬木千年見世勛話到西京耆舊俗
夢華有錄感斯文

登樓

蓬萊回首望神州大海波濤蕩不收憂甚陸沉天莫問
深：春色獨登樓

將去日本示送止諸子梁任甫韓樹園徐君勉羅

孝高羅伯雅梁元理

鳳靡鸞叱應幾時茫茫大地欲何之華嚴國土吾能現
獨眺神州有所思

桂湖邨以日本刀及張非文集見贈賦謝

日本尚武俠其俗愛寶刀慷慨悲歌瞑目誓萬死成就
維新勞吁嗟震旦士氣懦偷生甘為北朝奴湖邨子哀
諸夏之國以為二帝三王孔子禮樂文明之所託不忍
坐視列強裂而攫拔劍悲歌舜水墓解劍贈我明夷閣
蛟龍夾綃脫紫絛引出寒光秋水薄太白橫天白氣纏
彗星爆汁金光落青虹貫日紫燄飛驚雷走電芒交作
蒼獅掣曳白象靡千年寶氣自騰躍不知大治出相備

梁任公曰相模備前
皆曰本封建時國名
夜深龍鳴震塲角
擔覓荆卿入秦
庭亢圖窮虜神光
橫忽見朱虛埽諸
呂蕩滌殘莽洗媿
嬰老夫倚劍西北
征揮割紫雲上青
冥披艱埽穢震海
靈蛟鏗呼號神鬼
驚重捧玉鏡整金
經重為言曰張公
高文鴻烈馨乞師
東海吼碧鯨國危
白馬泣濤鳴千載
色胥有恨聲橫劍
蹈海撲龍腥再飲
神漢宿甌甌方壺
員嶠見朱英長歌
仰天視諸星白日
煌煌太清

荅山本憲

魯連耻秦帝狄姑惡北朝呂武擅廢立海波震不潮嗟
余奉衣帶哭庭音曉：東海唇齒邦同教望古遥高士
山本子遺徑抱翼：慷慨哀吾難奔走集其僚哀我北
首望瀛臺幽神堯齊桓能救衛我欲賦黍苗淵明詠荆
軻我聞風蕭：感子蹈海義痛我風雨脩

桂湖村邀集上野鶯亭即席索詠口占兼示同席

陸羯南三宅雪嶺口口藻洲皆東國記者之盛
名能文者

不忍池邊詠盡簪萬家烟樹俯花南滿坐無言心已醉
梅仙染墨寄征衫

博浪椎秦起大風事無成敗六英雄只今東海逢黃石
酒入梅花飛落紅

東台一戰兆維新今日鶯亭無限春風雲感憤從來事

把臂休傷酒入唇

鷺亭花月真無賴
上野裙裾照早春
最是新亭好風景
河山故國正愁人

濱村藏六許贈刻印索詩為券

篆刻雕蟲亦壯夫
詩人餘事落江湖
神山自有散仙在
片石韓陵當索租

己亥元旦與王照梁啟超羅普在日本東京明夷

閣望闕行禮

曉日曛曛射北扉
遙從海外起朝儀
仰看北極瞻丹闕
立對東風認紫微
去歲走趨穿陛仗
今晨顛倒之宮衣
逋臣西望腸堪斷
故國雲飛有是非

遊日光德川氏廟

風景玉勝廟貌壯麗
有漆柱八每值萬金

夾路松杉三十里
白頭雪滿日光間
海東伯業銷沉盡
畱得雕塲鎮此山

將往加拿大游歐宴文部大臣犬養毅大學教授
松崎藏之助及柏原文太郎陸實桂五十郎諸
名士子明夷閣口占贈諸公

陸海浮沉未可知人天去住亦無期明夷閣上羣仙集
畱取風流作後思

巳亥二月由日本乘和泉丸渡太平洋

老龍噓氣破滄溟兩戒長風萬里程巨浪掀天不知遠

但看海月夜中生

上巳後四日遊加拿大灣高華公園送譯者遂日

本呈東國諸公

大瀛萬里隔游塵上野鶯花照暮春未敢回頭思漢月
卻看江戶是鄉親

櫻花開罷我來時我正去時花滿枝半歲看花住三島
盈：春色最相思

三月乘汽車過落機山頂大雪封山雪月交輝光
明照映如在天上其頂甚平譯者請名之吾名
為太平頂

落機鐵路繞巉巖大雪長封直矗蔚藍身世直登太平頂
峯巒直走美洲南光明混合寥天一孤影真同明月三
此是玉京瑤島路欲為天問試寥參

四月過加拿大阿圖和都英加拿大抵普寬度侯

爵設跳舞大會招宴侯夫人電邀女畫師於都
瑯社來寫吾像畫師年方十八紅衣娟妙最有
名者也

飄泊餘生北美洲左賢特為寫形留風鬟十八紅衣女
卻是中原顧虎頭

四月乘船渡大西洋近北極曉見二冰山高百丈
自北冰海流來者船人傾視誠瓌璋大觀也

冰海凝寒橫北極積雪萬里大地白
仲夏凍氣漸銷釋
轟然迸解如天裂光恠各成峰巒出
塊磊海波互擊噬
隨波浩蕩去窮髮飛輪浩々忽逢之
驚恠海島生變疾
疑是共工摧不周天柱散墜半段折
或是蓬萊分左股
浮來海西自飄撇是時旭氣騰海上
光彩相射更晶澈
兩峯中流凝水晶雪濤噴激遶皎潔
玉山千丈照白日
雲氣晴明無掩失平生浪說瑤島名
今日見之豈恍惚

東峰長方似方壺西峰圓如貞嶠窟頂平亦復侶甌瓠
可有神漢白于雪藐姑仙子羽衣裳身跨白鳳佩明璫
左挹鴻蒙右雲將翩：汗漫遊其旁皓鶴飲啄瑤草芳
應結瓊樓宿其上日泛銀海同徜徉手執琼枝飲瑤漿
冰肌玉骨生清涼無有渣穢謝文章萬歲千秋樂未央
須臾變滅計亦良神明獨在太清長

到倫敦館於前海部尚書柏麗斯輝子爵子爵代

請於英廷扶救復辟議院開議進步黨人數少
十四人議卒沮以英使竇納樂惑吾總署誣言
也遂去英時閏四月

秦庭空痛哭晉議自紛紛使者是非亂盈朝朋黨分陳
恆誰得討武曌六能君只愁飛袖水八極起愁雲

五月出利物浦渡大西洋重到加拿大入勝羅崙

江口

西洋巨浪地球稀萬里行程九日歸故國蒼茫烟月遠
逋臣憤慨海波飛雲垂大野星辰炯水接長天島嶼微
喜見美洲江岸近茫茫大地又何依。

重經模士莊李棠再到酒家買酒中夏風景迥殊
春莫矣

客舍來時雪覆磯園林歸日綠陰肥再到舊家重買酒
寥天九萬過來稀

加拿大小住裊花士打某官請茶會男女數十皆
善曼歌有女士索吾作詩代歌傳於留聲器以
為韻事

小住裊花閱劫餘琴心鳥語散花初記取紫雲歌一曲
人天哀咽最傷余

己亥夏秋文島雜詠十九首

流離已久憂病頭風此海千島雪山照人日遊

一島始居帳幕繼裝潢漁室名曰寒天前後兩
居凡弼月志士馮俊卿奔走供給護衛至周

域多利海島無數山離雉泊我來遊每日蕩舟遊一島

夕陽醉繞魏家洲

島為中國人魏
四買而耕

哀歌擊楫氣縱橫珠島周遭帶醉行驚起前洲漁者識
依稀故國棹歌聲

小島周遭十頃餘小山松柏滿幽居坐收平果生涯足

牧豕屠羊更取魚

日：磯頭坐看潮長眠石上樹蕭蕭
蒼苔寸厚無人到
但有鴉聲破寂寥

大海網魚新事業深山砍木好工夫
新來學得捺舟法
日向煙波作畫圖

居帳還同游牧國秋千揀得大松林
有人來覓明夷子
叢木崇岡深更深

午時泳浴海波中
冰雪肌膚對冷風
旁人問我冷何許
對面雪山初雪溶

牽蘿補屋綴山齋
老木荒僵作几排
上有松枝陰最綠
讀書孤坐浪潛

晚來繞島一周遭
隱處看雲更聽濤
穿樹敲崖猶未了
險淥深處試三篙

老柏蒼僵六十圍
忽遭野火對斜暉
異香十日燒難盡

觀我生兮何所歸

回首中原歎陸沈
兵纏大角氣森森
老夫短褐登場獵
日：校槍能中心

黃松島大多野雞
校獵幽尋山路迷
深林蒼翠暮烟紫
穿出磯頭看日西

海底齒：沙石見海面青
：行帶舒繫舟倒挂岸松下
卧看漁人網截魚

石斑魚美世所無，椰菜數畦香異殊。
鄰家開網朝送，天遺土產不須租。

瑤臺恠石暮躋攀，蘅杜江花滿石斑。
老柏竒松低入海，卧懸樹杪聽溪潺。

殊方窮髮寥天室，痛哭英靈賦大招。
西望瀛台波渺，

逋臣灑涕滿江潮。

八月十三日与志士劉康恒
李福基祭六烈士于寥天室

海雲海浪兩冥冥，秋氣秋心不敢醒。
盡日頭風醫不得，

海波沐我月華生

思君念母客萬里憂國懷人又九秋
最是痛心當八月
經年須髮白盈頭

申胥痛哭知何往正則行吟更自傷
萬里投荒住孤島
登山臨水總淒涼

遊魏四島其婦以瓜見贈

小灘咽：樹幽：獨木為橋過隔洲
野雉爭飛瓜正熟

夕陽孤島盪輕舟

游魏島歸棹望海思家時太夫人及眷屬住澳門
壁月亭：出海邊遠山近島紫凝烟踴躍金輪海山碧
遙知濠鏡影同圓

己亥六月十三日與義士李福基馮秀石及子俊
卿徐為經駱月湖劉康恒等創立□□會于二
十八日至域多利中華會館率邦人恭祝聖壽

龍旗搖颺觀者如雲灣高華与二埠同日舉行
海外祝嘏自此始也

海外初瞻壽域開龍旂披拂白樓臺白人碰盞倚裳至
黃種然燈夾巷来上帝与齡憐下土小臣泣拜倒蒿萊
遙泛文島瞻瓊島波繞瀛臺夢幾回

文島中秋夜有故鄉蘇村之蘇熠来陪與語故鄉
事惘然寫付寄鄉人

飄零遠客二萬里垂白鬢絲四十春回首銀河共明月
最難文島宿鄉親慚將黨禍驚鄰曲媿之恩施及里人
便恐故鄉成永別空勞父老話逋臣

別文島周游之跌足而返回望吾廬寥天室悵然
不忍舍去

島樹別離行一周沙灘跌足不能游與闌緣盡送茲去
歸棹回頭獨倚舟

文島幽居占月餘風烟草樹不吾疎天涯走徧佳山水
比似寥天總不如

己亥九月秋夜再到神戶仍宿警察署樓去年初
至忽：周期倏仰惘然

去年秋夜此曾經萬船燈火海冥：今夜篝鐙再飄泊
人民城郭夢如醒

自美洲東歸至橫濱懷木堂謁南湖村蒸洲東畝

諸子不得面寄贈以寫相思

東亞風雲日夜急溟海龍魚吹浪泣故人醉別已半載
萬里歸來心相待神山可望不可即颯風吹我落南極
鶯亭晨寢空相憶欲往從之不可得焦心勞思徒反側
怒濤洶：捲白日摩挲寶刀扣刀錄何時再望富士山
吁嗟禹域不可到何心惆悵思江戶只恐從茲成永別
問訊櫻花顏色能如故

九月二十四夜至馬關泊船二日即李相國議和
立約遇刺地也有指相國駐節處者傷懷久之
碧海沈：島嶼環萬家燈火夾青山有人遙指旌旗處
千古傷心過馬關

神戶汽車中夜半遇日李前外務省參事官志賀

重昂譚國事竟夕索詩占贈

飄泊人天任所之櫻花開落遇君時
萬里窮愁神戶路

忽逢夜半更譚詩

熟讀神山風景論賤地學莫如君

君著有日
本風景論

相見兩

看秋夜月天涯淪落起愁雲

君以去年為外務官奉命
接待我者初乘見時亦九

也
月夜

過日本懷舊相大隈伯前文部大臣犬養木堂寄

呈

夷吾不出奈蒼生問取木堂嘉樹成萬里東歸不得見

海雲冥：怒濤橫

自馬關乘船適香港即去年九月東來之河內丸
也船主英人殷勤道故感賦

東海西洋三萬里雪來柳往已經年秋風獵：圖南溟
渤澥茫：遇舊船艦主權欣慰身世事長殷勤問食眠
老夫無恙髮白矣卧看碧浪亦奇緣

居香港英輔政司駱乞通華文能論中國事頻來

慰問請茶會索詩溘替卜君存問殿：派警士
廿人保衛夫人贈畫感謝並呈

風雲激慘澹天地有傾軼金翅食龍子海波翻沸瀆支
那際舊敝政頽民苦統愚公志移山誓欲救國活遭逢
際聖主愛民變法決謬贊維新政百日民大悅掃除二
千年秕政一旦脫龍熬流大庭兵氣纏宮闕堯臺痛幽
囚黨獄慘流血龍蛇鬪倉皇螻蟻命輕絕幸依大國仁

兵艦救倉卒危胥行哭秦莊烏復吟越病母隔經年遊
子憂鬱咽香滂許重來邏卒加嚴密凶人感恩惠肺腑
紉稠疊師：輔政君才明挺人傑金鏡騰光輝寶手流
惠烈文通倉頡史俗諺震旦轍林伯哀瑣尾婉孌蘭芷
屑頻煩枉高軒採問著書說嘆息遭秦焚百卷燼灰滅
無由酬賞顧只自慙罪孽每最遵晦養存及家人節綢
繆在太平縞紵心已折況茲通播臣感激五中熱將軍

遇愛憐夫人畫妙絕銜戢如何謝冥報永歲月倘復乘
風雷長願親隣結

邱菽園孝廉未相識哀我流離自星坡以千金遠

贈賦謝

天下誰能憐范叔餘生聊欲託朱家英雄末路黃金感
稽首南天一片霞

菽園投書邀往星坡答謝

飄泊寰瀛九萬程
蒼茫天地賸餘生
狐裘瑣尾泥中歎
羊節淒涼海上行
夢繞堯臺波縹緲
神驚禹域割縱橫
九州橫睨呼誰救
只有天南龍嘯聲

憤為秦逐客久作晉土人
處之如吾土日一寄此身
水懷傷日月苦乃結乾坤
寂是銷魂者華顛別去親

甲辰二月
玄憐別西親

康有為

會休一鶴去初仙
 風雨閉門太古羨
 不獨人為畫七情
 鶴虛小德畫中神
 鶴翁
 懷碩君鶴逸詩寫呈
 法翁文恭公詩有

大庇閣詩集

康南海先生詩集卷之五

後學東莞崔斯哲手寫

庚子春徙圖南溟及夏英海門總督並力山大館我於其庇能節樓名之曰大庇閣居十月至辛丑十月乃去是時廢立難作京邑邱墟鈴雨淋道勤王不成思君憂國怨憤而作都為大庇閣詩集凡一百四十七首

己亥十二月廿七日偕梁鐵君湯覺頓同富姪
赴星坡海舟除夕聽西女鼓琴時有偽嗣之
變震蕩余懷君國身世憂心慘：百感咸集
天荒地老哀龍戰去國離家又歲終起視北辰星閣
閣從圖南溟夜濛濛亂雲遙接中原氣黑浪驚迴大
海風腸斷胡琴歌變徵怒濤竟夕打艤艫

星坡元夕鄉人張燈燃爆繁開過於故國觸緒

傷懷與鐵君覺類同富姪追思鄉國

海月團：又上元波橋影靜市聲喧刺天珠爆爭星
麗照水銀燈夾岸繁舊國烟花重此見新亭風景泣
何言忽憶前年燕市夜酒酣擊筑夢中原

寓日坡邱菽園客雲廬三層樓上憑窗覽眺環
水千家有如吾故鄉澹如樓風景感甚

小橋通海枕波涼兩岸千家數百舟廿載銀塘舊山

夢忘情忽倚澹如樓

庚子二月四十三歲初度寓星坡之恒春園居
一樓名曰南華梁鐵君湯覺頓為吾置酒話

舊慰余瑣尾

四十三年現化身五千里外託逋臣南華樓上環花
氣上野場中盞酒痕去年梁任公偕同門三十餘人
祝我飲于日本東京上野園
天惜殘軀經萬死生為大事豈前因紅糴綠葉憑欄

話北望堯臺總愴神

贈陳孝廉□□

平生覓儒俠節士得田疇生死吾斯託
戈矛爾可修
老羆雄卧道俊鵲利乘秋誓敵勤
王愾同袍氣共邁
聞衡山向道隆
以三千人勤
王傳檄遠近海內
震動三日而敗天下惜之

衡山雲氣鬱縱橫
首唱勤王第一聲
三日大呼徐敬

業祝融峯頂有英名

題邱叔園風月琴尊圖

天風浩々引飛舸
海月茫茫照醉歌
別造清涼新世界
遙傷破碎舊山河
變聲浪吼窮鼉舞
汗漫天游仙鶴
過我識鴟夷
心寄遠五湖
預擬泛烟波

正月廿五日遷居恒春園
二月廿六日離去凡
居一月樓亭花木未免有情
得四絕句寫付

菽園主人

後十年庚戌兩居星坡之憩園
在恒春旁每遇輒黯然

恒春樓閣最徘徊捨宅周瑜亦俠哉一月南華樓上
夢檳榔遇雨記登臺

飲冰池上樹陰：惻井泉清惻我心浴髮日須三斛

水幾忘天地會飛沉

有二池井吾一名為
測泉一名為飲冰

幽欣亭上冒絲橫擊劍飛拳更論兵驚破如如心忽

動風吹高樹落椰聲

有亭吾名曰幽欣鐵君
神于拳技辟易百人

鞦韆飛上轉如輪欲入青雲絕世塵
三丈樹身花滿頂飛花片：着吾身

正月二日避地到星坡菽園為東道主
二月廿六遷出之日於架上乃讀菽園所著
贊談全錄余公車上書而加跋語遇承
存款滄桑易感亡人多傷得三絕句示菽園
並邱仙根

憂時曾上萬言書十死殘生億劫餘
海雨離居讀君

作淒涼舊恨集公車

平生浪有回天志憂患空餘避地身最恨邱遲傷故

國題名記上少斯人

今日乃知蘇園本聯名
龍華會工恨少君耳

聖主維新變法時當年狂論頗行之與君北灑堯臺

涕刺我南題孔廟碑

君創孔廟學堂于南中後余貽
書陸祐卒成之今為尊孔學堂

二月二十五日遷林宅三月初八日自林宅移

居章宅英督亞力山大招待殊厚派印兵十

八人保護每日夕小步階前園大數十畝花
樹蕭々或席地卧皆有印兵四人或八人執
槍佩劍擁侍左右

日夕閑遊席草眠月明花樹散清便修羅八部常圍
繞班劍持槍擁後前

章宅窗外有樹閉門不出偃卧窗下夢回京國
五尺屏風七尺簾北窗高卧一間僧綠陰滿樹風徐

入京國書堂記得曾

日本繪有古今世界十傑像德大非獵王俄彼
得帝美華盛頓俄亞力山大第一朝鮮大院
君美總統格蘭法拿破侖第一德卑士麥清
國康有為日本大隈重信信行天下鄙人忝
列愧而有作

造新世界各雄奇大地千秋俯仰誰光照古今圖十

傑小生慚愧附于斯

雨潤雲收華盛頤風移霆震拿破命盛德殊功惟二
子吾生尤羨美洲民

幼博之喪未敢白老母時偽作家書以報平安

今日使覺頤寫之心痛淚下

庚子三月十三日

更無魂夢隨黃泉夜雨傷神又兩年偽報平安怡老
母未能下筆已潸然

遣人入北尋幼博墓携骸南歸

茫：漠北何山寺青山埋骨尚無處清明節到雨紛
紛一尺斷石三尺墳紙錢麥飯送無人大仇不報負
英魂星坡北望淚沄沄杜鵑啼血斷燕雲鯨鯢橫波
斜日曛誓起義師救聖君魂兮殺賊張吾軍報汝仇
憤開維新吁嗟傷李肝酸辛

三月十一夜懷徐子靖侍郎時在北獄念之痛

心 庚子

沉：憂怨我何之風動鉦鐺月墮時
燕雲慘霧何時解正氣歌成壯更悲

題菽園孝廉選詩圖

華夏文明剩竹枝南洋風物被聲詩
蠻花犵鳥多佳處恨少通才作總持

飄然浮海孝廉船絕妙才華慘綠年
王粲周郎吾未

見畫圖詩卷識游仙

窅窅洞天五百石
霏霏柔佛萬千珠
君子居夷亦何
陋盡搜翠羽上紅
筍

中原大雅銷亡盡
流入天南得正聲
試問詩騷選何
作屈原家父最芳馨

褒姒滅周天喪亂
離騷憂國語滄
湧銀河手挽無多
淚應識幽思託選詩

題邱菽園看雲圖

黑雲壓城沒星斗，滿天如墨沙石走。
陽日掩匿光乍黝，蝦蟆狂叫變蒼狗。
邱生奇氣世無有，登高橫睨八
荒久看雲憤慨，難袖手被髮問天天。
聽否誓呼大風掃群醜，溟海蒼
頑霧厚撫劍問天天，字剖絕頂獨
立無人送邀：雲霧向虛空，但見
仙人綠髮翁。白雲黃雲翳滿：我
與雲將盧敖若士游鴻濛。

与梁鐵君在星坡追話梧州舊游

白月四更冰井寺与君踏月記曾來
萬松蘭若崎嶇路幾樹梅花上下臺
綠水夕陽移畫舫銀燈雪夜照深杯
可憐鴛水東流盡又懸華嚴劫一回

鐵君用原韻和

兩度同遊踏明月蒼梧昨夢故人來
宋碑唐井前賢地灘水鴛江舊將臺
翻為焚書邀笠後再從浮

海共吟杯蒼生繫重何能死歷劫而今第幾回
菽園以書告譯天演論者得奇女子慕而嫁之
亡人間之忘其憂患以國事鬱久矣今日
軒渠可愈肝疾寫寄觀天演齋主邱菽園
傳聞天女嫁維摩花著花飛說法多絕世愛才何惟
惻生天諸界共婆娑渡江挑葉何須揖入海玄珠不
用羅昨夜雙星看織女光涵東壁過銀河

我生思想皆演頰如嚴平先譯之億劫死心沉大海老夫春氣著花枝神仙眷屬居然遇著述姻緣亦太奇遂令亡人忘憂患沉吟新論動琴絲

皇上三十萬壽時大亂京津消息多絕幸聖躬無恙小臣在星坡與梁爾煦湯叡設香案龍牌望闕叩祝時邱煒爰鼓舞星坡人全市祝壽極開前此未有也恭記

聖躬歷險猶無恙
天意存華庶可知
兩載房州書帝在
八荒壽域動民思
漫愁蛇豕鬪宮闕
夢想龍鱗落海湄
小臣雖乏朝衣拜
喜見黃龍徧地旗

看虎丘寒山寺影畫觸舊游

十二年前過虎丘
寒山蒼翠劍池秋
桑田一夢成滄海
畫裡重看滄舊遊

七月偕鐵君及家人從者居丹將敦島燈塔

燃燈夜：放光明打浪朝：起大聲碧海蒼天無盡
也教人怎不了無生

大海蒼：一塔高秋深絕島樹周遭我來隱凡無言
語但聽天風與海濤

北京蛇豕亂縱橫南海風濤日夜驚衣帶小臣投萬
里秋來絕島聽潮聲

携婉絡坐石上口占

羊輪新月上微明
浩：風聲挾浪聲
偶作瀛洲仙眷
屬不堪回首望神京

大海茫：絕島波朝雲
常伴老東坡
七尺石峰三丈
樹因緣小坐此盤陀
濤濤乾坤起
大風青茫海氣接
鴻濛塔燈照我光
無睡斗大明珠
燦夜中

暹羅太子為僧坐禪
絕世頻憂中國見人輒問

吾起居

涼離萬死亦天哉
空話維新剩刮灰
暹國高僧經絕
世頻煩問我起居來

丹島多奇石拾得百餘枚
以廢歸裝鐵老亦相
與拾石自遣

袖中滄海帶歸來
割取雲霞錦一堆
丹島廢舟無異
物行裝怪石百餘枚

曠：白塔廢丹青大海濤頭起怒潮日：崕濱來拾
石秋風吹浪聽蕭：

丹將敦島拾古木甚嶙峋題詩其上

斷木輪囷棄海濱波濤飄泊更嶙峋他時或作木居
士後萬千年尚有神

偕婉絡竟日下山拾石弄水晚歸上山小憩松

下

丹島高三里九折路縈盤老矣筋力憊遊倦歸頗艱
左憑朝雲肩折枝共盤桓中途上坂曲小坐得所安
長松十一株片月挂其端灌木纏綠蘿深：藤可攀
如張碧畫屏折枝紅斑斕驚樹葉驟落高枝忽墜猿
樹杪見白塔高挿霄漢間晚霞倒海鏡金碧生波瀾
弄水既已倦看雲亦已闌亡人得餘懽境曠神愉閑
回首念神京喟然傷心肝

久不見菽園以詩代書

我與君居星架坡日飽鄙厨腹其皤緬邈經月不相
見有似牛女隔天河重垣閉闕絕賓客竟日枯坐如
禪和捧花洗葉作功課午鷄一鳴清睡過翻思京華
人事皆忽得化身坐維摩太陰雷雨翳白日光明大
放鏡相磨長天一月夜來燻龍蛇鬪血海生波鼠齧
犬吠有搖杵鳥鳴花放獨婆娑更從多難得至樂觸

處隨順履無跛束香合沓萬花舞虛空音樂聞清歌
地獄天宮皆淨土華嚴流轉現刹那如是南華真寔
境浩：天風吹大羅哀此衆生來濁世煩惱障碍無
揀呵八千往返亦何厭与子靈會亦已多海雲邀：
春雨暗樓閣離：隔山河垂簾匝地飛絮搓魂夢從
之路若何

七月朔入丹將敦島居半月而行愛其風景与

鐵君臨行回望不忍去然聯軍鐵艦日繞島
入中國見之憂驚示鐵老

丹將敦島住半月弄水聽潮憶舊蹤
海浪碧藍分五色天雲樓塔聳高峰
風號萬木驚吟狖濤湧崩崖嘯
卧龍隱几愁看征艦過中原
一綫隔芙蓉前即芙蓉嶼可通大陸也

七月望英總督亞力山大以輪船來迎同往檳

榔嶼即館吾子督署日同游公園看花聽泉
供帳甚盛誌感

牙旗十丈角悲鳴帳幕垂
擁衛兵馬埒樹連高閣
迥兵場草接遠山平
倚船對月同茶話
游園看花並
馬行嚴妙節樓盛
供帳為羈隨會若為情

自星坡移居檳榔嶼京師大亂乘輿出狩起師
勤王北望感懷十三首

戰鼓津沽急烟塵京輦頻傳聞圍客館無故戮行人
名怒西隣責興兵萬國屯驚聞燒炮壘烽火上星辰
聞說初宣戰廷爭亦有人裂麻經聖主折檻有良臣
竟作茅焦戮偏送延廣倫豈聞十常侍攘外用黃巾
太陰黑霾日大角氣纏兵王柱驚天折金甌碎地輕
戈船橫渤海蛇豕聞幽并不忍看沽水血流千里平
鐵道聞燒斷神京最擾攘大臣鞭血泣都統闔門殃

公府焚成燼郎官餓倚牆禁軍稱武衛盜賊尔猖狂
藩鎮蒙恩澤旌旄久寵榮南疆託保境北關孰稱兵
討賊無單騎勤王不好名但聞興黨獄何以對王明
中昔紛：下紅巾獎義民兜鑿戒胡服槍砲復華人
白簡慘遭戮黃天詔有神真成一敵八舊黨計何新
國土同孤注君王類置棋金輪篡唐日叔帶乱周時
孤服哀衰如衣冠孰東之人謀雖欲盜天命豈能違

驪山笑烽火，廟社泣灰塵。
黃屋傳西幸，蕭關又北巡。
珊瑚鞭遺御，馬紅袖泣宮嬪。
腸斷淋鈴雨，淒涼夜走秦。
五臺山縹緲，七佛地清涼。
雲豁金銀闕，天開安樂鄉。
壯圍思聖祖，巡狩痛今皇。
行在無消息，看雲但黯傷。
龍樓旋繫馬，鸞掖且觀兵。
金鳳成灰燼，銅駝卧棘荆。
飄零周雅樂，蕪沒漢公卿。
文物千年盛，繁華一旦傾。
上相和戎出，聯軍壓境雄。
首應函使冑，師合質蕭同。

帝座星同戴神州日再中心繫天意號泣訴蒼穹
兩年奉衣帶萬里走窳瀛攬髻空傷老勤王恨未成
喪元泣先軫迎駕出麻城日盼紅旗報盈：老淚橫
綠徧檳榔樹紅開皂角枝山雲飛浩：海雨聽離：
絕島悲魚鼈秋風怨鼓鼙夜深故國夢兩載月明時
北難日急江南軍未歸聯合五省義士興師勤
王將用日本挾藩之策先行之武昌事敗七

月十八日門人唐才常殉難漢口烈士林圭
等死者三十人祭之哀愴心肺

烈士悲國種奇才起楚湘苦心結豪傑誓死救君王
兵氣連江海元戎壓武昌驚聞將星隕憂痛惻肝腸
兩載經營苦勤王今始成未誅李孝逸先喪冀元亨
天奪嗟何速中興豈未平傷心覆醢痛笳鼓咽先聲
虫沙哀死士三十尔何人故國傷蕪沒元功痛隕淪

頭顱輕報主精魄上為神嗟我長城壞無由贖百身
鸚鵡洲前樹從茲翳黑雲淒涼悲葬碧騷賦泣招魂
迎駕期他日成師念宿勛血痕沾老淚灑滄苔三軍
聞救國居士欲為政變說部詩以速之

我遊上海考書肆羣書何者銷流多經史不如八股
盛八股無如小說何鄭聲不倦雅樂睡人情所好聖
不呵自從戊戌八月後天昏霧黑暗山河房州閉廢

金輪覆大鵬遮天眯雙目
天宮忽遇南風扇蓮花留
得六郎宿呂家少帝豈
劉氏潘后童女為魏續天柱
尔朱假大權內總禁衛外
旗綠兵馬元帥都天下坐
觀玄黃聞鬼哭姚宋才名
甘作輔何況無耻陳伯玉
頃者開科買士心秀才得意
群呻吟君國淪忘彼豈
識科第偷竊衆所欽舊黨
獻諛狂一國大周受命頌
駸：是非顛倒人心變哀哉
神州其陸沉頗欲移挽

恨無術縐眉搔首天雨陰聞君董狐說小說以敵八
股功最深衿纓市井皆快覩上達下達真妙音方今
大地此學盛欲爭六藝為七岑去年卓如欲述作往
再不成失靈藥或託樂府或稗官或述前聖或後覺
擬出一治更一亂普問人心果何樂庶俾四萬萬國
民茶餘睡醒用戲謔以君妙筆為寫生海潮大聲起
木鐸乞放霞光照大千十日為期速畫諾

聞張之洞購捕菽園以三萬金思昔捕狐狸豺
圖寄菽園

豺狼狐狸捕未得虎豹龍蛇禍更深可憐大士來救
國贏得頭顱三萬金

菽園寄示哭唐烈士才常詩稿指血作点慘淡
模糊如目覩漢難志士哀哉至矣

髑髏化碧滿江潭有司死者三十三楚厲招魂誦新

作血痕盈紙淚盈衫

閱報聞禁中皆成茂草矣

憶昨趨朝禁省秋五雲宮闕與天浮兩年回首成未
泰不信弼箕竟滅周

庚子八月五日閱報錄京變事

五鳳城前再拜辭前年此日出京師忽驚烽火生
寢如空有波濤泣子胥中國陸沉誰致此速臣飄泊更

安之西山一角青；在北望憑欄有所思

聞祭酒王懿榮熙元吉甫編修壽富殉節皆故
人也感而賦之

金石琅：王元美濁世翩；熙公子氣節我；壽太
史三烈故人慷慨死
辟雍松柏森不朽名教入人深且久播紳試數千官
錄殉國胡惟兩祭酒

橫榔嶼偕鐵君四更踏月步遊公園長林清薄
雜于月影中光景佳絕

綠柳馳道白沙堤白閣青林十里迷夾路樹陰花影
滿沿溪踏月水澌：

戊戌築園花埭僅移家數月而被籍沒吾尚未
見也鐵君語曾兩到今為鬪蟀場矣

園林新築素馨芳碧浪紅橋繞粉牆喚作主人猶未

見淒涼又作半間堂

京破後獄囚皆放聞徐子靖侍郎即奉赦免喜

倒淚下

冤獄兩年悲黨錮維新元老記春秋驚聞西狩摩燕
關忽喜南冠出楚囚天下咸知城北美人間解盡海

南憂苦憶哀歌宋玉宅何時把酒仲宣樓

與李茂老同飲宋廷

棟宅各發變徵之
歌遂別至今

戊戌春花地築室成吾留京師未一歸見而八
月籍沒矣任者無任無任而任只有隨順非
力能為今京師又破士夫無家但吾先之耳

感賦

儒宮方二畝花架蔽三弓奉母堂開北藏書牖向東
松陰低水碧荷葉隔溪紅著述思長隱吾生作遜翁
煙雨井旁宅素馨田畔家小橋通澗水大樹隱雲霞

樓閣皆垂柳比鄰盡種花廿年營卜築牽去客京華
移家纔數月考室未能歸春夢圖空憶秋風事盡非
淒涼慨華屋蕪沒話苔磯不見珠江水流漸對夕暉
弱女猶能說新居樂事聞摘花僮出賣落果母平分
刺艇嬉潮水垂竿弄夕曛洋桃十株熟上壺共呼羣
昔作草元室今為鬪蟀場吾身難據有物理識無常
滄海親看變神京忽見亡百年宅坊記瓦礫盡堪傷

府第成灰燼衙廷化棘荆天壇傷茂草紫禁宿蕃兵
同盡豈天意先憂觀我生應知南雪宅長挂趙陀城
聞邱仙根工部歸里與黃公度京鄉各爭詩雄
文人結習別開蠻觸以詩問訊且調之

五嶺崢嶸矗兩峰詩壇滕薛日爭雄如斯蠻觸原風
雅只恐河山在割中

亡國原為好詩料保身最好託詞章只愁種滅文同

滅佳集雖傳亦不長

回首故鄉歌大風飛揚猛士為誰雄
陸沉應作反招
隱可識閻浮國土空

檳榔嶼公園有飛瀑鐵君尋得日與同遊自去
國避地不見泉瀑久矣

澗曲林深山頂池九天珠瀑下飛垂
飄風吹我鐵橋
立疑在羅浮白鶴時

檳嶼漫行遇西人元日感歎

累年絕域長為客北望中原愁殺人海外風塵吾漸
老蠻中雲物日相親蒼藤纏樹花生頂紅布圍身金
墜唇酒醒夢回腸斷處長天萬里是燕秦

檳嶼庚子除夕

黃屋西巡尚未安勤王事業但汎瀾龍蛇起陸地機
發虎豹守關天步難沉：往事風雲慘渺：子懷年

運闌甚矣吾衰頭半白為羈歲晏夜漫：

辛丑元日樞嶼督署大庇閣上望闕行禮見雲

氣成龍口占

高樓西北旭熹光
綿蕞為儀拜上方
雲氣成龍扶瑞日
中原走馬望興王
三年海島傷逋客
萬里長安對御床
聞道迴鑾消息近
廟堂重掃待當陽

辛丑花朝日讀十五年前花塲看牡丹詞

十五年前事淒涼看牡丹繁花久飛落吾道屬艱難
簾幙低垂寂樓臺獨立寒夢闌香爇後何法得心安
八股廢矣厲檠嶼督署有印度衛兵廿人守護
朝夕傳呼驚入曉夢猶似童子試八股場聞
鼓角時也結習未盡患難猶如此人之所遇
所學積久成因亦可推矣

二十班劍虬鬚夫角聲吹曉聽傳呼夢中驚入文場

隊官燭青袍記似無

辛丑二月偶披棋局見與鐵君舊聯句再題一

詩

黑白至今漸見輸贏大局難知三年華嚴彈指如是
我聞一時

八月再題棋局

方罫畫成三十六紛二國土現變觸沉吟臨晚是中

原諸邊已割成殘局

栢島避地衣物典盡

萬里投荒去國悲經年絕島無人識
釵環質盡佐軍資春衣典庫空相憶
久經籍沒本無有畀是區：更
何惜東坡黃州日百錢吾今甚愧費
千億亂世郎官倚牆餓公卿採椽
乃得食丈夫一死本預辦獨歎窮
途在絕域自笑一身不善謀空腹
高談營八極素衣

將敝豆粥難聖主蒙塵猶感：孤臣奉詔不能救負
罪萬死淚沾臆津遼流血滿江水中原陸沉民胥溺
吾亡海外已天幸逝欲奮飛救無力日噉三升太負
腹大庇閣中空歎息吾所居英督署號大庇閣

檳榔嶼英節署前道徧植大樹似榕經年皆花
時：換葉花在樹頂黃細如微花時望如黃
雲惟一日即落吾席地其下花滿襟袖徧地

皆黃可惜光景太短名為一日黃

修柯密葉蔽雲霞黃微金蕤滿頂花昨日開來今日
落可憐頃刻短繁華

天雨散花如布金盈床徧地更弥襟呼童掃蕊縫為
枕擁几攤書卧綠陰

嶼有花馬拉語名為布牙側甚綠葉如劍一枝
直上千花園合九層分布如夜合而大朵皆

下垂色白如團雪望之如白塔玉樓亦如旌
節英督署前有二株開時雪光玉色吾每日
玩其下名曰旌節花

千花團結九層垂雪聚冰凝五尺枝海外節樓花第
一便名旌節可相宜

檳榔嶼大庇閣閱報

樓前碧綠好煙鬟松石深翠黛斑忽被黑雲蔽天

過小童警告失青山

兵燹節樓床前對山每朝暎既上小婢開門蒼
綠溢目得意如在羅浮匡廬間也

中原憂患滿人間海外逋亡轉放閒高樹當樓朝日
上臥床攤被看青山

喜健曾孫周晬寄同薇女並示張夫人

去港忽兩載抱孫周一半錦綉知慧甚口印孰持先

能解老人意應傳太史篇
亂離何日見催老撫華顛
己亥九日由加拿大還港假道日本日人受偽
政府託有違言前內務大臣品川彌二郎子
爵以死力爭于其舅山縣有朋侯時為相也
乃於神戶上岸警吏接送至馬關而還品川
子為大儒吉田松陰高弟以松陰先生比余
今聞長逝追思箴規救助之德為之泣然

老鶴清聲唳九天
松陰儒統託薪傳
尊王講學生平志
比擬深慙似吉田

秋風跨海過橫濱
逐客關津阻入秦
慚媿先生為死諫
假途神戶許亡人

東海洪濤日夜驚
未能執手謝平生
九原不起斯人歎
獨望蛉洲老淚橫

即事有感 時苦蚊

早歲金仙入夢思，碧鸞舞後彩雲遲。
海枯聞到灰飛盡，花落花開付阿誰。

求仙採藥久蹉跎，普度深慚過愛河。
爐火冲天丹未就，蚊蟲下界擾何多。

避地檳榔嶼，不出日誦杜詩消遣。

亂離日已甚，憂思日已多。
我欲托詩史，鬱結弥山河。
每讀杜陵詩，感慨更摩挲。
上念君國危，下憂黎元疴。

中間痛身世慷慨傷蹉跎千篇仁人言低諷長吟哦
幽居得物理可吟天倪和如我腹中言聞之嘆奈何
奔走世喪乱辛苦道輒軻我遇与之合流離同一科
我官步後塵工部冠同我便道子美詩可作明夷歌
我詩可不作人應無我呵登高覽大荒披髮滌滂沱
吁嗟稷契願故宜投世羅

光緒二十七年六月二十八日在檳榔嶼英督

署大庇閣望闕恭祝萬壽

六龍西狩慶將旋
沸海波平止鎧鋌
中國不虞分玉斧
吾君無恙祝金仙
最痛蒙塵求豆粥
有時吹夢入鈞天
尚想冕旒仁壽殿
流離海外已三年

邱菽園孝廉刻先師朱九江先生論史口說書

成見賜賦謝

此乃學者聞講義時
倉卒取義詞尚待潤色
然大義可窺一斑也

冠歲摳衣謁禮山

講學地名禮山草堂

恭聞斧鉞貶權奸董承

忠烈豈謀反陳壽千秋有厚顏

豈料門牆老弟子親奉衣帶作孤臣
普天冤憤久顛倒幸藉微言白後人

遺書焚盡義無聞口說流傳更可珍
多謝邱遲為搜刻要令天不喪斯文

奉詔無功負罪愆主幽國亂只呼天
不圖絕島投荒日辟呬如聞又廿年

檳榔嶼冬晚望景物

白路迢迢：直似繩綠蕪極望晚霞蒸半山落木髮誰
刺滿屋纏藤衣不勝露地白牛猶食草帶錄烏鬼自
燃燈獨憐旌節花如雪寄託南蠻淚暗凝

庚子七月居檳嶼督署今己辛丑六月手種藤
已花矣

我居檳榔嶼侵尋已一載節樓頗嚴敞迴廊環其外

修柯拂層雲沉陰翳靈藟步牒曲迴合密蔓纏瓦蓋
去年所種藤紫花何暖：凝風揚長條蜜蜂群噪採
墜葉滿階徑芳草共萎蔓黃花落遍地鋪金燦從：
深綠栴榔樹遇節綠撐解傍廊鬱翠竹清陰帶爽愷
此物南洋無獨立如有待岬中攀垂枝得意忘時代
黑人知我意持帚將榻徙五尺白藤床高卧攤書改
白牛牧已狎鳥蠻語少解兩耳挂寸錄鼻珥燦光彩

兵房環蜂窠修途鮮馬載婉孌印度婦圍豚趨不急
紅巾而黃裳蔽面行暄：不見中土人但與蠻俗對
越場白闌干數里接青靄岩岫列翠屏日夕瀉嵐黛
藍輿登山椒橫晚望大海煙潮但浩沓中原果何在
虞舜西巡狩白虎未奏凱獲麟歎道窮烹魚誰滌漑
我生本如寄觸遇皆樂愷時物變已多歲晏秀不采
兵嶼督署秋風獨坐雜作

憂患弥天塞太空
樹聲爭戰起長風
樓臺寂寂無人
到廊外藤花開小紅

山色深藍將作雨
日光變黑忽生雷
獨倚欄干數鷄
鴨黑奴騎得白牛來

贈菽園以焚餘楞伽經

此為震旦證心書
我住南洋挾与居
大海波濤渺無
住聞獅子吼證如

書三百篋被秦焚此是焚餘敝帚珍一卷楞伽經歷
劫付君心印一時間

聞和議成而東三省別有密約割與俄各直省
人士紛：力爭

魏絳和戎豈有功只愁雲霧蔽遼東憑將士氣扶中
夏淚灑山河對北風

四月同璧女來棋侍膳因與聯句

綠陰萬樹繞樓臺_壁紅蕊黃花次第開_生醉眼慢看
新世界壁餘生歷盡劫輪迴_生霧霾兵墨聽悲角_壁
雲墜前山殫酒杯_生多難今朝復相見_壁黃雞朱蠅
不須哀_生

庚子七月十五日泊丹將敦泛輪來庇今日又
辛丑七月十五已經年矣追思壬寅七月望
在印度癸卯七月望在爪哇甲辰七月望在那

咸乙巳在紐約丙午在意之美蘭那丁未在
瑞典戊申在瑞士己酉復歸檳嶼庚戌過丹
將敦到星坡再讀之俛仰陳跡益興懷也

去年丹將敦明月照海雪今年檳榔嶼又復見明月
我生多去住明月幾圓缺人生若飛鳥太空自飛沒
蹤跡皆偶留長久同蒼卒歲：客遷次年：老甲乙
一任大化遷豈與人間絕舉以問明月明月不能說

借居檳榔嶼絕頂英督署避暑山趾至巔十餘
里磴道單盤兵壘環之俯瞰山海花木深闕
嗟吸雲氣自奔亡後居此最適矣

海山跨絕頂樓閣瞰玲瓏牙旗舞十丈縹緲颺虛空
石樓敞闕麗兵壘森青鋒雜花沿廊生海棠覆地紅
青松圓若塔磴道夾鬱翁俯瞰群山伏下走羅群雄
有如奔萬馬蒼：飲池中大海如凝膏澄明磨青銅

極目一片白渺：際蒼穹大艦破浪來正練
蝨蟻蠟下視棋嶼市蟻垤營窟隆千里竅海峽萬島點芙蓉
東接珠崖波西當印度衝回睨望中原悲風接華嵩
瀟：出白氣有雲起下峰逢涌而上騰靉靄与天通
迴風飄蕩之諸山橫被封隱：見林木漸：露蒙茸
模糊復蔽虧穿闥入簾櫳出納盡雲氣長涼亘太空
元氣浩往來呼吸變鴻濛天宇忽開朗山海還青葱

葱澗見神人遊戲識化工我生歷萬劫不復嗟途窮
縱浪聽大化地獄亦天宮妙境既清絕峭崿罕人踪
體適而魂安切利將毋同勿復視下界動我憂心忡
棋嶼月夜倚闌
倚闌終日望中原淡月窺廊雨打門浮海居夷吾亦
樂花陰徙倚作桃源

憂患既多頭風時發輒奏自鳴琴鐘自加拿大

梟花威士購來者
梟花準花園樓閣高迥迥
思惘然

曲調鏘：似管絃頭風每發賴調宣
一自梟花樓閣
夜伴人岑寂已三年

檳榔嶼放歌行

樓東檳榔樹樓西椰子樹樓南紅莢樹樓北黃花樹
樹：相引臨官路樹上杜鵑啼血盡月向低樹下山

鷄舞舞罷千山雨芳草萋：綠樹迷：鶉鴉不啼王
孫不歸孔雀翠已損鸚鵡言甚婉樓閣深：簾不捲
大鷹如鵝欺人軟

中秋夜栴榔岫絕頂英督別墅步月四首

與婉姬同

璧女侍遊

萬松夾徑幾徘徊露浥垂蘭香撲來小坐松陰雲繚
繞月明萬朶白花開

山路高低萬樹陰樓臺無數抗山岑
夜來步履三巡數花影松濤十里深

天風浩：白雲行海氣濛：高岫橫絕頂樓臺人獨立
俛看下界月華生

十丈牙旗點晚風海棠覆地璫飛紅
俛視萬家燈火冷茫：天海月明中

漫行檳榔岫山頂羣山深迤大木垂藤碍路幽

絕採花以歸

長松滿壑樹參天，大石為床席地眠。
山路深無人不到，白雲無盡海無邊。

山遊亂踏果何之，便遇窮途亦不悲。
十種名花採歸去，明燈醉酒聽歌詩。

補撰春秋筆削大義微言考草堂舊註已焚失
出亡後自庚子十一月朔冬至始業辛丑六

月二十日注成于檳榔嶼英督署之大庇閣
凡百九十七日書成題之

硃：焚膏二百日茫：筆削三千年大義微言擬十
一幸從口說演心傳

執器西行曾有夢抱書東走竟遭焚太平大道天難
喪蒙難幽：續此文

八月假檳嶼絕頂臬司別墅与婉絡同璧聯句

壘壑深：萬木稠同壁茫然天地一高樓婉絡此身

便欲長終隱更生何用求仙到十洲同壁

白雲深處有高樓同壁天海蒼茫見十洲更生香泉

一飲能長壽婉絡便尔幽棲解百憂更生

棋岫頂假居臬司別墅臥室窗臨山海顧而樂

之戊申再到
己改矣

茅齋結託群峰頂幽室安排花樹間開闢兩窗長不

開前看滄海右看山

栢嶼山頂縱遊

山路幽深處：經山花山果不知名
垂藤碍路無人
遇時見吉甯口水行

山居七日了無事
贏得新詩一卷來
酌井看雲天海
濶詩中雲氣自縈迴

山花山草滿籃歸
幾担山香下翠微
喜得玉紅花雨

樹澗：石瀨過苔磯

張夫人生日醉吟以寄

香霧清輝隔兩年海山北望月方圓
女兒採得山花百絕頂靈山作壽筵

檳榔嶼頂夜看雲

嶼嶼絕頂倚樓閣高：上通偈天闕
俯視萬丈乃至雲蒼：厚鋪如海雪
蔽虧合市數萬家截成半島若

環玦勢若巨浪撲岩嵒侵襲岡陵頂欲滅分師略地
兩道出白袍白馬白旗揭洶涌騰奔無可禦山腰忽
已被橫截漸：上侵迫峰頂有若洪水漲汗滴懷山
襄陵無不到似泛巨艦聽飄撇林木忽已被周遮大
浸稽天：柱折罡風壓之不得上分作長圍氣不竭
遂退迴蕩塞海面島嶼萬千光怪別雲海水海成兩
層光影怪變不可詰竟夜扶筇行巡視天風浩：隳

殘月侵曉忽已見海日光彩瀆紛天宇出殘雲零落
樓丘堙海上雲海真竒絕

哭祭軍機陳次亮郎中

悲風躡海波驟雨掩平地陳公天人姿秋色忽凋棄
吁嗟維新業于何呼同志君才寔鼎鉉天生清廟器
深通中外學緯畫長政治日夜憂中國誓心拯衰敝
京師承平久千官多諱滯清議惡變夷守舊拘法制

百鳥皆反舌丹鳳鳴鏘噦神采慄峻整正直瀉肝肺
見我即解帶兩謀若印契時當割臺和士夫知憂喟
共聞強學會爛然慶雲蔚寫誠說常熟十二策竒計
惜我沮蘭尚鬱：紉荃蕙奪去鳳凰池佯狂真避世
十年直中樞津要頗得位一朝泣枯魚長貧無歸計
及語君父間大義聲色厲聖主方潛龍外論頗誹詆
公獨慷慨言聖德寔命世中國必不亡中興此焉繫

宵旦憂呂武談之輒掩袂戍戍津大閘君聞早相謂
當有房州變殷憂惟眉涕吾猶疑其訛及信難為計
賤子竟奔亡聖上瀕危廢惻念君言天乎空灑涕
京邑旋烽燧蛇豕橫燕薊黃屋已西巡轉側圍城際
復口日有聞哲人忽摧逝昊天胡不弔殄瘁寔可畏
他日幸維新大川之梁濟陳荔奠椒漿憂哀令人瘳

六哀詩

戊戌之秋維新啟難堯臺幽囚鈞黨起獄四
新參楊銳叔嶠劉光第裴村譚嗣同復生林
旭暎谷御史楊深秀漪川及季弟廣仁幼博
不識遂戮天下冤之海外志士至歲為設祭
停工持服蓋中國新舊存亡所關也六烈士
者非亡人之友生弟子則亡人之肺腑骨肉
流離絕域嘔血痛心兩年執筆哀不成文辛

丑八月十三日奠酒於檣柳嶼絕頂成五烈士詩海波沸起愁風颭來哀紀亡弟卒不成聲蓋三年矣後補成之

故山東道監察御史聞喜楊公深秀

山西湯夫子霜毛整羽鶴神童擢早秀大師領晉鐸
琨玉照蒼旻勁翮刷秋鷲嗜痂癖鄙言論學起嶽
瑣碎蒼雅奧繁蕪傳注博山經與地志佛典共史略

繁微舉其詞一字無遺落吾能張其軍見公生畏卻
尤能舉大義行已無愧怍清絕冠臺官子病無醫藥
趨朝輒賃車賣文乃款客時經膠旅警慘憂同疴瘡
旦夕論維新密勿頻論駁首請聯英日次請拒俄約
繼言廢八股譯書遣游學涕泣請下詔大變決一躍
御門警羣臣開局議制作聖主感誠切大號昭渙若
四月變法詔永：新中國大旱沛甘霖群生起怍樂

奇功動日月，衢尊共斟酌。大蛇卧當道，神鷹擊一攫。
憂甚武嬰禍，惜無東之略。忽驚神堯囚，赫矣金輪虐。
黨禍結愁雲，盈廷瘖若縛。抗章請撤簾，碧血飛噴薄。
董軍密入京，蕭々八月朔。吾時奉詔行，公來告氛惡。
揮手作死別，吾擬委溝壑。豈知痛嵇生，淒絕山陽笛。
昔謁椒山宅，遺像瞻瓜削。見公適々驚，骨鯁貌相若。
故知是化人，來為救世託。雖慘柴市刑，能禱權奸魄。

大鳥遠故鄉剛毅死猶嚇

故四品卿銜軍機章京參預新政候補知府譚

君嗣同

復生奇男子神劍吐光瑩長虹亘白日青鋒拂蒼溟
足跡徧西域抵掌好談兵橫厲志無前虛公心能平
才明挺峻特涉獵得其精于學無不窺海涵而淵渟
文詞發瑰怪火齊雜水晶孤孽既備嘗德慧更耀靈

徧探異氏奧遠徙筐頻傾歸心服大雄悲智能長惺
聞吾談春秋三世志太平其道終于仁乃服孔教精
貫串中外學開通治教程奇闢破宦奧華妙啟化城
大哉仁學書勃率天為驚金翅來大鵬溟海掣長鯨
巨力擎燭龍雷霆吼大聲吾道有譚生大地放光明
師：陳義甯撫楚救黎烝變法与民權新政百務興
湘楚多奇材君實主其盟大開南學會千萬萃才英

新法丕矯變舊俗滌以清聖主發維新賢哲應求徵
奉詔來京師翔鳳集紫庭宣室前席問帝心持簡膺
有命參新政超階列群卿向以天下任益為救國楨
旅吾南海館緯繡夜不寤首商尊君權次商救民萌
條理皆闇合次第擬推行煌：十七日新政煥庚：
大猷未及告竒變怒已形衣帶忽飛傳痛哭發精誠
大床方卧疾揮涕起結纓自任救聖主揮吾出神京

橫刀說袁紹慷慨氣填膺奇計仗義俠惜我皆不成
神堯遂幽囚王母宴飛瓊緹騎捕黨人黑雲散冥
吾時將蹈海欲救無可營東國哀良臣援拯與東征
上言念聖主下言念先生兩者皆已矣誓死延待刑
慷慨厲氣猛從容就義輕竟無三字獄遂以誅董承
毅魄請于天神旗化長星

故四品卿銜軍機章京參預新政內閣中書林

君旭

曠谷挺天秀，髫年富文史。波瀾盡老成，清妙紆練綺。
文辭有漢聲，詩詞得宋體。下筆麗耆宿，十八冠鄉舉。
弱冠游京師，名聲颺鵲起。王粲詣蔡邕，陸機入洛汭。
一時譽竒材，公卿為倒屣。折節不自忌，來問春秋旨。
商榷三世義，講求維新理。論才荐大科，交章用處士。
奏對稱師說，變法陳古始。前席承宣室，參政贊彤几。

經綸謨密勿夥頤難述紀頗聞罪已詔敬輿筆所擬
至今感人心普天思聖主蕭牆難既作堯臺囚莫弭
宸衷顧從容眷惜微臣死密詔促出行緣汝籍弟子
造膝近御座衣帶傳密旨捧詔相抱泣報國同誓死
惆悵吾去國綢繆汝救主倉黃解玉璽蕭颯走緹騎
非無西人哀援手為救止慷慨乃捐軀投身赴大理
嗚呼萇宏血三年碧不止娟孀沈公孫令德儼才璿

竟作墜樓人長咽秦淮水晚翠自名軒完節無愧此
每見青琅玕傷心淚滿人間廿四年英名滿天地
故四品卿銜軍機章京參預新政內閣侍讀楊

君銳

峨岷氣悽愴精英起肅：楊君抱粹姿溫：潤如玉
學問窈淵懿神體窺渾穆史學尤精研晉書手注錄
久遊諸公間京華推名宿謹密無少洩謙讓似不足

平生憂國意慨歎眉蹙：代草諸公疏補救強蹙跼
與我志意同遇從議論發公車始上書號名君鞠：
繼乃會強學君肯同開局豺虎磨牙食羣士皆退縮
君首爭署名抗章聽誅戮膠事吾去國君走為推轂
後開保國會被劾君猶睦始疑謹厚姿頗慮弱不足
豈知百鍊金光芒深韜蓄學術本少殊行事乃相服
益知君子心憂國至誠篤聖心善鑒拔大器備令僕

參政十七日玄黃邁痛毒帝座竟傾閣衣帶密傳讀
上言憂中國變法救危辱下言觸慈怒六位將傾覆
設法籌營救焦灼企望速君密傳同志失聲咸痛哭
顛危竟不救萬死罪莫贖董承以反誅千秋傷冤獄
故四品卿銜軍機章京參預新政刑部主事劉

君光第

我不識裴村裴村能救我署奏拒鷹鷂心感報無所

昔開保國會千丈松磊砢模糊一握手未得親右左
君言讀我書傾倒亦已頗故人多石交下石一何夥
故知交在神面交多坎阻京華聲利海十年潛默坐
謝華學獨劬寡交足頗裏閉門陳正字直節無揜姁
小字作顏書剛健少婀娜研精蓋史學維新乃最果
聖上切旁求陳撫荐自楚新參一朝拔得人四海賀
王相客盈門不投一刺過密勿贊新猷氣象皆駸駸

改元設參謀明堂燦藻火訐謨善畫策君莫不畫可
奪門忽聞變投獄無少軀竟從龍比遊哀哉呂武哥
人才付一燼邦國嗟長鎖吁嗟孔融子覆巢卵同挫
側望蜀川雲灑涕風悲楚

故候選主事亡弟廣仁

壬寅八月十三日在大吉嶺補作附錄于此

哀：天疾威子桑遺淫虐孽龍發雷火鸞鳳為燒灼
骨肉遭鎗醢肺腑痛煎割一念一腸斷再念涕橫落

汝生七月孤同產吾與若先公屬纊時撫弟遺顧託
汝幼多疾疹母憂藉醫葯居然幸長成我；丹頂鶴
隨吾三十年讀書觀大畧天馬不受縲遺棄時俗學
英姿稟金精神鋒挺銛鏑寶劍未出匣虎氣隱騰躍
白光時一瞥照射無不削橫厲空無前碧霄捩秋鷲
縱橫出竒論人天供噴薄新理乍雷驚異想開山鑿
結友何易一披心同研索十年抵足談相視得大樂

斟酌西哲說掃除舊俗幕當時國守盡難遠倒其橐
時人若聞之耳聾此大喝吾頗能新言寔施稍起怍
汝乃言即行勇猛無畏卻長劍睨九州神鷹橫大漠
吾以時未可強力加抑遏每論四海豪輒謚為闇弱
頗嗤吾拘懦常箴吾痞瘡臨事眼如電口手斷無錯
欲汝芒韜斂試更折其角捧檄屈一年邈然棄官爵
人情遂深達屈伸妙取酌千里進一步自茲器琛博

民智哀不開譯書為之鑰民身憫不健西醫導先覺
婦女嫉抑壓女學徇木鐸惻々悲裏只開會解纏縛
四者為己任業此日呼籲戍戍吾受知緯繡佐君國
顛々廢八股民智可開廓審時謝餘事知幾慮禍作
頻詠歸去來招隱日有約吾亦知顛危顧聞消息惡
傳言房州廢即在天津聞詎勉欲救主不忍拂衣作
王卿敬汝才剡章薦逆閣忽奉衣帶詔旁皇勢無著

汝乃身任之，促吾出京郭。倉卒緹騎來，無妄踐湯鑊。
慷慨就獄囚，視死已無愕。柴市天曠靈，冤雲飛作電。
頭顱無人收，慘々歸大壑。頻年遭義俠，收骨摩燕關。
汝以吾被戮，哀哉心肝絕。平生風雨床，親愛古軾轍。
回憶南海館，昧爽門前訣。豈料永酸辛，為國竟流血。
捨身質文明，舉國憶英烈。老母年七十，思子長憂結。
汝往遇孝媚，毋念肝欲裂。給言慰老母，云汝走胡羯。

蒙古山寺中為僧待時節時偽作書遠執筆輒哀
嗟汝女尚能嬉汝妻忽知洩終日淚盈頤見姑忍哽咽
吁嗟吾罪咎從何慰母憫百輩保口會持服陳祭潔
忽：四周期宗周衰如滅聖主尚見幽大仇痛未雪
仰天灑血淚化碧應不滅

喜聞李慈園尚書赦歸

荷戈久痛三年戍投老誰招萬里魂竟緣鈴雨淋

道得唱刀錄返國門定遠生還寧自料中原重見泣
何言應聞聖主猶無恙只是先生霜雪繁

累公遠戍皆因我聞赦君還喜欲狂宗玉宅中歌別
曲張騫槎上返魂方天山勒馬看全漠黔水行舟見
故鄉天可見憐能捧杖白鬚相挽話新疆

春聞李苾園尚書新疆赦歸

前二詩失稿李公索詩補作又失未

寄今並錄存以記懷舊之思云尔

喜聞赦詔聽歸田
雁磧龍堆路幾千
鈎黨甘陵南半
部荷戈雪窖北
三年孤臣憂國死
無地老叟還家生
是天多難敢思親
捧杖但聞索句已
欣然

須彌雪亭詩集

康南海先生詩集卷之六

後學東莞崔斯哲手寫

自辛丑十月入印度居大吉嶺葺草亭於所
居名曰須彌雪亭至癸卯四月乃行著書遊
山幽憂放浪都為須彌雪亭詩集凡九十首
十月去檳榔嶼往印度將入加拉吉打見恒河
異域流離逐客悲飄然浮海更何之欲尋佛國清淨

土頻寫旄丘瑣尾詩石島夜深駭虎嘯雪山幽絕少
人知朝來已見恒河水欲證無生度阿誰

遊中印度呢忌喇故京十一月十五遊沙之汗
帝故宮陵是夜月色如銀再遊王陵遊人甚
多宮陵皆臨恒河純以白石為塔殿高挿天
半倒影恒河中費十二萬萬地球巨工未有
過此其精養亦与羅馬彼得廟同冠大地焉

英人以為公園要曼歌於林間可感愴矣
遺廟尚存摩訶末故宮同說沙之汗玉樓瓊殿參天
影長照恒河月色寒

自阿喇霸邑尋佛教僧寺有人言剎都喇有之
至則絕無尋至了忌喇爹利即古之舍衛也
亦無佛跡大教經劫感慨而歌之

黃面黑足披白氈塵沙遍地來乞食當時瞿曇率徒

遊而今掃地無佛跡緬甸暹羅家：事西藏蒙古人
人祀旃檀莊嚴共泥首支那日本同奔走豈知佛生
中印度千里無僧無一寺但見恒河東涼水滔：摩
訶末寺挿天高婆羅梵志苦身軀裸體仰天卧泥塗
供祀妖像羊与豬馬身象首塗粉朱人持香花与燈
俱白牛入廟膜拜咨獼猴千億雜人居施以豆麥走
羣狙形俗愚詭可駭吁如入地獄變相圖徧尋佛教

萬里無成住壞空本非相億劫變幻只須臾嗟尔象
教浩大亦滅絕何況人家朝代國土之區：固知教
宗無美惡視乎人力為張弛非道弘人人弘道可鑒
可懼可驚瞿悟入諸天更無着明月照我自清娛此
月曾照瞿曇面諸聖河沙皆曾見今我感愴人間世
劫無免者如水逝高天蒼：大地搏：懼大地之無
碍乃諸天之常存

夜宿刹都喇茅店遊婆羅門廟猿猴千萬見人
不走施以豆則爭來亦異觀也

遙尋古教刹都喇落日牛羊滿野原塔廟千重猴萬
億來看合掌婆羅門

茅蓋蘆簾白彩屋繩床無褥來一宿只見恒河無佛
蹤短牆月上照幽獨

遊印度舍衛城訪佛迹

十一月廿日于舍衛城外三十八里得佛舊祇林須
菩提布金地遺址殿基猶存三角樓尚完遺柱三百
有四其西南則半圯矣環廊尚有三面皆純石半完
半圯西門五石龕最完好其西南一堂崇牆三重巋
然餘皆為回教所毀登塔四望羣岡自鷲嶺走來數
重環裹其氣象為印度所無宜佛產其間也頽垣斷
礎無佛無僧大教如斯浩劫難免其他國土一切可

推携次女同璧來遊感愴無限車中得九詩紀之支
那人之來此者自法顯三藏而後千年而至吾矣

印度萬里無一山舍衛大城鷲嶺環粗石怒奔走平阜

抱迴佛窟營中間印度自須彌山以南萬里平原無一

而石氣莽蒼為印度所無餘山城鷲嶺獨起雖高數十丈

產于是矣實為印度之中故一成佛土四營帝都人皆

于金陵及燕京焉

未登關里撫遺檜先來祇樹訪布余地上三千年教主

頽垣壞殿憶余心

堂構經營須長者鐵表摩挲阿育王殿廊遺柱三百四此

是瞿曇說法堂

殿中有鉄柱高二丈餘六合抱是阿育大王所立刻梵字

布金舊址周七里結石精廬餘五間想見當年妙嚴相

回環舍衛六口山

法顯最先記佛國玄奘以後無西遊支那次我第四客

白馬馱登二石樓

金殿皆壞惟二角石尚完登臨惘然吾車用白馬想見秦景馱經今佛教

東行而西方反寂滅我
未為支那第四人矣

可憐蒙古第一帝長瘞原陵依講堂可蘭文字徧刻壁

七百年來同蕪荒

蒙古第一帝心捧顛巴慮打馬士營
奠佛殿旁崇門屹然皆刻可蘭經文

今亦同廢第一帝疑
燕帖木兒之子也

高塔摩霄三百級俛看舍衛四遷城霸圖佛跡俱零落
指點山河落日明

世界本來有成壞化城無礙現華嚴天龍神鬼圍千億

似有雷音震塔尖

夕陽驅馬重徘徊
再上臺階認劫灰
迦葉曼殊膜拜處
更無香火首頻回

遊逝多園湏菩提
布金所營精舍登
角樓拾石而歸
此石二千五百餘
年矣自吾入中國
可為瓌寶

須菩提手所經營
驚嶺移來久聽經
到今二千五百載

魯叟當時猶未生

深夜至霸拿拉士携同璧女敲數客店門不得入
苦甚

霸拿拉士四更霜度仵越陌夾長楊停車逐客看殘月
絕域無歸堪斷腸

訪鷄足山伽耶靈塔佛蹟時天寒雨大道滑馬蹶
不能行停車中野久之改坐牛車入寺艱險至

矣

遠訪浮屠去天寒霜雨零泥溝看馬蹶野曠絕人行樹
影連高塔山嵐繞故城白牛車遠近乘重覺勞輕

偕同壁遊印度雜足山伽耶塔

石山秀聳帶雜足料有靈竒佛窟開靈塔嵯峨十層
出曾經悉達坐禪來

水亭悄：對方塘十七禪龕古道場想見法王入定

日法雲亂墜雨花香

寶樹婆娑摘葉回曾經佛坐亦悠哉
光孝菩提偈老矣只為此樹作雲來

貝葉文書分五簡梵天經咒得三函
施以夫妻雙合像易來古石兩瞿曇

樹下青：一片石當年晏坐落天花
臺前石鏡摩挲徧佛影長留識妙華

伽耶靈塔百八尺環繞小塔像千億坐立十像真法身
撒以香花似相識

古德靈墳塔百千或經二千三百年馬鳴龍樹今在否
亦是龍華大會傳

我來印度訪佛跡只此猶留丈八身夢入漢明知此是
撒花供奉雨紛

佛像二尊大車載雙白牛馱以背此像二千二百載

歸作支那最先輩

絕域深山宵失道，狼嗥虎嘯風阻人。
弱女抱持行半夜，驚魂又作再生身。

去時霸雨馬不行，夜歸山谷道縱橫。
天惜奇寶不易與，故作艱難如此程。

十二月十一居大吉嶺，有松七十三株，而無花，遂購之加拉吉打寄到，乃除夕也。

雲松滿山館所之祇繁花遠購經千里泥封滿一車
海棠紅覆地石竹翠盈家避地應元日幽棲莫嘆嗟
辛丑除日新遷大吉嶺山館得報大駕還京親
謁郊廟引見外使君位小定為戍戍以來未
有之事喜賦

鸞輅西巡喜復歸傾都迎拜淚沾衣四年郊廟親龍
衣百國冠裳覲紫微天落前星空僭偽人懼故主快

瞻依追思兩載驚心折豈意愚忠願不違

明夷蒙難斷遺篇海外流離歲四邊救主無功宜萬
死思親日遠已三年但假著書消歲月幸能蠟屐攬
山川此中衛藏通無路故國遙瞻只慘然

大吉嶺頭山館新雪峰天半對崑崙閉門種菜吾將
老拄笏看山日數巡城郭人民猶故國鐵橋雪嶺此
通津獠奴日課栽花竹異域年闌託隱淪

壬寅入春三日山館林中繫秋千

入春忽忽已三日去國迢迢又四年花樹怯寒尚含蕾
峯巒近莫總含烟中原萬里無消息大壑千尋獨醉眠
且喜林園有餘地更饒狂放繫秋千

雪峯天際正當門曉望崑崙山最尊孤卧柴床臨絕壑
頻穿竹徑過鄰園垂簾礙帽時低首落葉盈衣故不言
避地偏宜閑靜性倦聽山市開聲喧

正月十二夜月明如晝滿道遊人偕家人步月
繞行大吉嶺山路上下盡繞鐵欄樓臺燈火
點綴上下崖路軒豁隨處有亭几可坐歇如
一大園林也

廿里環山路繞闌真成七寶鐵圍山百亭排几危崖
上萬木驚濤曲徑間上下樓臺占邱壑億千燈火綴
烟鬟月明扶杖尋幽去白道迷雲夜不還

正月十三竟夜遊山歸即卧忘著書矣

今夜遊山去幽行斷著書白雲遮下界明月落吾廬
松籟頻來枕花陰更荷耜無家更安住長此定幽居

十四日晚步月

晚來扶杖看煙鬢日落柴門夜不關嵐蕩茶園橫半
嶺雲穿松徑遇前山花畦曲：行三匝竹徑深：露
一斑試打秋千更神往已看明月落人間

正月十五夜登大吉嶺山頂見須弥雪峯如片
雲橫天半有白塔神壇為哲孟雄祭天處神
幡無數光景竒絕生平所未見也

大吉山巔踏月行百盤磴道頂長平引攀霄漢青天
近隱見須弥白雪橫烟霧重冥雲四合樓臺千萬火
微明神壇白塔風幡動獨立蒼茫問太清

大吉嶺十六夜步月

山路迢迢過幾層，迷濛嵐靄見疏燈。
俯臨絕壑看雲走，獨立高峯待月升。
山市千家聞犬吠，禪龕一磬定高僧。
朝雲伴我憑欄坐，五百年遊可得曾。

步盡危崖落葉聲，樓臺背嶺絕人行。
萬松夜卷波濤大，絕頂風來鐘磬清。
激：深嵐遮壑谷，澗：飛雪滿邊城。
白雲忽蔽前山影，塔樹模糊月失明。
曲徑深：夾塔松湖洄，松盡有烟封。
羣山夜碧不見

樹半嶺天清時聽鐘
大壑籟聲奔萬馬
中天月色散
千峯濃雲來往盈襟袖
久坐崖邊尚見從

先忌哭亡兒同吉同吉
死葬大吉嶺

來去何因夢尚疑
笑啼成壞是何誰
今朝先忌孤身
拜身後無人淚
暗垂

五月閒數大吉山館花木作記

老松六十有三株
芍藥玫瑰一百餘
可笑老夫無用

場移花數樹作工夫

題大吉山館圍立松下者同璧也避地得樂回
念京師流血不知塞翁之馬誰為得失也

是誰簪髮歌松下自在烹茶嘯竹間芍藥滿崖雲滿
徑藤花纏屋樹纏山園林拓影能誇大身世無依反
得閒頗念高衙黃閣者兩年京室血斑：

大吉嶺樓閣濃深處有兩崖九曲上下欄干五

重橋亦五重左右飛泉六道飛下與雲氣濛
洄最為佳勝雨後泉聲尤大吾冒雨策馬觀
上下三巡路無行人讓吾消受也

兩崖九曲抱闌干林石青葱樓閣寒上下五橋九飛
瀑誰能立馬雨中看

尋覓賃廡有屋在翠崖深林中雨泉夾屋左右
幽勝甚欲租之

萬木陰：崖翠開中林曲徑路千迴藤蘿峭壁精廬
結夾道泉聲日夜來

大吉山館新築草亭開曲徑設竹闌作柴床
草名其亭曰須弥雪

松下藜床坐幾回不知飛雨竹間來
回看山石歌紅藥濕盡松枝滴碧苔

呼童掃徑葺茅亭雜草移花日課程
檢取松堆竹下

坐野人拾去尚青：

大吉嶺暮行

泉瀑爭流勒馬行
墜紅滿路翠籐橫
暮潮落後松濤起
隔嶺雲封一火明

翠壁臨流石氣粗
穿林磴道徑盤紆
上方雲瀑看飛雪
獨立危橋作畫圖

讀史記刺客傳

封狼當道狐憑社竟賣中原起沸波遷史憤心尊鼎
政泉明詩詠慕荆軻要離有塚誰能近博浪無椎可
奈何羞甚蒼生四百兆豈聞一客劍橫磨

大吉嶺中最勝處為上下五橋每日暮駐馬聽
泉于是

山居供養但雲烟跨馬清遊勝地偏大吉嶺頭日何
往五橋上下暮聽泉

自大吉嶺携同璧女遊須弥山行九日深入至
哲益雄國之江督都城英吏率國王迎于車
站入王宮出其妃子相見衣飾鏤器皆中國
物王拘降于英十四年欲遁不得見我欣然
以貝葉經酒筍相贈吾解帶答之其妃以拓
影相贈璧女解玉戒指贈之蓋故受封於我
國者也

我遊哲孟雄其王迎道周珊頂而袴褶脚鞞腰帶鈞
從官並冠袍雉尾擁刀矛森：漢官儀驚喜入我眸
延我入其宮莽：依荒丘極望少人家徒見峯巒稠
岡顛颺大旂金頂抗崇樓列室耀金章梵文畫幡旒
正殿設中座拜伏多羣酋南子出握手霞披珮琳瓊
鳳冠珠纒：中華妝尚留設几飲我酒從官跪獻酬
贈我以梵經酒筭与茶甌百器皆華物慙：我心慙

世譜存藏僧受封實藩侯環疆二千里虎節鎮山州
南与布丹國拱衛要荒悠惜我不能衛強英遂隸收
今爲保護國忽：十四秋給俸僅月千貧困等拘囚
英主頃加冕迫令朝賀愁遺子聊自代欲適不自由
見我上國客悱惻情尚適解帶以贈王聊用慰綢繆
頗聞布丹人望救心百憂豈知瑤池飲王母醉歌謳
煌：典屬業日：感邊陲

望須弥山雲飛因印度之亡感望故國聞西藏
又割地矣

喜馬來山雲四飛山河舉目淚沾衣此通藏衛無多
路萬里中原有是非

重九登山墜馬適遇村人拜婆羅們

重陽墜馬落蠻村鼓簫迎拜婆羅門此是霸厘除夕
日穿雲採菊望中原

大吉嶺後嶺接茶園茶花皆白夾道十里

大吉嶺頭茶有名短叢覆嶺葉青；松陰夾道引流
水十里白花生素馨

遊須彌山往來藏印間峯高入雲澗低懸壑光
景至佳陟降勞甚

危棧摩雲幾降升馬瘡僕瘁石峻增僕夫遙指高峯
頂今夕應居最上層

復過鐵橋前次夜來無火危崖百丈路廣數尺
下聞泉聲澎湃左持刀捫蘿攀壁右扶壁女
抱持而行僕人吳積仁手牽三馬前導經兩
時乃行里許方見燈光若遇猛獸毒蛇或失
足皆致死戍戍之險未之遇也

危崖千尺走泉聲重過鐵橋心尚驚記得無燈携弱
女捫蘿摩壁夜中行

雜沓峯巒過幾程馬頭斜日亂山明却看來徑諸峰
上山翠蒼茫雲自橫

日本禪僧慧海入藏求經得秘帙羊皮四篋以
二白馬馱之自稱為漢土所無者住阿耨池
三月蓋日人往藏自慧海始也索詩贈之

禪僧鑿空尋西藏白馬馱經又再來阿耨達池三宿
住金剛寶土四年回

大吉嶺名
金剛寶土

蓮花妙法真異矣祇

樹梵音亦善哉再向泥巴求古本

泥巴即廓尔喀地名乃種族名也

神山宗教見新開

十一月十二日送同璧女還滄省親兼往歐美

演說國事並召徽女來

瀛車飄瞥去轉瞬沒孤烟送汝唯雙淚思親又五年
長安幽失日大浸冥稽天家國無窮恨都來湧眼前
美歐幾萬里幼女獨長征豈不憐孤弱其如哀衆生

流涕言國故□□□□女權新發軔大事汝經營
印度決：大文明最古邦只因倡革命各自背君王
行省爭分立全疆遂盡亡鑿茲持螯蚌漁者到吾旁
印人曾告若如狗更如猫亡國宜如此哀音難重描
驅車汝親見歸國我猶遙泣為邦人道覆車毋再翹
民權乃公理憲法實良圖此是因時藥真為救國謨
光明布宗旨感激為馳驅聖主猶無恙蒼：意豈無

熏天爾未燄戮使更幽君借助金輪轉意將宗廟焚
皇輿前路暗國勢奕棋分太息無平日天涯對日曛
波濤太平海遠滄半郵程破浪翻雄志全身念所生
在家殊作客任事異談經驕吝宜淘汰無存兒女情
同薇通問學尤熟蟹行書伯姊宜偕作吾生最愛渠
文姬堪慰寂佛土合來居只念重堂老淒涼日倚閭
絕域吾垂老雄圖空自嗟艱難思舊國涕淚落秋笳

頭白須彌雪心搖躑躅花別離孫抱兩惆悵未還家
騎馬獨歸去零娉迷路行愁雲天黯黯落木樹冥冥
慘淡羣山雪飄搖異國旌鏡濠腸斷者豈不識歸程
聞宋芝棟侍御在陝被逮為之驚感聞得官救
改令看管始放懷

冰玉廣平子梅花清絕塵功成廢八股業盛贊維新
黨禍遭除免申江久隱淪數年書問絕念爾喜存身

神京淪陷後城北獄囚除黨人旋禁解故里盍歸歟
豈意寬三字翻令對尺書媚奸嗟虎吏舉國共駭吁
緹騎蒼黃捕何殊戊戌秋飛章震闕輔寬獄動歐洲
編管真來網驚魂尚楚囚伯仁由我死惻：為君憂
歸省不成憂思而作送璧女行呈母

老母七十二不侍三週星此身欲歸省束裝乘飛舲
電來告粵警中途竟不成賤子誤仕國遇禍貽所生

坐令老人涕夜：枕席零思子百不寐相見憚遐征
吾是孤生子撫育本淳：生平侍親旁遠遊無歲行
况令温清事失第空啼兄而今萬里隔望雲徒夢縈
一念腸輒斷再念魂欲冥生平頗學道不畏憂煩傾
到此罹百憂耿：相纏嬰

吾身非空桑鞠我劬勞勤固極恩不報侈言救國民
厚薄既顛倒不孝何言仁人皆得事母我獨失養親

人母皆有子，奉權采衣新。我母有若無，倚閭但酸辛。
汝歸代定省，婉言為告申。能移板輿來，庶幾瞻羞溫。
債貧久不償，受恩報不聞。人生第一義，遺憾贖無身。
號泣呼蒼天，哀哉此戮人。

日本井上圓了博士哲學第一名家也訪余于
金剛寶土留之下榻贈詩索和

萬死憐亡救國危，餘生身世入須弥。偶從空谷聞鸞

嘯了盡人天更不疑

山居日對湏弥遊坐皆是光景竒絕

湏弥天半對嶙峋夕照成金曙作銀倚嶺家：花塢
開遊山面：雪峯皺曳筇臨壑瀑盈面騎馬穿林雲
滿身曬曝携書崖上坐忽亡世界有紅塵

臘月故居賃期滿遷居公園側花竹尤幽書齋粉
白玻房虛明曲房繞花羣山環碧日携書往

公園坐讀竟日無人無事生平園居之樂未
之有也避地得此聊慰餘年

公園偌大饒泉石常愛園南地一隅精舍今朝落吾
手山林終歲最清娛百花深路臨池坐萬木盤山夾
徑扶日：携筇隨處歇便稱此地作吾廬

公園南畔茶園北崖下曲欄松下居薜荔纏牆曳亭
架雜花生樹滿階除迴廊置几夜聽瀑白室開簾晝

讀書最是坡房窗下卧紅□翠竹繞扶疏

屋前列障翠摩天暮靄朝嵐色萬千左右高峯倚樓閣下低澗曲徧茶園諸山夜碧看明月斜照昏黃射紫烟時有白雲來入戶更循山路繞聽泉

屋主東鄰善種花綠蘭紅架翠交加登高獨看須彌雪循隴頻巡大吉茶竟日無人更無事看山歸馬緩歸家生平無此幽居勝憂患何須傷歲華

日本哲學博士井上圓了索題四聖堂
以孔子
釋迦牟尼
格底康德
為四聖

東西南北五為中時宜春夏復秋冬軌道之行雖各
異本源証之則各同先聖後聖之撥正千里萬里之
心通一堂捧經相質從羹牆如見夢相同化星方寸
與天窮藐茲億劫如旦暮以俟來者之折衷

壬寅除夕騎馬遊登山頂復省蘆廬同吉生死

于此者居一年矣

蘆廬重省意淒淒：竹徑松丘晚欲迷
柴磴斜欹久眠坐
草亭無恙記提携
門廊寂靜藤花倚
房闥玲瓏蛛網棲
最是情癡桑下宿
驚心阿吉似兒啼
騎馬行：暮不歸
蕭蕭紅葉點人衣
風旋萬里壑谷動
嵐擁千峯樓閣微
歲月堂：今異昔
山川莽：是耶非
峰巔立馬揚鞭望
日淡天高雲四飛

大吉山頭住一年中原側望總淒然
幽樓日對須彌雪孤憤難回禹域天
家在神州徒惆望壯羈絕國已華顛
園林花架闌無賴故觸逋人到酒邊

壬寅歲事終矣得詩六十首是歲山居甚僻皆
遊口占之詩也

故國龍蛇慘五年迴天無力只呼天
身遊萬死一生裏家在天涯海角邊
大雪壓廬採薇盡亂雲蔽壑壑擁

床眠丈夫餓死誰知得每念君親淚似泉

癸卯正月大吉嶺大雨雪卧病絕糧

萬里飄涼棗紀域一春影事落繁花繩床高卧無微
巖大雪弥山雨又如

日本文學士姊崎正治來訪能印度語所著印
度書考證佛典甚精博

須弥天半雪橫飛國土淪亡宗教非蹈徧恒河看大

劫先生拾取一囊歸

涼離絕國一柴荆
回看河山落日明
喜見神仙紫眉
宇願從佛土學無生

癸卯二月生日祀先人每念一身孑然涼竄絕
國先墓被掘弱弟被戮思君憂國為之慘然
五年不得戲萊衣回首中原萬事非弱弟冤魂慘柴
市先骸邱壟伐松園一身報國經多難萬里思家未

得歸日對湏弥雪花落側身東望但雲飛

日本志士在暹獄寄詩請改答之

慷慨憂天下窮愁徙冥南獄中無曆日東國有奇男
天地同羈鎖風雲待定期論文拳遠訊翠□欲追驂
最傷奉衣帶鬱鬱五年中滄海嗟無俠臨淄又之功
一籌嗟莫展萬電竟誰通北望瀛臺路蕭蕭易水風

上海馬國凱游序
盧蔭本賦呈
詒公

危城擬荒十一年
回看漢月百餘園
彭水五港猶東

白雲沙中萃只
豈然生入玉闕
竄
日料定看灰劫笑

多矣人民城郭
多如如華屋山
邱惟向天
康壽

逍遙遊齋詩集

康南海先生詩集卷之七

後學東莞崔斯哲手寫

癸卯春賊臣榮祿死吾辭英人保護自印度
出漫遊緬甸爪哇安南暹羅遠涉省毋遂遊
歐美十餘國吾蓋有逍遙遊齋黃學士仲弢
為吾篆額九萬搏搖都之為逍遙遊齋詩集
凡一百二十六首

癸卯三月久居印度聞榮祿死舉國酌酒相慶
吾遂辭英人保護去印度歸省且漫遊

鬱：久居此蒼：只問天黑風吹忽散孤月影將圓
佛土行三載亡人幽六年逍遙遊去也故國整歸鞭
生民二章

生民坐塗炭國勢日凌夷西藏何疆界東遼多鼓擊
樂政淫息好亂說猖披萬里投荒涕吾生丁此期

堯舜君民願艱難險阻身明良思會合肝膽尚輪囷
欲鑄新中國遙思邁大秦吾能不拯溺四萬：生民
聞俄據東三省

鬱：瞻長白雲流鴨綠陰豈真王氣黯竟令敵兵深
百戰思開創三年病割侵萬方皆震動王母宴荒淫
緬甸哀

潞江滔：怒流徂兩山夾川走龍粗遠起滇邊萬里

紆中盡阿瓦蹲伏無千里盡海平原腴阿瓦千年緬
作都石闕聳天宏規模山川環繞好形圖王宮華嚴
皆金鋪其方二里四門廬金甲守門衛士殊黃金寶
座殿壁俱後宮白石浴可娛前苑堆山水注湖殿旁
高塔入雲扶俯視萬家春樹蕪嗟哉形勢壯海隅惜
乎荒淫不備虞五日滅國堪駭吁妃主茅棚豆羹存
遺軀上漏下濕床几無贈我縫衣慘不紓王弟乞食

于我乎哀吾屬國淚如珠降相烏江年八十頗用文
學政權執戶部亞東尤才辨昔同遊歐稍擬拾遺震
英勢主和議立致敗亡何太急烏江佛學最深博意
救生民不及國亞東語我滅亡事懸河之口猶岳
語終稱吾緬已矣中國陷危不可樂頗聞恃大尚守
舊深怨亡同一邱貉吾自逋亡但漫遊聞之耳聾三
日□惜吾官府不出遊不爾請聞驃國樂

遊緬甸仰光黃金塔

黃金作塔三百尺上摩蒼穹鬱八極白日映照光晃
蕩龍鱗雲際斜閃爍吾入潞江倚海艦萬家煙樹聳
孤直門峙白象既雄偉廊夾諸神若首職士女膜拜
白石階環繞殿幢百千億刻雲鏤金雕采麗媚佛祈
福傾民力金鳳綵繩降塔頂隨喜懽呼百戲集男女
謁廟皆跣足惟有白人許履履太守陪乘偕我遊乃

得橐履周廟壁後再入廟為所訶請之英吏得殊錫
特許華人役上殿豈意華旅過自抑嗚呼無耻不自
立永躋諸蠻真可惜

觀蘇拉派亞火山歌

朝暎旭：升蒼穹跨馬終日登青峯黃竹方節映綠
茸九坂千迴白雲封夜投客舍烟靄濛介叔隳馬心
有忡山高衣薄凍難容積仁篝火相煨烘晨凌千仞

更御風高：直欲摩天宮忽見谷迴嶺奔圓如環廿
里盤：周中間外似域垣岬嶺灣下似馬埒盤馬嫺
中有嵯峨崔嵬之崇山山顛呀豁開圓口鬱：青煙
衝牛斗之而天闕遮天黝黑龍金鱗時俯首天柱欲
折地軸朽地中金積噴薄久亘登三山俎二酉彤幢
絳纛圍其數千鐘萬鏞轟戶牖霞車虹靽炎官搜朱
祥靺股攢雜醜天闕霹靂電霆糾東峯破熄山稍低

架橋上升如雲寬其顛築亭可依棲俯視大壑目眩
身齋深廣千尺直見沙泥琉璃橫徧地微烟猶迷下有
深潭視不可曉投之以石鏗鐘如變言下無底蛟龍
頻嘶欲洞地穴直達中西□娥不來共工難揮空釣
巨鰲我將安歸

遊瓜哇雜詠

失 去 甚 多 今 餘 三 首

史萬歲誇廿萬里鄭三寶身入南洋中華士夫誰到

此我是開宗第一章

烟藍滿目帶青蕪沃野漫山千里腴客久今多大地

主吁嗟吾族苦為奴

荷人凌虐華旅待同巫
未由人慘苦不可言

學校手開三十餘授經傳教遺吾徒俛：弟子三千

衆西蜀文翁豈可無

吾編游各埠開學校三十餘今學生三千矣

重見劉銘伯徵君別八年矣金石之交始終如

一鷄鳴風雨莫若此君時舉經濟特科以直

言見黜以詩贈之

直言誰復薦劉蕡抗疏于今見李根霜雪凌寒倚松
竹似聞漆室有幽人

龍門山石生峻峭桂林文酒記纏綿豈知龍戰玄黃
後重話滄桑又八年

將為汗漫遊去港別親三首

甲辰二月六日

慣為秦逐客久作晉亡人處：非吾土行：寄此身

永懷傷日月無力轉乾坤最是銷魂者華顛別老親
及門陳蔡從送我最淒然靈會知何日聲聞亦有緣
補天同鍊石浮海亦多年去々休回顧人天歷大千
地獄欣然入來因救衆生怵心雖若戒乘願亦何驚
悲憫開新世莊嚴起化城諸天無去住且聽海潮聲
門人趙日生以報館記事涉疑被逐不得見
三字獄又起五年事若何傷心吾種族回首舊山河

廢制施非類縱橫置網羅邦人猶不戒革命尚生波
二月十五麻六甲海上看月

百花生日記今朝海月蒼茫上碧霄南溟波濤看浩
北遼鞞鼓聽迢迢迴天縮地無神術去國離家賦
大招似有魚龍共出沒繞船飛雨拍驚潮

三月十八日再登檳榔嶼英督及輔政臬三別
野摩挲舊館俯仰淒然舊僕吳積仁昔從我

於是先一夕死殯醫館也

雲際紅樓蕩片旌
舊時月色海中明
飄零又墮英雄淚
蹤跡猶存兒女情

別館高齋曾卧起
深林曲徑記幽行
獨憐從者一環土
死別生離觀我生

哀義僕吳積仁事我五年携往美中道沒于檳榔島躬為殯奠客旅孤羈未當辦此不勝哀

感也

俯仰人間世去住跡如掃形骸本幻合何果成親故
情感終難滅修天竟有數琮山吳積仁事我歲五度
鞠：性謹愿勤：惟早暮沉默寡言語強記敏學步
庚子春正月星坡吾初到黑鬢而白衣修潔奉職事
挈往丹將敦從我櫛與住薪水多勞役數去重来遇
載移大吉嶺塞塞不通語寸步不能行側身全仗子

數月通印言歸然任譯事義孽湏彌山九秋偕弱女
度嶺穿雲行越澗聽泉去跨馬夜入谷尺寸手扶汝
下臨千仞壑一跌碎無處行：呼積仁竟夜相依據
去年過緬甸深入至蠻霧朝江與夜□日夕穿瘴霧
與汝兩提携安健相慰勞復還遲羅峽徧遊水哇地
萬里關百輩無不共遊憩我疾汝按摩我驚汝撫慰
衣被汝提携飲食汝調製晨夕汝陪奉親若賢子弟

盡通六種語象鞅可代敝印度与緬言馬嘽及英例
閩粵通其轍汝舌一無滯吾行無不達賴汝同扶曳
遠港汝歸省遊歐吾其驚左右不得汝念子已百顧
汝復扶吾來懽喜如逢故一病乃沉縣殮殍檯城樹
群醫盲無術呻吟苦難道昨夕入醫院晨省夜已故
剖腹遭慘毒掩袂不忍顧既已蓐蝼蟻一體亦何怒
吾寧忘汝愛棺衾厚而賦葬之檯嶼墳刻石記汝事

游西貢

故占城真臘國也後併于安南今隸法待華人虐甚

占城王會歷千年屬國滄桑空問天河曲千環成海
涉稻田三熟望滕阡園林艷麗市樓峻賦稅繁苛刑
罰偏已改地圖奴隸久最傷華旅受征屢

游暹羅

其總督本吾國人敬吾變法見待殊禮以王之象輅乘余從者乘馬車道上吏民皆施殊敬

並拓影焉

鑾輿駕象亦嚴莊華蓋金幢尊坐王殊禮殷勤蒙地

主高軒崇異俯樓牆吏民夾道敬加額車馬連塗立
滿場拓影自憐乘象輅蠻夷大長又蠻荒

錫蘭乘羽摩拉巨艦往歐洲新觀巨製目為聳
然得詩一章

淺海至錫蘭魏：觀巨艦樓觀四五層俛臨滄波澹
驚飛上雲表鵬翼九天鑿其長六十丈洞廊窗深口
千室以容客弘廓尤泛濫重過一萬噸結構森慘淡

巨浪拍如山，遶若虬螭撼驚波。
了無覺蹈海若枕簟，信茲樓艦力能敵海石。
陷昔稱萬斛船，北人信不敢。今乃廿倍過，後者應難勘。
浮海突奇峯，島嶼築天塹。眼前突兀見此船，海不揚波無險探。

過亞丁至紅海 自錫蘭行望亞丁山勢若火雄
奇絕甚英人鑿山築壘扼險以

瞰海道令人可
驚回詩一章

夕陽見亞丁雄山臨海角，巒簇嵯峨鐵色立。若削

尖矗皆火勢累：走樓閣意態何嵒崿金精橫秋岳
斜坡下走者亦復成劍鐔邊海勢竒甚麥加更何若
想見山川雄摩訶末乃作仗劍掃歐亞稱天傳教鐸
至今千餘年遺種雖少落大教自盛強橫絕非亞漢
武人兼君師大地汝蹠蹠我昔得駿馬云產阿刺伯
雄姿挺慄銳追風走歷落今猶思其雄况覩山獍惡
惟天設竒險石勢環犖确紅海此門戶強英先據攬

砲壘洞山腹旌旗表蒼漠錫蘭與坡濤遙々相犄角
遠將大印度一網無遺落盡握海王權張翼遠其啄
嗟尔競爭世海險無復獲

蘇彝士河北口盡屬為北地中海樓閣照波闌
闡雲連馬車汽道交絡人民數萬皆環北岸
地中海兩居築石堤長里許中立里息勃斯
石像望之甚偉巨美哉禹功民之不能忘也

得一絕句

里息勃斯存石像千秋神禹豈忘功如斯沙漠空能
擊酌酒蘇彝落日紅

地中海歌

浩：乎沸涌灑渺哉地中海激浪之雄風君士但丁
之頸延其西直布羅陀之峽口於東西與黑海相接
東與大西洋相通南則非亞沙漠迴抱若拱壁北為

歐洲山陸槎柯若蠶叢中開天池萬餘里洪濤浩演
無不容揚帆激艦可四達羅馬伸股據其中南邊楛
圓如半規非亞列國憑險雄東邊萬島相錯落希臘
文明於此作亞居海港汊既繁互亞德亞狄海灣長
成谷壑高盧西班牙以為西北屏埃及阿刺伯以為
東南郭巴比倫亞述之發生實藉海波權先覺腓尼
基與迦太基賀遷處：依海角海人習海波海商成

商國西頰与推羅二市未寂寞用能販易文明毋治
海華嚴成樓閣羅慕路所居既得地雖起野蠻小部
落憑藉海波駕樓船鞭笞四表一統廓亞力山大
有遺力駝隊大船走集猶連絡綢標愷撒東西驚
蘇爾孫拿破崙相尋索滔：洪波邈：天幕幾世之
雄賦詩橫槩汽船如飛我今遇茲濁浪排天浩：淘
之英蹟杳：猶在書詩地中海：人民秀白地中海
之山

岳華離激盪變化頗難測知全球但見海環地豈有
有萬里大海在地中之恢奇不知木土火諸球地似
此海者有幾希地形詭異吾地稀宜其衆國之競峙
而雄立日新而妙微昨日一日行希臘雲峰聳秀天
表接島嶼萬千曲：穿瀾漪綠碧翻：涉遙望雅典
哥林多嵐靄溟濛岳巖嶻七賢不可見民政今未泯
嗚呼文明出地形誰縱天驕此溷渫

唾蘇唾士火山麓酒樓望海並眺奈波里全城
華人莫我先也

晨登唾蘇唾中午飯山麓酒樓憑高屬開窗縱遊目
海山兩門峙海波浩深綠島嶼蕩烟点帆牆渺相屬
樓閣走邱陵臨海環列屋波濤拍石岸風起奏笙竽
人家六十萬烟壺弥望緜葡萄梅杏李纍：枝頭熟
都會二千年英雄戰事酷德法與奧班爭霸來逐鹿

近起燒炭黨竟成統一局雖歷火山災豈捨勝地曲
山海控要妙闡闡偉瞻矚吾華與相比之眾猶少縮
大風波忽蕩炎日正當旭長嘯眺大宇天海在一掬
引杯且浩然旅人登快足支那未遊者吾先誰為續
夕遊意大利旃那祐連岡有公園一千四百年
之故城尚存噴水池最大若怒濤之奔下水
聲甚大蓋引山水為之此岡可望半城憩馬

臨眺追思羅馬霸業慨然有詩

七岡草樹綠茫茫
大地山河此最傷
百里石渠連碧漢
千年古道黯斜陽
頽陵壞殿名王跡
高塔叢祠舊道場
泰擺江中橋上月
英雄照盡幾滄桑

遊邦堆壩廟此在周與孟子同時甚完好可驚
中置意之始王伊曼奴核第一及畫者拉飛
尔棺

邦堆瑞廟二千年畫者名王棺並肩嘆甚意人尊藝術
此風中土甚慙焉

由鉢賒出地中海

地中開海是天池養出天驕開闢奇迴望鉢賒樓閣迥
海波浸處海雲飛

懷意大利拉飛爾畫師得絕句八

畫師吾愛拉飛爾創寫陰陽妙逼真色外生香繞隱秀

意中飛動更如神

拉君神采秀無倫
生依羅馬傍湖濱
江山秀絕霸圖遠
妙畫方能產此人

生死婚姻居室虜
畫圖實景盡遊心
弟妹子妻皆寫像
同垂不朽畫神奇

拉飛爾畫歐人重
一畫於今百萬金
我已盡觀千百幅
靈光恍恍醉於心

拉飛爾畫多在意意境以外不可覓只有巴黎數幅存
瓊寶珍于連城璧

拉飛爾畫非人力秀韻神光屬化工太白詩詞右軍字
天然清水出芙蓉

基多連贖本師畫妙筆於今亦具存終是出藍能變化
拉飛爾作紀新元

羅馬畫工兼石刻精微遍肖地球無最傳秀氣拉飛爾

曾見紅閨合樂圖

遊羅馬拜西訶埠公園觀詩人立像揭幕士女如
雲旌旗繞繚警察呵途口占一絕

公園十里拜西訶士女如雲警吏呵萬眾免冠旗影繞
詩人立像敬恭多

古物五章

印埃雅典多遺蹟環構雄奇畫石工行徧地球看古物

尚看羅馬四三雄

頽垣斷礎二千年
衢道相望自巋然
最異頻經兵燹亂
保存古物至今傳

後漢世稱風俗美
賊畏名賢鬼讀書
羅馬人能存古物
此風粹美更何如

古物存可令國增文明
古物存可知民敬賢英
古物存能令民心感興
吁嗟印埃雅羅之能存古物
兮中國乃

掃蕩而盡乎甚哉吾民負文化之名

埃及陵塔何嵯峨印度殿塔歲月多
雅典古廟可婆娑羅馬壞殿遺渠侵
雲過皆是周漢以前物英雄遺跡嘯
以歌回顧華土無可摩文明証據空
山河我心忤：手自搓惟有長城奈若何

初登歐洲陸奈波里遊公園即觀意相嘉富洱像
喜賦

我生徧數歐洲才意相嘉侯實第一我今日首登歐洲
陸初遊即見嘉侯銅像聳雲而突兀方面大耳修幹軀
眉宇雄偉態強倔森然天人姿降誕救意國我生最想
慕之英雄忽尔遇之喜舞不可遏譬如好色者見所愛
慕之美人情意懽欣中暢發忽念構造遇之艱聳然起
敬手加額少日躬耕類南陽壯能擇主同諸葛君臣魚
水亦復同明良千古難遇合當時革命民主論紛紜獨

以尊王違俗說遂以分裂十一邦竟能統一國獨立外
結英法兩君相內容加瑪二英傑前拒強奧之奴制後
絕霸法相侵廢成功雖同俾士麥艱難締構過千百起
然若無人世欲意國為妻情何窄大地嘉耦汝最奇得
此丈夫種不滅瓣香我只為公焚今日相見情弥親有
若公生咤風雲揮斥天地獨立軍仗劍昂首向蒼旻微
公誰歸無典墳奈波里卒非公國鑄金乃記范蠡勳林

木森蔚樓臺新海浪淙；石隄濱電燈萬千歌樂喧繡
幄香鞋草成茵士女嬉遊瞻仰頻我生東方之大秦當
公立國之始已四旬與公相隔三萬里之關津豈意入
境第一日先見公像結緣因東海西海波瀾接徘徊悵
望想千春

羅馬懷古

壞殿頽垣倚夕陽教宗霸業兩張皇東窮舍衛西羅馬

大地山河最黯傷

去羅馬北行汽車道中

岡巒四綿亘果樹剪平齊山顛抗樓閣郊外盡菩提野
女紅兼白山田高及低夕來明月大逐我汽車西

羅馬名寺甚多有古來巡禮參拜者有耶穌及古

德遺室者吾有詩曰

緇徒市里道相望遺室參經古道場羅馬名藍四百寺

幾多塔殿對斜陽

羅馬訪四霸遺蹟

遊愷撒故宅與古陵墓通十餘里皆葬羅馬名人者斷碑碎像古石數千購數十事及初通中國之安敦像歸羅馬物入中國自此始

愷撒生時宅紅牆倚夕陽金燈照陵墓玉匣卧叢岡
斷碣英雄蹟零磚蔓草旁搜羅千載物望古集淒涼

遊奧古斯敦遺殿椒房丹壁后室無恙壁畫瀟灑似吾浙派所遺瓦缶丹澤盎然

奧古斯敦殿遺缶色盎然丹青猶在壁瓦礫幾何年
羅馬今為律飛龍昔在天秦皇與漢武相望孰為賢
大秦始通中國之主為安敦守文之賢主也後
漢書安帝紀傳其獻獅子符拔寔為歐人交
通之始購其石像歸以紀交通

獅子兼符拔通來自大秦交通從後漢第一是安敦
文化開瀛海承平創善鄰我携遺石像禹域幾由旬
君士但丁有遺殿戶牖尚存屹然高十丈其製
摩色金盤甚麗多其遺製吾曾購得之

君士但丁帝雄姿不可方丹青有遺殿戶牖半頽牆
三國歸靈統東都闢喬皇金盤摩色麗娑撫起蒼涼
瑞士國在阿尔頻山中湖山之勝游客之盛為

天下第一吾兩過之

瑞士非國土乃是六公園蒼々
阿尔頻岳鎮中歐尊
陂沱潰下南北海歐洲百國皆僕緣積亘千里何盤
：山中闕國五百年南朝羅馬北通日耳曼必經焉
昔此封建戰焚煎山民自保障壘堅七十邑部盟密聯
北与漢堡市府相應牽輿霸輕視等羗蠻頻遣輕兵
敗不前新舊教爭大鑿膊遂令自立開桃源太平共

和廿二村無君無臣樂便：葡萄連架農之田時表
精妙良工磚花牛漫山魚滿川以牧以漁時狩動雪
色皚：照青天碧松徧山草芊：碧綠邱壑白峯巒
山巔成千湖明漪動紫瀾小湖柳歌波蕩槩饒風煙
大湖數百里渚浸其間虹橋苔磯間綠闌萬千樓閣
枕湖干抗山架壑高下繁白塔紅亭冠山巔水榭林
屋隱澗泉瀛船翻浪穿湖邊鐵軌穴隧上山巔歐洲

諸國程途便一日二日至闕：帝王妃主微行先將
相公侯貴王孫騷人名士倚袂連大賈富商隨喜遷
相將蠟屐賦游仙別墅行宮望離：旌旗飛揚壓翠
微客舍華嚴百億扉沿崖夾澗隨日移士女霓裳曳
羽衣盛夏清涼相携嬉水濱草際行卧宜聽瀑登山
泛湖湄幔亭茶舫泊無時毬塲獵犬無絆鞮夕歸觀劇
浴香霏南柳街諾北壚順臨湖佳勝天所資冬時避

寒客□□萬峯雪色尤離披寸岑尺土綠琉璃樂國
樂土無復之我兩過此罄其奇勝地勝遊古今稀夢
迴天際之峯莽不離

遊奧地利詩 甲辰五月

灣京詠奧語其京名灣不名維也納

灣京舊霸統氣象比巴黎宮館皆嚴麗林塗盡廣齊
柏靈嗟幼穉倫敦狹模規感慨邯鄲市今朝落泰西

灣京架非館相望十餘里冠絕大地

架非敲士灣風味廿里相望天下無樹上電燈下陳
几樓前歌瑟後當壚園林接比魚龍曼士女扶携亭
慢殊舞罷秋千椅襪坐碧琉璃滿飲葡萄

匈牙利標德卑士京華麗冠各歐國其地夾多
饒河長隄廿餘里電燈鐵几車馬如織士女
相携園林精妙好樂似巴黎白人本游牧善

為樂聲故小國僻壤有此壤異也

向京雖僻小人號小巴黎道路廣以潔樓閣麗燈迷
滔：多饒河花木夾長隄鐵橋連鎖之山水瀉清輝
隄長廿餘里士女相扶携島園紅素開湖舫青白低
電燈如月照車馬如龍飛議院與王宮壯麗河東西
夜遊百戲園燈火億萬枝遊牧琵琶聲佳人紅玉肌
信哉古鄭衛游樂人不疲從今歐土國後作勝前徽

逆想百年後迷樓與天齊

遊柏林議院前有俾士麥像瞻望感賦

巍：明堂位金塔抗中正林園三十里石像夾道並
摩天立銅人仗劍意氣競其下負地球一足踏獅瘡
云是俾士麥仰觀聳萬姓廿五國君民俯首聽号令
破法震大功惠民滋德政工商興寔業海軍握魁柄
至今略非洲殖民地日并商場溢海外強英不得騁

雖苦民兵制期使弱普勁合德既定霸干戈終身靖
乃知保國仁迥異黷武病我來游柏林道路廣以淨
植樹列四行行人想以詠漢堡与冕痕周道如砥鏡
萬國治道路無如德光瑩士女畏游遨子夜百戲靜
政治既嚴肅文學復明盛國驕好武烈樂毅不治定
夷吾藉國大葛亮曰亂聖我儀吾華彥景略庶幾偁
豈唯賢相才寔資英主聽君臣既一德功名乃相應

當時与法鄰革命鼓大興惟公審時勢君權救國命
衆譁等小兒萬變仍堅定用以明良遇得成強霸勝
假使從衆咻弱普為人併我久繡手原模範卿雲慶
今來拜下風九原吾歸敬

柏林觀劇有十三歲女兒入獅檻撫獅騎之抱
之鞭之以首入獅口可謂神乎技矣

弄獅女兒亦神全綠衣入檻抱獅眠起執長鞭騎獅

走不畏獅吼如普賢

遊德國波士淡蘆京諸宮苑于阿朗蘇利宮前
觀天儀五事蓋吾京師現象臺儀器元太史
郭守敬製也昔曾摩挲不意絕國重撫之感
懷故國淚下沾襟乃作長歌

陂沱葱鬱普蘆京訶釐湖波一碧平離宮別館三十
六掩映林麓見飛鷺蘋菓屈籬獸噴水數里幽綠圍

青城崇岡危級花畦繡上據殿閣何崢嶸長方樓塔
橫百丈鈿墀文石登三成草間花際徘徊步忽覩寶
噐心怦：紫銅圓球大盈丈周圍刻綴皆天星太微
紫微橫天市二十八宿何焚：文昌七曲似闇昧帝
座北斗猶晶明長歎牽牛與織女隔漢相望不得語
太陰之精猶閃鑠班痕蒙：蔽北極坐茲欖槍遂掃
地致汝六寶流異域以手摩挲重歎惜淚痕盈面涕

沾臆吁嗟此為渾天儀太史以製授時曆其旁龍紐
纏四山黃赤二道紐斜環象限一儀以測候製作精
妙生紫斑作者元初郭守敬獨明絕學任天官測天
分候廿二所北窮謙吉南越蠻謙州吉州見北曉地
近北極鮮卑間西窮黑海與裏海並置臺官測天垣
以元域大得新識用製諸儀精巧極利熊南湯自歐
來雖改歷法寶遺蹟我：燕京觀象臺諸儀陳列環

四壁亘今明清六百載疇人夜：來捫測光緒八年
秋七月吾遊京師來橐筆生平頗好天文學登臺摩挲
細考析豈意別後廿餘載波士淡京重遭值金人淚
下遇灞上銅駝手撫見荆棘同是華京淪落客相逢
相吊感疇昔絕域隔海三萬里問君無足無羽翼何
能飛來德意志載以巨舶裹以席龍縶胎禍食小龍
驪山烽火名外敵庚子京邑遂邱墟鐘簋隳頽金輪

側移置此宮草間卧徒令歐人嘆嘖：大呂如何徙
齊臺紀甌從來歸晉國唐樂遷移入契丹中華雅樂
永絕滅周鼎幸不入泗水猶在人間免淪溺從來壞
寶非一國多難遭逢劫千億國土文明寄重器河圖
天球重拱璧文獻遺留吾與汝身世飄零多感激江
南再見李龜年天上人間添惻：鳥啼花落此何地
白髮重摩傷逋客異時再登觀象臺呼天難問雲慘

碧

携同璧女再遊舊京波士
淡之訶釐湖離宮相
望風景甚佳

碧波十里漫林巒絕無人影見帆船指點離宮三十
六訶釐湖畔再來緣

漢堡風烟最撩人林池樓閣繞河濱道廣花園數重
樹橋多舟過幾通津船塢波海驚奇偉園樹環湖闕

妙新二事華嚴冠大地愛斯小市自由魂

遊薩遜埃士拿巔壘閱路德譯經室

丙午十一月

兵壘翻經十月中板扉木榻匿英雄若無護法強侯

在早與呼斯骨灑風

時教皇捕路德薩遜公匿之壘中否則與約翰呼斯同焚矣

小窓開望萬峯環謾二松濤雪滿山想見鬼來窺壁

夜墨痕濃蘸譯經壇

埃士拿巔壘萬山環繞古木参天風景頗佳夜間路德譯經時

有鬼來窺路德投以硯墨

來因河古城其石壇為沙立曼即位處憑弔放歌
漸開平原草木腴古城扼河衝要俱石壇臨流鐵闌扶
云是沙立曼即位之遺模旌旗影絕衛仗通河山壯偉
自縈紆尚想鄣上遺雄圖佛蘭拂大會諸侯作東都亞
痕阻海關中無根據盡在來因乎來因河流德人命據
險東爭終取勝吁爾薩遜表山河蜀晉終難一統競德

法千年鐵血多孰成霸者來因波路易十四俾士麥後
來之英奈爾何霸圖大小得失在地勢橫覽天下無殊
科石壇兮嵯：雲影浪流共婆娑江山憑吊夕陽過

自柏林瀛車過薩遜及來因河旁諸邦

過都越國瀛車飛薩遜來因瞬息移國土經過無量數
戰場甲盡古來稀明：月照山河壯渺：烟霏樓閣微
遙想千年封建亂競爭進化是耶非

遊法蘭西詩

登巴黎鐵塔頂與羅文仲周國賢飲酒於下層酒樓高三百尺處憑闌四顧巴黎放歌

浩：凌天風高標卓碧落邈：虛空中華嚴現樓閣神仙蕊珠殿人間誤貶託高：跨蒼穹仍插塵中脚霓裳羽衣舞夜：月裏樂玉女紫霞杯一飲成大藥回頭憑紫闌忽爾生玄覺俯視下界人城市何莫：河水縈若

帶遠山綠一角問閣何撲地殿塔數厯落岡陵抗園館
有若蟻垤作問此何都市巴黎稱霸國千年大都會繁
華此窟宅人戶三百萬煙樹交迷錯時有英雄人揚旗
震天幕下指紀功坊石馬欲騰躍卻憐八十年革命頻
血薄去：上青霄更登上層閣寰瀛我踏徧名塔登之
數只許繞膝下阿育見應作摩天九百尺雲構巍岳
呼吸通帝座碧霞仰斑駁深碧地中海渴攬同一勺湯

：太平洋橫海誰擎攫我手携地球問天：驚愕

巴黎觀圓明春山玉壘思舊游感賦

宮苑深：老柳敗荷花開盡無人過葦橋渡入福海中
白石臺殿倚白松白頭宮監猶守護淒然僵柏起長風
蔓草荒煙堆瓦礫玲瓏白閣猶奕：門戶萬千盡歐式
聖祖手作著象曆憶昔霓旌幸苑時疇人南湯來侍值
壽山春日饒物華輦路繁花好顏色羅刹遠遺圖理琛

荷蘭貢入量天尺當時威廉始入英人民不及五十億
歐土文明未開化惟我威靈照八極百年之間新世變
汽船鐵軌通重譯惜哉閉關守長夜竟爾絕海名強敵
阿房一炬光亘天熱河三軍淚沾臆小臣步屨傷懷抱
手撫銅駝歎荆棘豈意京邑兩邱墟玉璽落此無人識
雨夜淋鈴幾度聞追思故苑滿春雲春宮鶯囀春花落
玉泉飛落閒池閣晉陽已敗獵一圍燕子重箋恨十錯

五鳳樓頭胡馬來秦晉西行日色薄素衣敝盡豆粥無
 歸來歌舞又重作通臣萬里游巴黎摩挲遺璽心淒
 尚想承平春苑道千官擁從豹尾麾黃屋龍旂繞朝暉
 八校無譁萬馬蹄

巴黎觀懋勤殿碧玉璽感賦

殿在乾清宮側上日
 讀書閱奏疏于是戊

成七月上銳意變法欲名新政諸臣入懋勤殿行
 走以備顧問議大政蓋用聖祖用高江村徐東海
 入南書房之例也咸豐之時用何秋濤郭嵩燾入
 直當時號稱二鳳齊飛故事其園尚書以為請議

以此殿為樞密之內議院議選海內名士咸集于
是吾弟幼博亦被符預焉上發十朝聖訓與譚復
生檢閱故事而後發語將大漁汗政元維新事未
定而難作吾既遠亡異國而此殿玉印亦流落絕
域觀此淒
痛得詩

憶昨維新變法時
延英選士贊黃扉
明堂大啟咨羣議
草澤旁求助萬機
豈料羣龍成血戰
當年二鳳話齊飛
淒涼回首懋勤殿
玉璽遷流國事非

遊乾那花利博物院見斷頭臺路易與爹亞像歸

過路易墳感賦

斷頭臺上見路易和德塲中識爹亞專制鑒人聳毛髮
共和永定想叱咤法人之口何高口亂舞僇三日可射
尊崇道理去階級並行公產誠佳話大同之道乃吾志
非時妄行馬碍駕狂泉同飲眾小兒疾行狂奔口慢罵
慄悍敢死固可愛輕佻顛蹶難假借可憐百三十萬人
流血成河果何因美人如花血紅茵帝后蛆士螻蟻身

中間便宜拿破崙起自布衣擊金輪思混全歐續大秦
第三繼起詭惠民暗易民主代以君八十年中亂紛紜
危哉汝國幾瓜分今雖立憲不可循世爵貪橫治未臻
荼淫隳胎絕人倫人種漸少隱憂頻黨派繁多政斤：
施之國爭無功勳費盡人血野未文震蕩歐土民權伸
不得其食空耕耘昧：我思別有云波及東洋大燒焚
盡改憲法君不神天下為公選賢親大地政體胥變舊

萬年昇平法策勲天生人權各有分國為公器難私吞
豈其暴民肆一人道術既裂但抑臣昔殺庶其春秋文
湯武順天非弑君聖有大道含混淪不偏一義圓且均
邊見偏頗誤人群項來道經路易墳兩龕供奉君后魂
從官九百可痛酸斐蘭民黨亦艾焚民具爾瞻鑒在殷
此是亳社太白旗之殿軍

觀拿破崙紀功坊魏峨參天萬馬欲躍旋視其陵

文石為襯旌旗繞之已觀蠟人院見拿破命卧
 帳殄殲為之惻：痛心也見余遊拿破命紀功坊
 帳中屠縑垂絕其子愁眉側坐而侍疾一桌二
 几一榻奄：英雄末路我心惻之雄心屈于短
 圖遠志抑于近慮幽于茶島斜對夕陽海波森
 瀾追懷夙昔金戈鐵馬已為昨日之山河殘喘
 離魂將為蓐食于樓蟻奮飛難再斷腸奈何斯
 亦拔山蓋世之雄所淒楚哽咽者已苟非知道
 能不痛心知來去之無常本縱浪於大化喜懼
 則乘願而來緣盡則絕塵而去假以黃金鋪地
 終有崩決之時成住壞空何戀何愛藉非為救
 世度人而來者雖有英傑西山日薄漏盡鐘鳴

能不
悲乎

滑鐵廬中龍血黃
囚龍荒島太蒼涼
萬里戰雲收絕海
百年霸業對斜陽
旌旗黯淡扶歸櫬
觀關嵯峨表石坊
最痛總帷殲磔日
奈何低唱月微茫

巴黎登汽球歌

超：乎我今白日上青天
香：乎俯視地上山與川
身輕浩蕩入雲霧
脚底奇特聳峯巒
巍樓峻宇如蟻穴
車

馳馬躍似蟻旋千尺鐵塔宇內高第一下覽若插尖筆
端大道蕩：轉羊腸么麼牌坊拿破倫青邱綠壑大如
掌乃是卅里裛倫大公園巴黎天下大都會百萬戶口
繞風煙人民城郭數歷：迴風飄我天上船渺：青霄
游恟恍不知是何世界何川原德英羅馬俱冪：埃及
突厥何圈豚或者已渡東亞海臨眺禹域為潛然或者
以我惡濁世突出諸天之外焉諸天世界多樂土一星

一界何殷繁禮樂文章皆特別七寶絢爛生妙蓮音聲
有樹樂自發其論微妙入神顛其俗大同無爭鬪其世
太平人聖賢神灑飲罷顏色好香積食既善見宣但有
喜樂不哀怒長壽無量億萬千忽視地球衆生苦哀尔
多難醉腥膻諸天億劫曾歷盡無欣無厭隨所便不忍
之心發難滅再入地獄救斯民特來世間尋煩惱不願
天上作神仙復自虛空降塵土迴望蒼：又自憐問我

何能上虛空汽球之製天無功汽球圓圓十餘丈中實
輕氣能御風籐筐八尺懸球下圓周有闌空其中長繩
絙地貫筐內繩放球起漸之上蒼穹長繩一割隨風蕩
飄：碧落游無窮繼我登者球墮地諸客骨折心忡：
吾女同璧後來游球不復用天難通我幸得時一升天
天上舊夢猶迷漾

遊微賒喇路易十四故宮

阿房三百里鬚鬚見秦皇跡是瑤臺後花繁上苑旁舞
鸞猶鏡殿畫象徧椒房拂拭金人淚英雄事可傷
追思繁盛日宴劇歷迷樓三千備宮女十萬走諸侯歌
舞收雄據貂蟬艷貴游隱銷封建患英主自深謀
歐土千年亂封侯肇不寧兵戈雖滿野磐石結維城封
建從銷弭民權乃發生夜呼聞涉廣憲法大橫康
遊法國方點部螺宮觀拿帝及其后與公主奩

厨金宮畫柱文石床几繡為之感

繡床玉几金宮殿圖寫華嚴霸業空尚想桃華奧公
主百花舞鳳隱英雄

球圖精絕廿年成玉斧當年指列城萬馬奔騰叱咤
去記茲隱几決長征

遊方点部螺故宫此宮創於西曆十二紀累世
增廣凡三千六百室二千榻歐洲王宮之最

大者

繡壁金宮相妙莊三千殿室二千床歐洲宮室誰為
大萬戶千門此達章

請于丹墨國相顛沙告獄吏而觀丹墨獄莊嚴
整潔當為歐美之冠

吾遊丹墨獄華嚴若天堂壁瓦皆綠白磚石盡紅黃
花徑夾鐵闌綠草植道旁囚室廣而潔白鐵作溷床

食卧皆引機榭几陳書囊虛空真生白淨妙倚綠牆
俸則遊憩室草樹有新芳時上藏書樓或者入琴房
妙女揚明昧鼓琴聲鏗鏘食則兼牛魚飲酪芬以香
夕賜酒半尊薄醉可徜徉其廚及沐室華整何堂皇
費金二百萬偉哉大道場嚴麗冠各國歐美無可方
歐土各王宮遜此妙麗莊况我富貴家享受遠相讓
吾想太平世刑措無錙鐺假使有獄囚樂過今君王

以其備神機必非今可望地獄與天宮實相本無常
視其所生世苦樂與相當此獄過帝殿何其耀燿煌
信哉平等仁恤囚惠以康不遇禁游佚不辱不飛揚
回顧吾國人室屋卑汚方穢惡交騰蒸疾病多瘡瘍
貧者雜犬豚矣溺共糟糠不知衛生法况識安樂鄉
家文下有豕古訓尚未忘獄囚更何論瘦死幸有喪
獄吏問我國獄室可清涼吾顏如渥丹忸怩無可藏

相去何太遠天壤乃王郎我實政不仁宜其國不强
頗聞歐人風競侈為榮光爭誇獄囚仁過麗得無亢
罰罪似賞功差等無杪芒吾未敢謂然懸此待禹湯

遊丹墨詩

電車馳驟電燈明丹墨重游更有情百萬人成樂
國公園游治六街平

丹墨公園水塘樓閣極似吾家園澹如樓十年

去國携同璧女遊此感愴于懷

廿年讀書處憶我澹如樓飛閣臨波影圓窗照道周
橫塘隄樹密對岸書堂幽豈意長飄泊離鄉已十秋
自瑞京還再遊丹墨公園與同璧女歌曲悵觸
鄉國步彳起愁

丹墨公園水塘曲依稀似我澹如樓十年久絕鄉園
夢萬里來為波海游花徑同携歌舊曲柳塘小棹泛

新舟電燈千億游人萬澤畔行吟獨起愁

挪威海道萬島飛綠撲入船中得鮮蝦與女同

壁及羅昌文仲飲酒觀吾免冠髮盡白謂五

年前無此為之嘆息口占贈羅生

頻經國難忽華顛南北重逢已五年美酒空為人送
老飛舲且作客游仙好山縹渺欲飛去大海盤旋幾
變遷且喜竒才能磊落又來弱女慰纏綿

瑞典京士多貢據海島為之天下所無
環湖據島開都會瀛舫湖橋處：通瑞典百千萬億
島樓臺無數月明中

瑞典京士多貢之思間慎公園據海島為之環大
數里半枕湖波繞以百千樓閣電燈萬億百
戲紛紜光景奇麗為地球公園第一與女同
璧頻遊

瑞典公園奇麗絕海波都會互迴環
金銀宮闕排雲裏縹渺林亭出世間
島外有湖：外島山中為市：
中山獨登高塔蒼茫顧烟雨迷濛天上閒

瑞京一千二百島：中處：有人家
盪船曲：嶼塞路穿葦深：魚上沙
松林掩映紅樓閣磯石欹斜翠柳花
波光山色綠無際戴月歸來醉蟹蝦
窮髮投荒盪汽舟賦詩橫槊幾人遊
青天一髮通中

土大海洪濤又九州若有開天新世界頗思故國舊
風流謝公山賊驚開鑿後齒憐渠限一邱

瑞典北海申堪聞常熟凶聞於海上大盤陀石
哭之時海風怒號助人悲痛不意黨禍遂成
永訣後之覽者豈止西州之痛耶

長天黯：海蕭：欲溯淒風賦大招東望江南雲斷
虜空將老淚灑寒潮

海山淒斷海風酸，忽聽山顏最痛辛。
譽士豈聞才百倍，救公何止贖千身。
蕭何能荐登壇將，王猛曾為入幕賓。
豈料七年悲黨獄，竟成千古痛維新。

昔為膠州北上書，冰河凌曉賦歸歟。
追亡竟累鄴侯履，變法真成商鞅車。
黨錮千秋話蘇馬，波濤萬古泣靈胥。
房州未出應難瞑，故國相望恨有餘。

故太子少保協辦大學士軍機大臣毓慶宮行

走常熟翁公哀詞十四章

戊戌為中國維新第一大變翁公為中國維
新第一導師關係至重恐人間不詳故詳詠
之此雖詩也以為翁公之傳以為新舊政變
之史皆可也

中國維新業誰為第一人王明資舊學法變出元臣
密勿謀帷艱難救國民我：常熟相鑿空闢乾坤

仲舒學純慤第一冠賢良博雅推蕭望公才屬馬光
韋平勛再世陳竇黨重傷仙鶴青霄淚霜毛竟不翔
師弟而臣主寧聞二十年成王新斧扆尚父授經筵
堯舜天人聖熊盤啟沃賢痛心喪良傅一老不遺天
馬江經敗績謬上萬言書遼失憂薪火韓止慮涖魚
審時求變法痛哭輒當車絳灌非公意長沙空里問
甲午東和後紆心世變更高軒咨下士長揖對前榮

不信徒薪策今為割地盟豈聞師相貴謝邁向鯀生
考求中外勢救國決更張進御新書本培才大學堂
苦心營鐵路鑿空啟銀行十二策猶未經帷逐太忙
乙未公大變法未成而恭邸撓忌那后惡之不遠近
上遂于十月撤去錄慶宮行走錄慶宮即師傅也
金輪久臨御玉屐類潛陽雖割三臺島仍張萬壽觴
舞歌扶力士斲睡挾相王憂國驚讒毀沈：只自傷

乙酉丁三年復行守舊祝壽起國安其危利
其突李聯英恭王執政翁公被讒憂畏甚

膠州忽見割伏關我陳書荐士勞推轂退亡特枉車
闕門咨在下決策變維初廷議終為梗椒蘭誰為除
郵人上書不達東裝南歸翁公凌晨下朝未退朝命
王大臣見之于總理衙門以上賓相待皆向變法
恭王憂死日華夏復生年一德君臣合千秋新舊緣
耻為亡國主誓欲復君權戊戌當初夏深謀變法全
恭王守舊撓變法三月薨
四月公与上即決變法
四月廿三詔維新第一辭大號明國是獨力掃羣疑

五日相遂罷千年弊盡披新潮今捲海開幕可忘之
公以廿三日請上下定國是詔中國數千年新基本
于是定廿七日即革職遂歸永不叙用公以愛法救
國民罷相之速
古今未有也

神州大一統文化五千年守舊盈廷論攘夷舉國傳
弓刀經改試經濟特求賢變法身為導羅文公遂先
痛絕瀛臺變憂深京室墟老臣編禁後聖主幸巡初
幾被張華戮徒為殷浩書七年驚黨禍慘淡謝興居

庚子正月榮祿請那拉后殺公軍機大臣王文韶摩
壽恆叩頭固請乃令常熟縣監禁七月京師破遂有

西幸

之事

上相猶居士幽囚現老僧閉門惟讀書遊寺或行騰
待死一生樂憂時百憤騰房州未復辟目瞑亦何能

公七十無子寡欲絕交贊無懼
惟好畫或遊山寺耳

他日新中國元功應尔思鑄金范蠡像遺祭曲江碑
灑淚隨歐海招魂仗楚詞乾坤何日正生死論交悲

稍士巴頓湖島雜詠

島石栽：繞短松三橋架浪瀛船通華嚴樓閣相望
屬淡：微波夕照紅中島

怒濤拍岸葦蘆幽石徑繁花着小樓行徧島橋歌石
坐海波渺：島雲秋島盡處小室坐石聽濤

扶女携筇沿島行松枝碍路石縱橫行來島盡盤陀
土坐聽濤聲看月生日夕繞島聽濤待月

玉面霓裳侍女遊，牽花坐石小勾留。
摘花簪犬亦新趣，臨海徘徊圖畫幽。
書所見

兩園東食又西宿，千島朝遊至暮歸。
絕好海山行氣

舫百千樓閣對斜暉

吾居湖濱客舍食於中島酒樓或游于千島海中

看劇歸來夜渡航，瀛車百里度重岡。
樓臺無限山無

數島嶼環湖月似霜

自瑞亭看劇夜十二時乘月歸

居稍士巴頓島海山幽，勝別日煙雨迷離徘徊

不能去

海山第一冠歐洲廿日勾留千島游烟雨濛濛如送
別淒淒波浪打磯頭

三橋獨立為多時回望樓臺島樹披絕好海山為永
別最難烟雨又迷離

愛瑞京士多貢之勝欲徙宅居之

阿拉伯馬天下駿高加索女地上無更當徙宅士多

貢看取中華拓地圖

遊比利時詩

過比利時滑鐵盧視擒拿破崙處有高塔及惠

靈吞與同時諸將像

邱阜浩紆逸查影透天際危塔何蒼；石像揭偉麗
猛虎一朝陷竟為螻蟻噬百年古戰場旌旆蔽天戈
精甲連百萬士馬壓山勢聯軍七八國龍虎發雷掣

血殷川澤紅脂膏原野蔽五萬白骨堆只為一夫斃
拿帝自才雄正與項羽例但逞匹夫勇贖武橫一世
不知內撫民自將遂自蹶埃及冒渡海不擒已幸事
天幸豈多逢胆大終絙繼班葡功未定鼎爾孫來制
入奧三擒縱不滅太失計娶后豈能親連圍終相繼
南顧憂方殆北伐更何為瞻前而顧後跋胡宜狼狽
何不鎮撫法分遣十六衛功成帝一統事敗國不敝

乃知唐太宗文武真冠世尚惜高麗事親征為所穢
漢高定四海白登幾不濟楚人沐猴冠豎子孰為智
吾過滑鐵盧大發廣武喟

丙午十二月五日自德國亞痕乘電車入比境
關吏索稅重回亞痕侵曉來關候驗散步滿
野皆霜亦未見之異境也

關征阻我遂迴車破曉重來霧滿沙獨倚溪橋聽流

水野田霜樹白成花

游荷蘭詩

海艦朝窮荷蘭境
汽車午入漢堡途
綠蕪千里田園
直紅瓦萬家樓閣
殊林木夾堤露高塔
牛羊被野傍
平蕪早聞漢堡稱
繁麗會看飛花夾市衢

觀荷蘭京博物院製船型長歌

蒼茫浩蕩大瀛海
全球土地供吐吞
為天地周四極

據地大半無有垠吐為五洲各洲渚齊煙九點眇川原
一洲割據無數國有若池中石山蟻垤繁有能通海任
所往五洲陸島皆聽我盤桓種類傳散布大地一聽海
王割據權是在大艦能製造破浪萬里忘瀾汗中國海
疆七千里太平洋岸臨紫瀾大地全勢唯我有樓艦可
以咎百變大陸豐饒自飽足不思開闢徒閉關惜哉海
禁二千年珠崖猶捐况大秦腐儒不通時勢變泥古守

經成弱孱坐令大地主人位甘讓碧眼紅髯高步于其間
迄今樓艦三萬噸甲板二尺鐵為藩橫絕大海孔龍戰
嚇取土地談笑間乃逢諸雄競爭日蹙然大國無海軍
如鳥無翼魚無翅人無手足僅有身身愈肥盾割愈易
其形類瓜最宜分嗟爾謀國肉食者狂泉醉酒何濃熏
昔自科崙布尋地班葡輒收大陸新荷蘭先覺逐其後
聚精製艦成殊勲明末創自地勞打船制鈍拙無可云

然已徧收南洋島朝貢諸國亡紛紛彼得雄心變服學
胡俄遂霸波海濱英人旁窺得心法專意製艦肆斧斤
即取印度澳洲加拿大徧奪南陽諸海門艦隊第一為
海霸能擒陸霸拿破崙故知海力最無上於今新世尤
居尊縱覽荷蘭船口型感嘆彼得木屋勤兢尔荷蘭強
若此況於中華萬里雲嗟哉誰為海王圖鐵艦乃是中
國魂何當忽見鐵艦五百艘龍旂翩蕩四海春嗚呼安

得眼前突兀五百艦橫絕天池殖我民

遊山泉觀彼得學舟之遺屋板屋丈許床灶蕭然
几榻敝帷猶存如故前俄皇亞力山大為覆大

屋焉

板屋濱河邊高廣敝風雨云是大彼得學製船於此遺
灶對外榻疏布遮床處几桌凡四事樸陋苦難似昂頭
戶碍眉伸手瓦觸指遺像猶在壁執斧舟斜倚身衣賤

工服目若橫天地眉宇天人姿顧盼有雄氣當時同業者寧知帝王至玉座何尊崇紆身執勞肆深宮何安樂久習能捐棄臣妾亦已衆隻身走萬里日與工人伍降辱成舟楫豈不憚孤苦為成圖霸志迄今橫三洲雄圖霸大地乃知英雄主舉動自殊異橫覽古帝王神武無可擬我儀主父偃環偉差可比變服學騎射入關窺秦主王者欲強國苦身猶胥靡况茲我庶士賤辱更何齒

歐人所由強物質擅作器百年新發明奇偉不可比遂
令全地球皆為歐人制吾國文物博所□製造戩士夫習
尊大難辱身降志何況帝王崇玉食尤難蔽坐茲成孱
弱衆強名吞噬沉吟古今人最敬彼得帝昔者編其傳寫
黃進丹陛聖上為感動變法大猛厲忡：震子心大業
傾不世豈知九萬里來視舊廬敝木架與支持游者踵
相曳大厦覆其外丹碧簷環麗遺構及像設拓影杯盤

細大購數十種將以贈國士感歎慨然興發聳起志氣厲
自荷蘭夜渡海侵曉至倫敦

小別倫敦已六旬漫遊列國走風塵風濤兩渡波羅海
土俗深語歐北人

國小各能門戶立民貧亦闢物華新昨夜荷蘭女兒酒
宿醒未罷見英倫

游英吉利詩

英倫避暑仙控任公爵邸舍樓閣華嚴園林之
六冠英倫蓋千年諸侯舊邸其先世隨威廉
入英者此宅又為克林威爾舊第今英王嘗
幸之公爵以英王卧榻浴室待予感英故事
永夜不寐

千年舊藩邸百頃好林泉牀帳金繩麗風煙玉樹圓
通賓門置驛愛客酒為船樓閣華燈靚憑闌夜不眠

此是克林宅遺蹤二百年當時起雷電從古發民權
游釣猶能溯亭池自惘然試來摩大樹鬱鬱聳蒼天
與周國賢遊蘇格蘭故京噫顛堡自故宫至公
園馬車繞山俯瞰全京雨雪凍甚

驅車蓋京登古城天寒雪点撲車轍國賢年少愛試
凍老夫畏寒吹慄烈山石聲確故宫憑砲壘嶽崎旌
旆揭繞山開道夾綠蕪馬上峻坂紆九折烟樹人家

十萬戶川原迭選雲霧結下湖雁鳥漣漣游上湖石
壁峭若切憶昔故王呼鑿道霓旌已過簫笙歇黍離
麥秀二百年雪虐風酸慘替裂山勢嵯峨虎氣存故
宮魏蹙感行人美利御榻故猶在摩挲遺像更酸辛
地古人豪尚可愛道汚屋黑不堪論吁嗟蘇格蘭赤
脚多遺民

遊蘇格蘭拉士高夫市過河底隧道長二里許

以機亭升降而出入之可謂大工矣

我遊拉士高中橫格來河波平仍渺滌欲渡喚奈何
寧知鑿河底隧道通前坡遙長逾二里闇：燈不熄
上蓋橫鐵窠兩壁結灰沙堅固不洩滌人行如蟻過
兩極通地樓深：十丈頗鐵絙轉機亭升降在倏俄
六馬牽重車直入載無蹉上天而入地鬼神應驚呵
河深二十尺巨艦若邱阿船泛河面駛人在河底歌

遊蘇格蘭京噫顛堡見創汽機者華忒像感頌
神功不可忘也

汽機創自英華忒水火相推自生力汽船鉄軌自飛
馳縮地通天難推測萬千製造師用之捲翻天地先
創極汽機製器曰：新凡十九萬五千式力比人馬
三十倍進化神速可例識窮山野人地鋪毯琉璃作
杯激艷碧雲際峯巒闢園囿轉車驟上無頃刻我今

周游全地球足跡踏徧卅餘國文野詭竒盡見之吾
華前哲無此福游蘇格蘭見公像惟公賜我生感激
巧奪造化代天工製新世界真大德華忒生後世光
華：忒未生世間塞美哉神功在地球永：歌頌我
心惻

己亥五月自倫敦出利物浦還美今五年再自
倫敦出利物浦如故觸物感噫

又別倫敦渡海行
瀛車烟島作雷轟
邱原弥綠牛羊
牧樓閣飛紅市道平
風景依然吾老矣
海波歷徧月
將生重游利物浦
園囿花徑尋來眼更明

徧游歐洲十一國題詞

留滯歐洲半載餘
遍遊十國走飛車
腥魚乾饜難為
飽華屋巍樓頗可居
風化何能比中土
物華差或勝
方輿地中有海生人白
二者天驕我不如

寥天室詩集

康南海先生詩集卷之八

後學東莞崔斯哲手寫

乙亥之夏吾遊地居加拿大域多利之文島
名其室曰寥天海島雪山有憂輒能去勝遊
不可忘自甲辰十月再入加拿大遂再游美
墨再歸于歐鴻飛冥冥扶搖九萬則入于寥
天矣凡乙丙丁三年歐美之作都為寥天室

集凡六十四首其歐土國別之作先附于道
遙游齋集者不計也

九月二十二重泛大西洋 甲辰

瀟：蕩：泛：洪波萬里香：無坡陀隔限歐美奈若
何南通非洲浩漠沙不知大地何年凝成壳不知西
洋何年窪成窩冰海之北冰山裂南流漸成洪濤多
爾乘百千萬億歲渺無片帆隻艦一經過人世絕不

相通惟有鯨吞鯨舞門龜鼉日出月沒星辰炯雪山
映照碧浪槎若非冒險科命布十萬里新大陸今猶
莽榛柯野人盤據狂狸舞豈覩文明繁盛之國家巴
西萬里神皋沃神遊夢想巴馬孫之河吾國人民繁
已甚開新中國其有那移民不知始何日大願終償
吾則歌四百年以來檣艦飛渡踵相摩探闢新地之
大功若入新星界而上大羅五年三度過此海海波

深碧若鏡磨登舫把酒祝海若安得再尋新世界吾
婆娑

三過落機山放歌

一歲住湏彌三度落機東球諸山湏彌最高峻西
球諸山落機最雄奇湏彌昔稱日月所出入我居大
吉嶺巔夜遊集仰視白雲一道橫天共河沒落機覆
巖五千里春夏秋冬巔皆雪峯萬重門開合東迎西

送皆竒絕石壁峭削立積鐵危嶂侵雲橫天曲城郭
以億垓直勒隊仗各戰決室蓋亭：出麾幢帳幕森
森劈斧鉞忽各萬馬擁旌旗銜枚疾走不可說漸登
其顛太平頂一白無極映明月高：燈摩上帝座去
天尺五捫星澈顧盼大地彈丸圓蹙踏五洲大陸裂左
提太平洋湯：右弄大西洋浪：瑤池閬苑我能識
呼吸雲氣挾雲收琪草瑤花自芬芳縞衣皓骨白雲

裳玉樓瓊宇白龍鱗舞白鳳凰白旂白馬相飛揚寒
天無極冰玉光穿三晝夜山陰陽雪峯侵入魂魄涼
憂煩銷去難侵攘眼簾變動皓茫：天上白如在玉
京飛揚忘我身世塵中忙人間豈有此仙鄉神人紫府
非渺茫昔年五月曾過此萬壑浸綠千峯紫澗滔激
湍碧白波撼撞山壁鐘磬和垂藤老樹紫岩陀青翠
□□可婆娑下臨絕□□□□兩峯隔此可相摩□

□□□萬丈多架以鐵橋驟飛過隧道八十如山阿
漸下千里溪成河黃沙綠浪碧草槎俯視萬山白□
□人伏如平坡儀衛森列天仗如自霄從降泥沙迴
視蒼：雄秀倚大羅

遊加拿大詩

在加拿大聞償款加鑄價重稅頻加憂而有作
時甲辰十月也

幣償十萬：自古無此奇此金從何取刮自民膏脂
暮冬風雪裂行經山澤陂遇一老工者適自中國歸
自言事力作工價甚薄微手足生繭粟風雨沐艱難
有時感寒暑父母嗟寒飢辛苦扶病起頭昏扶鋤犁
一日之所得百錢僅能支官府勒取去巨金納于誰
奪我困中粟病母卧無療取我機中布瘦兒寒無襦
我民何罪辜衣食絕無依民也資忠義愛國同有思

或者為國防強兵振天威或者為開學民智開愚癡
或者興農工富民補助資抑為六舖樂吾民同娛嬉
或者□君后歌舞湖山濱吾民亦效忠願貢之赤墀乃
聞道路傳強鄰實輸之三十有九年緬邈何長期官
府代追索骨肉受鞭笞我既擔重負老死無了時我
子尚被債我孫猶瘡痍苛征力難任避地走美非我
民實愚昧不識稅起時道達歐洲人述此出宮闈汝君欲

變法汝后幽廢之乃擬立新帝太上為載漪友邦患干預客
館先長圍陰通義和團冀成廢立徽徧逐萬國人繫
殺無是非遂召八國軍長驅入京畿眾邦代定乱兵
餉索固宜非我外國督乃汝太后為汝宜自怨怒無
憤鄰邦師我乃如夢覺泣涕垂漣滿近者復加稅苛
重難訕譏謂因加鑄價千萬更支離和議已五年今
何翩反而當時所議定銀價非金質銀價用兩別金

價用鎊持曾見和約文各國分索詞某國若干兩萬
千無錯遺無言鎊幾何約文豈兒嬉睦鄰久和好云
何當面欺此豈復成國索貢亦太奇竊意我大官聞
此峻絕其今者加搜括我民地無皮不敢怨外邦深
為朝廷悲未暇怨縣官天寒我無衣就令倍徙征亦
復無憂悲我家四壁立典鬻無所施仰天但長嘆今
夕灶不炊

鑄憤

八國聯軍已破京五年議約久行成償幣只聞用銀
兩和戎亦既竭關征無端改作輸金鑄何異渝盟動
甲兵怪甚商於欺大楚笑同趙璧許連城貢之不口
猶藩隸師出無名是奪爭不耻國交用貪詐誤他強
盜號文明無人謀者為秦國有瞽私焉是宋廷肆索
金繒意使者可憐木偶漢公卿既微管仲行披髮更

乞孫僑與軟盟信誓何須申旦：大橫無服諒庚：明堂大啟開民議痛哭寧無漢賈生

病卧灣高華山澤浪游地多僵木皆數千年燒

之以闢人居板橋四通行之無盡

甲辰十一月

板橋石瀨溜濺：臨水山花亦妙研行徧荒山看野燒荒僵巨木盡千年

嬉理慎泉看大雪湖溪泛棹

甲辰十一月加拿大

野日紫：暗松林香：冥群峯皆雪色萬壑帶泉聲
僵木縱橫倒溪流曲折清白鳥同呬喋打槩一無驚
橫雲藏島嶼大雪滿林邱溪小成專制湖深得自由
波高揚溷濛天大聽沈浮泛：原無住行：任自休
再遇鳥閣道海峽最深幽翠崖劈兩峙綠水瀉中流
雪嶺看無已飛泉聽不休苔錢封巨石人跡少來游

重遊嬉理慎溫泉宿故店 甲辰十一月

重山伐木深通道山盡途窮見水明廿里烟波開
媿萬杉樓閣對澄清嶺巔雪影兼雲影橋畔泉聲與
浪聲再循磴道摩林石雖酌溫泉已冷成

灣高華對海旅店夜步

甲辰十一月

海夜波濤拍岸粗冷風吹月渡明湖步迤烟剪巢邊

遇大雪封山萬樹枯

美洲土人名曰烟剪蓋印度
轉音也華人呼其屋曰巢

除夕加拿大海島卧病感懷五首

甲辰十二月

東遼擊鼓人中立
西藏風雲我不知
絕好江山誰管
領空看書畫想
迷離從何說起
中朝事日飲亡
何長
夜悲忽念當年
開國畧艱難百
戰是何時

思遼藏也

八道山川磨邏
青蘆封箕子不
神靈夏商血屬
唯存
汝晉楚干戈可
有名保護有人
寧遣使太平無
事可
裁兵漢陽姬氏
子今盡周鼎摩
抄目不瞑
哀朝鮮也
王母瑤池麗上
清蟠苑正熟賜
飛瓊鈞天廣樂
聞同

醉驪火燒烽不少驚欲勸長星來飲酒更增圍獵一
開營海枯天隕生何世哀我蒸黎痛失聲傷臨朝也
華胥夢入境迷濛又隕迷途大霧中衆瞽叟：同論
日群雌粥：乃無雄狂泉大飲竒歌舞博夜摸行失
北東獨有餐毡北海者冰天雪窖卧書空唾變法也
縱橫宙合周寰宇飄泊身名度落機澤畔行吟無遠
近海邊齧雪太支離一年垂盡陰陽戰萬樹僵枯雲

物悲誰識伍胥吳市日鬢鬚全白異當時感殘年也
乙巳春彈病入美羅生技利會中同志莫雲屏
諸君為賃宅養疴門臨西湖每日繞湖一周
藉草看花

兩月西湖賃宅居萬花齊放為春餘夕陽樓影黃金
照夜電燈光白月舒步彳亍行時藉草繞湖小坐且
攤書度橋穿樹看波去泛棹歸來問煮魚

遊美國詩

美中文明詩社吟詩來乞評定回擇其佳句湊

詩七章

乙巳年二月

海外文明詩社開瓊章
勗我意徊徘民望敢灰強國
志主知深愧救時才回天無力
慚衣帶浮海多年歷
劫灰情偽險奸皆開徧白頭
連客夢瀛臺

龍蔡飛灑痛房州京邑邱墟重稅抽絕好江山成破

碎神明種族慘幽囚誰伸俠氣誅民賊安得雄才復
國仇中國魂招涕被面砲聲霹靂夢遼幽

東倭忽霸倚何事印度為奴亦可哀只為那拉生肉
亂一從江戶起飛灰莫倡革命傷元氣寧願塗肝鍊
俠才北族本來同夏裔莫持鷓蚌召漁來

榮辱興亡亦有因倒行怪甚我君民氣爭異口牴同
種才鄙中朝媚外人深要大群翻斲小却嫌強霸絕

維新狂泉醉飲猶難醒
坐看哀微種亦淪
墜斷志趨圖利市鬼
置才足備干城賤夫
勿謂爭生計
武士宜興起弱傾有
托辣斯王貨殖出拿
破崙世昇平欲生中
國非空論軍學銀行
踴躍成龍戰于今血
未分十年國事不堪
聞太陰入黑磨雷
電旭日升天曠霧雲
銳志拚為鸞翮鍛庸
才何忍燕巢焚劫灰
飛盡看滄海回望神
州已夕曛

陳登萊及門人陳繼儼募修白沙先生嘉會樓誌
雲臺求題二額追思與簡竹居舊游寫寄二子
世界之學派心物別兩支希臘索格底印度釋牟尼神
我標妙諦一切相棄遺耶氏言靈魂佛說出餘枝大概
古教主靈明多主之開口講明德大學第一辭孔道雖
兼賅作聖貴睿思萬物備於我孟氏發精竒象山遙接
緒指心之論師江門風月深靜中養端倪得此把柄入

萬化皆我隨天地可闔闢世界等塵微渺絕姑射仙綽
約冰雪姿大教移薄海姚江醞其醞尚想楚雲臺妙契
出希夷吾緬鄉先生嶺學光在茲疇昔曾齊心超出造
物克既現救國身未肯脫垢衣不忍心難絕且復隨慈
悲大地無不到現身無不為猥以行患難美洲道逶遲
前遊二十年黃雲紫水湄吾友簡朝亮碩德竹猗：携
手登釣臺展裳謁遺祠撫摩碧玉珪瓣香獻所思躊躇

嘉會樓尚想舊風規
圭山端以直紫水清以漪
方今易新世學風盡掃
披舉國飲狂泉功利醉
于飴誰肯搜文獻拂拭
有道碑我遇歐列國好
古賢是希壞宅千百年
修舊加敬之豈料兩陳
子古義照鬚眉慨修前
賢蹟命我題其楣教宗
有運會盛衰可感歎千
年太平後心學重張施
中國學必光視我白沙
詩

斯哲謹索白沙先生名獻章字公甫新會人正統十

二年舉人穎悟絕倫聞吳康齋講伊洛之學遂棄其
學而學焉乃皈隱白沙致力於修身正心之學其論
詩謂詩之工詩之哀也故其所為詩冲淡古樸有漢
晉遺風焉

□□□□歌

太平洋湯：亞美利加兮羊昌駕樓船兮浪狂：回望
神州兮路長不得登岸兮神傷

遊花嫩岡謁華盛頓墓宅

頗他瑪水綠沚：花嫩岡前草樹芬
衣劍摩娑人聖傑江山秀絕地
萌文卑宮尚想堯階土遺塚長埋
禹穴雲不作帝王真盛德萬年民主記
三墳

紐約樓閣高二三十層初到驚觀冠大地矣

鐵構巍：雲表騰紐約樓閣欲飛昇
十二層樓為閨苑銀行街上更卅層

羅生技利開十八年已成大市地暖宜果病者
多來避居

寒山夾大野極綠拓平蕪土沃耕農富天和病客租
邱陵成縹繡花果足菜鋪廿載誅茅棘居然盛大都
紐約街頂有瀛車倒下死者十三人血肉橫飛
傷者五十二人折足斷臂慘不忍觀吾在他
車幸免

開街之廣十丈旋開街之人蟻行聯電車如織破道
穿人避不及肉糜酸肉糜碾飛廿餘里聞者傷心為
掉鼻乃穿六道地中行又架鐵橋天上至鐵橋高跨
開街上高者四丈卑二丈廣狹無定□□□美東大
市日隆：徧市瓦面瀛車通玻窗簾几坐玲瓏直馳
疾驅如走風倏瞰市道如雲中樓閣塵市人民車馬
擁如蜂樂我馳驟破天功歐洲此制未發蒙今日紐

約聞警鐘車行太疾軌脫縫飛墜於地險無窮死人
十三血肉融傷者五十折臂胸間之驚極心忡：我
雖不坐此車中昔者頻坐顧盼雄乃皆樂極苦必從
或今車制未精工幸其改良少險凶人世何敢不冒
險且以救國尤考終嗟尔瀛車殉難者車製不良慘
遭逢

遊威士潘兵學校視操 乙巳年七月

朝乘汽車威士潘閱視兵校憑海灣山海蒼：林木
鬱中有石樓為校室將軍戎裝握手見導游畫舍宏
規屹列帳松陰荷鎗守巡行肅整耐苦疾組練三百
白如雪花旂前行鏡樂發砲隊轟峰震雷霆烟霧塞
天翻地脉士女如雲散夕陽夜來跳舞電燈白美國
向主孟祿義保守不須兵馬刷近日麥堅尼霸義發
越不可遏東定古巴西呂宋驟增海艦四十額武稜

漸著抑可知茲校士官誇武達鹿逐犬爭今何恃倭
勝俄人我懾之七寶空藏不守衛誨盜名敵無此奇
東遼西藏無主者聽客七寶取携而嗚呼武備乃是
文明具連年變法豈不知坐視國土日割削愁送各
國武庫觀龍旗

聞兵訖夜乘瀛舟自哈順河歸紐約月色微茫
此福尔敦創瀛舟首行之地夜闌看月感賦

開兵散後松日斜山海一碧遵滄汭
瀛船吹烟飄瞥去回看石壁樓閣綠
樹嘉雙輪捲水浪花白頃刻百里疾
可誇此為哈順河昔者福尔敦創行瀛
舟之所過先我生世五十年神工首出
功難磨滄海茫：浪汪：四無岸兮不可
望天四垂兮雲蒼：國土限隔無能航
羅馬前人視飛鳥後得指南針有方上
下百萬年大地冥墨寒絕各夜郎政俗
難測識寶精各深

藏雖有科崙布晏遜與墨領強覓新地闢大荒交通
仍艱難披閱勞肝腸自有福尔敦遂縮大地若堂坊
波浪滔：夜燈彌山閃煌：百年世界大進化萬載
無此大塊新文章我國祖堆之造輪舟在南齊時惜
我後世不繼美不然地球吾為主人基福尔敦尔何
幸吾感尔功又歎吾華人失計之非倚欄聽濤夜歎
息忽到紐約太迷離船燈明麗若我紫洞艇樓閣百

丈臨明漪造此繁華之新世嗚呼禹功垂萬期

黃石園歌

黃石園圍七百里六日乃能周游美人徙民空其地為之誇為地球第一

白草黃沙灰塵飛撲如成塞外其佳處只沸泉
千穴誠為異觀然僅此數里耳餘無可觀甚負
盛名也

黃石園中何佳異沸泉數千周數里昔者火焰噴山
巔今者沸泉藏地裡徧山空虛成沸潭萬竅怒號良
有以觸孔噴出漸成穴淺深不一皆清泚風蕩輕烟

熱拂面瀾漪皺動成丹紫淺黃深碧紺琉璃微波五
色生妙理亦有穴深三百尺窅；澄碧下見底如壘
如釜如竈窟如壺如盤多肖物螻蚌蝶馬各象形千萬穴
形難一一最著九十有九泉岩深激刺能上沸壘泉
二百五十尺信泉依時來汨；是時天黑夜八時旅
舍百客夜走出萬燭電燈放樓頂撮光激射如皎日已
見信泉浪洶；飛波走沫霧四溢煙雲五色吐變幻

沸濤十丈上涌發由龍穿地衝上天雲霧夾之光怪
疾雷轟雷掣閃寒光聲：霹靂跳珠沫翻波倒瀾目
眩絕如是半時漸低沒此誠天下之奇觀羅馬噴池
從此法祇此數里為園圍處：畫欄繞泉穴實為大
地詭異處游客快觀必叫絕惜我黃沙白草三百里
俸苦馳驅無可說恒河之沙金一点空勞披口如飢
渴萬里走來六日游塵沙如山日烈：有若出塞遠

征戍僅見沸泉已厭極欲誇廣園冠地球闢此童山
炫游力徙民空地數百里只有熊鹿數四無人迹一
善不足掩萬惡請君不必蠟游履

科葛微那泉歌

黃石園以沸泉勝凡千數穴黃碧連漪有名
為科葛微那者譯言莫忘我也泉深碧不可
測松石環之口誦成此歌

溫泉兮摩訶滌：兮碧波烟涌兮通天河深難測兮
可奈何我心熱兮難和枉勞肝肺兮自多君寧知兮
莫忘我科葛微那

松盤：兮澗阿石在澗底兮我：溫泉感兮沸不和
既涌噴兮棄我奈何不調鼎鼎兮漫澤陂我能去宿
疾兮起沉疴日浴三斛兮酌以歌君壽康兮莫忘我
科葛微那

黃石園中有大湖百里即名黃石湖泛舟視中
島野牛鹿宿濱湖客舍觀馴熊飲不攫人亦
異事也

平湖藏山頂百里亦壯濶碧波淼淡；漫山浸天末
松林若截齊坡阜遠周括中有島嶼四一養麋鹿活
山牛巴付路頭毛何毳毳湖魚凡三種何問鱖乙；
乃知新闢地生物最簡略物以雜而文久大交通訣

華夏百產繁乃由老六國所以文明盛賴物產發越
小島與新地文明難產托因悟進化理慨然感民約
客舍臨湖濱明黃三層閣湖山照明媚松林穿約畧
冥、熊羆此為宅一熊離襪來一熊樹上落一熊蹲
樹脚舍主曰飼之熊來有信諾凌晨在六時傍晚五
時確諸熊從容食客視不擊攫吾亦勇當熊相見亦
落、乃知無殺機猛獸馴不惡應識凡百業造孽慎

所作古者秦龍人豈賴他術學神僧矜伏虎虛白心
乃樂萬物本一體並育豈交搏睨視信得道超然天
人覺

黃石園中白草黃沙數里無人塵沙高捲儼如
沙漠可名黃石塞非園也連日游行苦之

白草黃沙曩絕人飛塵盈丈捲雲輪天低雲慘松林
短策馬艱難塞外巡

沙磧荒山真大漠迨：度漠最勞辛此地宜名黃石
塞長逢六日戍征人

百里風沙撲面飛荒山竟日馬蹄馳問君何事苦行
役為被遊園黃石欺

遊黃石園六日畢出園矣作

黃石園中數首詩篇：譏笑悔征衣黃沙白草了無
觀風雪灰塵苦不支

驚度荒山三百里虛名游園六朝期
除却沸泉高十丈更無風物儼幽奇

丹壁觀瀑為園中最佳處美人自誇甚至危崖
峭慄日蒸無避吾游苦之

瀑布小以短山崖崩以頽峭壁瀉丹黃危土流素灰
草樹皆不產童髡無徘徊炎日照蒸酷難覓松陰開
俛瞰徒喘慄徒聞轉谷雷小坐亦無所佳趣亦何哉

危欄空徙倚不如歸去來

第六日行近丹壁客舍長橋處觀溜灘山綠似

桂林道為園中最佳矣

澗瀨濺：枕石流長橋百丈度岩丘馬行半日度沙
磧特為停車且少留

溜灘坦石瀑橫飛山綠周遭石滿磯回憶桂林千里
道山川寸寸碧琉璃

落機山盡處行自要離至思父士頓山道中七
十里九月白雲滿山岩壑甚美

群峯連白雲山路緣幽林六馬曳大車登坂千百岑
澗流積碧綠上承青松陰積水轉金輪製電照崎嶇
千室放光明曠道炳幽深中午到山椒去海二千尋
突兀聳青天太白欲摩侵元氣通鴻濛美州橫古今
南通安底斯新國吾所欽東望太平洋故國動越吟

自茲下崇崖馬佚不可擒一時三十里忽下坡陰
石壁峙嶙峋積鐵立竦森流水自潛：牛羣牧松口
時有烟剪人板屋臨綠溇亦有開礦夫帳幕淘取金
此地落機盡萬峯攢花心故擅岩壑美鐵軌新酌斟
晚歸卧瀛車溪石聽佳音

穿落機山高處

澗低松矮雪鋪岑千萬花牛牧壑陰俯仰衆群如蟻

隊瀛車上駛路千尋

行盡落機山南入新墨西哥境遇美水利長波
告我此地稻田似中國溝洫遺跡猶存

日携一卷地圖開落機穿過萬山回新墨西哥溝洫
跡遺民似是自華來

亞士瑞有古屋數十戶云二千年皆石為之有
樓二三層形似中國今雖亂毀遺跡猶存

古屋依山聳石樓傳聞口亂二千秋不識桃源幾何
世遺型髣髴是中州

巡覽全美國畢將遊巴西登落機山頂放歌七

十韵 光緒乙巳十月

祖龍華盛頓開美十三州憑西海隅新藟百年前未
關乃為班法之耘鋤南北戰餘四十載迤西萬里未
通車蒼莽落機山只有荒林穴狐豬渺：太平洋只

有烟翦晨捕魚三藩息士高與乾沙五十年前無人
家而今人居四十萬戶畫樓廿層聳雲霞羅生新闢
十八載公園華屋可驚嗟砵崙舍路憑山市里繁
庶亦怪呀鹽湖大鎮開自摩門教多妻被逐來作家
沿海數州皆腴壤綠縹秀野鋪桑麻麥粉商估徧大
地以農富國機交加新墨西哥宜水稻溝洫舊跡出
吾華落機山中數州地五金煤鐵大地誇餘者亦復

宜畜牧牛羊徧野蔽草沙回顧我中國三代文化卓
江南粵蜀閩尚為蠻夷穴羅施南詔在宋時猶為鬼
國之部落寰中開闢艱遲猶如此何況長城外東西
北之三角歐洲大陸羅馬初混：草昧無人覺過茲
深林晉世開英倫海賊宋時作埃及以南莽萬載渺
渺撒拉大沙漠統觀大地開闢皆甚遲無有若美之
速攫仗劍草創數郡土闢萊順成萬里國蓋從機器

備文明更賴鉄軌縮地岳一通汽車四十年萬里山
河野蠻成神仙農家樓閣丹青靚工人士女衣帶鮮
小家琴聲弄娟：熙：婦子自姿妍禮容神態中法
律皆從學校通文篇自從北購亞拉士駕富庶雄大
無倫邊地勢東西憑兩海亞歐交通左右便我驚開
關進化驟時哉華盛頽林肯：生焉力少效大古無
比太祖美州汝為先往來全美南北路東西經過三

周穿行道路略近五萬里度盡落機四回旋目極兩洋
曾登岸蜜士失必与微蘇拉皆泛船東方登白山西
遊黃石園曰：撫地圖昔：攷山川甚妒華盛類甚
思開新天橫睨大地中豈無荒地翳榛煙高視霸王
圖時來治教起聖賢波士類摩新世石初祖舍我其
誰先從來爭內地尺寸皆奇艱一城流血以億萬兩
雄互得守已單春秋晉楚爭虎牢三國六朝江淮間

歐洲中原千里土千年戰血流斑：直布羅陀與旅
順英班俄日爭幾年魯衛宋鄭盛文化地居中原無
由前晉楚燕齊秦强大處於四極易拓邊歐陸德法
與意奧千年雄爭兵氣纏相吞相害千百里凱歌高
奏稱霸尊師丹楚殺數十萬所得有幾何慘旃拿破
侖志一歐土萬戰不就身竄國猶偏豈若俄闢鮮卑
地英攫印度與加拿大馬葡班地小迫於海注意新

地開最先只今國弱地頻削散布全美皆其孫萬年
英班必不滅以種徧地皆根萌古今國勢可以鑒勿
爭朝市棄荒原英智或失愚或得放逐或福王或憐
南美有大荒誓將闢地開坤乾我國人民數萬：貧
苦奔走同棄捐我將殖民巴西地樓船航渡歲億千
樹我種族開我學存我文明拓我田移民迅速殖千
萬立新中國光亘天既救舊國開新國我族既安強

且堅雖未大同天下樂我願庶幾救顛連嗚呼不知
何時償此願突兀獨立落機雪峯巔

懷陳吏部

不見十年同經萬劫支離絕海
蕭索窮冬思我故人西望鬱結

義寧公子人中鶴風雨飄搖聲聞天零落霜毛兼雪
羽劫來滄海與桑田乾坤不正嗟無力家國同□亦
有年黨錮舊交半邱隴滔：江海自風煙

考驗太平洋東岸南北美洲皆吾種舊地

吾遊加拿大古蹟忽有李陵台好事徐維經購得埋地
古錢之一枚傳聞古錢埋一甕名字皆自中國來我曾
摩挲墨搨之視為異寶藏於懷米北亞拉士加人面貌
酷似中原胎新蕾我遇水利長口稱新墨西哥稻田開
其地溝洫似中土定是華人移殖回墨西哥文明尤古出
遺殿百級高崔嵬百器制作頗類我蓋民相見情親哉
吾人呼叔似南越特留酒食意徘徊秘魯文化亦相似

今雖代遠存刳灰麥秘中間稱盛世惜遭變亂毀蒿萊
我將南遊親考驗益見吾種滂遠無不賅想見颶風吹
渡海二萬里遠難重回或者三苗舊蠻族或者渤海扶
餘莪或者文身斷髮出吳越少被文化無通莪各以國
風與野俗行之新陸傳雲來文者開文明野者山澤化
日類總之太平洋岸東米洲五萬里落機安底斯以西
之草苔皆吾華遺種之土地証據確鑿無疑猜科倫布

尋遠在後先者為主後者隨彼挾國力推智者歐土又
近來相偕遂令光光新大陸客作主人先安排赫：歐
洲鼓與旂樹徧南北米洲照雷雷送來得失多反覆天
道人事古今可相推我華人類數萬萬橫絕地球吾為
魁他日中興樓船破海浪水濱應問吾故壤北亞拉士
駕南智利故主重來龍旂颺

徧遊北美將往南美巴西關新地 乙巳九月

平生悲憫天人志，開闢榛荒宙合圖。
涼落天涯誰或使，縱橫瀛海氣徧粗。
手扶舊國開雲霧，足踏新洲徧海隅。
慣歷諸天經萬劫，教宗國土此區區。

乙巳二月居羅生西湖兩月追憶舊遊

西湖舊宅應無恙，步屨遊廊豈再過。
記得好春花月夕，扶筇日日看湖波。

入墨國境

丙午正月自美國南遊墨西哥貫其南北全境于是稍倦遊矣

歷亞歐非到美洲冬殘墨國又來遊海山踏徧廿萬里
國土縱橫六九州政俗詭竒文野見榛莽開闢古今道
諸天未歷吾猶憾老子婆娑納地球

遊墨西哥

貫其南北毋山為脊左右斜落為平原地瘠苦二千里不生草木稅重民貧天寒

皆無衣褐以毡貫頸流車人備五色亦詭竒之異觀矣風化雜沓皆守舊也

毋山盤鬱兩洋邊徒自鮮卑別有天地赤不毛憐石國
民貧無復擁寒毡黃紅白種久相雜美法班爭亦有年

舊跡文明壇廟在摩抄認自漢家遷

明湖橋畔記飛鷹走盡群山闢墨京人種移從了拉士
天神飛下葛爹兵戰爭歷久民能主專制猶存亂豈平
政俗喜能摹美國道塗樓觀望飛驚

近墨京架的有墨前王故宮苑遺跡人家數千依

山居泥磚平頂滿山皆桃花

秋祠簫鼓鬧荒村來訪蠻王石屋存億萬桃花夾流水

此山又見武陵源

茂蔭客舍制似北京院落有感

小院迴廊入眼驚
繁花籐蔓滿堦生
此是燕京佳院落
如何墨國觀庭楹
井邊橘柚冬猶綠
瓦面松杉老自榮
細嚼海棠攤卷卧
忽思故國不勝情

自歐美游兩載無少息
游稿數十畫可數冊
邊運為難逋客無家入墨
無可游主人黃寬卓與醫

士黃曰初議讓屋居我三月晨夕篝燈閉戶著書復如諸生時因題曰著書廬

亞非歐美倭遊餘息輒燃燈事著書菜苑高齋三月卧道遙遊亦作吾廬

光緒三十二年三月將放西洋入美探必固泛舟垂釣入探馬施河故人有自數千里來送携酒擘鱗極樂賦詩以記送行諸子之深情也

菰蘆瑟瑟：水如油滄海茫茫：試泛舟頗欲釣鰲旋地軸
且將擘鱗對濤頭浪花撲袖高三尺仙夢隨風度十洲
大西洋水深千丈送我深情記此游

聞夏直刺游美道左不得見懷以詩

不見雲間夏彞仲文采黃中絕世無幸我運英未推轂
喜君浮海騁長途劫灰飛盡何生世逋客遷流徧海隅
猶憶京津汽車道九年契濶共艱虞

墨國胡克家郊外十里許祇祠前有老檜圍五百四十尺凡二十八圍垂條蒼翠其巨大吾未之見也以在美中新地故得保天年耶

老檜周遭廿八圍拂雲陰蔽翠霏：不知何代汝生始行徧全球吾見稀億劫經過天不死新洲發現世驚奇霜皮黛色鬱相對駐馬婆娑坐石磯

墨西哥人種出自誰何今歐美人皆無定據吾

游茂韓觀古王宮廟皆五百年前物似吾北
方廟式紅牆層門如見故國其石刻物與西
伯利博物院中物皆同乃知確自鮮卑傳來
也地穴即墨末王孟諦蘇瑪被擒虜為之憮
然

吾游墨西哥考種訪古蹟茂韓腰架丹遺宮猶可覓
就近尋茂韓汽車歷夜日巖嶂母山高澗壑度山北

言至胡克家都會稍屹：衢市頗整齊戶口三萬實
稍嫌中央溝道上穢氣拂一宿易馬車百里馳驟疾
山野開秀綠室廬多瓦質屋瓦作金字秀昧睹人物
白袴穿草屨一一吾國物體制與狀貌似我怪呀發
夕照頽宮殿壞牆磚石壓丹堦廣十丈四面皆三闕
壑谷開地穴鐵閘深不測後殿最完好崇墜九級石
左右飾紅牆正中三門擘內殿列六柱厚牆三四尺

後殿丈室四廣容小收窄於樣磨磚成凸凹結石迫
頗似北口寺廟貌正髣髴周視恍然悟此是吾華物
吾聞了士惕移自鮮卑出鮮卑當漢時交通已久遠
蘇武牧北海已在鮮卑澤宜有李陵臺英蹟播遠邇
高齊嘗入主文明傳其國屢轉中華制播散其部落
甘查甲渡海了士駕乃作避凍而南行太平洋遼漠
連海得熱地墨西哥是托日以舊俗廬建築為廣宅

最好作崇壇三成而四出惜不識華文光明難發越
坐令科命布後來作先覺

謁畢總統爹亞士于前署進避暑行宮

長楊馳道直如箭離宮抗山林苑緬巖洞莎蘚作宮
門衛兵持鎗環似扇梯亭甍上入雲峯文瑣華嚴開
正殿繡衣佩劍直殿前文叔幅巾出酌獻握手殷勤
語蘊事諷爽英姿猶隱現自言二十充卒伍身經百

死多錘鍊二十八歲作將軍叱咤虎豹風雲變至今
七十有八齡目光爛：巖下電起自布衣為帝王文
治煥炳焜武戰徧觀大地各君相骨相權奇曾未見
叔寶畏觀楊堅像侯景汗流梁武面乃知英雄自瓌
異太原楊素可驚羨天人眉宇照塞外威武紛紜誰
可殿民主乃以專制治靖亂不使敵黨煽墨從爭亂
三百年賴君道闢民安宴譽我老國能變法慰我英

艦載出阨祝我成功天助祥問我來遊欲何得日命
繡衣陪乘遊請我觀兵陣旋抽將軍擁旋校昔卒鎬
戟森々和珮璆陪登大學藏書樓佚々胄子圖書大
九洲鑿渠百里瀉泥湫京邑爽塏賴此溝大工未竣
延我籌特乘花車出郊邱歷言古蹟請勾留索我墨記
欲代譯惜哉未成謝意周嗟乎惟天下之英雄乃相
敬而相攸詢我墨種所自由答從鮮卑夏種留甘渣

甲峽昔未折鴉拉士駕頻索求避寒遵海漸南下墨
秘腴暖田宅悠中華宮壇有遺蹟沃架丹宮可以搜
總統欣命史臣記古文大冊用相酬嗚呼惟天下之
英雄乃相敬而相攸

五度大西洋放歌

浩：乎浮天渺無涯洪波如山蛟龍是家翻罷巨艦
檣折衆譁四海皆汪洋西洋尤深鯨鼉擊嚴冬無風

不可渡老龜吹浪白日遮東羅美洲西限歐羅巴北
浮坤蘭接冰海時有雪山流出照霓霞南通南極不
可到莽：囊括非利加迤來千百萬億歲豈經人迹
一泛槎美洲大陸十萬里：原野莽烟花落機母
山安底斯只有了士惕人種之所家豈有文明開新
地只循太平洋岸捕魚蝦秘墨遺文久滅絕但餘破
殿供摩抄若無料命布豈觀電燈汽道照雲霞驟然

闢新無限土動植繁怪可驚呀世久人多國土窄資
此移殖民富加南美巴西阿根廷豐原萬里蔽榛蛇
長流瀟：亞馬孫護漑神泉饒仙葩架非烟藍乃土
產可移百穀種桑麻吾國生繁養不足殖民尋地吾
久查樂土樂國無如此廿年緯繡久咨嗟航海誓開
新國土移吾種族新中華雖知此願未易就指圖向
若吾先誇嗚呼天地無盡藏冒險勇浩鬼神訶噫嘻

科命布之功
酌酒贊嘆
豈有他五度
西洋如庭戶側
身望洋頻歎嗟

太華一舉一以緒碧髮餐霞
三日之息還帝擇岩亦禱世
跡蓮華一界妙豈人間誇龍去
天竺日月同鶴碧把携何山神
赤采仙乐志隱及采齒
柳宛仁茶

七里去廊——刻石如
拋雲層，殘土通天龍
整原公，昆成多遊方，博
心宮樹，煥起之在茅，原之為。

設大乃親考亦為

於地訪君自娛

三月香桃花寂憺

茅山同踏交西陲

批仲產弟起茅山

及西陲並為李四弟

弟少遠國
天文棧 兄更往

弟、信似上 祖塋

豈出想此及羊埭

皆手獲手端古古

世哉追思風雨聲

世老家之我弟兄

嶺雲紅柳月出向紫

杜鶴紅霞弄花叢

寂先幽懷回審刑

懷仲產李兩支弟再
賦二首 天游化人有為

乙丑六月乙

圖

海王是現十年後道光廿八年歲日
地喜田家到時去世可曾方有為
少年竟何有希一為終亦備仍先
門上費大回誰見為乘願此天八
千返存生不救斯少人

天啟化人有為

避島詩集

康南海先生詩集卷之九

後學東莞崔斯哲手寫

瑞興島嶼皆備山水幽勝有島在瑞京南湖
中萬松盤石樓：無所買山隱焉名曰避島
卜居焉號曰北海廬居之十餘月思歸未得
凡自光緒丙午秋至戊申秋漫遊歐土之作
都為避島集凡九十九首

再游瑞典稍士巴頓湖廬故客舍得舊室即前
游與同璧女同居處几榻盤花皆故物摩撫
悵然得詩三首寄同璧

湖橋島浪蕩樓臺客舍圓
窻又開故榻舊花仍從
倚兩年夢事省重來

記携同璧住多時
卧榻呻吟為折枝
我似無家惟與
汝此游孤獨更伊誰

皋蘭被路松迷島湖綠漫罔思遠道人天幾劫竟重
來白髮通臣人已老

過漢那活大學俾士麥昔讀書處山顛見俾相

大像感賦

巨靈崔嶽上摩天鎮廢山顛尚兀然誰識當年讀書
者如今霸業冠千年

羨蘭那觀博覽大會順遊佛羅練士讀書佛羅

練士為意中願
畫人皆會于此博物院
凡八皆宏妙可觀

讀畫無如佛羅練
考古猶有美蘭那
環寶精工集大地
十日世界徧婆娑

滿的加羅國在法之南
臨地中海地勢類香港
南北八法里東西十法里
而自立一切無稅
惟稅博進故歐洲貴族
美富人咸來避寒宮

室服饌歌樂妓曲皆號全歐第一人僭樂土
誠大地異境也

大地極樂國曰滿的加羅境土二十里小侯何么麼
山海翩：獨立旗附庸於法仍不磨滅得不足以爲
大苟存性命乱世過跨山南臨地中海雲石嵯峨迴
紫波氣候不寒海氣活深冬木青花繁多侯國如彈
丸侯政不繁苟順人之欲從人樂歸者如市滿山河

博場閎麗過宮殿公園妙美百香和靡顏膩理四方
集遺簪墜珥深宵多寶釵珠履日詭飾錦衣玉饌加
婆娑鳴琴利口繁曲劇雕牆文瓦增嵯峨歐土華族
數十萬束於嚴政無奈何闢此桃源異國土縱橫人
欲無譏訶瀛車一日可飛至避寒牽袂爭來過隳轡
王孫金絡馬綺紉公子玉人歌列國帝王居無事微
行時舉金巨羅揮金如土擲百萬踵事增華日相摩

服饌曲樂皆第一甲絕歐土理則那小侯故壘憑海
噬宮闕壯麗摩天際月收博稅百萬錢一切無征人
銜惠旅者如家歌樂土妙音之天何人世腓尼基唾
之尼士歐土杖杆多產異逆極小國生詭奇無若滿
的加羅極樂之怪事

波多為法南大都會以葡萄酒名今人家廿餘
萬屋簷道汚民貧俗傲矣夜大雪飲酒看劇

歌甚佳

名城憑海攬波多，屋簷泥污不可訶。只有葡萄斟美酒，揚鞭踏雪夜聽歌。

過比爾葛斯大山 西班牙

雪色何穹窿，橫絕歐南壁。迤亘三千里，天作法班隔。翻：青翠姿一青，惟頭白絕頂。關大原莽莽，接蒼碧。橫嶽掩長霄，積玉凝巨石。突兀聳天宇，連峯走額額。

儼若分軍隊仗伍各部勒亭：旂蓋出森：金斧劈
澗流瀉絕底渾灑黃河窄葡萄徧山麓蒙茸發芳澤
千岩與萬壑競秀綠可摘濃姿若美人容華倚天末
不知衡岱色頗覺台廬索南走賒尼華礪硠露節目
餘枝落非洲萬里變平漠南歐萃精秀宜開文明國
忽念千年戰英雄夢已昨山色渾不改青：橫海角
遊迦憐拿六故回宮迦藍罷鱗出覽宮外氣他

那人居

羣山迴翔從中落龍飛鳳舞紫氣錯長河縈帶開原
漠古回王都于此作遺宮故殿已千年畫閣穹樓尚
巋然刻金錯采密雕鏤分寸綺錯皆綸連乍覺崩雲
天際壓忽驚垂乳洞中懸天幕攢花□字曲畫壁衣
薄迴文宣萬國土木多妙製麗密無與鬪精妍別苑
長楊欲挿天穠綠夾道嫋風前四松結亭尤芋綿剪

樹作籬尤翩翩其崇二尺周中邊堂塔亭池自娟
制類中華想有傳古木千章環宮園呼鑾舊道詔山顛
危樓長廊瞰風煙春樹萬家翳平原故壘危牆屹崇
垣降王獻馭跡猶存山河依舊雄紆盤感愴興亡幾
辛酸驅車環山道曲拳蒺藜徧圉地窟聯以木柱巔
穴居顛上開中雷光下穿崖壁巉岩住穩徧一二几桌
曲吹利床灶同處眠食便亂舞傲々紅黃纏赤足繞

車乞爭先或盜客物慎防旃無一識字類野蠻形如
鹿豕可憫憐久居名都化不遷吁嗟歐人之文明兮
乃都會有陶穴之野番歎回政之不修兮故宫慘
而雲寒嗚呼班人之不治兮得失可嘆鑒觀

回宮臨城有穹殿上攢貝下鋪瓷制甚精以沙
伯拉女王遺科侖布尋地處

崇殿臨崖廢古城攢花嵌貝上穹精女王臨遺科侖

布大陸新圖自此生

遊摩洛哥宿當之三日道曲市穢腥臭嘔人作
疾至頭痛乃知古人之地名頭痛身熱坂非
誤也昔者欲環游萬國深探南美非之念遂
沮矣適除夕行

平岡走迤邐城垣盡海濱嶙峋萬家室屋瓦皆平均
極目藍白壁色相亦奇新穆護之教式武稜常振

昔據西班牙古宮稱瓌珍千年今削弱文治太不伸
道窄曲羊腸路穢濺泥痕衣裳貫頭穿如袋可笑噴
關征譏何嚴市譁聲難聞吾遇為揜鼻竒臭襲我身
呃逆頭上痛再遊又吟呻乃悟蠻地惡響迹不可巡
始欲探龍庭詳考政俗文又欲窮非洲徧覽蠻俗純
頭痛身熱坂古言非誤云亂邦不可居內變將逐君
畏茲遂裏之歸舟乃翩翩遙望中南非沮縮氣不春

通道善旅宿乃感歐美人

除夕携眷自摩洛哥返西班牙經直布羅陀朝
行夕至歷大西洋地中海摩英班三國地窮
年地角為之感懷

汗漫窮年賦遠遊今宵除夕渡非歐兩洲連跨三邦
土半日飛行一葉舟千載雌雄爭地角九年飄泊望
神州明朝五十應知命只念君親摩白頭

望直布羅陀

山容蓄翠水容清直布羅陀紅日明萬里吐吞地中
海丸泥封塞天下兵海波渾濶容飛艦戰壘縱橫颺
旂旌半日兩洲三國地老來道長到元正

自摩洛哥晚泊西班牙穆秩市樓閣新麗為西
班冠昔初開美洲運輸百貨皆在此市為歐
洲第一市令人人生今昔之感

海波溷：夕陽紅樓閣嶙峋轟碧空記百年前嵇秩
市美歐琛畫此輸供

篩非道中見班后以沙伯拉受科侖布獻美洲
地圖像及遊其古寺見班始王非難第一與
女王以沙伯拉結婚圖及其兩棺及科侖布
棺以四校金冕綠繡裳扛之三人者為歐土
文明之導而餘波及于大地者也為賦長歌

歐洲昔何有萬侯戰壘血在手侯為劫賊擁女而醉
酒民如奴隸牛馬而柴瘦人不識字如鹿豕曰聞干
戈而駭走稍能教人惟寺僧人：迷信納錢而泥首
寺廟徧地人祈生天而外無謬巧宗世九起十字軍
始驚君士但丁之繁華而美文摩訶末教不徒嚴武
勳文學徧集中西人科學天算醫學皆精真是時歐
土翳黑雲長夜漫：何嚮晨班王非難英武伸以沙

伯拉女真人崛起比爾烏斯山南端男女二王分地
垠二王嘉會忽交婚駿馬騰躍從官勤益日山河人
民遺圖采繪猶有神合國強兵平百蠻戰圍廿丈陵
寢存萬幕士馬莽雲屯降王獻馘一統吞陸釐度校
納其文科學創導歐洲新班人普受智識均人才輩
起造乾坤女王神識尤度世冥想海外別有天地春
時有時人科命布懷榮十上人莫徇女王受圖賞識

頻萬國交通指掌紋政學藝俗皆更新
氣船鐵軌纏地脉歐美穠華郁彬
：餘波蕩入東洋濱飲水思源
此三君斯寺遺骨千萬春我亦頂禮心香熏

由班入葡崇山巨嶺重：懸隔長松徧山澗
溪激瀉風景至佳以其天險用能別啟國土
惟葡京理斯本雖憑海灣而崎嶇山谷如
山城小郡大道聚賭不足道也

崇峯走劈額千里隔崎嶇長松夾澗流風籟笙簧音
天險限班葡開國控海臨達都山谷間崎嶇依衆岑
王宮與大學冠山鬱修林公園頗芳菲萬綠冬蒼森
新道夾花石車馬日駸：夕陽衣鬢摩士女息花陰
君后日來遊徒行人所欽此衢冠萬國陳□好酌斟
餘道皆斜歌樓閣不高深祆祠自莊嚴膜拜連裙袵
傷哉祠前地叢衆跣相尋博徒與病者羣聚而呻吟

其他秘密室男女同賭金濠鏡隸藩屬宜其敝風侵
餘波蕩我粵賭盜弥古今千萬買善鄰至言誠可箴
慕尔國無政黨乱民荒淫國命豈能久幸哉僻海潯

自法之南行六解

法國唯巴黎勝妙法南
貧穢不足觀也

自法之南草澤沮洳平田大原千里土腴何以種之

青：葡萄

自法之南屋矮地汚墻或及肩貧多役夫草具牛衣

馬牛其軀

自法之南行彼曠野役夫築墻言逢零雨張蓋吸菸
卧于堤下

自法之南□與尼士依山臨海風景美處樓閣華妙
避寒多住

自法之南言過波多表海大都霸業銷磨蓋壞泥汚
不治則那惟多美酒聽劇且歌

自法之南三至馬賽海山幽綠都市矜誇登塔天宇
走馬海涯不寒不暑山曲可家

自美返瑞再遊稍士巴頓湖泛舟

四山圍島綠離披放棹明湖接渡時一曲清歌煙水
暖漪濤低唱我題詩

再遊瑞士登離寄峯巔視諸峯環走下積層霧
如雲海蔽山時：騰涌光景奇絕旃里同遊

晨起天大霧道路不能辨高樓臨廣道恍惚影僅見
登舟破浪行天水合漠緬但挾飛雲走灝瀟蕩冥眩
鴻濛跨碧落潏潏造化變有如登瀛球浪作風颺戰
瀛車轉登峯邱壑橫白練漸見草樹湖山半隱現
焱尔升山頭天地軒豁浮晴昊懸白日皎麗中天秋
顯：千萬峰戴雪皆白頭我：昂其首聳拔仰天咻
攢：簇火勢鳳閣而龍樓下奔臨萬島踊躍不能休

俛視白玉海晶光千里流蓬涌似雲鋪蕩：懷陵邱
截山如島嶼青白雙射眸乃知昔大霧積厚變自悠
雪峰映霧海玉山不可求遙望崩芙蓉峯堯拔十洲
上界厭神仙復作下界游日暮下山去奄為雲霧收
舟中鳴金告岸上然烽求以茲為告語如行九地幽
平生好搜竒此景未有侔頃刻異人天感念翻生憂
巴黎觀劇易數曲各極歌舞之妙山海天月慘

淡娛逸氣象迫真感人甚深欲歎觀止

羅馬城頭微茫月泰擺江邊波晃潑軍隊列鎗逆聲
發夫君應鎗死流血烈婦抱尸誓不活哀咽鳴：殞
霜雪墜樓輕影忽烏沒夜氣幽陰慘欲絕次場英卒
破波回傾城士女懽迎開鏡歌鼓吹轟天起縞袂紅裙
夾道來父母見子狂喜抱朋識見友握手猜將軍馬
墜躍中道元帥旌幢擁上台就中妙女涕被面遠睹

夫婿瞥一見萬人叢裏湧身來相吻驚魂若重現組
練三千甲仗明重：旂隊笛鏡聲鏡歌過去作天舞
瑤台萬電耀玉宇玉面霓裳八百女羽衣八彩翩翩
舉四人作隊次第前八人合隊散復連隊：霞衣異
樣妍國：奇裝合色鮮百隊盤旋縹雲煙大小垂手
駢摩肩執拂執鐸相蟬聯明眸皓齒粲嫣然玉腕輕
攘文履便香氣氤：步生蓮飛紅傲：散連錢驚鴻

游龍妙難傳乍看宛地彩雲燿忽見華月霞滿天霞
光散作萬彩纏花雨紛飛五色宣群玉山頭遇幾年
瑤池月下多飛仙碧城十二皆迴穿光明燭放照六
千不識阿瞞月夜夢可將拍譜人間傳終場海山浩
蒼：石岩洞府黑無光洪波齒石作宮窗圓月出海
放光芒岩中紫藤花悠揚杜蘅纏石薜荔牆中有飛
仙肉翅雙翱翔玉面珠花白羽裳翩：小隊出岩旁

曼歌飛舞蕩悠揚
摘花戲水拾明璫
山間採秀贈芬
芳醉卧石上
花散香何人世間
我已忘

免恨京三詠

白道光華免恨京
樓臺新靚照人明
萬綠廢園倚邱

壑六街繞水聽波聲

歐美道路之潔以德聯邦海認
國免恨京為第一公園依山溪

流穿郡樓閣明靚
亦冠全歐也

啤酒尤傳免恨名
劊于泮認路易傾
吾曾入飲王酒

店三千人醉飲如鯨
啤酒創於海認王路易德音呼
三千人沉酒常滿飲者琉璃杯大如斗然德人
之肥澤由啤酒醉不害事亦飲中之佳品也
歐人論學東哲輕德人好學康德唱免恨公園畫院

獨見莊嚴孔老像
公園畫院正樓陳十餘前哲像孔子老子二像列焉全歐只見此耳

薩遜四詠

噫路比河夾兩壁方登如磚峭若城奇絕山形作平
削中間洞壑又瓏玲
自奧入薩遜循噫路比河夾山峭如壁層疊方平如磚天下未

有之奇境也而中有洞壑架橋極幽者

薩遜籍民四兆衆薩京養兵四萬師走馬高岡行廿

里森：帳壘列旌旂

薩京畜兵四萬列壘後山吾走馬過之森：驚人小國寡民如

吾順德縣耳而畜兵如此途中遇王與吾為禮

薩遜雕牆最妙精舊宮新院夾河城王宮雜寶值八

兆小國窮奢亦可驚

薩遜土木之精名于歐洲舊宮今作博物院尤偉麗幾冠歐土

王宮藏雜寶值八兆金玉珠鑽牙漆寶石銅鉄各異寶光怪環異吾一一摩抄之小國窮奢如此昔者歐

民之苦甚矣然今民乃甚富可見立國
有方又不在區：奢儉之間也

瑟明水木一園春立國百年大會新賽馬吾曾閱萬

駿驂騮驥駮騁飛塵

薩京爹釐士頓開立國百年大
會在公園水木明瑟布置宮室

極富麗賽馬數萬匹各國駿馬咸集吾一一別
擇預卜之高下頗中伏波銅馬式不知如何也

刊士丹士三詠

層樓雄構歷千年此是明堂朝岳先樓中古畫吾呵

壁往事如雲空間天

刊士丹士有刊士廉樓創于六
紀大于十一紀為德王行幸朝

方岳屬制質樸如吾粵五層樓
上懸圖畫故事皆數百年物

古寺環廊盡畫圖千年名蹟未模糊
教宗霸業銷難

盡水木幽；烟滿湖

約翰呼斯焚虜石鐵圍碧草尚淒；
師徒守死能徇

教地獄天宮應尔齊

波問人約翰呼斯先馬丁路德
拒舊教有遺宅居此即因于寺

室下與其徒氣羅尼謨士同焚于此今以鐵圍圍石
刻碑焉碧草淒；堅苦守死以善道乃為此地名蹟

波顛湖

波顛湖水最明媚山影倒看阿爾頻德國文明發于
此又看天上瀛船新波顛湖受瑞士諸湖之水巨浸
影蒼翠德文明先發此湖今邑巴連射伯爵
創製汽船方橫天上亦在此湖也吾見之
巴登京卡魯士雷

埋鏡湖島離宮秀巴登京城扇樣新山水頗如杭越
媚宅園妙擅美歐人埋鏡島在波顛湖中為巴登公
離宮隱秀幽絕巴登京卡魯士
雷宮室甚精新道路式
如扇樣光天下所無也

士篤吉京

宮室無如士篤吉花樣新開天下無曠域道中吾走

馬名園佳宅畫難圖

士篤吉屬清敦壁王國道廣室
曠域街第宅尤新式詭妙出

在十年間為
大地所無

佺論八百年廟塔

雙塔嵯峨直聳碧天高六百尺落飛仙地球宮廟多華

峻豈見工程八百年

佺論廟塔高六百尺自宋理宗
時築至同治二年乃落成凡八

百年地球巨工
無出其右

遊指魯壁壘及大學

指魯壁垣九百年古藤舊壘俯河煙面癩胃子曰關

劍尚武國風涼血鮮

指魯壁壘在西十一紀為歐洲

德主威廉少亦學焉

諸生曰關及傷卧涼血故德人

尚武如此威廉學生也人以此武敬之無癩者不敬也國

亦傷右手者

佛蘭拂選王宮

東都舊是佛蘭拂遺殿嵯峨記選王呵壁猶傳咨岳

事列王五十像嚴莊

佛蘭拂蓋為德東都有選王宮五十三王像存焉

亞痕故都陵殿

亞痕故都阻山海千年陵殿崢嶸在金棺玉几尚神

靈畫器摩挲空感慨

沙立曼初都于亞痕遺殿即藏其骨玉几在焉古物十櫛皆千

數百年沙立曼骨之金棺亦在櫛中非別有陵也

卡魯士跋溫泉

霸圖逐鹿立危峯晚浴溫泉麗館宮十四萬人來避

暑林園秀隱萬山松真之卡魯士跋山川幽秀萬松

得溫泉今避暑時十四萬人來浴
德英兩主皆歲來游浴焉

波緬京拉煎園晚望二首 奧國

三面圍山見波緬山河雄秀霸圖更騎馬拉煎岡上

望故宮舊壘尚橫雲波緬三面環山一面向故今

都拉煎岡上王宮大廟公園在焉夕
陽倦視萬家樓閣尚想霸圖也

遺橋尚話非特獵廣第猶存華德威英主雕鏤神跡
石將軍颯爽英靈非王宮大廟橋塔皆非特獵王所
刻畫極精華德威故第在拉煎岡下環以水大數里
即三十年教爭之大將也其第最壯麗金柱玉樓縮
型存阿爾頻博物院吾曾見之

再到烟土卜為奧之帝羅州都會阿爾頻羣山
萬壑奔走至此開大原煙嶂綠鬚至秀昔晏
將軍拒拿破命死於此都人傳其悲歌飲酒

山亭不勝感慨

萬壑羣山啟帝羅將軍死節賸悲歌山城煙嶂綠蕪
合霸業銷沉夕照多

古陵銅像廿餘人鐵額銅頭劍甲身霸王強侯英蹟

盡山河依舊憶遺民

烟士卜城陸德父陵兩楹有銅像廿餘皆德之列主及選侯像

精妙已極是數百年物

久不得徐子靖侍郎瑩父編修毅父孝廉及宗

芝棟侍御消息兼懷李孟符郎中

黑劫灰飛歷幾年當時同補女媧天
鸞叱鳳靡無消息吹落人間幾散仙

萬年青史記維新功罪如何說黨人
擊筑我思燕市侶酒酣夢冷不知春

避島十三詠 在瑞典京南湖

絕域湖海中松石環齒：買山知非年避地亦几：

北海廬

結廬依北海更在海中島高想釣璜人
遊世心樂苦
遊移

崖下安樂窩書畫可隱坐誰知肥
遊客窮髮來高卧
坐忘龕

小龕五尺餘松陰作禪坐清磬一聲聞
卻忘天地大
光明無碍塔

琉璃四面壁帝網重：隔光明四無碍盡攬湖山白
望雲台

窮髮數萬里思親上石台倚松望天末東海片雲來
崎嶇燈

石磴崎嶇登緣崖草花綠世路更險巖休嫌此却曲
翠屏嶂

屋後倚翠屏蒼：壁崖嶂松蓋何亭：明月上一丈

寥一天

松風何寥々絕頂倪萬壑長天浩無窮望極蔚藍幕

松浪崎

石磯盤平曲晏坐落花深下有碧浪聲上有青松陰

松徑

長松二百株鬱々濤不靜碧水青山中扶筇行此徑

魚釣磯

隄磯泊舟處白石濯離：春來萬魚子不忍釣竿垂
無垢室

湖波通于海海水冷于冰日脫垢衣浴無垢天海凝
哭亡友烈俠梁鐵君百韻

君名尔煦南海佛山人故鴻臚寺少卿梁僧
寶從子死節於光緒三十二年七月十四日
年四十九歲

老鶴拳獨立九霄
唳寥廓秋風野蕭
神鷹奮九澤
死友梁鐵君自天降
烈俠目光爛岩電
顧盼爍輝灼
我師朱九江大儒為粵鐸
吾冠遊禮山
九江講學所
曰禮山草堂
矩步事禮學訓詁與虫魚
一一細考索諸生兼四科
尤多文學客君佩長劍
來高步四顧窄望塵眾已驚
聞論胆尤嚇高談王霸略
捫虱手指畫最美虬髯公
欲闢扶餘國否則拯神州
風雲刮沙漠不知陳同甫

頰肖王景略盡詆衆士迂頰賞吾學博秋上越王台
高樓五層落樽酒約登臨縱橫天地作上稱孫吳精
橫講輿地確張口吞雲夢高望低衡岳倚劍睨飛雲
倚闌引杯勺笑謂長素愚今當亂變作孺子猶可教
其舍汝所學若不從予遊絕交從此劃雷霆聲震子
失箸弱難答時年二十二君我同歲發自此絕遇從
音問相離索忽二越五載法警驚城郭君居在佛山

吾避來棲託深夜叩門請握手大笑諾殺雞携鄰家
酌酒相酬酢談學師陽明好佛探微莫吾時通天人
君乃久拓落濶絕弥親愛叩學驚圓覺謬譽名世來
願學甘削服膠漆自尔固金石遂永託君家世大豪
千金恣揮霍時平不容傑仕進非所攫權益悟江上
絲竹銷哀樂東山日載妓縱酒銀鑿落我作偽經考
飛章上帝閣焚書儒既憂遊桂吾懷惡鷺江投藪留

平原十日約訪僧冰井幽懽飲畫船
謔同泛灘江水唱和入叢薄
同住風洞山蠟屐徧岩壑
變法吾見知彈冠君大悅
甚冀見維新快望起積弱
星雲慶爛熳明良感踴躍
龍戰忽玄黃宮闕起飛殃
瀛臺痛幽囚黨誅禍慘傷
泛海吾至滂英藏警署堂
君乃舍資業棄家來從亡
神山看櫻花海嶼啖檳榔
永哇觀魚池緬甸覽象場
廣舌導華僑開會同
□□更飲恒河水

數沙悟十方無生已自得折足證無常攜手登須弥
精神欲飛揚峯顛萬古雪高：片雲橫仰首吸上天
俛首瞰八荒臨睨忽東顧神州自茫：惻：下流涕
誓言救君王縱翼遂飛去三度入帝鄉入關偁張祿
養士同子房聖主起居注一一來報商安否吾皆知
調護君謹將身探虎豹穴手攬蛟龍藏孤忠一無成
仇讒竟高張緹騎遂見逮驚雷告徬徨是時袁世凱

擁兵鎮津疆遙執中朝權警衛森風霜君作漁陽搥
擊鼓目睽賜袒衣罵權奸數罪如鐘撞謂言聖恩厚
自臬邊侍郎賜食付衣帶以汝擁兵強望汝作保衛
乃汝叛聖皇呂布多反覆董卓遂強梁漏言既可誅
逆謀更莫當金翅食小龍九天雨泣涼廢立大禍興
黨誅元氣傷用召聯軍來京邑血湯洋郊廟荒鞠草
公卿餓倚牆淋雨走晉秦強敵爭遼陽至今房州囚

中國岌：亡是誰作厲階皆汝為虎張恨無朱雲劍
為民誅張湯恨無滄海椎為國祈災讓權奸雖梟雄
聞雷汗如漿四將陪之下優禮邀宴觴毒謀加鴆酒
毅魄返帝旁柏林夢見君玉立而上揚泣血賦大招
陳酒斲中腸古俠比義烈鐵名儼金剛百年哀死友
千載痛國殤

哭前翰林院侍讀學士湖北提學使黃君仲弢

戊戌出奔賴公告難勸吾微服為僧北走蒙
遠夜宴浙紹會館把酒泣訣今幸更生皆君
起死人而肉白骨也為服緦衰東望奠祭不
知其哭之慟也

鳳凰鳴丹霄五色和其聲老鳳揚威彩雛鳳聲更清
天台秀東南永嘉盛才英吾友黃仲弢温：玉色瑩
明澈神四照道義為之經穎敏拔髻戲博學最華精

妙篆披秋竹華文耀春榮鶴立露丹頂蕙芳發妙馨
妙年選詞館輶蕩持文衡學士老供奉長才屈短繩
憂國如家事好士為心旌捫虱縱高談解帶即寫誠
論學辨晨夕踏雪登樓城馬江已敗後吾憂國危傾
上書請變法唐衢衆笑詞君與屠梅君左右翼我擊
衣憐范叔寒金分鮑子贏愧非夷吾才倍感鍾期情
帝閭既隔絕敝廬乃歸耕數載詣公車三秋遊江寧

煙膩秦淮水雪壓陶然亭故人重把酒懽笑着忘於
強學與保國兩會吾為盟愛國同激昂比翼並聯名
時警膠旅割伏闕吾哀鳴先帝實憂民側席迺爾英
維新大更始欲起中國瘡謬思毗大業竊用竭忠貞
豈不慮黨禍未忍負聖明禱水浸堯台龍禁流夏廷
愚忠受衣帶誓死力救營是時爾朱談風塵宮闕腥
決計幽房州先謀誅董承鯁生猶在夢東市將赴刑

仲弢走告密一日數書并時日相伊藤約吾商國成
君來頻相左吾歸視猶輕仲弢更約宴卓如促吾行
言曰黃仲弢忠誠君子朋一時頻違請必有急變爭
銜杯浙紹館泣語至深更勸吾夜密走胡服或為僧
君像拓億千電話四驚驚地網與天羅密布難飛騰
北走蒙遼可南奔凶不亨時吾任救主逡巡難遠征
嗣同揮手言國事賴先生啟超與廣仁力請微服行

聖主吾任救，仲弢言有憑。所居南海館，是夕前牆崩。
嗟言命在天，易服吾未能。去：道津海側：別皇京。
輕裝夜已深，喔：群雞鳴。雲黑闇道路，林疏漏飛星。
觸樹疑猛鬼，聞犬驚。追兵車船笛鳴：天地鴻冥：
頃刻凌晨曙，金鐵飛縱橫。大索城門閉，斷行鐵路停。
緹騎三千人，九關虎豹獍。蒼皇京津道，縲綑及諸卿。
生我者父母，救我者弢兄。誓將結草報方冀，□□興。

皋夔同賈歌堯舜慶良明豈意武昌魚遠騎箕尾靈
絕海吾在瑞大雪湖海冰掛劍樹無所衣袞服猶輕
何圖浙紹館遂為永訣程倒盡銀河水吾淚猶未盈
翻盡東海波吾血猶焚：來生或有歟冥報庶幾微
震：悽予懷黯：天地凝

哀何易一

易一名樹齡三水人神鋒天雋好學深思窮

極天人並世無比館吾家十年契同莊惠末
謂人天定盡相約忘言三年相思不通一字
四十一歲沒於瓊

暫遊世界幾由旬別劫滄桑歷大千算式可推成萬
物微塵久已悟諸天彭殤壽夭本無有莊惠清談妙
豈傳從此運斤誰壘鼻無言先約已三年

除夕感事

桃蕊盡落隨流水柳絮輕飛過別家不用臨風惆悵
望天涯除夕感年華

大雪漫：夜渡湖樓台明滅火模糊登山臨水送歸
去歲盡花飛對酒壺

題桃花影畫

一樹桃花照碧漪飛紅入閣夢傲：今朝雨打風吹
去開閣褰簾亦有思

霓裳妙舞度曼聲
玉面桃花照眼明
永憶舊時圓月
色樓空人去可憐生

避島二月湖冰漸解

昨夜風翻浪涌
今朝樹舞波澌
湖上半冰半水
島中或雪或泥
避地有家有室
觀化無住無生
所至修垣補屋
醉來泛棹聽箏

門人狄楚卿以所印帖數十本遠贈却寄

我生好古多幽癖書畫鼎彝更瓦石琺瑯廿年肆索
搜碑版三千深寶惜晴窗攤紙手摩抄似伴佳人娛
日夕秦磚漢瓦及周彝宋畫明磁暨元刻餘力閒能
一及之有若匹夫加九錫一逆戍戍被抄沒藏三百
篋遭焚溺竟似花落美人死永劫沉淪不可識尔來
十載走環球日觀非歐亞美古遺跡故國渺茫如天

上觀我生兮世似易今朝華雲一朵來碑版百篇光
怪極一一披摩喜欲狂美人重生花再發此是中華
文明事思古幽情不可遏方今大變人好新古物棄
同沙礫擲庚子邱墟京邑破內府珍竒流異域頗聞
杭州丁氏藏流入日本失和璧我昔遊杭一覽之如
入玉山涎空滴應有好事待價沽為吾購求勿吝直
庶慰通亡久別情有如故國重眠食古之賢豪入夢

寐諸夏經營思萬億應知萬方豪傑士愛國情深斯
正則

康南海先生詩集 卷之九

六十六

漪漣詩集

康南海先生詩集卷之十

後學東莞崔斯哲手寫

同薇女久別五年壻麥仲華曼宣與同璧女亦
別經年吾舊有一家骨肉三洲地之句今同
薇偕壻曼宣來瑞璧以暑假亦來瑞而吾乃
將鬻宅矣夜來漪漣歌舞以佐飲酒聊以窮
歡而慰別又將分張不勝離合之感也

戊申
四月

絕域飄零久別離湖山買宅綠連漪畫堂秉燭圍爐
夜紅毯清歌妙舞時聚散悲歡聊復尔壞空成住更
安之三洲數載重相見窮夜清娛且莫辭

携同薇女曼宣娟再遊德舊京波士淡之訶釐
湖離宮相望風景甚佳再遊增感

十里煙波浸碧巒絕無人影見帆船指點離宮三十
六訶釐湖畔再來緣

次夜餞曼宣行兼送薇壁酒酣聽歌嗚咽不終
而散

良會聽歌又幾時繞梁激楚更含悲爐火餘紅對殘
日花枝轉綠照清漪昨宵團雪今先散他日明湖有
後思人去樓空將捨宅強為懽會只傷離

送曼宣行兼示薇壁時薇壁亦次第行

次第花開百草生來遊一月閒枯榮海田世事看成

劫眷屬蒼生未免情桑下盤桓為六宿壺中離別又
重經我來專為尋煩惱去：人天何所營

夜饑曼宣與同微同璧聯句

慙劫茫：又幾時注人天遇合意多違微華堂歌舞

還呼酒璧明月團圓且鬪詩曼離合幾回傷白髮注

輸贏一局話殘棋璧更思歡會知何地曼指點湖山

約後期微

携同璧遊那威北冰海那岌島顛夜半觀日將

下沒而忽升

時五月二十四日夜半十一時泊舟登山十二時至頂如日正

午頂有亭飲

三邊酒視日稍低如暮旋即上

升寔不夜也

光景奇絕德主威廉作華義像

于巔德公卿名士刻名甚夥行舟時亦適遇德王弟軒利未足見德人之好事

海氣混茫白浪粗上接鴻濛昊宇舒白日欲落光模

糊寒波淡沲青靄敷暮濤蒼涼山有無我扶綠玉踏

六鰲直登島顛輕崎嶇極望蒼々不可摸上通帝座

可吸噓御風而行上玉壺圓嶠方丈道空迂千年巨鯨
老不居掉鱗涌浪如山驅瀆珠跳玉似相濡萬載寒
冰冷我軀騎獅清涼訪文殊瓊樓玉宇寒如：凡骨
難耐冰雪廬夸父走死先駭吁哀尔虞淵將墜徂魯
陽揮戈志何愚長風萬里東望紆側望中華陽潛沮
太陽曠天埋綠蕪仰天長嘆曰喪乎是夜：半神鬼
逋乾端坤倪斃吁：靄氣忽開晶光鋪杲：旭暎紅

輪扶豔登雲端披絳襦光茫萬種照寰區義和無功
后羿誅額手仰天且大呼碧琉璃滿酌葡萄此為海
角島嶼之極夫題名如鯽鑿石腴德霸威蕩遠蹠跌
華表莊嚴鎮山隅云亭封禪何雄圖秦皇漢武聊自
娛我是乾坤一腐儒仰觀諸天闕劫餘壯觀山海盪
目皆寄此懷抱何區：永懷那處寫歌騷

泛那威尋北冰海縱觀山水維舟七日極海山

之大觀

那威好山水歐洲最有名
迤邐五千里島嶼億北京
島顛皆帶雪島腳皆挿冰
或簇如樓閣或颺如旌旌
或擁如人馬或列如隊征
或卓如筆竿或掉如龍鯨
終年長白頭萬古浸水晶
蒼々百萬島海中立亭々
北極那岌島南邊丹墨城
漁舟左右望綿亘七日程
盛夏冰海開漁舟乃縱行
衣影吸其綠萬碧浸波澄

舟穿衆島中，竒怪爭逢迎。關道如江湖，忘在海中經。
窅：巖壑秀茫：雲煙溟海山，只蒼：天風但冷：
白日出無沒，夢魂光且輕。海山合華妙，峯浪相影明。
較視大陸山，枯旱滋味輕。况乃數千里，長遠尤可驚。
吾昔愛温台，又復好南溟。既羨加拿大，更慕瑞典京。
皆以億萬島，足以妙性靈。然若論海山，諸地短且平。
誰甲大地者，那威吾定評。

遊拖咳悟洞 那威

雲島擁海中如母抱衆子
遙遷揚波行冥兀聳霄俟
石壁削崖立綠岡縣地起
沮洳成水澤花草多怪異
晴日且泊舟扶杖步其趾
長陵忽遮前洞壑隱復闕
綠樹參澗道曲折緣岩倚
澗瀨泉潺：岩徑石齒：
遙遷數百級洞門陟降倚
隆崇十餘丈深窅亦傍此
洞後鏡玲瓏望穿見雲水
洞前引諸峯海波浩瀾：

我久居桂林遊洞萬億矣奇妙日遇之海山僅見此
歐人能好事過此弭舟只人皆蠟遊屐飲酒洞中美
高歌繞洞口天風吹不止

多羅科洞看峽兩山合插直峯摩天飛瀑六七
白雲滿谷舟特轉入以快遊客蓋此舟名樂
舟也得一詩

雪山合沓瀉諸泉洞口深：峯插天特轉樂舟看飛

瀑碧潄無底白雲邊

自那威之陀潛舊京棄船登車飲酒車場口占
陀潛宮寺暮天雲舉酒長亭日半醺看盡海山五千
里風濤去耳卧猶聞

晨自布加利牙京蘇非東行穿巴幹山半日凡
二千里岩巒疊秀重複濃深然僅比吾國匡
廬山勢低橫未為雄拔口占二絕

半日行穿巴根山千里岩壑道迴環
雲岫排青看聳秀
澗流深碧聽淙潺

歐洲東岳亦尊之山勢低橫雄不竒
五十年來俄突戰
天分南北隔旌旂

自布加利亞穿巴根山半日北出羅馬尼亞境
乃知歐土
諸岳皆穿土中與我國相反故諸國競立也

歐土三岳吾皆巡
比爾島士大莫倫阿爾頻山居中尊

雙偉雄秀摩天根，巴根卑小難並論。皆穿土中南北分，
滂沱四瀆至海唇。海角杈枒遂紛，地中黑海多島雲。
波羅的北海洲嶼，尤續紅國土無數相僕緣。崎嶇各據
山海濱，彈丸棋布二千春。莫能一統兼并吞，小國寡民
君主不尊。或達市府角立斷，政體詭竒乃地萌。文國
會斯產民權，用伸皆由地形所孕育。非關人力能陶甄，
吾華三邊環崇山西起。隴蜀出崑崙北自天山走，賀蘭

祁連太行長城垠南連五嶺隔百蠻中開天府萬里原
憑東一面溟海瀾只有江河壑中間是以亘古一統全
帝者出震自乘乾東西相反各有因我得治安數千年
彼久爭亂銖血纏互較得失我尤賢彼今物質日新研
遂闢海力啟坤乾憲法庚：起民權假不菲薄互資焉
水流沙轉是天然我言地形為政魂

自布加利亞入羅馬尼亞境渡多鏡河感俄突蓋

戰

汪：多鏡河南北界兩國我昔經奧匈江浪頻漠：其
長弥萬里到此煙波濶平沙巨兩岸綠林点白閣水深
瀾不紫沙鷗時狎獲風翻三色旂鳴：舟鳴角汽車積
煩熱清波自涼作憶昔布人立俄實闢其鑰欲出黑海
峽假義行霸略輕兵出多鏡旌旗照依約突人既不敵
五國乃扶弱紛：割地去巴根北遂削我昔編其書記

突之削弱寫黃進丹陛鑿戎奮發躍十年久通亡不意
踐略口橫壘且賦詩英雄跡如昨

登厄岌坡利士岡俛瞰雅典感喟累歎

歐土肇文明胎孕自希臘詩樂与刻像精以開今業宮
室及道路環壯經歷劫民權尤先導萬國被大業大地
誰大力雅典實為極平生想像之神往撫圖籍冒暑跨
海來故京今遂即山岳雖秀挺禿赭殊可惜絕無寸草

木但見飛沙磧大風時捲來對面眯塵壁日午關市閉
道絕行人跡吾驅車過之蕭索驚適：宮旁列大第園
林無綠色徒觀屋平頂足硯無雨液走徧二千里山野
枯不澤厄炭坡利岡城中聳兀崒觀廟抗山耕場館環
麓揭陟岡肆一眺雅典攬目眩海水蕩西南波斯順所
截百萬師何雄竟為小邦折乃知憲政國民氣最騰達
魏峽厄天拿三功表觀關俯視城闔雄縱覽山川烈初

祖存佳廟噫叨地是作刻像員作柱鬱：垂式廓堂皇
扒地嫩傑構遺嶮竭文石百餘柱壯麗摩天切高：當
烈風二千年不滅議院倚山址階陞尚可攝尚想校倫
輩雄論發咄：大地此先河吾欲辨香謁眾拉覓遺碑
熊首方丈揭文字皆覓好摩挲嘆此碣前岡何平：石
壁峭如削拓中作大獄三門組以鉄昔囚索格底於此
斷賢骨吾來窺獄門森聳尚氣索從來大聖哲多業誅

縲紲濁世類地獄專為救苦入其他門表觀十餘尚星
列戲場百餘層四萬人可歌至今法與美偉大難追轍
皆二千餘年嵯峨未毀絕兵燹豈不多風霜久戰裂選
材既精石保全仗後哲洵美嘆文物顧我慙哽咽周物
石鼓外何者可指說尚美乃公理民情之所悅自為萬
國法範圍不可越墨儉人不堪中華愧朴略今幾降歐
文良自雅典卓氣運有遷變山川今枯竭安知北沙漠

昔非華膳結盛哀有消息賢嚴轉灰劫蒼茫國土變望
古感遠集

遊塞耳維亞京悲羅吉辣

多饒河曲三迴折左為內境右奧域中有崇岡臨河曲
屹然危壘旌旗揭塞維自立啟作都千里平原此屹嶮
極邊保障作京室一有邊烽恐危隙奧將哀堅昔破此
今幸弭兵或免滅道路崎嶇既不治室屋卑汚且破裂

議院陋小如茶室有若荒村何可歌太子徒遊招手戲
有似兒嬉何以立撫有廣土千里疆民愚治下無工商
但見沿途佩劍而戎裝以兵為國可黥傷百萬之衆難
供張小民頗復思前王今主將軍武龍驤遠處瑞士謀
弒將假托民怨騰報章還不討賊見肺腸英人責言豈
畏強操莽之奸天下是非在抑揚乃知春秋所徬徨顧
口王墳何蒼涼嗟尔國小政亂何紀綱

戊申六月廿九日曉泛黑海

自羅馬尼亞乘船戊申六月廿九日曉起

自船中望黑海澄波萬里紫瀾微迥漸見岡巒惟
多剎皮東坡詩曰有山奕如緒蓋地有運會苟非
其時則氣不澤潤行數時漸近突京平岡迤逸類
有古壘及村落然山色枯而力弱與歐西迥異
硯突厥之哀矣

澄浩萬里碧接天鏡誰磨紫瀾更不迴穩渡枕席過遠
通地中海深處室奧何戰艦幾千里白浪若山陀我來
際升平幸覩不揚波朝日升熹光反射金勃羅橫覽大

地國感慨起嘯歌君士但丁帝當年揮金戈雄霸奄兩
海宅都移作家遙望山秃枯破壘枕山阿突厥昔何雄
今茲哀可訶極望高加索美人產婆娑雄濤鼓溷滌北
岸俄艦多耽：出海峽英法實兩鋤餘怒從東海我遂
遺禍瘞黑海雖絕域動若洛鐘和橫槊誰賦詩吾應先
支那

遊突厥憶索立曼帥三十萬兵攻匈牙利時日金

幢羽冠葆蓋盛飾玉童金女出師之盛從古所
無此道皆我所曾經而想像者觀此則蓋世之
雄埋於七尺之棺而今何在為之憮然口占一

詩

百萬鏖兵向奧京金幢玉女夾雄兵當日威稜震歐土
只今毅魄奠階楹金燈照夜驪山夢總帳垂昏闕殿清
循省昭陵從葬路贈花幼女不勝情

遊君士但丁那部過宮門道中觸目皆奄人回思
故國慘然同之書曰與亂同道靡或不亡因為
感賦

人道有恥辱國事忌險危大恥吾未覺大險吾應知漢
由常侍亡唐乃天策師天子為門生廢立任尔為鞭笞
朝士夫何況國民卑漢唐作殷鑒明祖嚴制垂直瑾既
駸驪忠賢更驟馳我：九千歲東林肆醢醢莊烈親討

戮身復用奄克司禮與監軍大權赫火曦開門降闖賊
覆祚誰貽罹國初垂鐵牌內監只守闈干政罪則斬煌
：祖訓遺近者李聯英弄權苞苴肥宰臣與疆吏鬻賣
視饋施甚至廢聖主由其媒孽之拳匪以攘外聯軍入
郊畿津遼血塗地西道雨淋漓京邑既邱墟廟社皆離
披中國幾陸沈不絕如口糜亡人逋海外十載良為茲
行：至突厥頻過王宮扉奄人道相望黑面而歐衣聞

凡八百餘觀此吾縞眉云何止國政闇合復在斯宮刑
絕人類不仁久已唾刑人在君側春秋大書譏品汚智
昏愚况復心險詖天憲銜其口王爵任所私宮闈聽離
播大禍國遂隨覆轍豈不多何為再蹈其况今萬國通
得失較其微豈能容此物辱國可不思歐土用宮婢竟
裳玉面姿奧既四千人德亦三千妹袍袴掃御床殿戶
引朝儀紫袖侍玉座顧之可樂娛豈不勝奄官黃黑而

縑皮我與亂同道驚惕可駭嘻况突刑黑人我乃種自
誅二千年國恥願言一掃除廓清比武事洗滌險亦夷
鑒此禱祀求東望吾漳澳

策馬遊君士但丁遂乘小船游亞洲壘下甜水曲
溪艇子千百士女如雲蓋突人游樂處也英雄
兒女今古可懷

江山雄鎖兩洲壘都會憑凌二海波金石華嚴廟遺變

城牆地壞堞嵯峨英雄割據今時異坊宅泥污舊政苛
裙屐似忘危亂險夕陽輕舫萬千過

戊申六月廿九日到君士但丁那部適逢突主詔
許立憲國民懽呼十日迷事感賦

百夫擗鼓吹笳悲千夫塞巷擁馬嘶萬戶舞破半月旂
傾城士女酣歌嬉大呼萬歲祝主釐公園燈火不掩扉
擁觀演說百千圍鼓掌拍破筦鼓徽烟火射爭日月輝

釋囚破獄會逢稀十日大酺何淋漓蘇丹親巡盛饗儀
金幢羽葆校尉飛折檻闖宮民縱娛警卒立仗不敢譏
國民權舞千載期舉國若狂問何為詔行立憲蘇丹慈
偌大國事起幾時諸歐鐵血百年飛法國兆人血肉糜
今茲三日功成奇何能捷疾有若斯少校呢詩賓致茲
兵諫雖譎實得機挾兵三千登山如飛大呼立憲蘇丹
怒之重兵來勦如熊如羆八千兵變立憲同期蘇丹益

怒盡發衛師桓：三萬于京未離全國兵變電請同時
蘇丹大怒召問軍諮言舍立憲無術可施更問羣臣奏
對同詞退訊宦官且質宮妃咸跪啼泣死無所：君臣
并命法事可唏蘇丹無言悚懼涕洟一昔不寐親草制
書立憲復行國會即咨國民大悅懽慰無逾側聞呢詩
賓遣自大將軍將軍心已附新黨新黨創從故相阿士
文一自卅年憲法廢分走列國鼓國民卅年功未成廢

制乃益聞貴戚大僚憂戚分感紆心腹助黨人毀家紆
難同勤：四十萬磅旋乾坤下通兵校同時變上賄貴
官及宮嬪內外交通皆同意乃以兵諫脅主君吁嗟亂
世金用事立憲乃用賄奏勛吁嗟亂世散金鬪列國吾
國久鑿頌錢神

多饒河北為羅馬尼亞境河南為布加利亞境有
關以譏行人皆索視護照羅馬索五金馬以護

照但遊突而無羅馬也小輪舟徐渡夕陽下時
光景至佳追念布立國時俄艦隊自此破江而
下羅人阻之不得突人阻江為戰今三十年間
但見微風作漪鳥雁唼喋羅布之旗相映於隔
江中大地今古事皆可觀也口占一詩

多鏡河流迴碧漪隔江風颺布羅旗
追思三十年前事
俄突樓船金鐵飛

羅馬利加京卜加利士公園水榭午憩

高柳垂：路隔溪微波綠榭鳥空啼絕無人到忘身世
故國園亭夢似歸

是日聞報警電稱皇上聖躬不豫為之大憂飛電
北京問訊並令全會祝壽請聖安越日萬壽於
客店恭祝口占

日繞龍鱗又十年朝班省識鳳樓前聖躬安否驚寰宇

莫禱金滕只問天

遊希臘畢感賦

希臘號文明其先起海寇海王突那思盜據海波溜虜
人為之奴剝物歸為囿漸富徙居陸營商雄鄰右有攻
者尤強走海無畏漏後來得雅典文治漸發展埃及巴
比倫旁搜得文獻拓海軍艦多開山金礦顯製作日有
新富樂更無倫雕牆而峻宇好女而敬神妙畫與艷曲

媿：佳詩文至今遺劇場坐客四萬人是時無憲法尚
美樂云：海波靚艷：懽謔俗所欣金星千女祝大會
無遮春從來盜有道得物分必均是起平民權公帑久
公分公事公議之國會遂為根惟其慕尔島平等難獨
尊惟其海為家知識日增新惟其波浩蕩尚美且樂群
諧嬉好歌舞懽喜而慈仁始盜中為商末成艦隊軍終
以富樂名從來海島民腓尼基先駟唾尼士繼聞諾曼

亦海盜大尼入英倫哥倫布尋海班葡徧寰巡荷蘭以
商創海利亦大伸強英起三島絕陸鮮兵氛憲法用是
誕海霸權獨振是皆由地形孕育隱弥淪若以得失較
終讓大陸人請觀全希臘終歸于大秦大陸我最大願
起神州魂

遺廟共言摩訶末外官格說
少之汗一瓊樓玉殿參天影長且
恆有月也字

遺印夜訪

在蔭南極方覺弟几擁火歲換
無知吾里自有安心信可通些飲
印是家

寫舊作

圖

結秀芽大支別峯——雲中種
松去青松江濤日夕入我耳——似聞
鳥聲——令人踪

題五山別峯十首

山脚——原陵鋪嫩綠山月巖石
染似黃虞山山色秀如畫如畫刺
圍着色方

題虞山色

康有為

南蘭堂詩集

康南海先生詩集卷之十一

後學東莞崔斯哲手寫

大地輒環俤遊思返人間多難思蘊有情惟埃
及印度寔為大地文化之先驅蹤跡竒偉詠歌
難忘自尔則冥心坐忘大地無可遊者惟去
人間寄想諸天耳自光緒戊申秋訖己酉卻曲
迷陽濱嶼卧疾板輿迎養蹻所居曰南蘭堂都

為南蘭堂集凡一百六十三首

人間二首

歐美倭遊歸舟多感戊申八月自地中海再返印度洋僥仰平生感懷萬端

人間不如意情愛造因微歡喜生煩惱功名有是非青
山且面壁明月自漁磯宜釋寬親念安心是所歸
泛舟渺無住現世亦多更癡怒猶人相盈虛觀我生菜
蔬肉邊煮藕自淤中橫無碍蓮華色清涼自火坑

遊楞伽山晏那拉札布拉佛蹟楞伽即錫蘭印音

也其佛跡凡四一在後山深林中人跡不到一
在班打拉威拉之崇山距乾地不遠僅石上一
佛足跡無可觀吾不遊惟近哥林布之迦利臚
尚有道場而此地湖山幽勝佛跡最夥石柱萬
億千年前僧十五萬今零落之餘尚可一一摩
抄也

五家如山佛骨埋當時膜拜兆人排只今像塔經千載

僧坐諷經民獻齋

有五冢高圓十丈今磚多隳然其下

餘尤偉巨當時大道場

分五門五道膜拜可容五十萬

人今人民齋僧跪獻僧坐誦經答之猶極尊崇也

雙池澄碧水猶清廢寺猶存萬石楹聞昔講僧十五萬

于今佛像卧泥濘

有二石池深二丈許石柱萬千古大

佛像露坐泥中六劫若此

野中巨石作茅庵秋水湖隄繞樹嵐誰識楞伽証心法

傳衣王子記停驂

印人名錫蘭為楞伽疑楞伽經即說于此有六湖水澄碧石隄老樹野中

有巨石三數佛龕在焉昔印度王子

馬軒師利初來傳道開此湖云

飛雲封壑日穿林千級莓苔磴道侵落葉滿崖嵐滿徑

山猿頻嘯幾人尋

馬鞍山磴道十級晨
嵐佳絕策杖登之

兩峯高下馬鞍山肺腑重石作關一樹菩提舍利塔

南宗從此發波瀾

馬鞍肖山形峯巒環抱舍利弗塔
墓在千級盡處鑿石為關有手植

之菩提樹焉或曰此馬軒師利王子墓也或即
舍利弗譯名之異緬暹南宗皆自此出

十月母勞太夫人年七十八就養檳榔嶼十一

月廿六新得子同錢母喜慰名所居曰南蘭

堂 戊申

五年惆悵舞萊衣東望飛雲未得歸
今幸板輿移就養先泛海艦接音徽
園林請涉社席趾海浪扶看日
月暉白華馨潔欣康健更喜含飴慰式微

戊申除夕祭先帝後望海獨立思舊感懷
鼎湖龍去只矚天南海波臣泣墜淵
大業未成殂中

道馳驅莫效感終年孤忠永憶橋山劍末命哀傳玉
几篇慘澹明良何代事蕭條宇宙一潛然
十載周遊大九州戊申戊戌一春秋孤臣死罪慚衣
帶國步艱難累冕旒斧屨尚思天北極玉棺竟降殿
東頭歲闌絕海看濤雪追念維新涕泗流

述德詩五十首

侍母太夫人于南蘭堂談先德母命為詩紀

之適正月先府君忌日祭餘念祖緝次成篇
士衡之陳世德向平之賦思舊古人有之况
吾宗譜幾類史乘世有名德亦多畸人王劉
名家人：有集文武才用世：蜚聲代載達
人暨予小子雖述先德無一字之愧詞旁及
恩私之千金之報德

中原冠族曰南徙嶺嶠開荒自宋元記取南雄珠璣

巷遷：華胄到蘇村
吾康姓自宋末徙南雄珠璣里遷南海縣蘇村

避地浮槎至海濱
西樵秀峙綠山春
銀河水漲尋涼

盡卜宅移家付後人
蘇村在西樵山北三十里始祖建元公寔始卜居村臨銀河盡

場亦名銀塘鄉然七世前名字似是後追者

止明遺難吾宗盡
我祖涵澹一個人
手構石樓三百

載少時小住跡猶新
前明吾宗人二百餘遺明止皆盡惟十三世祖涵澹公一人存

公有一个人傳手構石樓
吾曾住之至光緒
初年上蓋乃塌摩撫舊址
祖德如新也

北摩燕闕攬中州幕府壯心紆筆籌斷句遺文猶可

誦青箱世業至今留

涵澹公承父泰秀公青箱之業當明清易代之際懷抱壯志籌

筆于諸侯幕府久于

河南自山東入觀京闕詩文集

欽寄清妙猶存至今

孫輩凡十二世為士代有達人

涵澹公非獨以一人存宗實為吾家文祖也

豈賤蕭曹刀筆吏于今律學重西歐金鬚安樂窩中

句竊比香山天與游

十五世祖世堯公隱于祿吏晚慕白香山邵堯夫道然自得吟

樂天自号所居亦曰安樂窩其吟詠亦仿之美鬚髯老壽七十餘人稱之為金鬚公

二馮嶺學接新傳儒宗純孝見參騫試披縣志官師

傳陳荀風流尊大賢

十七世高祖榮祿公諱輝號炳堂嘉慶甲子舉人贈廣西布政

使事蹟詳南海縣志官師傳五嶺儒學自吾邑馮潛齋

先生接陸稼書先生之傳欽州馮魚山先生以詩文

氣節顯先後講學羊城為嶺表大師榮祿公以懿德

純行並受二先生之學講學數十年身體力行吾家

門範自

公起

萬石無言盛德師柳袁世範刻門楣戢山人譜榕門

訓曰課躬行亦不離

曾祖通奉公諱式鵬號雲衢贈按察使以純行受庭訓好劉戢

山陳榕門之學手口不離力躬踐行而不尚著述只規
寸矩身度家範尤嚴終日肅坐設胡床數十年未一
倚約己豐施郵族養士未知
古之萬石君如何也

藍田世德勞何學幾代熏香集一身教澤欽連有祠

祀清風懿德起松筠

先祖連州公諱贊修號述之道光丙午舉人官欽州學正合浦

廉州連州訓導欽州諸生祀其遺德連州則祀於昭
忠祠少受通奉公陶育長受何樸園先生衣鉢何先
生受學勞莪野先生勞先生受學馮潛齋先生以醇
德正學為嶺學宗而連州公以善性翁受之聲律身
度由仁義行又友朱九江先生徐佩章先生博古今
通文學誨人不倦兩得知縣棄而司鐸著錄千數熏

德多善良孝友篤行尤戒好名

詩文集存戒勿刻

日援賢哲誨諄：理學傳家忠孝身連州官舍羊城

院千古傷心辟咤人

為八歲從先祖于廣府學宮考第祠講舍受詩書十一歲後三

年侍先祖連州學署受文史學長侍于羊城書院外館至年二十光緒丁丑五月先祖乃逝枕席盥饋日

以古賢哲忠孝言行為訓

剛介孤高清絕人萊陽范甌每生塵一錢一日鄉三

老高士寔羞原憲貧

先祖妣陳太恭人儉德絕倫本父子剛公之教公以諸生為鄉

三考嚴正無私日食以鹹攪作湯早吸汁
而夕食攪鄉人畏之不敢作惡令公知

不聞媚富方孫璧豈有枉人陳子剛乾嘉者舊吾鄉

俗盛德高風久渺茫

方孫璧先生以進士賣菜餓死
于粵秀山時任紫垣富數千萬

冠中國慕才名欲妻其子洋先生拒之曰我豈能以

長舌媚富人而賣子子剛公為鄉正有以金托事者

予剛公拂衣責之曰豈有陳子剛受金而枉人者哉

方陳二公皆雲衢公道德執友子剛公常館吾家連

州公篤事之子剛公愛連州

公而以祖母來歸

奇才韋布見田疇訓練鄉兵靖一州父老浮槎人數

| | | |
|----------------------|---|------------------------------|
| 吾讀遺書尚數楹兼資文武歎天生鄉人傳道軼遺 | 不得志則終身督耕餘事賦詩作畫皆孔明自比既 奇妙棋尤絕倫有棋譜六太居士詩集 畫邱壑娛魂寓治兵公負雄才熟史學能文章長于 生世雄心比孔明晚名六太事躬耕賦詩餘事銷棋 局景賢祠南海縣志有傳 萬乘榘環城請赦出獄共祀于同人 縣皆平圍練大臣中護下之獄時大水四縣父老數 殺賊練同人局勇數百轉戰南海三水高要高明四 萬環城請赦獄中囚 | 伯祖鑾儀公諱國燻字懿修號 種芝丁紅匪亂夜屠牛集壯士 |
|----------------------|---|------------------------------|

事夏曰光芒劍氣驚

種芝公購書數萬卷為少獵羣書皆飲公賜左文襄歎公兼資

文武欲奏薦遠卒同

人局成惠行一方鄉人傳其軼

事奇謀皆可驚也其治法為中國地方自治之始

中興百戰盛威名半壁山河奏凱聽松口久經立祠

朝史官大寫照丹青

叔祖閣學公諱國器號友之督軍平江西浙江福建廣東國史

有傳嘉應松口有專祠

陳臬閩中移撫桂當年威惠久流聞奉身布素仍無

異恤族義田猶有文

公自廣西布政使護巡撫贈內閣學士家無寸產身猶布衣清德絕倫

歸來七檜園居如水臣心真淡如羣從諸孫尤愛

我授賢師弟讀藏書

自桂撫謝歸闢七檜園虹蝠臺澹如樓手灌園蓄羣書園中延

名師訓羣後子弟授餐適館為預口選

十年侍側最情親器異殊尤教誨勤有道碑文我無

愧一生忠厚見仁人

公器異為鄉居侍側十三年教誨良多公一生忠厚仁人也為

撰行狀碑文無一溢詞

孝德英姿警辯才師門路點又參回越王臺賦存遺

稿歲：攤書今劫灰

先府君知縣公諱達初號少農又名致祥仁孝而英警善辯祖

母陳太恭人病三年乳癰與吾母共事備極孝劬游朱九江先生門有越王臺賦朱先生點定者今佚

閩粵從軍行五年運籌飛檄掃風煙荔枝三百空聞

啖遺恨周南太史篇府君喪畢從聞學公聞粵軍中五年籌筆甚勞將之官江西得

渴疾日啖荔枝而卒以年少未發明家學嗚為承青箱也

五孤咏泣第半歲劬：吾母最辛勤弥留末命痛辜

負撫弟傷心燕市雲府君以同治戊辰正月十九夜弥留年三十八吾男女兄弟五

人長姊十三歲幼博弟生僅六月末命為撫弱弟事
母善視諸姊妹而幼博弟竟以無罪殊戮柴市辜負
先命永痛
無極

兒疾懷抱十八日母老龍鍾八十春寸草春暉不能報

修談國事負生身為生數月大病十八日母抱持不
卧亦十八日及先君背持家教子

聖善幼勞今年八十
不得常侍每念痛心

哀號松柏隴岡仟痛甚先塋發十年深謝合肥李相

國密移先骨保幽泉光緒庚子正月奉后旨發掘先
祖先考墳李文忠公督粵與吾

有舊抗旨遭嚴飭乃密告移骨今幸
保全無思禍及先骨痛不欲生

天生劍氣吐金精弱冠奇才善治兵忠孝心懷豪俠

性三十優游無官情仲父知縣公諱達遠號介蕃亦

千勤平藍山三十仕廣西從馮提督子材戰定安南

孝揚才以世非巧媚不得官自以性抗必不得行志

三十三桑官耕于鄉盡棄聲色豪華布衣徒步感懷

以為才由天生不關讀書治事
最嚴整惜不展其才用也

熟耽史學識機微老楊有道愛鷓夷一家仕官獨先

隱自立優游雄以賢季父王如公諱達守淵沉高遠
 兵開府羣從皆爭仕宦叔獨得保通判亦不受兼
 營商業以貲自足優游自得以不求人為宗旨鑿功
 名之險知世故之艱畏而遠之深于人情與
 人不深不淺不多不少有道而游于世者歟
 二母愛吾期望早登第歸來二母去蒙難以前娛二
 老蒙難幾年二老故望吾成就及登第歸已不及見
 庶祖母崔太君凌太君年八十餘撫吾久
 及蒙難去國不及侍數年竟卒痛哉
 少談大畧氣吞牛草孺尋親未冠秋二十從軍親百

戰先登躍馬勇盤牙

後叔觀察公諱熊飛号少岳少好大略時兵亂十九歲草鞋度

嶺尋父閣學公于江西百戰先登皆其功

廿四登壇虎將喧手携黑砲掃狼烟江南半壁土乾

淨公瑾雄姿是少年

廿四歲統兵萬人于中興諸將獨與鮑超善同平江浙閩粵時

号虎將國史館有傳松口有生祠

羽扇綸巾虎穴回高談醉酒斲如雷太原公子楊裘

至虬髯豪客降幡來

勦藍山十年不下公單衣葵扇入山寨說其首練四虎醉飲斲

睡諸賊欲害之練服
其雄阻眾而降

英姿颯爽自天開左相頻稱疆帥才逸筆空餘詩畫

字雄圖未展壯心衰

公明敏絕倫善詩文書畫久隸左文襄麾下文襄每嘆公英絕

日督撫才也而公少年負氣頻與文襄抗爭至擲茶碗文襄強容之然吝其賞僅以道員賞強勇巴圖魯

可奈高思大敗何檀溪數丈馬騰波汗血成功愛雄

駿悲鳴不食殉摩訶

公高思大敗沒兵八千幸馬跳數丈澗得免其馬紅色蓋汗血

握注種也駿甚唯公能騎之他人則跳墜公愛其免已子難常親撫飼之公逝馬不食而死

廣文諸父我經師妙畫清詩世擅之伯善牡丹兼笛

管叔工梅竹與圍棋

諸父彝仲公諱達築竹孫公諱

從受經二公皆孝能詩文彝仲公善簫妙寫牡丹有

康牡丹之目得尺幅者人珍之竹孫公善梅竹而棋

尤精詩學太白起脫自在集存于家吾

少猶及見一門孝友棋酒之樂也

鐵石堅剛松竹青勿頸來嬪十二齡娉如孝慈壽八

十兒時愛撫記丁寧

從伯母陳孺人十二齡來守清節父母禁之勿頸自誓与如梁

孺人彝仲公配也並慈孝而性尤清直比德松竹兒

時二母同撫抱我皆壽八十子孫並天吾愧無以報之

天姿儻蕩性溫柔文采風流擅倚樓出塞圖南籌筆

老壯心未已劇封侯

從伯父知府公号天民諱達行又名朝棟個儻風流能詩文好

碑版玉磁交名士善文酒有婢雪姬善烹飪与先君

善常分饌得嘗晚欲立功名從左文襄出塞籌筆累

年奉檄往臺灣撫番年五十卒于烟瘴蔭孫同富州

判同富從軍有壯志不幸早卒公至孝友鄉居與為

論文談學媿：道時事

哀公壯志之不展也

粹玉明珠蘭蕙情侵人秀色最聰明王郎天壤終身

恨問字鈔詩記喚兄

從妹拾翠天民公女也玉質聰

如同胞既嫁吾自京還贈物不受書來永訣以
所適非夫九月遂死年十九歲亦可哀也

孝子恂：循吏清為除民稅棄官輕種花九畝長鏡

命口不言錢了一生

從叔父知州公尚樵諱達爵官
廣西上林縣知縣西隆州知州永

康州知州以盡裁陋規不媚長官休致歸隱居象台鄉

日以種花弄石賦詩自娛雜花數畝燦爛甚無疾而

卒僅餘銀一元而清苦自樂口不言錢至死親者環

問未嘗一言貧雖妻子亦未知金散盡也皆謂異人

異事生有自來公事母張太恭人至孝

與張太恭人待我至慈重可念也

有煌子季少徇齊純孝騫參德曰躋坤楷秀明皆蕙

折驚心家難記提携
相繼夫亡最可哀也
餘遺腹子有田弱甚

尚樵公有賢子三人煌純孝楷
聰明吾最愛之坤亦謹厚三人

負母曝暄憂姪病至誠純孝有畸人忽官忽幕忽販

卒統兵教學現多身從叔達善号吉堂曾從軍以縣

而教學困甚則時為負販更卒以養母數十年如一

日磴磴自守介介未嘗求人以姪同富溺死遇哀得

高文遠識論縱橫淡泊終身無宦情吾識楊朱有道

者著書千古見平生

從叔偉奇諱達讓好諸子精史

才也嗣閣學公應蔭

知州而不受閉門謝客隱居花

棧園地幽勝燕處起

然圍棋賦詩樂天知命著書及

遺集甚多惜刊行

於世者尚少

菊水吾家飲長壽祖孫八十者六人若數杖鄉杖國

老一門二十壽人春

高祖炳堂府君壽八十二曾祖

八十五仲祖姑八十

妣梁太夫人壽八十四長祖姑

從父達邦公麗川公

達天公從叔吉堂公及

八人其六十餘則曾祖

雲衢府君與伯曾祖瑞圃公

及伯叔祖慎修教之繼之從伯叔父虞門連泉竹孫
介藩從兄子樸次陶兩田十二人其諸姑伯妯尚未

計也

素封七世義門傳擅施吾祖最才賢乘下澤車款段

馬傷心舅氏恐株連吾母勞太夫人七世素封好施

芳尤才賢營登瀛書院築堤恤族任鄉事有魯連之
目十二舅振東孝友承家以戊戌吾蒙難恐株連展

轉走避与舅母陳以
憂卒悲哉以吾故

少日聰明期宅相老年鍾愛異諸孫買糕日記提籃

去上學寧忘大器言

為少聰穎讀書過目不忘頗異

每器重之于賀為上學日即以大器相期許少侍外

祖妣徐太恭人太恭人晨起上市提籃携往必買糕

一鉢見

恕謙祠外擊球時竹馬騎來外氏嬉頻到勞邊看百

戲披衣置膝記諸姨外氏村名勞邊素封創祖即恕

內外三姨羅五姨方六

姨馮携抱觀劇

吾姊才明慧且賢早孀喪子苦何偏別來老病難相

見煮藥煎鬚隔七年
吾長姊極聰穎早殤可惜仲姊
叔父介蕃公常稱遇為遠甚賢令清介適沙頭岸羅
姓早寡繼子亦夭亡傷哉時多病與為最親愛而七
年不見矣

三妹瓊瑤少靜嫻吾傷裏足解纒難嫁夕呼兄賦寡

婦撫孤念汝痛中肝
瓊妹幼裏足吾即解之吾誓解

歲最親送嫁呼兄聲猶在耳良人早歿而殉之
吾在京不得見為撫諸甥縉鳳尹于家傷哉

四妹安：婿富賢女甥寅好最聰妍阿恒可憐殤未

冠昭良漸長慰承先

四妹順適譚最富樂
而甥恒死

謹娛貞孝慰英靈曙後淒：孤一星稍喜左芬鮮文

字尚悲木主未歸庭

亡弟幼博殉難弟婦黃謹娛忍
哀事姑遺弱女荷今已能中西

喪每思痛徹

兒時乳哺記蟬英助母勤劬育我生瘦梅月梅保抱

我贏金未贈負恩情

吾生時母有三婢曰蟬英瘦梅
月梅保抱我經歲兒時笑許贈

責作詩紀之

卅角逆師記受經二陳楊簡並賢名老儒樸學皆高
行曳杖難忘辟咤聽吾六七歲十歲從簡侶琴先生
經十三歲秋冬從陳莫生先生學文三先生皆名諸
生樸學十五六歲逆副貢楊仁山先生學文先生為
先祖友年六十餘尤介行高節並愛余
至今馨咳如聞猶似童子請業時也

九江學術似橫渠平實淳宏禮治餘樞衣冠歲曾聞
道厲志傳新嗟焚書先師吾邑朱先生諱次琦號子
陵縣百九十日治行冠時歸講學于其鄉九江禮山
草堂學者稱為九江先生為自十九歲樞衣草堂者

三年始聞大道棄八股勵志以古聖哲自期先生以禮治為學博大精深而最平實溝通漢宋舍之而直溯孔子實集國朝諸儒之大成也惜所著羣書皆焚

懷高理臣給事

名燮曾清節懿德憂國丁酉以膠變奏薦吾久別不知存亡也

清風亮節能憂國十載存亡不得聞深念漢陽高給事楊廷華負荷賢文

長沙張治秋尚書奏荐經濟特科又以奏請大用鄙人革職以與吾未識留任聞喪感懷

卿雲文采是張華好士忠貞愛國家未面傾心奉黨
禍兩番荐剗媿長沙

二月花朝紅海看月出風翻昔有一家骨肉三
洲地之句久佚此詩補作之今亦一家分住
亞美非也

亾人久作喪家狗烈士拚來吊客蠅慘淡風雲經幾
變轉移天地愧無能一家骨肉三洲土十載飄零百

劫僧紅海吹波上明月御風九萬欲飛騰

遊埃及開羅京

自立尚為伽的父創業發于噫布謙金棺七尺藏六

業吾憶訶梨寄塔尖

伽的父埃及王號

歐美文明何自開遠祖皆從埃及來刻石雕金存舊
蹟摩抄藏物百千回

開啟羅埃及博物院古物最富而古大地皆無

覽之乃知歐土文明之所自

女子黑紗常蔽面最憐額鼻着黃銅厚喪女哭聲不

絕大道營棚七日中

埃及有喪者女子營棚道中婦女百餘賡續哭與吾古俗同

開羅古昔廿三宮廢殿頽垣今已空尚有遺園江島

上摩抄測水認前蹤

駝園環式畜千駝長幼卅年各一窩紅羽可騎亦異

種中臺落日看山河

開羅有畜駝鳥園式如環園自數月至三十歲者咸備誠萬國

所獨也園中高臺
可窮覽

開羅外訪金字塔

金字塔三相鼎立駢駝夕照度沙黃
遠影尖陵尚四五七千年物最嚴莊

四十七丈挿士陵于今六千四百齡
登尖二千五百級橫覽大地唾雲騰

禹穴中藏君后棺隧道斜開十尺寬
深入廿丈得空

處驪山銀海愧非難

獸身人首名星士六丈為頭百尺身陵前刻石巨如
此立馬夕陽驚煞人

大隧寬深若康莊石槨廿四皆相望槨厚尺許高逾
丈石瑩如玉髑髏藏

遊埃及錄士京

埃及古廟陵闕皆在錄士錄士為七千年古

京地球古文明第一遊埃及者不到錄士與
未遊同

宮闕嵯峨錄士京雕牆文畫尚縱橫舊跡多傳藍射
士六千年物最文明

華表校：石刻精巴黎紐約觀文明來此摩挲重回
首闕前星士百餘橫

古陵十八日搜闕隧道莊嚴寢殿雲奇絕丹黃圖書

色六千年物拭如新
看山歸馬踏沙灘落日雲低水不瀾
晚渡尼羅浴江水隔江燈火照清寒
孌便幕處猶游牧男能舞劍女而歌
寥々埃及古遺種面貌猶如古像和

遊亞士渾故京

尼羅江上誰幽勝百島應推亞士渾
女王台殿凌波

起萬載摩抄測水痕

有石島二百餘二十年
前埃及女王水臺

循尼羅江流數千里石山平長夾如兩岸

撒拉沙漠日飛揚尼羅江流穿中央奇絕石山夾河
水平長萬里似隄防

埃及行

石山之內綠野夾江石山之外飛沙走黃石山之旁
一千三百里疆尼羅直瀉萬里長一瀆無枝流逆行

力最强秋冬泛田隰淤泥長禾秧民廬皆臨流耕夫
迹水鄉距江稍遠者棄壤沙堆岡近江作層閘時洩
蓄坡塘貧者石窟中壑谷如室藏富者石為屋棟宇
及堦牆床几與盤桌一一擇石良刻文雕像畫傳古
多精良宮廟六千年至今完而藏楹壁石數尺高逾
百尺量六七金字陵蒼：摩天揚偉大尤可驚豈止
文明破大荒皆因山盡石又吹野夾江萬國文野由

地形順受其正難飛揚師尊菲薄空擾：口踏全球非
味茫狹長輿地豈能守後永奴降難自強吁嗟人事
由地形畔援歌羨吾欲忘

埃及棺蓋露首戲拓影像自題

蓋棺論定是何人後死斯文話劫塵了盡人夫偶乘
化此心未死死心新

宋名僧有死心新于帳中懸死
字自警因以死心為名

耶路薩冷國于羣石山上吾走羣山自佐頹川

至死海草木不生人家多穴處石山中伯利
恒耶蘇生處亦石穴也俛首而入馬槽猶在
今徧嵌文石耶蘇墓廟一切皆刻文石尤麗
中亭為葬處俛入有僧授燭萬人膜拜蓋羅
馬君士但丁后所築也惟城中廟前病馬千
百相集呼叫可憐宜耶蘇以醫為業又至耶
蘇升天石及門徒見賣飲酒處因感十字軍

所啟新文明為之感動異人之生也

耶路薩冷國石山綿磔硤須弥西走盡結此羅城頗
草淺木不生獨葡萄橙果莊嚴耶墓廟文石斲雲朶
中亭妙華嚴遺骨於此裏僧授人一燭入穴膜拜夥
萬首伏士女千載盛香火驅車伯利恒故宅石岩妥
低首入石下馬槽錦綉左傑構誰所營感動千載所
君士但丁后信教實元首檀施營陵廟峩巍今未朽

遺石傳升天，蓋堂認飲酒。使徒竟賣師，聖者不能走。
傳教美保羅，剛勁力莫醜。首座巨子傳，積力法王久。
偁天最尊親，報怨以德厚。救身日施醫，度魂不絕口。
勇猛得無畏，強聒能善誘。巨鐘一聲鏗，深省感良莠。
科儀與妙義，皆自佛法搜。百年徧歐土，尊信弥萬有。
遂令十字軍，九戰爭寢牖。只為一士壠，侯王死相糾。
列國師百萬，萬幕屯雲狗。唾尼士故宮，觀圖吾驚久。

烈火燒危城巨浪走大艘豈知新文明自此戰發興
華屋與金錢東都覩遺型其他百工巧乃至哲學精
亦自阿喇伯展轉傳授成教爭死人二十萬新教淘
去得精英餘波蕩地球大力無不傾吾今梯航來感動
亦屏營獨惜廟前民瘋瘖瘵環城想見當時多疾苦
用借神醫為哀矜濁世病國哲人來衆生無病神不
形我亦現身救苦者身經百死萬險經觀茲十字釘

痛苦又思伐檀削跡亦不甯惟有瞿曇大慧先巧避
僅能度世全身名吾今茫々何所往仍入地獄救衆
生

耶路薩冷觀猶太人哭所羅門城壁男婦百數日
午憑城淚下如縻誠萬國所無也惟有教有
識故感人深遠吾念故國為之愴然

崇壁巖仞：圍山上摩天巨石大盈丈瑩滑工何妍

築者所羅門於今三千年城下聚男婦號哭聲咽聞
日午百數人曲巷肩駢連憑壁立而啼涕淚涌如泉
慘氣上九霄悲聲下九淵始疑沿具文拭淚知誠懸
電氣互傳載真哀發中宣一人向隅泣不樂滿堂緣
借問猶太亡事遠難哀憐萬國有興廢遺民同銜冤
譬如父母喪痛深限年旬豈有遠古朝臨哭旦夕酸
羅馬後起強第度揚其鞭雖殺五十萬流血染城闌

當時嚴上帝清廟金碧鮮
我來瞻遺殿華嚴猶目前
珍寶移羅馬痛心亦難諱
正當吾漢時渺茫何足云
吾國二千載亡國破京頻
劉石亂中華洛陽慘風雲
侯景圍臺城一切文物焚
耶律執重貴雅樂遂不聞
暨至宋徽欽汴京虜君民
豈無思古情頗感騷人魂
或作懷古詩亦傳哀帛文
未有憑城哭至誠逮野人
婦嬰同灑淚千載慟遺民
吾跡徧萬國竒駭何感因

荅言祖摩西奉天創業勤艱苦出埃及轉徙紅海濱
帝降西奈山特眷吾家春十二以色列奄有佐頡頏
大闢所羅門兩王尤殊勛拓邊大馬色築廟耶路顛
武功與文德焜耀死海濬餘波躍耶回大地徧遵循
人種我最貴天孫我最親豈意滅亡後蹂躪最慘來
羅馬與薩遜蹈藉久紛紜英暴當中世俄虐今尚繁
遺種八百萬飄蕩大地魂有家而無國處：逐辱艱

被虐誰為護蒙冤誰為伸傳言上帝愛我呼彼充璜
窮途無控訴憑城號吾先言罷又再啼四壁啼益喧
哀：不忍聞吾亦為垂漣亡國人皆恨惟汝有教賢
他國不知愁同化久忘釜汝誠文明民文明成瘡憊
區：此遺黎艱苦抱守堅雖然猶太教今猶立世間
吾遊墨西哥文字皆不傳英哲与圖器泯滅咸無存
讀學皆班文性俗忘祖孫豈比汝猶太能哭尚知原

哀：念遠祖仁孝無比援他日買故國獨立可復完
先咷必後笑物理固循環吾哀猶太人吾回睨中原
四萬：靈胄神明自羲軒唐虞啟大文禹湯文武聯
孔聖□文王制作大禮尊聖哲妙心霧圖器文史篇
後生坐受之枕胙忘其源如胎育佳兒如釀蘊良醇
我形胡自來我動胡自遷我識与我神明覺胡為元
喜怒胡自起哀樂胡所偏我詠歌舞蹈我飲食文言

一一英哲人化我同周旋忘之我坐忘悟之六覺圓
一往情与深思古吾翩翩莊周夢化蝶吾寔化國魂
若其國竟殤哀慟不知端凡亡非我亡畸士托古詮
吾未免為人多情猶為牽吾為有國故身家頻棄捐
哭弟哀友生柴市埋冤雲哭墓已不獲先骸掘三墳
十死亡海外讒侮百險煎受詔久無功纏身萬苦難
十載逋亡人拂逆痛心肝我本澹蕩人方外樂談玄

胡事預人國誤為不忍纏今既荷擔之重遠難息肩
地獄我甘入為救生民艱受苦固所甘忍之復忍焉
久忍終難受去：將舍旃浩蕩諸天遊懽喜作散仙
天外不能出大地不能捐國籍不能去六鑿不能穿
猶是中國人臨晚蓋鄉園：涕被席耿：傷我神
願告愛國者猶太是何人

三月五日在瑞士呂順游阿爾頻山晚步梨花

壓山芳草數里越山度澗幽絕無人徘徊花
下遠聞琴聲湖波漪連夕霞照山湖迴從之
疑古桃源也雪旂花獨阿爾頻山產之游者
珍之皆挿襟上而歸

雪峯白顛湖水碧波林樹疊：樓閣僿：店旗風颭
船笛烟過遵彼微徑言登陵彼芳草芊：人跡不加
一覽萬緣極望無他暖：雪旂白縣作葩獨產阿頻

瑞草同嘉徵，馨插襟袖本。遂家逾嶺渡，澗唯聞鳥譁。
梨花億萬覆，巖阿時春三月。燦爛開花一山縞，素
雪飛日斜。婉孌黃蜂尋香逐，華吾久徘徊。疑桃源耶
策杖卻曲攀石磔，硤有屋抗山繞。花婆娑微聞琴聲
惜：以和有美一人玉面清歌，蓬山豈遠神仙所家。
水影漪漣霞邊蕩，摩夕陽下山歸路坡坵清絕難忘。
託之大羅。

遊各國蠟人院巴黎最勝妙矣

立門似傳呼升堂忽對眾幽室燈焰暗光影窺窗縫
顏色皆如生神氣尤飛動執筆者沉吟揮刃者猛重
冤獄者愁鬱劫殺者慘夢美人澤紅玉春光春霞烘
猛將活鬚眉勇勒駿馬控列國名君相一一見真像
吾憐拿破崙斃磔敗床帳一子侍床前悲苦不可狀
又憐德威廉玉几憑屬纊末命俾士麥永訣愁絕望

勳名蓋天地至此空惆悵古今大政事頗多備公案
法國革命時獄門霜夜飛王侯名卿士刀鋸同解支
金髮玉肌女流血跡淋漓彰瘴風聲樹悲感行路歧
病體作迫肖剖割尤資醫他日益擴張蹤態更環奇
利用過圖畫撫摩有所思

遊威路士宿蘭頓那碧海青山風景冠英國
俯臨碧海浪陀山路迴環蘭頓那絕好峯原皆碧

綠英倫勝地此無多

遊威路士之卡理維壘威路士民居今猶窟地
為宅列于山阿

長橋橫鎖亘山河故壘森森草漫陂百戰已忘游獵
盛遺民窟屋尚山阿

阿爾蘭都會名德通鄰其城壘山河公園皆以
德通鄰為名園甚大壘甚古山甚秀綠吾愛

其傾士湯路大園林卅里相望樓閣多新式

走馬樂甚

山阿苑壘德通鄰雄秀應為自立民走馬王城臨海

路園林卅里畫樓新

遊巴士浴于羅馬古浴池

此池砌以巨石引以鐵管遠戍而巨工已

逸樂如此想見霸業之盛也

羅馬溫泉曠浴池引之鐵管石為墀蠻荒遠戍猶雄

逸想見當年霸業基

威士賓距倫敦瀛車二時沿海依山風景幽勝
屋道麗潔為全英城市之冠與曼宣遊言若
居英當住此

傍山臨海得清勝華屋修衢最妙華綠樹廢岡花夾
道吾居英倫欲為家

寓烈住問遊英渣理第一故宮及儼鈍葛古宮

兩宮皆臨太吾士河
儻鈍葛苑花繁麗對競
渡處

嵯峨殿闕壓江波
蘆苑繁花對棹歌
民變未忘懸太
白遺宮故事說如河

戊申秋七月遊君士但丁那部
逢突厥立憲慶典見蘇丹於宮門
乘六馬車一后九嬪從萬民
免冠懽呼萬歲及冬十月開國會而民譁

今夏四月吾在英烈住問茶館閱報則幽廢
矣突國人皆讀法文去歲早知有變不意若
是其速也亦足為專制者之殷鑒矣

金闕華嚴觀乘輿九嬪陪輦六龍徐鞠躬撫劍答民
禮萬首呼嵩貫似魚

冬來國會集駢聞沸鼎譁然輿論喧舉國語文皆學
法預知民黨必爭權

懽呼萬歲未經年
流彘驚聞自電傳
江河不廢憲法
立覆轍鑿此廢制專

倫敦觀劇有作海山仙女幽逸如離騷九歌者

昔士卑亞曲多有之令人起：作出世想

海山岩下紫藤斜
仙女飛飛舞碧霞
弄罷風濤眠石
上滿身衣袖壓飛花

三厲烈住問日携曼宣婚遊喬嘉頓言去年与

同薇頻來遊嘉頤者園也方三英里時當四
月繁花正開綠松彌陂玉繡球夾路弥里許
徘徊花下吟哦忘世昔在北京与幼博第遊
極樂寺賞海棠而法源寺牡丹豐台芍药同
遊尤衆林園雖小屨履皆非今聞闢三貝子
花園及十刹海為公園皆舊遊也追思舊事
愴懷家國寄同薇女兼示曼宣

暮春吾寓烈住問曰携曼宣遊喬園周方十里羅萬
卉五洲草木搜剔全瓜藤草本各壞詭松類異狀尤
殷繁青綠亭：張幢蓋歷陂漫地禮世尊是時繁花
正鬧喧玉繡球大如錦團依山夾路長里許依稀似
入桃花源誰移石家繡步障沒此太吾士江邊絳雪
嶽：廢洞府紫霞艷：照神仙不知瑤台閨苑地或
是香積燄光天憶昔花塋賞花春携家曾泛紫洞船

燕京豐台賞芍藥又看牡丹訪法源記携子李極樂
寺海棠萬樹如雲屯三貝子園浩瀟灑長松大柳迴
廊穿十刹海邊老柳底紅裳翠蓋曾采蓮雖比喬園
媿麤惡亦可懽娛同民樂一自逋亡出鳳城只有神
傷望故國望帝流血泣杜鵑棠棣空庭經風落印度
玫瑰大如斗日本櫻花可携酒美國辛夷家：有萬
樹霞光隔疏柳歐土盡移中華花芍藥玫瑰海棠桃

杏相交加對花更思舊遊跡感時撫事增咨嗟吾女
同薇愛步此吹簫去歲同秦嘉迴風吹花落成陣悲
曲愁感文姬笳

德國威蕙舒苑為前嘻順侯國赫孤拉士侯所
築老木千萬水木明瑟幽深廿里山顛蓄水
下噴凡八百餘層今存八池昔有噴池八十
一今廢存十餘耳于顛作台崇六十丈上有

七層塔：顛作銅像十丈下有三宮壘昔拘
拿破崙第三即在此法路易十四宮亦師之
當為地球第一德主威廉歲避暑于此吾居
之弥月其螺韻坡壘布置曲折幽妙與奧之
恪慎伯壘並冠全歐也

故侯宮苑麗山阿崇塔廣台銅像栽老木萬千泉百
道名園第一冠婆娑

堆石引泉作噴池築崖架壑溜灘歌營作噴泉八十
一瀑聲穿樹聽時：

萬綠田顛螺韻坡樓廊幽折足婆娑方圓曲直尖多
妙畫器百年皆可摩

德武十四章

吾出入德國十一次過其都邑五十餘治學
皆精冠于萬國其勢又聯邦也易於統合將

來歐若一統其在德乎告我國人
以法以嚴
遵彼德塗嘉樹夾徑日三灑掃其
瑩如鏡載出德境
道蕪不淨

巡彼德警奉法嚴憫子夜戲爭
畏子不敢載游法都
醉卧反：

相彼德室花樣新異色相華妙
摹自古器甫創十年
漸行風靡視歐鄰國樸直寡味

閱彼德兵肅：其武止如山立動如潮怒旋視他國
翼散如舞

德人之工日出壞詭既深理化自多新製器美值廉
廢倒大地

德人之商勤懇密精皆學皆兵歷試乃成奄有歐東
遂勝強英

德士之資重毅怯慎天性好學深思獨至其起雖後

其成殊異

洗：曹子面必癡痕拔刃相關懦怯是耻吁我尚武
激風曰肆

世族從戎振：軍容小大相從盤山列峯卅萬攢：
磐石之宗

世族古俗營室尚農今營工商富力日豐製作新奇
民曰昌丰

涼船于飛如鳥斯翼誰創成之德先作極渡波顛湖
仰視歷：強英大震全球變易

德霸方略宇宙無雙既逐俾士麥專制是張內善撫
警察外輯柔聯邦

德今霸王深夜操兵十萬走集郊日期鷄鳴失期捷
伯禽赫其武稜

惟聯邦之民咸戴霸王惟聯邦之勢易收小邦我儀

合歐陸兮天縱德強

惟普之昌自大非特獵三王捧冕新宮頂昭七年戰
力割波蘭與薩遜遂基霸業威廉用賢乃統德國英
辟六七作後強難測

吾自德還比再過來因河百七十里中百壘相
望山河如故昔皆百侯國戰場也歐土文明
僅此三百年耳

青山雜沓水滔：百里相望百壘高，千載侯爭民血
染驅車重過尚蕭騷

乙酉六月自歐歸過蘇彝士河感懷兩戒僥念
萬年吾亦四度過此俦遊息輒將述作矣

大瀛海水忽橫流，小九州通大九州，別有文明開世
界，竟由新法破鴻溝，素王道統張三世，黃帝神靈嗣
萬秋，我作大同書，已竟待看一統合寰球

己酉七月朔重遊檳榔嶼自庚子七月望來居
于今五度十年矣

十年來去我堪驚五酌檳榔嶼水清大地遊頻經似
夢神州劫後變多更歸魂縹緲關山黑身世飄涼著
述成蒙難整冠問箕子陳疇待訪可憐生

惜誦

西北葡萄熟東南孔雀飛翠毛損曠野美酒對斜暉

天馬欲騰去名姝未贖歸故園萬花放可惜老漁磯
聞前禮部左侍郎徐公致靖之喪哭祭而慟
哀：痛余懷乃聞明月碎徐公竟長謝天乎于此醉
鼎湖已龍騰老臣隨波逝風雲皆慘淡明良失嘉會
耆德不再見晝日遂永晦感慨追舊事崩摧惻肝肺
倒盡銀河水來灑知己淚臨觴不能酌奠酒空為祭
豈意宗玉宅悲歌成永瘵憶昔戊戌春秋邸近卜鄰

下斜街裏宅過從道緣因是時膠旂割萬方曠黑雲
吾走咨士夫保國大呼頻公車集千士俊顧兼三君
裙屐與冠裾合沓吾闡闡急則上書爭暇輒講學諄
後車載遊者數十從門人客座作講堂論道無晨昏
旁薄萬國事折衷古今文上言正術學下言退國身
感激談國危涕下或紛：皋比擁中座聽者多嘉賓
猗：孝廉船請業來紛紛□□□仁錄聽者意殷：

姓名多末通履綦接音塵時有賢大夫高軒折其中
丈人昆玉姿純粹清玉温圭璧明堂達瑚璉清廟珍
芙蓉出泥滓天然無埃氛桐枝綠淨直鳴鳳寫風薰
學士長翰林耆舊領典墳二子軾轍秀木天聯彬
硯甫督楚學新學導人文瑩甫才且明白鶴丹其唇
三蘇起眉山朗照臺閣鸞唯公忘者年見我竟奮翻
請吾講春秋側坐咨疑難論學且浮□憂國日接裊

慷慨抵掌談激昂抗章繁乃知古醅德勇氣自有真
首請定國是大變轉法輪譯書遺游學次第啟經綸
好士頻薦賢推轂及鄙人聖主翕受之闢門大咨詢
超擢贊春官簡在屬大賢百口啟大業千秋導維新
宮庭起大釁賊臣謀奪門天津將闕兵房州欲廢君
沈憂共救主綢繆思推袁藉彼兵掌衛或作師靖難
豈意本初反竟獎爾朱奸金翅食小龍鐵血飛九關

黨口作大獄新參慘冤魂丈人坐誤存經年繫囚新
秋風吹銀鐺正氣慘不伸夜月照獄牆幽夢徒相親
夫人憂以死涕零灑血頻長公哀毀亡一家罹禍辛
哀哉為黨禍我實殺伯仁在獄頻遭喪吾思饋公貧
傳言謂愛厚慎勿通雁鱗坐茲絕消息于今十二春
但喜赫出囚不敢書相聞只冀復明辟會看爛星辰
莫拜德公出已聞董相墳知我不能報東望但酸辛

萬載新崇德簡竹難書勛千古黨人碑摹寫應傷神

思舊詩五章

簡廣文竹居

名朝亮以諸生奏薦授教諭昔與吾受學朱九江先生學行高

絕今之嶺表大儒一人而已聞避地連州躬耕與世絕云

我有同門友青雲絕世塵大師傳嶺海學道共河汾

帶草空山老藜床避地頻康成多著述濁世賸儒真

斯哲謹案竹居先生經學湛深著述極富民國廿二

年八月初十日沒于廣州出殯日間執紼者萬人云

陳茂才慶筮

名樹鏞新會人冠年陳東塾先生以遺書付節高學博教然任

道惜三十

早卒

萬丈岩：氣魁儒任道身北城頻論學東塾託傳新
講授孫明復沉淪鄭子真夕晨過陋巷宿草悵多春

陳孝廉梅坪

名瀚通博精修藏書甚富吾少年多與借書論學門下多佳士

沈默陳無已憂時最好修絳紗傳講座縹筆擁書樓

鶴露書能著鷓冠天與游一瓶曾記借惆悵酒壚秋

黃京卿公度

名遵憲戊戌以黨禍被錮

磊落老松節蕭條人境詩湘波蕩新化海國久周馳

黨錮蘇黃盡騷詞屈宋悲長才從古棄多難泣交期

譚糧道叔裕

名宗浚博極羣書清才雅文口及第第二

江南試旋放雲南糧道不得意以病箸述不遂惜哉

科名文學擅風流六雅清才世選樓瑚璉寶光存清

朝尊鱸秋思痛歸舟著書未遂生平願
蜀遊惆悵兩京尊酒話迴車尚記過西州

與菽園論詩兼寄任公孺博曼宣

一代才人孰繡絲萬千作者億千詩吟風弄月各自
得覆醬燒新字尔悲正始如聞本風雅麗葩無奈祖
騷詞漢唐格律周人意悱惻雄奇亦可思
新世瑰奇異境生更搜歐亞造新聲溪山大澤龍蛇

起瀛海九州雲物驚四聖崆峒迷六道萬竊風雨集
明廷華嚴帝網重：現廣樂鈞天竊：聽
意境幾於無李杜目中何處著元明飛騰勢作風雲
起竒變見猶神鬼驚掃除近代新詩話恍恍諸天聞
樂聲茲事混茫与微妙感人千載妙音生

四遊乾地在錫蘭山上高千餘尺氣和不暑故
星吉釐王都此今英長官衙在焉前臨明湖

林巒倒影湖邊古寺今有藏經臺
俯臨湖波前為佛骨塔右為故王宮
外為公園萬卉咸彙幽勝獨絕
雨後遊之尤秀倩也

湖水漣漪一碧澄林巒倒影白樓明
頻上藏經臺畔望王宮佛塔尚縱橫

乾地公園環隴坡森：萬綠壑坡陀
卉草億殊五洲盡異香雜翠雨中過

那釐利在錫蘭山顛六千尺開大原有湖多花
不暑風景佳絕當為南洋諸島最勝處

楞伽絕頂六千尺晏畫明湖翠壁開繁柳繁花滿園
路不寒不暑好樓臺

印音呼錫蘭
為楞伽

錫蘭再訪佛跡數處其塔殿最莊嚴者皆千年
來物非佛跡也自晏那拉積布拉外楞伽真
跡近在歌林布二十里者迦利贖圍塔頗大

周廊二百柱天已暮燃燈擲花佛前塔前有
菩提樹僧摘葉相贈

圓塔嵯峨迎利臘周廊繞徧摘菩提此是楞伽說心
虜道場悄：佛燈淒

秋九月再遊印度昔聞密遮拉士有寺數十僧
萬數吾至問居人皆不識僧寺者近縣有支
那智利有古佛城七重金塔十餘最莊嚴皆

改為婆羅門廟至丹祖古印王國河橋環島
風景甚佳故佛堂且有改為濕婆教廟者於
舊日佛龕徧供焉藏環廊數十婦人入廟膜
拜摩抄由至潔不妻之佛道一變而似奇淫
為教以此悟正負陰陽反動力之自然例耶
大劫沈：於是全印寺僧皆滅吾亦可超脫
於人間世之形相矣

踏徧閻浮何所之莊嚴佛土盡離披是時為帝相非
矣大轉迴輪翩反而淨穢早知無揀擇教宗如此太
離竒人天非想非非想萬法冥：萬劫悲

遊孟邁外舟行九英里曰象島有佛坐道場處
鑿岩作堂左龕下有潭水清碧右亦一堂柱
數十象偉巨大半完好惟龕中皆改供濕婆
淫物矣積翠深：既思說法龍象之跡又感

浩劫淨穢之不擇也

象島寒岩積翠侵石堂廣輿石龕陰尚憶龍天聽法
日雨花落徧碧潭深

藏寶崢嶸佛像嚴一龕淨穢竟無嫌而今閱劫同歸
盡只見疏林傍塔尖

九月避地再遊印度絕無僧寺傷念大劫感懷
身世

匪兕虎耶遊曠野又河沙矣再西遊莊嚴淨土成淫
祀勝會靈山今冷秋金印無僧無佛法有生盡劫盡
離憂本來不作生天想為拯斯人甘獄囚

記夢

開落桃花泣笑春息夫人作李夫人無言應識冤親
等影夢重來又劫塵

讀史

平生壯志輕四海垂老憂讒畏一夫毒螫慎無小蜂
蠆禍機從古發閻奴斐萋貝錦易人信黑暗風波豈
尔圖可待功成從范蠡輕舸西子去西湖

不敢再來行

千真萬真曾參殺人貪心貪心不疑盜金可惱可惱
陳平盜嫂叛逆叛逆杖殺明月妒汝妒汝王后扼女
不畏刀鎗惟畏讒傷人世多艱真偽翩翩顛倒裳衣

反覆是非指鹿為馬刺血移尸浸潤膚受或信或疑
既亂聞根耳難洗之蛇虎同居欲眠不安磨牙厲爪
睽暘駁斑斲：毒蚊飛而食肉夜入我帳血殷吾足
蝟蝎蛇蜒徧緣盤几我不敢坐吾不敢餌嗟吾有身
大患是臻嗟吾有名謗毀交繁嗟吾有家煩惱如枷
嗟吾有國憂難並作我心不忍是救是□明知獄苦
自囚自忍捨身救民竭忠盡懇益人何所徒自殺我

飼虎飼鷹施捨有情頭顱其幾心肝碎靡聞世無量
歷劫已多死生何云痛苦奈何大地甚廣諸天莽
達德之國瓊瓏之缶天人可親妙音可聞樹樂微妙
衆香芳芬床楯樓閣七寶繽紛神瀆瓊漿飲之如神
玉女華色羽衣鮮新賞吾仙骨誤謫濁塵授我仙丸
復生返魂顏色復少木石皆春絕無哀怒但有懽欣
本無所住聊復與羣僥視世間腥臭血薰坑陷徧地

狼麟啖人目駭神傷是何緣因掩目難視裏足不巡
不取再來謝汝下民

基督新教浸禮會牧師未脫士傳教中國廿年
今為僧於錫蘭吾遊緬甸錫蘭見英人為僧
者數矣皆赤足苦行此為中國教士耳但其
所得仍是南宗蓋印度北宗已亡但入中國
耶教出於佛之小乘本近南宗今印度譯佛

書雖二百餘種皆小乘也惜西土佛會未聞
吾中國大乘他日譯出其傾倒歸心轉移教
宗必不可思議也却有輪迴道有深淺他日
大同之世佛教必復興於大地也

印度地饒富足食教先揚印度民困苦逃避教尤昌
北倚須弥山萬物富豐洋九六道中精妙日有彰
佛乃最後起集成撮其良微妙不可思廣大不可方

淺則禍福陳深則圓覺明彈指現華嚴帝網重；張
垢淨亦何擇生滅視無常即心可證性無住豈有鄉
大乘傳龍樹北印流入吾華香小乘舍利弗南印流
成南宗長試讀弟子品文殊普賢名渺茫惟有舍利
弗第一成戒定慧大教行譬如孔門多賢哲曾子長
壽宗最强強毅樸誠能守道宗門所賴是金剛並力
山大時入印久翱翔小乘必西流波斯展轉將基督

遠聞道發明破天荒舊義本託天挾之加醫方我各
証其義剖符無毫芒更觀各科儀壇像燭煌：緇衣
合掌而跪誦乞食赤足而遊方素食且不娶高行自
激昂道阻二千年迴環復東方耶徒未脫士廿載華
土翔削髮忽為僧赤足而衣黃飯依棲楞伽大覺歸
法王方今佛蒙劫全印無僧坊正當耶宗盛大地莫
與強逃耶乃歸佛此非因勢降淺者必歸深公理之所

當時固有盛衰道難逃陰陽是時為帝耳雖劫何損傷
佛說太微妙國爭時非良奉天合地時耶說今適當
行教有軌道近短遠則長逢時宜大興過時宜則亡
佛教宏而微軌濶道遠將它日大同後魂學大明光
粗跡人事極度世魂靈揚于時諸教宗佛法再昌洋

今日

今日聊為樂吾生亦已難身名為大患家國遘多艱

避地住無所非人心可安明知地獄苦四顧且盤桓
懷門人錢用中程式毅二子朴學篤志戍戍以
會試從余居京師南海館八月牽累下獄久
不見倍思之

麗江洱海吾未到卓犖英姿猶有人黨禍株連刑部

獄十年不見點蒼春

錢用中
雲南人

道心朴學不求名得鬱洎、蕩秀靈同難我思陳蔡

從獄囚牽及魯諸生

程式穀字子良潯州人送吾子桂林風洞甚久今聞已官知縣

美性行純勢學向博深
風雨不踰尤善也

已酉臘在檳嶼與門人王公裕步南蘭堂後園

感懷示公裕兼寄麥孺博徐君勉

流亡海外一星周自笑更生十二秋
得失興亡親歷
險艱情偽與由
閉門種菜英雄老
握髮非人心
事休神傷不敢看
時報花下藤床搔白頭

蒼攘國事奉強鄰，惟懼謀謨可有人。
卿士似聞名隨會，椒蘭有意譖靈均。
東門逐獵娛牽犬，西狩嗟窮泣獲麟。
吾道非耶浮海久，不哀時命只傷春。

與王公裕南蘭堂園林望海雲寄麥孺博

鬱：久居此樓：吾道休湯洋望海若寂寞倚層樓
高檜參雲直垂藤繞樹柔飛雲忽東走惻：眈神州
斯哲謹案公裕名覺任民國二年任吾邑縣長政

修明行純潔其學問淵博與岑孟華孺博齊名

己酉臘南蘭堂後行吟徑扶病與王公裕望海
海氣蒼茫海浪號日看拍岸捲驚濤行吟憔悴巡花
徑誰作招魂誦楚騷

臘盡聞梁伯鳴病危將死哀之去年令往暹開
啟南報還至商報國事報鷄鳴風雨歲寒不
渝令人益感思也

生世恂：不近名歲寒松柏見青：十年不見還行
苦風雨愁從歲晏聽

聞龔睿生病目寄慰兼示陳仲遠

狂風兼驟雨客夜聽鷄鳴不動真強立多憂是玉成
人身皆疾苦天眼自光明寄語陳無已雲流素月生
檳嶼多柳絲松乃數百年物吾南蘭堂有六株皆
七八十尺勁幹如松垂條似柳剛柔合德節

日憂雲吾顧而愛之日午避暑移藤几松下
著書自戊申冬至今兩年矣

勁幹參雲百尺長垂條細葉娉悠揚老夫愛汝剛柔
台篩月摩霄意不忘

南蘭堂後柳絲松六樹蒼々嘯海風日午先生來隱
几著書松下兩年中

攜旃理南蘭堂後望海

冥：海浪草青：柳葉松絲垂草亭茗罷打毬當晚
步相攜望海酒微醒

己酉除夕前二日酬梁任公弟寄詩並電問疾

六章

又為黨錮號康梁廿載齊飛攬六荒同入虞淵援墜
日共思宣室泣先皇神州沉矣哀：劫吾道非耶莽
：傷共笑屠龍寧誤學殊方餓死可悲涼

家國牽連溺愛河有身可患奈之何預知歷劫懼喜
受最痛生民憂難多誓拯衆生甘地獄備纏諸苦陷
天羅瞿曇巧慧先紆避宣聖兢持僅得遇

而今出劫過來身去：冥飛別有春朶：蓮花開樂
土天：世界現微塵吾生舊吃肉邊菜濁地今升天
上人回首百年成壞事雲中俛視尚酸辛

勝駕諸天散衆香舊鄉臨晚故迴翔斯文墜地道將

喪大浸稽天民可傷吾喪我兮今解脫汝哀世也救
顛亡衆生病已吾何病病已或開新道場

孔佛耶摩並聖醫各能起病藥尊師尊天明鬼皆有
託出世同民盡大悲但苦一身難兩面雖云圓覺亦
偏知悠：萬古衆生苦昧：吾思一救之

百年身世幾何時六載羣居歎索離大地轍環吾倦
矣扶桑日出汝淒其側身天地猶旦暮極目海山空

怨悲貧病逋亡不得見沉：歲晏只相思

立春檳榔嶼校定詩集畢携旃理倚亭欄望海
霧雨迷濛淒然有懷

淒迷山海霧冥：校罷新詩似夢經獨有朝雲倍寂
寞茅亭賞雨倚雲聽

懷抱千秋八表思滂沱四吐欲何之靈光燭：為誰
發縣邈芳馨寫付詩

誰令憔悴作詩人三度檳榔嶼上春澤畔行吟騷賦
者千秋人誦屈靈均

舊作詩篇遺流多失任甫請搜印刻老珍敝帚
檢於絕國凡得十餘首緝成題之

檢收墜簡寫烏絲五十年来千首詩聲色見聞非我
相風霆流襲有天知教宗國土紛勞爾神鬼天龍呵
護之終是多情樂微妙妙音天上感心脾

憇園詩集

康南海先生詩集卷之十二

後學東莞崔斯哲手寫

德宗景皇帝百日喪畢剃髮哀痛無時感賦

白髮耗二百日垂黑鬚盡白亦茲時明良遇合終天
痛喪服禫除及禮期剃髮六根終不淨感恩千古只
含悲孤臣首疾何能解永放江潭與海湄

庚戌三月七日□□□□□□□□□□繞行

檳榔嶼携旗理觀山海

游山觀海醉酒卧簟聽謔夢醒簾影燈影花影浪聲
蛙聲蟲聲

庚戌三月廿七日閱報有作

破甕顧何益臨崖足久垂勒巖背水陣超軼樂天思
身病得心樂途窮入道資人天遊戲久成壞亦何悲
到坡三邊舍館數月中自庇去坡由坡而港由

港而西貢後復還坡追舊感今而賦

冥黔席暖亦何曾浮海居夷已不勝
天地只為行旅宿歲時常作打色僧
多情懷舊誰能免着意開新我
尚能道里經過五十萬應無所任任騰：

十二月二十三日在星坡海濱之丹容加東深
夜起步看月觀濤海浴有感

岸崩路折白沙橫捲雪驚濤拍岸驚
碧海青天漸澄

澈跡星孤月見光明二三燈火知船泊數四漁燈趁
夕行歲晏幽人依絕島夜來海浴聽潮聲

庚戌十二月再還新加坡菽園三書請助卒歲
計並出新詩百餘相示追思庚子立儲之變
菽園因迎吾來坡為之感慨

前度康郎今又來桃花開落費疑猜十年來往星坡
夢笑指蒼桑變幾回

昨夜雲開見月明
天容海色漸澄清
釣竿拂得珊瑚
樹猶聽老龍噓浪聲

與邱菽園論詩跋卷尾三首

滂沱吐出作歡悲
懷抱千秋八表思
偶爾起予三尺
喙攤箋百紙又論詩

論詩竟夜已天明
起步園林萬綠生
皎日騰升諸境
現高邱曲演九州成

鳥啼花放知何世木繞雲陰自在行
別有諸天千世界化城無礙起縱橫

又七月初一矣

久客何年了移家司歲中海門濤拍岸
鷄打樹塚言雨濕檳榔綠雲烘鬪順紅
著書空老矣故國又秋風
關順花木本高數丈花大三寸許開滿樹
秒南洋各島多植之弥望如霞蒸

七月十四為梁俠士鐵君殞節日陳酒祭之

詔書立憲日烈俠捨生時槌鼓彌衡罵誅心司馬知
驪龍誰敢捋毒鴆死堪悲陳祭年：淚思君共酒卮
遺骨埋榛莽三年竟未收撫孤愧丹口去國尚扁舟
義俠他年史香煙絕域秋卅年生死友哀痛望神州
仙鶴長身立雲龍遠氣豪日光岩下電兵法洞中韜
超世得禪佛雄才可節旄從亡十年事明月碎波濤
前十年此日鐵考從我在星坡移丹
將敦燈島

與旃理晚步憇園北坡旃理感秋思親請賦詩

子懷亦同口占

木葉亦已隕秋風昨夕生繁花紅萋地茵草碧連城
搖落仍生意蕭條對晚晴漸看華月上萬里共圓明

枝影葉

南洋草本有葉大數寸內
藏枝葉影誠異種也

綠葉臺萋：倩影迷來蝶碧質而綠綠圭璋賦理擘
嫩紋織綠緯中有枝影貼

諸葉間長短中條長亘接只聞殭化石豈見枝影葉
昔劫適何時前塵今尚懾

菽園絕世事而苦吟其詩精深華妙大成矣
採葯靈山歷苦間一朝換骨得金丹驂鸞化鶴飛升
去僥視腥膻人大難

庚戌除夕居星架坡海濱丹容加東與旃理步
海沙攀松石長椰夾道夕照人家接目皆巫

未由吉寧人去國十二年傷存念止雲物淒
：遂有浮海居夷之感

大海波濤拍岸粗疏椰夕照帶蘼蕪居夷久矣年運
往吾道非耶曠野孤松石頑嬉笑山鬼乾坤偌大着
潛夫似聞朝議思隨會諸夏顛危誰與扶

竇陳蘇馬自千春放殛誅流痛黨人鳳靡鸞叱經浩
劫天旋地轉念維新劇憐埋骨多君俊更痛攀髯轉

聖輪漢相帝師傷拱木楚囚學士又風塵
出亡歷：十三年國事塵：夢化烟聖德神功帝何
力維新立憲史誰編雲陰解駁明孤月海色澄清通
碧天共痛冤飛柴市雪昭回衣帶日高懸

宣統二年秋九月六開噴室贊新謨廟堂何意排羣
議民猷同心過百夫安國舊勛思樂毅射鈞往罪釋
夷吾移書欲放逋臣返雲物淒：尚海隅

時資政院
議員請向

禁燬

聞高麗亡日俄協約且有蒙古遼東之約痛慨

感賦三章

坐看東海竟揚塵
太極茫：轉日輪
箕子為奴今及
裔庭堅不祀最傷神
千年圖史空王會
八道河山痛種人
長白山頭雲黯：更愁鴨綠浪鄰：

趙朝曾憶廿年前
五鳳樓頭日耀天
紗帽綠袍穿陞

仗朝元賀朔入班聯沈：渤海驚龍戰滾：邊塵廢

鴨川可笑降王娛帝號曾供傀儡十三年已丑年元旦朝會曾

遇高麗使于大和殿門緣袍烏紗帽象笏送送九品班末也數年後短衣後祖送各使後鞠躬矣

撫桂親披職貢圖先叔祖中丞公撫桂林時越南入貢宴之巡撫大堂巡撫中坐司道

側陪貢品陳庭使臣侍郎阮某拜跪階下登堂賜坐于地而宴之曾拓影為吾年十五親見之同治辛未

也卅年世變色模糊越裳香象無踪跡緬甸金花可

有無鬱：祖伊奔入告哀：天帝醉難呼琉球高麗

誰為盡瀚海遼河更可虞

仲廉二弟最孝謹久別八年患難遠離祠墓田
園皆賴弟香泐重見懽然贈歐土物弟無受
但乞詩字因寫贈之並寄季雨四弟因傷感
幼博

從弟平生馬少游十年憂患隔滄州勤：數馬傳孝
謹站：飛鳶念毒愁痛發先聲難作記惜非吾土強

登樓掃除祠墓唯憑汝夜雨傷神最感秋

辛亥人日立春星架坡海濱曉起視萬綠匝地

嫩晴濃熙皆椰蕉棕桐鳳尾草不得見故國

梅花牡丹也寄任公孺博曼宣與薇女

棕蕉匝地草侵沙淋氣晴光映綠椰乍見嫩春如好
女惜居絕域寫年華花埭牡丹移畫舫燕臺芍藥照
人家而今碧浪盈：海人日題詩寄昊霞

晚潮捲浪岸淘沙夕照皺烟天滿霞
隱：青山轉帆
艦深：綠樹隔人家曾携婦孺尋螺
蜆網集漁人得
鱗蝦喜入立春又人日醉眠芳草忘
天涯

飛鳥驚枝天欲曙候蟲吟草月微明
深宵不寐頻歌
枕似聽三邊鞞鼓聲

憇園北坡晚望携旃理同凝

北坡煙樹鬱槎枒被徑皋蘭芍藥花
却指高邱樓抗

頂周遭綠樹倚紅霞

新□□□聞警

噴室無靈民獻空熏天復皎贊元功
春來準買千金笑花好難留百日紅
可是賜秦天帝醉恐傷懷楚大王
雄楚歌四起邊雲擾感國哀：思大風

海運支離入南溟陸沉淒惻歎中原
晉陽已過猶增穢關外環兵尚禁言
縱敵患深貽數世和戎割讓擅

專門海枯天墮今何世東望神州只斷魂

二月花朝夕携何勝旃理水塘步月遠憇園聞

木樨香

月明如水浸湖隄淡々金波煙何低白石蓮花見燈
影紅泥檳樹送輪蹄祖師禪意通葡萄居士香聞證
木樨繞屋循廊光可掇花陰樹底霧微迷

送春

春盡星坡又一年鳥啼客去草芊芊
：花開花落供惆悵
天雨天陰總可憐
倚閣三杯婪尾酒
游園五色並頭蓮
獨愁鞀鼓催春色
夢入東華只愴然

辛亥夏五月自香港重游日本
寓任甫須磨雙濤園築室同居
與任甫離居者十三年
檳榔嶼香港一再見
亦於今八年矣
兒女生於日本
皆不能識
相見如夢寐
任甫賦百韻詩先

有四律奉迎答以四律

大浸稽天痛溺淪，惟吾與汝拯生民。
身經百億萬千劫，我是東西南北人。
黷：春明有餘夢，滔：海立盡成塵。
團沙易感傷身世，十四年來幾轉輪。
交魂通夢八年餘，檣嶼香江嘆索居。
九洲中我行路，二百國事汝成書。
幾聞變遷驗家國，屢驚生死送居諸。
同心離屬憂傷老，秋水相望恨有餘。

清淺忽然見河漢風颭不復阻蓬萊
洶：碧海淘浪靜謖：青松聞籟來
執手似經灰剗別傷心重借酒杯
開成行兒女皆新識異域驚看喜復哀

須磨月照萬松青東海決：納一亭風浪千帆如不
動神山羣峭想飛靈南村卜宅樂晨夕九世通家傳
諱經頗笑預人家國事耦耕浮海拚沈冥

題梁任甫所藏唐人寫維摩詰經

我生視書古為僻未見唐人之筆跡
江南京北覽藏家僅存宋後寶
拱璧昔者歐遊觀古物埃希羅馬多
遺墨邦淖忽露古城畫歌林近發
舊都刻摩撫丹墨數千年惆悵吾
華安可得雲風洞窟何茫：石鎖蛟
龍寶氣藏碧瞳綠髮多好事十年
石室發燉煌玉檢金泥裏百篋
龍威鳳篆寫千章一船書畫巴黎
溢五車秘怪燕市光陳農求書
白馬寺杜春挾簡金絲堂

散落人間尚千百紛紜眩暈而探囊我從南洋望北
極石渠怪發動未央竭來須磨雙濤閣海濤松濤生
清涼任甫手持唐人寫經卷妙墨通峭寫硬黃隸意
尚存北齊勒筆態頗近誠懸莊鉄網交如珊瑚折仙
樂嘈奏回鸞翔所寫淨名經一卷菩薩行品尤深長
不染不捨無淨穢是逍遙遊之神方半生行道長挾
此日飯三升毛孔香我本摩詰所化身衆香國裏吾

久薰偶來濁世任斯文預人家國亦艱辛頓慮辜率
為世醺日讀一編心耕耘神遊諸天身入塵地獄天
宮亦何分斯卷破煩之六軍著茲古墨誦勤：豈止
古物僅藏珍因此證果散法雲震動六極大千春

題梁任甫海桑吟畫寄林獻堂

東敗昔割臺吾方在公車孝廉三千人伏闕哭上書
鳴鼓守臺官連軫塞巷間臺灣有人士血淚灑大夫

吾時從旁觀惻痛切肺膚終為秦檜阻行成割地圖
人士絕往來旌節亦已無哀念吾種人驅為亡國奴
未知新邦政困苦果何如遺老林獻堂好義薄雲衢
任甫與邂逅遨遊遂與俱鹿耳與雞籠周歷千里途
遺黎夾道迎聞聲相歡呼

辛亥夏來日本須磨居任甫雙濤園築小樓十
弓臨海名曰天風海濤樓室成與任甫覺頤

樂之兼寄若海索和

海外通亡十四年，又來湏磨結三椽。
紙窗板屋生虛白，夕靄朝暉覽萬千。
松鱗舊亭立前後，丘中曲徑得迴旋。
小樓坐大吾知足，吞吐東溟占碧天。
雙濤浪拍與松篩，海碧山青日月移。
丈室可施花雨榻，故人□寄草堂賢。
白波萬里如舟入，青蓋千株繞壁歌。
遇眼雲煙渾欲忽，側身天地更何之。

新室成十四夕與旃理倚樓望月

明：今古須磨月夜：飛雲送入樓海色天容行朗
：松聲濤浪辨悠：人天斂籟常盈耳舟屋繙書笑
打頭空相音聞得清淨烏皮几在且休：

辛亥除夕前三日再游箱根看玉簾瀧

夕照連山蒼翠黏渡橋逾澗石□□天教開領佳山
水半日重來看玉簾

橫濱大同學校十五年紀念慶典恭承頒御書
匾額而鄙人又適再東游躬襄其盛喜賦祝
詞

光緒丁酉秋舉國猶守舊庠序徧都邑講授皆學究
祁：趙胄子翹：烈文囿埋首八股業閉戶三家廬
嬰兒誦周易不解同梵咒禮樂射御數古教盡遺漏
歌詩舞象勺學語之不覲豈知四國為何況大地厚

以茲人材之適當大變湊歐美發科學教法日新奏
日本先取法學科得步驟期：愛國心磨激更日富
用致勝中俄本在文學闢十萬毛瑟鎗祝此學童幼
華僑多志士發憤思自救同心構學校好施共奔走
分科良美備流風遠被覆子弟既多舉邦人咸輻輳
全國立新學此校實導首昔謀立校初遠與我邂逅
大同錫嘉名遣師與先後逾年戊戌變東來覽蕭構

洗：蒸髦士萃：陳俎豆一別十四年汗漫歲月質
春蘭與秋菊日聞挺英秀王路紆阻纓郡縣充教授
或遊歐美學或入江戶胄翩：百餘士好學多成就
老夫在東美回望神山岫桃李已芬芳手植嘉樹茂
坐觀翔飛雲回思撫蓑口朝思遠不遺御書宏獎侑
仰瞻卿雲題欣逢吉日茂志學邁嘉會乞言歡飲耐
更望鬱棟梁斐然先瑩秀雖遜鹿洞風却挹文翁袖

神州起夏聲多才作人壽

與麥公立游淺草動物園石瀑溪橋幽甚

愛坐池亭日已曛堆山激水浪成雲泉聲在耳瀑在
眼開市深山境未分

池橋頻徙倚泉石證聲聞道入鳶魚際人將鳥獸羣
昏黃日將夕林翠瀑生雲待月頻張樂華嚴語幾分
夕與公立入飲酒寮及出而泉瀑忽收蓋以人

工為之制機即止可悟入無常而證非：矣

酒爐從醉卧泉瀑忽收藏乾溢口冬夏遷移驚海桑
光猶留白電夢未熟黃梁寧待四門悟天人豈有常

携媵何旃理及姪女同荷遊宮島寺

同荷為亡弟幼博女

時肄業于日本女子大學

少日讀書白雲洞今來宮島又相逢危峯上月夜生
白萬木遮雲午聽鐘亂石當樓多磊磊：流泉到枕自

涼：泛艇弄潮看海寺故山回首杜鵑紅

遊廣島

羣山開廣島十萬關人家兵氣雲藏壘軍威馬踏沙
泉庭樂水石行殿倚山霞海水知深淺通渠蓮白花
若海遠自京師訪吾子日本須磨縱談弥月見

贈二章次原韻

披髮升天攬大荒舊鄉臨晚忽徊徨人才誰與共大

事國難寧能忍舍藏風起雲飛思猛士天旋地轉痛
先皇紫眉若士真英絕百尺樓頭湖海蒼

環轍歸來久白頭人間徧閱更何求夢華尚有山河
感大浸能無仄劫憂傾缺乾坤猶欲柱風颺郭李且
同舟多情來看湏磨月夜：聽濤嘯未休

再宿塔之澤環翠樓主人鈴木出吾舊詩札隻
字不遺口占即贈

十四年前曾遇客而今三繞地球回山林鬱鬱仍環
翠泉瀑瀉：尚隱雷再卧故居真似夢新添白髮共
登臺殷勤地主重談舊歷劫人天幾去來

醉早稻田講師桂湖村贈詩

乾坤浪莽久飄零倚劍崆峒歷歲星不意神山能再
到草堂風雨再談經

甲子元旦作是

正

華嵩及來已除夕

六十七翁來古稀

氣雨惠花竹醉柔
彩烟雄朽松飛中元
甲子天良及外史康
中國事始更為立喜

正元日
有為
有為
有為



納東海亭詩集

康南海先生詩集卷之十三

後學東莞崔斯哲手寫

甲寅除夕感逝

自延結山莊撫棺歸車中口占

歲盡淒：總帳風人間萬事總成空
玉棺長卧思天上環珮歸來只夢中
歸國因緣六月息環球形影七年同
從今滄海看明月怕聽胡笳奏落紅

乙卯元日與孺博若海談國事兼寄乙老

逝波年運往多經淑氣晴光春半醒風草茫：無故
物山河莽：又新亭衣冠避地幾如掃滄海驚濤不
忍聽五十八年憂國事今年憂甚可沉冥

遊煙霞洞

洞在南高峯麓有六朝佛像數十精
妙迫肖神氣如生天下皆稱素欽雅

典羅馬刻像之精不知中國古舊刻像精能如
此實為中國瑰寶國人宜共珍之洞外巨石離

奇梅桂數千時當
八月桂花大開

萬木森：磴道迴桂花影裏記徘徊燃燈列佛笑迎

我似為破煩招隱來

經年易劫尚山青
洞裏沉：佛未醒
酌取錢塘一江水
烟霞痼疾願沉冥

再登韜光

萬竹盤青磴道分
北高峯下一鐘聞
左江右湖供一酌
足踏飛來頂上雲

泛舟遊公園

園本舊行宮二十七年
前曾遊之
乙卯歸國再遊朝市則已
改公園

為之感慨

湖波澹蕩捲寒風
夢入華胥事已空
二十七年春色
過煙迷雨冷憶行宮

乙卯三月重遊高莊
光緒丁酉九月携長女同
薇遊西湖故人吳雙遺方
令錢塘館我於高莊越年戊戌蒙難走異域雙
遣殉難而終忽十九年不意再能來遊也循
覽林館感蓋憶懷從我偕遊
者門人王公裕鄧百村也
湖水仍清柳放綿
高莊庭戶尚依然
記携弱女曾三

宿蘇武重來十九年

重遊三潭印月

此島築于北宋時在西湖中內作四湖三島以三十折橋通之

老柳環堤紅荷滿水千年舊物得此為歐美公園所無吾遍遊數十國歎為絕景

湖中有湖島中島三十折橋堤柳早開紅一舸入荷

花三塔猶存明月老

島外有三塔潭同音碑文誤寫作三潭

遊靈隱寺飛來峯寺經燬後重修甚麗殿前石

塔無恙重摩有感

焚餘殿閣又莊嚴百劫歸來問塔尖
大熱泉聲猶作冷已空山色不妨添
亦知成壞原難免閱盡興亡自不嫌
我與飛來峯去住雲林新月上纖纖

乙卯三月二十六日送春詩

園林半割幸偏安萬紫千紅竟送春
驟雨連朝太無賴憑欄盡日最傷神
坐看落花隨逝水又驚寶馬碾香塵
閉門莫道東風惡只見啼鶯不見人

跋鄧完白山人登岱圖

雲氣蒼茫日觀峯
登高望海若能從
精神飛揚天地外
始識畸人亦赤松

題張叔未寫阮文達北湖草堂圖

文達有詩

高樓文選摘星光
尚想風流蘓草堂
逸筆百年張叔未
北湖荷葉寫遺香

嶺海文翁學海堂
今為瓦礫最堪傷
勞君馬踏搜殘

像付此畫圖衣鉢藏

題羅兩峯仰首問天圖

兩峯自題前身花
之寺僧

陸沉慘：樹搖枝仰首呼天呵問時被髮大荒空莽
：前身明月又花之

偕若海公裕品茗不忍池中無着亭看月已而
病若海以二詩來答之

池亭呼取密雲龍知共佳人聽暮鐘碧海青天無限

恨且看華月上青松

衆生有病吾遂病世界微塵我入塵玉宇瓊樓不歸
去人間少住未知春

題亡妾何氏所遺書畫詩

天女化為舍利弗本無障礙女男身散花究竟涅槃
覺學書初學衛夫人

發願為吾全寫詩畫樓春暖日臨池空將十紙摹梁

鵲留與家書說衛漪

魚山學行草谿筆留得書丹在
我家不寫簪花傳化度自然高
渾發清華

月竇風寒注逝川去年此夕奈何天
房櫳久閉塵凝筆書畫搜遺墨滿
楸兒女悲啼倚燈下形容綽約步
階前更無入夢腸空斷且費扶鸞
問敬仙

智師一字五萬錢十字文無人間
烟旃理臨之冰雪

仙忽思纖手拂箋年

濃艷凝香帶葉妍
粉痕墨暈態猶鮮
而今落盡殘紅
後讀畫題詩更惘然

一枝濃艷發遺香
曠粉殘箋空斷腸
色相華嚴常示
現殿將畫譜拾羣芳

丙辰元旦感事書

又看春色到婆娑
送暖晴光盪綠波
正月無王思撥

亂普天後日望陽和可得自娛尊號上幻聞伐叛戰
雲多魯連豈肯秦稱帝目極三巴奏凱歌

甲子書猶晉處士庚申史作宋遺民百千劫後成灰
日十九年來去國身春發人歸尤感舊天旋地轉望
迴新草廬尚有乾坤在遠我中原風日春

丙辰二月五日送君勉回粵赴義兵討洪憲冀
借寫近詩付善伯歸示君勉

慘：滔天巨神州，恐陸沉行藏。吾與汝，弔伐古猶今。
撥亂春秋志，辛勤梁父吟。鷹揚廉耻，將四海所歸心。
丙辰三月十二粵海珠之變，譚典虞以奇才邁，
難哀而祭之。

雄武周公瑾，英姿正妙年。孤忠心不展，沉勇氣無先。
百中韞難下，千間厦未完。終無一旅藉，長恨咽黃泉。
贈鄭大鶴同年

海內詞人孰正聲
畫師博敬話居平
何當麋鹿游臺
感又見龍蛇起陸
爭燕樂孤微知石
竹樵風哀艷入
琵琶西臺鐵笛曾
吹裂賣藥懸壺斷
此生

入山惟恐不能深
勾漏羅浮何處尋
欲問葛翁同徙
宅山樵妙墨有青
岑

身世可堪逢百憂
萬方多難竟無休
死生契濶嗟吾
輩
烟雨迷茫話小樓

題趙管合璧畫

文采風流兩璧人，獨將書畫照千春。
武林舊事寧相憶，翠竹蕭然世外塵。

女夫羅文仲官廈門海關同璧女赴任題趙管

合璧畫與之

水晶宮裏兩仙人，書畫流傳並絕倫。
玉潤冰清得歡喜，明窗斐几助精神。
竹蕉深隱人世外，木石與居山

海濱付汝如賓舉案暇涵關似見古之春

為茅山乾元觀保新木及虎丘半塘龍壽山房
所藏善繼禪師血書華嚴經求達塔保護呈
震巖同年

僧寺鈔經道觀花雨般風物擅中華代告使君為護
惜免流外國毀泥沙

同璧女赴閩官舍題吳白花卉圖與之

梨香雲漠：飛燕雨微：雉雞飲啄樂醪靡春事非
雜花成錦地孤石倚苔磯應有看花者無言夢自歸

偶感

先德梓鄉碑有口棣華燕市蓋曾傾浮蹤遘共壺天
聚下里偏邀白雪評春夢一場供劇哭花潭千尺感
深情臣愚自蹈亡身禍敢向青閭訴不平

積之第六十壽寫寄

積之仙人姿生本非凡物久薰衆香國累刮浸肌骨
天性自近道不為腥膻汨純粹而好奇乃不為庸物
至常非常義廣納而肆出少打細腰鼓折節服道術
冠乃獨尊孔宗學守兀：頓愛袁了凡勤：講陰騭
以為可補儒實惠民物活家世桂林秀一枝尤挺出

春日重題大觀樓二首

樓上春雲住又飛樓前春水綠生肥舉頭莽蕩身何

處釀酒蒼茫醉未非三島游仙他日夢五湖垂釣幾
人歸毬場牧馬將軍老誰話天山雪打圍
湖花湖柳此依：天下春光兩燕飛好水自頭連尾
看諸山從古到今圍百年作客原如寄竟日登樓只
不歸此曲莫傳王粲和怕教遊子淚沾衣

懋華陰廟

漢柏秦松白帝庭：前晝夜走仙靈殘僧不管人間

事卧看芙蓉萬古青

漫題

種菜英雄老遊山婚嫁遲仙名留美飲官職折吟詩
肝膽今誰照年華有鏡知飛鴻杳天際獨立看雲時

外物

已能外物知朝徹未至非人尚夕飢驚說凡亡猶噩
：慣看星隕入非：面依牆壁山巖坐手擲髑髏雷

雨飛世界八千頻往返可憐萬物入于機

贈龍積之

太清吐瀟漳青城遊絳闕龍子鸞鶴姿道氣非凡骨
薰香自累劫芬馨浸肌髮靈山昔有合補處無量佛
同發悲憫願欲拯飢溺活示現來問世辛苦充寶筏
天然好道心一生抱明月雖現宰官身無礙得解脫
禮樂本天性青雲月照豁汎愛教無類善誘義妙發

恍：投岸獄鬱勃談理窟出入天人際
豢龍在一鉢
困窮起禁觀汗漫衆芳歇世界幾百億
賢劫幾變越
神遊亦無量萬佛同聽忽推我不忍
心勾留救民疾
卅年舊因緣老矣相濡沫海上重相逢
銜杯祝鯁噎
願長生未央明德追曩哲

庚辰三月十五日訪蘭亭

縱觀宇宙水精庭同時裙屐並高名
禊序昭陵劫幾

經二千年蹟蹟蘭亭清流修竹相映碧峻嶺崇山猶
自清春和天朗吾來口悵望蕭條幾換星

遊柯巖

柯亭竹笛不能見柯巖峯石猶挺竒烟霞洞深七星
墜潭水清澄誰樂之

探禹穴俗稱禹王陵有窆石即葬處窆石頂穿
傳是太白作窆石中有宋刻字數處與泰山頂
之沒字碑並為最古物

莽：羣峯萬馬騰龍蟠禹穴看雲升
委宛神靈存石紐會稽草木護
王陵中華稱夏人思創洪水平
灾鬼與能安得同遊遷與白金瑩
玉簡擁霞蒸

鏡水稽山舊夢遊千巖萬壑秀
爭流山陰道上接不暇百里春
谿一葉舟

登紹興城中虎山故越王勾踐樓
甲士處可俛望百里城郭山河甚
壯自古為雄郡惜今改縣

虎山蟠據侷城中甲士三千樓越雄十萬人家烟樹
碧山河壯麗惜春風

偕徐子靜侍郎登杭城：隍山遠望

城隍山即吳山

立馬吳山攬遠空錢江滾：浪流東左江右湖樂無
有鳳舞龍飛勢自雄隔岸峯巒奔萬馬舊都王霸見
羣龍南高峯側堪惆悵十萬人家烟樹紅
為退思齋主人題垂釣圖並祝長壽

漢北旌旗萬馬看，老歸心事託漁竿。
寫畫小兒呼造化，製瓷舊國記衣冠。
壽人笙磬來泉石，少日勛名識鳳鸞。
度世行慈紅十字，買山深入碧千盤。

龍井

丙辰夏六月二十日陪徐子靜侍郎文鄭浩義卿袁鍾瑞仲符斯明做吾龍志澤伯純徐肅澄秋仁釗勉甫池鑑清子美与婿羅昌文遊龍井

再來飲此一泓清，碧蘚沿崖聽水聲。
卅載四來經幾劫，青山仍淨証無生。

破寺蕭條佛不尊
辯才抱朴認茲身
我亦東坡久遷
謫修篁古徑重溫存

人世何須問濁清
名山且共聽泉聲
茶香水熟羣相
屬潤我枯腸詩思生

幾度滄桑道益尊
髯翁合許證前身
破除煩惱渾閒
事得伴清遊至樂存

亂後寺庵皆遇劫
我來龍井一茅庵
卅年樓閣華嚴

現常清功德在禪龕

烟霞洞

十載光陰首漫迴烟霞重到益低徊齋房蔬圃都非
舊似共滄桑變易來

劇談共對佛鐙青敢向塵寰詡獨醒天道神明佑賢
哲肯容出世託鴻冥

半生憂患尚何圖不信賡酬□□湖老我猶能鼓遊

興前塵如夢有還無

理安寺

十年前到理安寺細品芽茶酌乳泉塵世于今幾經
劫清遊相聚有羣賢濃陰滿徑堪忘暑長嘯舒懷莫
問天忽覩帝師遺墨妙追維曩昔又凄然

有寺僧出
翁常熟墨

跡相

迴馬嶺

崇巘陡崖人面立翠華峯麗不能躋我來策馬休迴
顧更自壺天一綫窺

泰山磴道撫秦五大夫松及四唐槐

尚撫唐槐四君子空號秦松五大夫槐幸婆娑有生
意松為寄託乱真吾

御帳屏

峭壁摩天飛瀑跳珠山色如鈇乃知北
宗畫所自出

羣峰環翠積鐵立飛瀑如簾濺玉聲北宗畫境誰能

識佳處無如御帳屏

題吳氏雙照樓刻詞集皆影宋元舊槧自王半塘四印以外為最精矣

活板流傳刻板收宋元槧影孰能留半塘以後刊詞集海內無如雙照樓

題蓬萊宮闕

曾瞻宮闕歷蓬萊一去滄波竟未回
偶看畫圖憶青

瑱市朝已變劫餘灰

左子異宗承以左文襄公少像屬題先中丞公

諱國器戰浙閩粵時隸左文襄公麾下幾十

年吾家長輩多從軍先君少農府君亦在軍

草檄吾少年仰望左文襄公如雲日以未得

見為大憾恭覽此像少年已氣象萬千欣喜

敬題

抱膝隆中亦異哉
虎頭犀項非常才
當年趙普業師
日豈識風雲萬里來

丙辰秋八月登泰山絕頂登封臺東過日峯觀
日出俛視羣山極望感懷鄭義鄉及門人王
公裕鄺壽民同遊

碣石飛涼四百島
玉檢登封七十君
大宙飛揚觀日
出萬峯奔走俛層雲
金銀仙關通天帝
青赤齊州涌

地文此是崑崙分左股乘龍臨曉日斜曛

度泗水望曲阜

汶上昨日見泗水今午涉其廣數十丈深尺度車轍
岸沙廣浩：當上泗漲沙人可負戴度小水何足說
所貴近聖居喜容動眉睫翹首見嶧山峰勢猶巖孽
豈必山水佳童時耳聞藝愛屋及其鳥况先聖過跡
昔將到鷄足想瞿曇行乞後望伯利恒想基督游歷

況在洙泗間夫子日行役車馬前揚塵尚想周流跡
漸瞻曲阜城日射黃瓦脊予懷三十年今始慰望極
登太白酒樓濟寧人士請寫樓額

太白曾携玉杖遊城樓酒熟占千秋我無謝眺驚人
句只為先生題酒樓

濟寧夜將登車行秉燭往訪文廟漢碑勞文武
長吏陪遊

□□傳呼燈映騶廟堂秉燭事勤搜此來為撫漢碑
碣慙愧羣官陪夜遊

丙辰九月朔游鳳陽龍興寺明太祖為僧處碑
甚多有六銅鍋四乃題太祖像

壞寺頽牆照夕陽銅鍋石碣總荒涼龍顏隆準開皇
業畢竟劫中僧一房

由帝而僧清世祖自僧而帝明高皇兩朝開國勛何

盛一例披緇事可傷
早識色空無障礙
難逃成壞感
滄桑龍興寺裡龍顏在
袞冕袈裟傀儡場

遊鳳陽明陵：距鳳陽城十八里

山河雄壯四飛揚
遠自嵩華王氣長
誰識王陵風雨
泣竟成高冢起高皇

久已銅駝歎棘榛
于今石馬委灰塵
御碑紀實徵時
事五百年間只憶神

重九前二日遊莫愁湖第三度矣寺僧出端午

橋尚書莫愁園題卷末

一角城牆百頃荷六朝金粉曠烟波湖山應讓佳人
領免使爭棋劫局多

油壁香車三度遊石城艇子正清秋人民非故湖仍
舊三十五人口白頭

尚書舊事空回首霧鬢風鬟有所思省識春風留感

慨江南山水漫題詞

重九登金山塔今新修矣寺前沙州又新生者
丹徒令章君覲瀛置酒寺中僧出紙請題寫

二詩付與

七竇崢嶸倚塔尖重來樓閣現華嚴妙高臺上登高
望感慨滄桑洲渚添

烟蕪極目際天高江山如畫幾人豪羣峰西走勢屹

二 大江東去浪滔：

九月重九夜十二時登焦山宴畢趁月渡江楊

春普章觀瀛汪甘卿陪登

焦山高處最高樓吸盡西江滾滾流
海浪天風吹不盡遠烟淡月見揚州

江月蒼茫江水流遠蕪燈火覓瓜州
浪聲樹影夜烟色重九焦山秉燭遊

遊濟寧鎮江觀者夾道

□□前驅笳鼓闐車場城角火燎天後車賓從乘數
十夾道女士人萬千到處聚觀新法祖此行望似大
羅仙游山深愧成張蓋壇席神明何敢焉

別焦山

又與焦山別江流無盡時風濤常獨立花木不離披
□□□□□天雲好護持名山又有待後約再來期

再登北固山寺僧出紙請題江山第一亭同遊
為汪甘即觀察章觀瀛大令

獨上江山第一亭
烟蕪水浪帶藍青山顛
石壁皆通峭天末
樓臺幾醉醒
昏曉乾坤似吞吐
海門日月欲沉冥
古今淘盡誰人傑
浪打磯頭倚石聽

登靈巖山携兒女同復園環同錢同凝同俊遊
壞塔嵯峨磴道迴
俯吞萬頃太湖來
宮花宮草蕪蒼

莽山鳥山雲鎖綠苔響牒無廊空石壁采香有徑繞
琴臺猶循御路遺磚在落照銜山亦可哀

抗殿冠山作館娃玩華井裏曠蓮花扁舟終泛五湖
去佛日甯知千劫差頑石蒙茸僧尚醉靈巖樓隱著
為家笑携兒女騎驢去暮碧松烟一徑斜

丙辰八月鄧尉山看桂

邱壑重深夾路松梅花未發桂花濃碑亭珍重晉時

墓寺閣莊嚴周代鐘香海人家三十里太湖波浪百
千峯慈山說法空：矣但醉山嵐與水容

題王定甫先生婆姑課誦圖

風節文章獨秀才通家孔李服半裁豈知誦讀孤童
日卻自秋姑婆女來

梧桐秋影月光寒姑響書聲共夜闌我亦好歸資誦
讀遺經淚濕不堪看

輓鄧筱赤宮保文

卒年九十丈與我言國事話及先朝即淚下吾歸國來只

公一人耳又戊戌吾家產被沒丈自出首名為請于政府給還感文厚德惟以文章報之

國老誰如伏生壽靈光驚近泰山頽似聞威惠流旌

節誰識孤忠淚劫灰避地耄期猶作畫補天色石媿

非才償還沒產勞公請報以文章寫我哀

甘翰臣得石濤畫餘杭山色圖請題

天目羣山龍鳳翔峯巒青綠竹松香去年驅馬西溪

路盡入清湘一畫囊

乾嘉老輩幾題詞
流入陪城又幾時
熊氏印章古樵
句重歸粵客護持之

國破家亡花石網
青城人往最蒼涼
可憐歌舞湖山
後舊國回思盡可傷

夢華那復錄東京
士女當年樂治平
風景依然在圖
畫上河佳日記清明

印色糝糊有十洲
鈴山興獄枉豪偷
于今四百年灰劫
絕世丹青我卧遊

贈侗公

落花流水帶平蕪
天上人間春盡無
國土華嚴猶可致
家居□壞抑何愚
每懷先帝慚衣詔
哀念王孫泣路隅
鬱鬱五陵佳氣在
五孃畫好且堪娛

答梁節庵贈詩扇叙吾訪之於鍾山書院舊事

花落花開三十年江南柳老想吹綿
星巖泛掉撥雲入烟澣聯床聽雨眠
晚對松筠喜青翠中多風雪隔山川
鶴歸城郭皆非故共話滄桑只惘然

丙辰九月二十九夕題麥孺博潘若海為盧毅

安寫扇圖

毅安弟以孺博若海合寫詩詞請
題蓋自甲寅來滬日與二子共事

而乙卯孺喪丙辰若殂誰與共天下事者每
念心痛欲賦不能下筆今乃攬筆哀之成詞

老淚猶
濕也

吾門房杜有奇才次第沉埋委草萊本是同心人合
壁痛看遺墨劫餘灰掣鯨碧海詞猶壯賦鵬長沙命
可哀吾道窮乎天喪咒灑將老淚濕青苔

君和仁弟別十九年重遇海上感贈

文正之孫惠敏子二十封侯長御史門多列戟十朱
輪兄弟侯伯國無比珊瑚鞭玉勒走沙隄一擲百萬豈

豪侈侯門當年盛煊赫吾猶及交群與紀猶憶惠敏
捧手時入吾卧內翻百紙覽吾內篇激賞之謂在吾
國歎觀止豈意蘇武亡外十九年化鶴歸來易朝市
文武衣冠異昔年王侯府第易新主君家田宅被封
沒丞相祠堂奪造几故侯流落無所之東陵種瓜今
已矣秋風萬里吹江水海上重逢話光緒戊戌朝士
已無多式微式微何瑣尾哀公孫兮胡不歸嘆城郭

是兮人民非侯其自愛保前徽佳氣安知無光暉我
心惻：芳草菲

僅叟侍郎丈生離死別凡十八年乙卯十月訪
吾滬上吾居申嘉園十日朝夕銜杯話舊閱
書讀書為平生未有之懽昔曾生祭今得生
遂皆相逢出意外行時贈詩謹和韻呈正

生祭哀：死別空豈知遺老尚存公劫經故國滄桑

後春入先生杖履中一日為懽杯酒裏百年話舊水
流東水深浪濶天游慣來往風流對阮窮

丙辰十月七日宿茅山陶隱居松風閣懷僅叟
侍郎年丈並示勉甫弟

猶記西湖共月明畫船檀板醉歌聲老年病疾憂之
甚舊事淒涼聽未平喜見重孫得聰令追思故舊歎
凋零茅山高卧松風閣南望錢塘秋水盈

聞丈病憂甚即欲赴

杭後知病已
乃遊茅山

祝左逸叟宗丞四丈六十壽辰丙辰重九作于

泰山頂補祝

峻岳弥天壽日長岱宗頂上作重陽百年高節見喬
木九日孤懷託晚香棲鳳舊巢掃痕迹戰龍大野聞
滄桑大天松老同摩撫復約峯頭再舉觴

題葛毓珊先生玉照

誰繼江村消夏錄平湖又見網珊瑚貞元朝士幾人
在好事風流得僭夫

丙辰十月偕李明庶楊嘯谷羅根登六茅山頂
仙山樓閣倚嵯峨茅許陶楊跡已過天外三峯青未
了羽衣雲蓋可如何

華陽洞裡無真逸欲跨天風問上清已就丹砂生羽
翼六茅絕頂好相迎

開歲忽六十篇

開歲忽六十元日歲丁巳除夕飲團樂羣兒鬧鼓吹
爆竹聲震雷紅梅麗繁藟雪花大如片飛來徧階砌
池臺鋪瑤玉林杳綴瓊珥天姥舞羽衣來獻新年瑞
巖服事上帝酒醴祀祖妣燈燭爛廊檻兒女歡饗饌
俛仰易元正感慨追我史長途行漫漶猶記當童戲
視彼耆舊翁相隔遠莫比豈料親吾身及此花甲暨

長江夜大浪扁舟渡揚子避雨蘇臺屋瓦飛立無堅
華德里落磚掠面過從耳假磚移半寸中腦遂已殫
大同書未著中國人無此廿八患頭風半載痛不止
羣醫束手謝自計亦永已蘇村延香屋瞑目將不食
令妻與壽母旁觀淚泚泚海外有良方書架得數紙
拚死妄嘗為首疾居然弭海通大勢變萬國進猛鷲
中華猶守舊沈沈若鼯睡上自馬江敗下迄割臺議

不忍吾國危
七上書投匭
遭逢堯舜君
采納及封菲
震雷馳霹靂
變法除痼疾
維新甫百日
昭蘇動萬彙
北晨構呂武
讒慝遇宰嚭
毒霧曠堯臺
冤雲慘柴市
竟遭甘露禍
逮捕三千騎
閉城三日索
鐵路中斷毀
津滬並大搜
驚濤立海水
兵艦走飛鷹
巖電馳遠迹
密詔命吾行
仲弢歌變徵
戒吾易僧服
北走蒙古寺
幼博長跪請
過津難自秘
吾生信天命
自得大無畏

經津登芝罘拾石罔忌諱到滬得偽詔正法着就地
驚聞上太行舍身投海汎英吏力抱我勸言宜少俟
艤腫多巨艦護我驅濤至十死亦不足幸免皆天意
己亥港省母高樓夜遇刺開門正對賊隔案僅尺咫
大呼吾開門驚奔賊走避乃改炸葯焚買隣穿地隧
吾適圖南行闔戶免於殘懸金五十萬購我頭顯貴
橫地浩茫：視天夢曠：庚戌居星坡又為敵所忌

健賊夜斬關車夫痛斷臂吾先及曉行破浪已遠致
天幸何多逢湘纍爾何恃廿年亡海外時：辦一死
遺囑繫衣帶恒幹付僕婢君危莫濟扶母病歸難侍
憂國驚溺淵思家軫病妍祭先顧無後望鄉歸無自
浮雲漫長空飛揚惟尔企頻繁歎絕糧質物盡簪珥
印度居絕域交通艱郵寄生兒大吉嶺瘞兒亦於彼
小墳向中華後顧無有嗣囊餘十四錢自分溝壑委

峩峩須弥雪天半橫峻□望岳歌采薇金石吟擁鼻
英雄方時來霸王自高視丈夫慣餓死傭保亦何耻
截業鷄足山伽耶塔尚歸方塘十七龕有齋挾女季
山道夜深行白牛車緩弛山僧挾二挺防盜出與倚
危徑聞狼嘯深林憂虎唾驅馬哲孟雄荒山行日四
徑仄路又滑日黑驛未蒞下臨萬丈澗轟轟浪聲恣
林密杳無見山暝行弥遠前則憂虎豹後則憂蛇虺

長嘯愁猩猿一脚驚山鬼同壁投我懷揮刀捫壁奔
尺寸扶服行一步汗喘：出林見星光據石聽流駛
枯坐待天旦篝火露垣堦喜心乃翻倒得生倒酒匱
在德遺目疾延醫無藥餌腹痛摩洛哥不敢入郊鄙
洪濤渡西洋巨浪泛其從吾道其非耶曠野多虎兇
生嗟人道絕死葬蠻夷肆豈天降大任拂亂苦心志
險阻與艱難重耳久歷試大地環三周四洲足曾履

那度日不落北極看靉靄游三十一國行六十萬里
十九年於外子卿已暮齒竟逢唐虞禪已知舜禹事
新室善詐符曹社陰謀鬼謬假共和名只為篡盜計
四海飲泉狂九州慘鼎沸生民哀塗炭百物盡更始
九關布虎豹白日走魑魅學校禁讀經天孔廢禮祀
儀：睹飛舞攘：爭權利荃蕙化為茅芳橘變為枳
神社與神帝風晦泣壇墮鬼妾与鬼馬色悲供娛使

神州憂陸沈，須磨悲憔悴。龔勝辱頻徵，管寧卧不起。
東海吹鼉浪，風木哀陟屺。白首奔喪還，朝市久變置。
重入黃浦江，若隔人間世。重望白雲山，毀龍難為祭。
重返銀河鄉，見塔若夢寐。重上澹如樓，摩挲七松翠。
愴然化鶴歸，人民似非是。蕭蕭茂陵樹，風雨泣荆杞。
敗棘銅駝傷，入河金仙淚。舊俗既遷移，教化亦淪墜。
大好舊家居，纖兒撞破碎。神器既折散，誰能造新器。

我歸一不識若異域人貴閉門未暇論無賢愚惡美
歐戰莽風雲申江遠遷次沁園龍池台書畫饒清閱
藏書廿萬卷四百畫在笥歐美亞珍物博搜集瓌異
少文為卧遊華胥夢酣肆山谷芳杜若牽蘿從園綺
漱松飲石泉搴芳采蘭芷歲晏孰華子種菜猶拊髀
巨君懷大欲託名置金饋騫然起巨波洪憲圖帝制
吾時遊西湖看管幾囚累翩舉脫樊籠懸賞猶密向

吾本淡蕩人魯連義不帝發憤呼義徒奔走易趙幟
碧海掣巨鯨大力曳負鼎蚩尤旗已滅噴室議尚異
五年三大亂虫沙可戲噉君子為猿鶴小人為螻螳
四海嗟困窮杼柚空筐篚機樞已停轉邦國無活理
中原試睨望澄清待攬轡蒲輪迎申公洪範訪箕子
執政虛旁求卻曲未敢詣崆峒多風雲橫天射長彗
鯤鵬負九萬千里假翼翅披艱掃紫氛太清澄翳滓

渺：兮予懷天乎胡此醉補天猶未能鍊石負慙愧
賢嚴幾歷劫蘭菊弋代遞新者日以親舊者日以徙
帝王與將相親戚及友紀山邱多零落吾生觀何為
古人多遭變無如我所被過眼烟雲中收拾色空裡
維吾覽揆辰五日月維二大火赤涼屋子夜吾生始
戊戌亦赤火藍燄禍先悖父老動色驚奔走咸怍異
書香再世延吾祖賦詩慰時秉欽州鐸名余欽為誌

摩頂受教告趨庭訓垂鯉康叔劉康公未知所受氏
代傳青箱業十三世為士十一齡能文十二覽傳記
連州觀競渡古詩二百字耆宿驚傳誦神童謬譽擬
長受九江學大道濟其裁以聖為可學豪傑能仰跂
虹氣摩青蒼長劍碧天倚生性本淡泊握卷窮日晷
幽：雲洞與我：樵山峙萬木下擁書瀑流聽泚：
故鄉銀河橋故園七檜址淡月篩葉影落花滿衫履

金山望紅棉花球種茉莉蓮館日游行綠暗鬧紅醉
究極天下畧研窮諸教旨著書遂等身發真除糠粃
講學得英才循孩奉甘旨雖嘗竊科第無情求祿仕
一生不入官好游有癖嗜樂豐草長林行山顛水涘
松霞弄暉變花鳥獻天媚漠沙山海巨雄竒入目眦
造物妙文章千紅更萬紫吾既生其中樂天受蕃祉
前哲竭心思制禮樂工技吾幸生其後美樂略大備

合沓翕受之濟衆用博施若生太平時獨樂吾几几
豈肯預人國厯險冒詆誹無如哀民艱又痛國事燬
猥以不忍心百難遂集矢亡身及其親戮尸及先軀
三魂易斲喪廿載歌瑣尾臨崖足垂外蹶墜下無底
仰涎見鱷魚磨牙遇封豕假能致國強身殉亦樂只
迴觀中國勢墜淵日傾否空自覆吾家危身其餘幾
胡不為燕雀稻梁飽黍餼胡為慕巨鰲戴山竟流徙

喪亂俗反譎置罟陷老佃見人鮮佳妙觀物得欣意
林泉送日月豈不得樂愷舍旃復舍旃避世永斷棄
入山恐不深友鹿衣荷芟人外天海闊逍遙無歌翼
斯人既吾與同患應大千萬物皆一體諸天並同氣
發願救疾苦華嚴現彈指中天俛雲雨大旱待一溉
瓦礫與腥膻不厭人世味往返曾八千來此偶現示
戮辱與謗攻皆吾夙孽遺于天固不怨于人亦不懟

化人之煩惱熱然亦何似世界自無量國土本叢尔
陶輪曾一擲天地為傾圮八表雖經營僅若洽隣比
天宮遊汗漫地獄入惻怍豈敢憚患難但發吾悲智
撚鬚白成絲斷髮短以眊觀河面邊皺嗟余其老矣
唯吾滿腔春赤子心尚釋假年百二十吾志自強懍
形容日衰艾浩氣日壯厲縱浪大化中不憂亦不喜
江海幾浩蕩天人自遊戲

丁巳元日賦此得二百三十五韻沈培老布政言
古人最長詩只一百五十韻吾遇既奇援筆叙之
不覺冗繁非故旆晉郊以示衆也

行年得六十壽逾天地老君試觀螭蛄莫度春秋老
相彼蟪蛄巢微生物無數吾窺顯微鏡蠕動紛生聚
視虱如車輪其體骨已巨虱體之血輪有地球國土
析之萬億千展轉孳生譜累析及至微須費幾時序

吾人之一瞬彼已壽千古精心冥推想比例難疏舉
然則六十年豈止億歲許以觀我衆生宇宙樂仰俛
行年已六十生性不知老或壽億萬歲恒沙無量數
坐視天人變生死輪迴苦國土幾沈滅星日多隕去
天行運不停日月舞六宇時放四光明化生茲后土
彗星觸之沉黑暗遂萬古開闔在所覺視猶頃刻許
山中千歲者縮短七日廣視此六十年豈真比旦算

而何稱祝為謬亦僞耆父

可也元日賦長篇後意未盡而韻已將盡乃再賦
此二章吾生平所得在此也

丁巳二月五日覽揆詩付善伯頴漪

久拚萬死碎微塵豈意餘生非壽人北海歸來如夢
幻東山興罷整乾坤同民不離人間世憂國猶存劫
後身老子婆娑思揆曰鄉中扶杖物皆春

坐主顧漁溪先生別二十三年相見滬上用善
化相國韻寫呈兼介壽

神武衣冠□黑頭重逢劫後話滄洲心存故國旌旗
動春在先生杖履游西北高樓直望氣東南大澤且
披裘追思二十三年事介壽偃觴白可浮

失題

龍爭閩劫感孫吳魚釣淮口水一篇背部堂成歸打

槩園林五柳似依陶

葱石參議兄藏小大忽雷琵琶為圖囑題不勝

古今興亡之感成三絕句

千載琵琶迤邐語曾入唐宮記得無猶聽貞元供奉
曲青衫濕徧獨愁吾

甘露園中有變聲遂亡唐室可憐生分明遺恨文姬
拍尚在人間亦可驚

曾得東塘樂府新
竟能神物合平津
劉郎已作逃秦客
一曲興亡最愴人

簷前櫻花四月再開
五月三度開
巡簷見之乃

占詩三首

一樹櫻花照艷霞
花飛春去委泥沙
綠陰紫實紅樓雨
不意華曇再現花

荷池銷夏日徘徊
三度櫻花又見開
巡簷索向高人

笑絕色穠花胡為來
姑射神仙絕世姿未能結實示情癡忍教厭世求長
往故現多生色相奇

聞瑩甫喪哭慟

衣帶詔同哭寧知永棄捐鶴歸非故物龍去只號天
家國遺多難市朝嗟復遣憂傷人不永痛子天天年
雛鳳巢阿閣清如老鳳聲三蘇人側慕廿載我親情

變法同經畫為謀最老成唯吾識君子思子淚盈：

三月見僅老追思戊戌別十八年步韻

死生同契濶滄海痛橫涼絕望寧能見喜逢翻化愁
天猶遺一老人各自千秋但祝西湖月長圓為我留

美森院詩集

康南海先生詩集卷之十四

後學東莞崔斯哲手寫

丁巳五月八日與善伯偕沈子培尚書王聘三
侍郎乘津浦鐵路北上九日至豐臺望西山
呈諸公示善伯去國廿載不意生入國門也
廿載涼離逐客悲國門生入豈能知長驅津浦有今
日大索長安憶爾時朝市累更哀往劫天人合應會

佳期西山王氣瞻葱鬱風起雲飛歌有思

九日八時天暮望都城各門樓

百雉環城故國雄鳳樓晚日霽明虹連臣廿載重歸
日無限傷心煙樹紅

十一夕出西直門至頤和園門外步月仰瞻璇

題蒼茫有感同行者善伯及雲門侍講

萬柳毵：御道長故宮門外月蒼涼逋臣重到腸堪

斷二十年前對御床

五月十三日出遊瞻宮闕謁文廟飲于萬牲園
與善伯同遊

六年四亂亦堪悲□□□萬物熙難犬不驚金鼓
靜驅車九陌看□旗

十五日早望闕口占

五雲宮闕望觚榭黃瓦瞳矐曉日昇竟見少康重纘

□躬逢光武再中□漢官重覩威儀盛□會親瞻□
□承逋播廿年重詣闕毒心翻倒淚沾膺

十八日兩苑飛機隊潘世恩尉遲良以飛機投
彈於宮中斃三八會逢大震醢王于十九
曉召入吾曾賞禁城一人肩輿不及候徒行
入東華門已閉久叩之守兵覘吾冠服乃應
門則殿廷闐然醢王命商外使相對慘悽外

使許保宮禁託澤公復命遂留使館

流涕口室遺艱難宮項飛機幾次盤奉召趨朝不俟
駕臨危叩闕豈鳴鑾羣臣散走殿廷寂外使商量宮
禁安不意廿年歸國日龍樓鳳閣對沈瀾

二十夕入使館住美森院有老木步月口占

小院迴廊月色微森深喬木息塵機孤塵白髮明燈
下側望觚稜事已非

廿四日侵曉四時至下午二時砲聲不絕涼彈
入別院巡廊搔首輒歸下帷校讎刻成自著
之春秋筆削大義微言考

高木蟬鳴午苦暑圍城砲聲密如雨迴廊搔首步沉
吟下帷且校春秋注

張紹軒以六千之眾敵八萬之兵壯矣諸帥本
與紹軒徐州訂盟□□今竟妒功背盟無信

不立痛哉

圍城慘澹賭龍爭
蟬噪聲中聽砲聲
諸帥射王敢傳檄
羣僚賣友竟稱兵
晉陽興甲何名義
張東無謀名喪傾
信義云亡人道絕
旂收影涕沾纓

廿九日為□政府名捕吾又居首回首戊戌八月適廿年矣

解禁趨朝十日前刊章名捕復戛然黑雲壓日慘瞻

關白首迴天泣逝川
黨錮重悲勳俊口陸沉再見毀
坤乾我生命豈在牛斗蒙難蒼皇又廿年

館門深閉終日大雨無人吾是老僧入定矣

薛荔蒙牆樹蔽天
院門深閉颺茶烟
偶逢淫雨日昏
黑便是僧寮入定緣

善伯與我共難月餘君勉與我共患難廿年善
伯持歸示君勉吾輩既為救國而來萬千苦

難原是故入假使鐵輪頂上旋定慧圓明終
不失

哀我生民偶現身故來地獄不酸辛忍同雁鷺爭餘
食度世同來是化人

贈乙庵尚書四章

解帶論交三十年同舟郭李望如仙盡通文史儒玄
學證入慈悲喜捨禪莊惠相忘在濠濮馬龍無礙戲

人天無生已了得，大慧出世聊為入世緣。
諸天出入四飛揚，國土熏聞想衆香。下界夢迴驚蟻
鬪，宰官身現看鸞翔。哀民疾苦同不忍，憂國傾危共
救亡。雪館雨窓頻緯繡，篝燈促膝幾迴腸。
海外分携十六年，五年黃浦慰纏綿。酒爐再展論文
語，丈室重談品畫禪。大□革除救移國故，□憂念力
迴天。驅車北贊中□業留記春官未了緣。

人言經國稱房杜我信同心比范韓
偌大乾坤偕負擔生平襟抱共艱難
鞠躬豈計遭蹉跌鈎黨何能害
錯槃上有皇天鑒忠悃祝公頤壽共彈冠

乙庵尚書避居吾美森院半月于其行也賦此
以贈之

蘇李河梁携手時
茫茫大地欲安之
天人去住同旦暮
半月美森留後思

久共蛩：與巨虛素心晨夕數居諸綠陰移影驪駒
駕送此蒼苔徑不除

丁巳七月七夕幽居美森院念滬上沁園故居
及諸姬與諸兒女吾以五月八日曉行今適
兩月殊覺良久蓋獨居焚寂之故未知何時
可同待月看花也

無垢亭橋宵待月闕清院徑曉看花三年池館共歌

哭兩月別離無口家碧落銀河苦風浪雲鬢香霧想
仙槎遙憐黃浦小兒女可惜燕雲解歎嗟

七月既望看月懷沁園

明：如月光可掇赤壁何時得縱遊記得去年同步
月繞廊深夜立橋頭

丁巳中秋後五日題所藏孝迪茶竹幽禽圖於
北京居幽之美森館所藏畫只此一卷

綠竹猗猗：猶挺節紅茶灼灼：自幽芳最憐十一共命
鳥棲宿一枝人世忘

其二

蘭蕙化茅荆天舞茶竹幽禽生意回綠陰晝靜羨森
館盡日無人攤畫陪

公裕弟子吾蒙難日來省視奔走秋八南旋吟

詩送之行

草堂都講王公裕雪白蘭薰唯汝賢思我廿年陳蔡
從金臺蒙難日相憐

其二

黑雲漠：欲蔽天秋水蕭：送客船南望茅山騎龍
去人間天上亦多緣

八月十三日祭六烈士於幽居之美森院廿年
還國再蒙大難酌酒哀痛

戊戌冤魂莫問天，朝衣東市本吾先。
素琴顧索應今日，白首同歸歎逝川。
蘇武國門竟生入，趙岐土室復幽煎。
年：酹酒傷秋八，蒙難重傷驚廿年。
柴市慘痕未臨哭，燕京正氣復居幽。
早憂王室銅駝感，已憶華亭唳鶴秋。
逮騎刊章再名捕，閉城大索記前遊。
君臣地下如相見，代告崇陵涕泗流。

亞蘧侍郎丈見贈二詩並以五月廿三夜話詩

相示賦答

老鳳高飛公鳳清中州天關發靈英亡韓尚有子房
憤復漢如聞周勃兵再毀乾坤無有易橫流滄海尚
思平西山口氣風雲鬱臣靡猶聽鞀鼓聲
繡臺夜語雨淋鈴錦瑟初停聽砲聲玉女投壺聊作
博金仙下淚太多情家人篋篋載忠節大陸龍蛇起
甲兵怕讀孤忠悲痛句近看南北陣雲生

丁巳重九日美森院感賦

烟雨青黃院落陰滿庭風葉晝沉
東籬無菊惟黃葉落木天高感客心

九月題袁督師祠二首

吾粵將才名世者督師祠墓醉殘紅
古來才大原難用朝末功高鮮令終
間入長城君自壞讒多寃獄世無窮
國亡勿謂無人在長令傷心吊鬼雄

杜郵賜劍杖涼風馬草投潮藏種弓寬寫金陀莫須
有囚于鐘室將毋同搖落山河名將碧蕭條異代劫
灰經記遊山海關憑弔立馬長城一世雄

門人張伯楨子幹為鄉先烈袁督師表彰建祠
供奉請詩以此貽之

先烈勤：表繡絲辦香特為督師祠白山黑水海翻
立擊鼓聲中我有思

中秋北京城上步月

城頭馳道直如矢，夾道林花紅翠寒。
玉殿瓊樓無限影，傷心隱隱月中看。

正陽毀斷尚岿巍，步接崇文百雉遙。
城郭人民可非是，灤：烟月望深宵。

坐几林中掃綠苔，巡兵碧眼荷鎗來。
此何國土燕京也，壁壘今歸客館開。

夜：城頭步月明，
俛窺粉堞聽笳聲。
人家燈火十萬戶，
朝市遷流感我生。

丁巳夏五六月間蒙難避地美森院即事

深傾張裕葡萄酒，
移植豐臺芍藥花。
且擘蠅螯寫新句，
已忘蒙難得蓮華。

庭蔭南柯方覺夢，
几攤大藏讀楞伽。
吾生自有安心法，
所遇皆欣即是家。

九月廿三日壽陳弼庵太保七十

樓閣清流文學宗黃禪晚著護桐宮巍然舊學存元
老絕少書生兼總戎潞國格天期耆壽虞淵捧日鑿
孤忠我生兄事傷蒙難臣靡終歸矍鑠翁

壽沈濤園巡撫六十

海閩喬木鬱雲霞烏石重開旌節花循吏班春多治
譜詩人閩劫遂名家冬青南極萬年樹秋老東陵五

色瓜與子杖鄉祝靈壽重扶日月紅光華

九月為中國最傷痛日賦二章

秋風蕭瑟吹落木夕照昏黃對晚天早慮分亡同印

度今真保護類朝鮮相持螭蚌資漁利深恐義軒絕

種傳勿謂無人謀不用側身天地淚如泉光緒壬寅

作政見書辛亥作救亡論共和政體論癸丑作
不忍雜誌以戒國人皆不聽有以致此

軍器同盟甘賣國利權同室日操戈四百兆民忍奴

隸五千年史，悵山河。屯身播吾遭，此瞎馬盲人行。
若何胥溺飲，狂猶作笑。可憐召□為□□

謝芮恩施美公使

美館高柯庇我陰，遮天蔽日暑難侵。太平洋水深千
尺，不及使君情惠深。

予封布政兄，自戊戌別丁巳，再見則感劫萬端。

日相慰籍臨別賦贈

卅年交蓋廿年別，刳後重逢白首新。
軾轍才名天下重，李桃芳蔭嶺南春。
鄰卜南村尋處士，詩從汐社訪遺民。
平生江海忠義動，再造乾坤共轉輪。

丁巳十月廿二夕，美使派文武吏士專車護送。
出京鐵寶臣尚書、顧亞蘧侍郎、商雲汀侍講，
即來慰問道謝並呈。

居然辛苦賊中來，又度重關亦險哉。
嚴警車亭游徼

密模糊夜月野天開國門生出誰能料城闕迴瞻亦
可哀兩度蒼黃仍免難所親驚喜首頻回

使館重煩文武吏鋒車專發護通臣電燈照耀穿中
路劍珮森嚴夾轉輪馬廠乍停夢驚砲天津適止我
為人戊戌閉城停鐵道廿年回首重酸辛

神州臨晚重徘徊游戲人天一瞥回萬物入機劫終
壞衆生有病我仍來泥犁故入原無畏滄海橫流孰

挽回再毀乾坤思再造側身大地嘯雲雷

丁巳冬至日遊青島並謁恭邸於會泉

海上忽見神仙山金碧觀闕絢其間曉暎乍上映紫
瀾樓觀飛鷲抗晴巒崇樓尖塔五色宣晃耀眩目出
人寰六衢整潔樹列班萬貨輟闐弥百屢驅車周道
馬翩逾山歷澗至會泉樓閣倚山臨海滄碧波浩
蕩通天邊登高嘯望心悠然樂土信美吾不存此吾

青島昔荒田粵昔丁酉德攘先吾時伏闕力爭焉太
陳利害言萬千投書宰相慘呼天常熟翁公憂國顛
早朝前夕稱荐賢遇臣百倍謬推尊一時輿論譁然
傳請破格用救元：退朝尋訪枉高軒時近冰河吾
言旋驪駒駕南海館門公遂直入吾齋前朝旭甫上
草樹妍披衣強起相周旋公強留行情意諳且言聖
心至勤：由是感激贊艱難上書變法百萬言請

效明治書孝：十四卷考條理繁聖上發憤百日新
萬國震動中華春惜哉蓋臣蕩北宸政變遯荒國步
艱至今日將墜虞淵共和六載大口瘡吾奮救之竟
蒙難展轉微行乘神丸忽睹青島愴我神日本立憲
上有君國本正定乃勤民百度並興模歐文予以用
武為國魂乃得此島與雨雲吾國共和□□民羣盜
攘權徒紛紜生民塗炭日邁屯試觀川粵湘黔滇同

室操戈曰相煎豈有國利民福焉豈有民意與民權
大謾欺民內訌闐徒供漁人得利便山東曰設民政
官我乃蔽目揜耳何可憐民力爭之未得直□□我
惻：痛難捐會泉山水最清妍前後櫻花為公園中
有賢王卧林樊憤為劉崇英氣完寗蹈東海首陽山
不食周粟踐周原見我如故意纏綿今日冬至逢良
辰京國舊俗陳餽飫吾為一飽相勞頻且將相宅擬

卜鄰夕陽漸下我歸船
回望孤嶼繡金銀
嗚呼感慨度天人

游大連旅順謁艾堂賢王賦呈

長白矗東北萬里走旅順
陟入黃海崖鐵山雄作鎮
百島走碣石起接登萊近
口我兩京地天險守岩峻
俄規東亞霸周鼎竟敢問
魯久為齊弱后淫不自振
無端甘割地虎牢遂屬晉
早知大禍臨冠劍皆齒震

吾時初釋褐痛哭上書訊聖主力持之早朝后理鬢
怒以梳擲上謂汝何忿：豈真欲戰耶垂簾含餘愠
遂并大連城割讓不血刃俄人經營之大起宏規運
盧卜一萬：岩疆險以迅戡：鷄冠山地六曲成陣
唐：闕大連道廣宮室進大厦築萬間雕牆過數仞
徒觀其氣象鉅麗壓百郡東人惡榻斲憤奪發大願
桓：乃木君忠孝東國傷破險奪崑崙武稜乃大奮

東鄉亦健者俄艦焚餘燼吾昔觀影畫海波有餘炊
驅車登高岡覽彼戰利品感慨為流涕信美天何慙
紫瀾迴內灣公園亦有韻大中小各校宏麗氣殷賑
環山度阡陌霏白雪填口嗟我為荒壤授人作雄郡
撫軒但太息對酒不能醕賢王此避地相見話舊讐
忼慨猶當年勤孝感令聞才子廿二繁掌珠十六潤
無國幸有家玉樹滿庭播王子勞遠送願言效忠信

天心必回復幸王加餐飯

龍洞

亂山走迴合群峭重杳復丹崖與翠嶂壁立削碧玉
溪楓欲染崖巖柏倒挂綠澗流夾松風謾似和筑
峩：禹登山竅：藏龍谷錦屏芙蓉開列岫三秀郁
如環玦口擘如城墻堞矗圖峯卓筆立絕頂抗塔獨
二甕不可見嶽竒登層麓及腰洞露穴入門僧秉燭

三佛儼像設迎立妙嚴肅侍者凡六人寫生肖瞻矚
不知何代刻疑化工所劖自此蜿蜒行低頭恐石觸
高穹忽峻拔遠徑且匍匐行：皆團豚步：慮傾覆
上懼折元首下憂濡溺迺百步露線光狂喜慶出谷
翻嫌遊興淺更欲重躑躅洞口過懸崖半广可坐讀
入定游諸天三界忘色欲石磴澤盈丈少憩樹藪：
元豐有刻文記為求雨祝俛視環立壁天洞地亦福

側徑下聲确度澗越紆曲下有聖壽寺唐栢蔭茅屋
把酒仰青天騎龍馴白鹿

佛峪

路迴而峯轉數里見佛峪山掩重肺腑宇張鬱林木
迴環成洞府窅窈闢壑谷广石蔭蘭若長廊俛崖曲
倚闌坐酌茗周瞰山水淥澗流聽潺湲森綠凝萬木
右轉登靈臺飄凌雲矚天生一片石百尺矗心目

輒于松柏杪手攬飛雲熟下俛林汲泉上有怒飛瀑
靈風吹潮音散沫下珠玉齒：漱白石洗心可吐襮
羣賢樂俊游晞髮盪涼沐幽奧非人境清涼出林屋
此是帝釋巖超觀世寵辱忽遊播轉迦頗覺天地局
南北龍玄黃雷驚鬼夜哭銜杯愴然忘筍將醉歸僕
碣石四百島渡海起泰岱走峯盡濟南龍種猶存在

新濟南詩

揭：華不注離：點蒼黛翠巘巉天半單椒無連帶
虎牙獨雄立巨石奮靈怪鵲山按前橫萼藥鞍後拜
群山次第朝黃河曲擁戴名泉七十二衆流會灌溉
明湖滙濟灤歸極環下界清河繞黃臺紆折入河內
鵲湖懷家窪千里水朝外山水有拱抱卜宅此為最
我儀地形佳冠行省都會昔人昧形勢河水夾反背
宜移新濟南華山下作繪大開數駢道公館聚冠蓋

山上擬亭臺夾道植松檜
巖舍先移築
旣：冑子戒
游徼警長途車馬分馳載
居行游皆來盛會於此賽
人皆羨樂土十年繁茂對
今日攀巉崖聲確我僕僊
它時成大邑四顧意氣快

蒼苔蒙露精
 樹蔽天
 院門深閉
 踏茶烟
 偶逢佳雨日
 昏黑便
 走僧寮
 入定政
 保团
 终日大雨
 无人
 吾是
 老僧
 入定
 矣

哀哉生民偶現身如來
地獄以酸辛忍因雁
鴛鴦爭舞合度世因來
之化人

善伯与我共遊日休
君勉与我共乘難心

六月十二日寫近訪付

年善伯坊級示
君勉吾輩改而救國而
來善千善難不是放
入便使鐵輪頂上旋定
蒸團似快心火

善伯收呈

雪庵弟

游存父



寥天蒼

立一天山寂方處可
撰全西湖遠矣亦海

一天山頂作可老呼及

參寥雲西開三石山

環三面以美枝松栝秀
枝梅吐香日月南宮心
起威烟嵐東海來腹

坦西游杭萊戶去夫
登望奧塔哉

清巖

立開天天宮前橫
廿丈天然岩田煙孤
藤蘿山與七

康南海先生詩集

七

枕爲山株僂石屏屏
核女丈枹青二心園岩
壑官奧境上極藤

蘿小換名芳草生
環石徑小池噴香
茅亭玉皇山影雷

峰嶺寫入蘇堤烟
舸舫
康遊存史

壬戌秋寫

此詩第付回薇

更姓



金。石。琅。玉。元。美。國。
妙。翻。騰。雲。氣。却。
故。家。歲。暮。春。大。文。宜。
故。人。梅。花。死。死。
海。內。名。多。入。心。積。
海。內。名。多。入。心。積。
海。內。名。多。入。心。積。
海。內。名。多。入。心。積。
海。內。名。多。入。心。積。
海。內。名。多。入。心。積。

游存廬詩集

康南海先生詩集卷之十五

後學崔斯哲卓吾手寫

辛酉元日賦詩二章呈寐叟

今為六十四遺民歷試諸艱賸此身國會大同幸親
見天心來復望誰新息壤空懷撥亂世望樹仍思轉
法輪千百水仙香滿室坐忘春色已還人

辛酉七月祝徐君勉五十壽

金精正芒寒本自皎摩發獨立放光明照耀爭白日
吾徒徐君勉清淨瑩冰雪華岳見秋隼爽緊動毫髮
泰山矗雲端正色壁積鐵天生青雲器惡濁掃一切
唯有救國心畢生腸內熱金城植惠本閱徧萬千劫
靈山夙世會與吾億生結發願來人間欲將亂世撥
神勇震雷霆大仁本惻怛冠歲來問學大義獨貫徹
英才羣偕來深叢孤巖突吾時發大同散財養俊達

卓犖博群書敏銳通儒術駿馬騫坡澗竒思騰文筆
草堂充都講門人咸敬悅吾開強學會留後支隍杌
會散改時報雄文任撰述大聲談國事震動起聾瞎
吾憂下無學創校在東國大同開學舍橫濱聳屹
君往充校長學子萃：茁九畹馨蘭蕙廿載綿瓜瓞
後卒業大學數百爛霞蔚從政徧中外至今思棠友
友交東國賢才名結僑肝犬養君稱子德行為第一

信我得其真聲聞不可遇戊戌吾聞政欲君持東節
幽都日忽冥黨禍發君卒英艦救至滬路海欲永訣
吾老母在堂思家心痛割以君忠義資貽書相付託
絕命永訣書天下今傳說株連至十族捕逮汝幸脫
□□與憲政開會百國訖惟君徧呼號美亞重蘭恤
山海度蒼茫廿萬里播越忠信涉洪濤公廉動萬物
毀家紓患難冒險載飢渴平恕待僑民赤心收豪猾

四洲兆華僑惟君能提挈咸為至誠感非徒辨才折
庚子吾勤王君大收豪傑並轡唐才常緯繡籌密勿
厯載備險艱大事痛蹉跎雄心益發憤奔走再厲揭
南渡星架坡深入暹羅窟東越太平洋美墨周車轍
徧開數報館大掉廣長舌民智雖日開國變竟擊裂
大盜遂移國哀激憂孑桀授君總領事封還官誥笏
日夜收將士勃宰弥百粵吾亦捨宅助犒師遂鯨突

橫海跨樓船，駕浪羊城伐。海珠詭和會，伏兵遺羅罟。
鎗聲迸雷震，伏地積尸壓。皇天祐仁人，電船來救出。
勞病垂累年，肝肺傷成疾。險死喜更生，得天竟逢吉。
時機豈患無，養生宜勿失。君今五十歲，十四月當七。
梁鴻與孟光，齊眉壽霸正。才子能亢宗，兩孫知覓粟。
人生嗟寔難，大亂慘流血。歐戰與吾草，帝王同慘殺。
無貴賤，賢愚蟲沙皆斷刮。吾与汝多難，死生同契濶。

今俛仰無恙且能祝哽咽相顧應喜樂飲酒聽鳴瑟
雖憂中國危每念心怵：宜觀有生樂神明自超逸
再祝六十時引髯吾醉兀諸天無量數御風游傳駟
騰雲駕紫蜺揮手挽日月俛視地如橙不足當一瞥
報子以神方贈子以玉瑟試開天中天長生有霧伯
度劫億萬歲無灾永除祲神珠定且明天龍弄一鉢
微壁二女久別以母張氏夫人逝世來滬奔喪

送葬於茅山事訖分散以七月十八日同行
會少離多又有家國存亡之感老夫雖有天
游之學亦復悽黯不可為懷同遊半淞園拓
影得詩四章送之

十五年前瑞典湖團團蓋夢久模糊黯然况復經多
難耄矣能無傷老夫後會扶携定何日新園拓影且
留圖人天聚散知難免骨肉分離最可吁

若論汝母同相見已在阿薇新嫁時
抱孫已過九子母廢帝將興八國師
似歷千年游萬里竟成死別又生離
淒涼廿四年中事國破家亡不可思
女來萬里只汎瀾汝母容音已閉棺
歎蒲杯倦皆罷飲茅山風雨共飛翻
頻來讀書不能得此別遊園強作懽
我本諸天自趨度死生契濶感盤桓
戊戌當年逮捕挈天乎姊妹幸生逃
覆巢破卵原同

難持節環球聊自娛世亂帝王亦難免人生憂患本
來俱婆伽婆為破煩惱長記天游天作徒

壬戌之秋七月十七日餞同徵同璧二女酒後
步月微壁問易義並及人天之故明日行無
人間悲感之情庶幾遊於人間而不為人世
所囿則超然自在矣

行時問易說經銓不似凡人傷別遠記取天遊臺上

月伏生有女出人天

五月九日自曲阜到泰山居斗母宮對面盤龍
山即吾地十一畝有老栢八十五株下為白
澗流白石鑿：泉聲潺：坐栢下石山終日
聞泉聲將營室焉

徂徠前對汶滂橫上倚巖：室可營八十三株存老
栢澗流白石聽泉聲

買山泰岱亦前因八載初來為主人
松柏滿山泉石繞欲營石室老吾身

題紹越千先德夢迹圖

太乙乘蓮藜照之循聲文采著
褰帷因緣一切如夢迹圖畫長留絕妙詞

壬戌九月二十八日夏映戶陶叔惠陳哲侯三
廳長招同喻澹寧編修王省三交涉使楊見

心中書游西溪飲于秋雪六樓上觀蘆花洲
渚皆白如雪光景佳絕歸舟聯句記之

蘆花瑟々滿洲白姓飛花欲吞雲夢澤映湖山山外

覓清游省秋老西溪天水色扁舟有約南海座惠叨

陪杖履賞秋雪哲渺々涼風起天末澹遙望一片雪

花出省一杯在手興欲狂古今詠者天涯客酒酣扶

醉登高樓飄々柳絮入茵席白頭老人岸巾幘坐對

此花長太息廿年夢憶陶然亭風景淒涼似京國
思舊夢蘆中人風波幾變天地裂休論往事作天游
斜照晚澄歸槩拍注

西湖水上步沈寐翁尚書兄却寄

烟深不見北高峯獨泛扁舟寫舊踪可惜寐翁不携
手錢江風雨見魚龍

杭州西湖一天山人天廬成賦詩付同薇女

劫是莊嚴或是賢飛灰未盡我生年人間日暮知何
世山上雲荒別有天子處幽篁冥晝雨坐觀滄海與
桑田故鄉無此湖山好避地人言望似仙

壽王公裕

公裕學道人秀骨本玉屑積刳修德本熏香不能滅
與吾靈山會舊因知幾結通經而學古金鐸諸玉節
溫潤縝以密蒼粟以皎潔吾謬憂國高留京當戍戍

草堂存萬木都講唯汝述鍾：高說經學子感服悅
及吾遺罪難學舍亦封沒藏書三百篋秦焚何烈：
株連至十族捕逮汝僅脫國門猶懸賞舉家累汝擊
遣居馬交石十年避縲紲惟汝有賢父懼然治井滌
鈔我中庸注不以黨禍解世德能作求寒暑無冷熱
吾家走海外港澳匿偷活惟汝奔走視廿年遼歲月
始終如一日死生同契濶庚子京邑墟乘輿驚播越

吾舉兵勤王惟汝總樞揭關中託蕭何等餉收豪傑
手挈百萬金公廉而高潔自奉最儉嗇仇怨無可說
旁搜及綠林此輩多反側駕馭苦艱難日對嘔心血
支柱既歷年謗議尚入骨唯吾知汝賢匪躬當惶汎
大事雖不成元亨翳彷彿蕭然重相見清白如浴雪
共事輒成仇惟汝弥親熱自是超世心道高出囊括
丁巳吾邁難幽憂美館歇吾子愈恤蓋奔問未雙躡

日夕至勤苦半歲久不輟博書商國事送吾出虎穴
從容樸被行然後徐歸粵知時無可為與世乃謝絕
貽書勤勸吾謂盡力事國今既聽藐亦可止憂
仁者固必壽况汝道高徹今歲杖鄉飲長眉齒未豁
令妻同長年靜者宜大耋憾未啣白杯寄此祝黃髮
諸天無量數同御風車徹揮手紫霄上出入日與月
俛視地球小不足當蟻蛭化人通天人隨喜弄龍鉢

一飲紫霞露億萬歲如沫

一天園詩十章

園在杭州西湖一天山有丁家居山下故俗
名丁家山今丁家人盡矣故復名一天山園
地購於丙辰丁巳以十一次成今園凡三十
餘畝以庚申春夏經始屋亭道路壬戌賦成
一天山裏一天園地傍西湖負郭村邱壑自專吾可

老湖山高卧我無言閉門菜甲漸成圃避地桃花亦
有源拄杖徜徉成日涉神游天外此身存

桃花源

三面湖波亦半島百株桃樹又漁舟蓬萊婀娜宜忘
世湖水漣漪渺隔洲夾路荷塘白烟影小亭篁竹綠
雲秋花開花落春何意避地避人天與游

人天廬

天上人間七往還而今游戲在人間
民生同患何忍去木石與居猶自頑
茅舍槿籬盤磴道茂林修竹抗
崇山結廬人境心仍遠呼吸通天開九關

筠岫亭

余處幽篁不見天登山險難磴迴旋
高邱萬竹隔雲雨峭壁一亭通月烟
緩步躋攀緣樹杪扶筇曲折出
崖巔豁然別自開天地盡攬西湖山與川

寥天臺

一天山頂作高臺呼吸參寥雲四開三面山環三面
水萬枝松擁萬枝梅吐吞日月南亭下起滅烟嵐東
海來腹坦西湖抗萬戶老夫登望興悠哉

開天天室

高齋高抗一天山岩壑橫臨屋四間前作長廊花樹
亞後憑絕壁水波環窗中列岫排青入座上來雲虛

白閒想入諸天化人也時從碧落數螺鬟

水精域

廿二玻窗三面成
僊臨絕壁倚天清
水晶宮裏生虛白
晃是天中放大明
葛嶺抹煙屢影淡
蘇堤過艇月華生
朝暉暮靄通雲日
春煦秋陰受雨晴

潛巖

抗屋山椒僊石屏
橫廿丈樹青
下開岩壑窅冥

境上絡藤蘿不識名芳草成茵環石徑小池噴水傍
茅亭玉皇山影雷峰塔瀉入蘇堤烟水舫

松雲徑至飲淥亭

一天山突出西湖三面環湖烟水殊半島卧波倦蕉
石蘇堤如帶拱吾廬百松夾徑垂：下萬木湯山處
處腴日吸山光飲湖淥石壇啜茗亦堪娛
山林小築觀天性鶯鳴比鄰近物情魚躍鳶飛參道

妙菊芳蘭秀識時行山邊射虎看人猛湖上騎驢觀
我生拄杖雲中日成趣盪舟烟外月微明

十月初四日陳哲侯陶叔惠夏劍丞三廳長招
遊西溪飲秋雪軒蘆花滿洲如雪光景佳絕
宴後移舟交蘆广題詩

不到交蘆又七年舊時題墨化雲煙秋來何處一片
雪記取西溪洲渚邊

秋雪菴中蔬筍筵移舟聯句共羣賢風流猶憶□□

□付與山僧秋雪篇

十月十五携鶴姬游三潭印月步月

湖中島嶼盪漣漪山作園牆湖作池步盡長橋三十
折八年来看月明時

壬戌十月十三日□□□□盛典微臣因事

不能趨朝叩賀湖山綿蕞為儀望闕行禮聞

十五日朝賀各國公使咸入宮上能操英語
酬答各公使咸大悅歸心民國大僚亦多入
賀者喜極而賦

龍潛閭闔五雲開五鳳樓前鳳輦催萬國衣冠瞻玉
步九天日月耀金台乾坤北極居懸□袍笏東華入
杖來青鎖朝班嗟未點湖山高處望徘徊

吾西湖一天園泊舟處曰桃花源

桃花園裏百桃花打槩歸來笑暮霞
白首老人看花醉
醉花開花落
在誰家

曼宣子女在游存廬看花樂甚

游存廬中飛杏開
幼子童孫喜欲狂
打罷秋千賞花去
忽憶燕京花廠香

花朝日校詩一天園山巔飛花盛
開書來方記今日是花朝
寫以為詩寄曼宣壻並示子良

瘦公數庵三子

飛花爛熳滿山椒
白舫如鳧散六橋
盡日扶筇看山水
書來方記是花朝

為校新詩一天園
白頭花下啜茗看
遙想花之崇效寺
海棠開後酒杯殘

鄧鐵香鴻臚手書詩多至百數十章及其愛女甫蓮墓誌流傳人手為索還之元翊弟

直節高文世共知
死生契濶盡交期
遺子來遊□□
蘊摩挲遺墨淚雙垂

詩句畱存絕世芬
傷心最是女□文
亡書三篋今來
復代贖文姬返與君

壽李容譚氏四妹六十

骨肉同枝葉託體自雙親
兄弟凡五六今餘我二人
鍾離嗟妹在大雷寄書頻
垂白徒相望緬邈隔海雲

妹今六十一幸聞強精神夫婿富且壽子女多成群
一生健飲啖八孫抱紛紜宗戒有所事奉教惟所云
惟以老舅在末肯俯觴尊恒言不俯老戚黨咸羨欣
人生與憂來如妹已寡聞天錫福嘏純德昌延後孫
寡兄六十六共享百年春七年不得見何時酒杯溫
宜來一天園西湖同樂存

賀吳昌碩八十

篆刻高名海外知，雞林製像更求詩。誰知詩字皆忠憤，錯被人呼作畫師。

淵明曾現宰官身，垂老歸來作逸民。從古畫人多大雀，大癡長壽自長春。

壬戌十月十三日恭逢□□□□大婚慶典，微臣蒙賞給御書天游堂匾額，又御書福壽字各一方，感恩賦詩恭紀。

狄臣無地可埋憂且作諸天汗漫遊想入三千周世
界身存七尺魄神州乾坤日月懸雙照鸞鳳神仙下
十洲更効馳驅同達口永懷他日答宸旒

題石門銘

此碑終是王家好王遠書銘在石門鳳翥鸞翔仙衆
會花濃雪聚佛微言瓌姿異態自竒逸隸韻草情得
妙玄右挈龍顏左瘞鶴追隨羲猷探南元

四月五日晨起移石十二于松廊夾立石道旁
頗瘦透高皆數尺

山曉茲無事呼僮擁石排丈人顛米老仙杖列蕭齋
夾道立松籜分班侍石街老夫自娛悅此十二金釵
龍井僧送黑竹四株至異品未之見也分植山
巖路旁

龍井有烏竹僧來送四株分方立中土微雨種當塗

與可曾洗墨東坡寫作模黑龍嘯雲雨入夜震西湖
夏劍丞胡惛仲陶叔惠徐肖硯同約泛舟西湖
看雪過訪吾丁家山人天廬踏雪下山尋蕉
石鳴琴飲於樓外樓登西冷印社觀樂樓聯
句

登高一覽湖山白姓如對畫圖鋪水墨惠王戲咳唾
自九天劍玉龍百萬□□絕惛軒豁晴昊見花埤肖

遠山近水雪突兀 挂扁舟共訪德公居 惠松竹皓然
歲寒傑 劍精廬近俯蕉石巔 悟列岫旁搜葛嶺北肖
白銀世界可有無 挂華嚴忽現未曾得 惠道旋苔磴
足碾瓊 劍屐穿雪林眼生纈 悟山下欲聽太古琴 肖
雪冷滑誤致客跌 挂孤山酒樓春酒香 惠義尊合為
老坡設 劍銜杯萬感話前塵 悟滄海桑田那可說 肖
樂夫天命逍遙遊 挂觀樂樓頭忘主客 惠皓々陵谷

斜陽多劍凍省潛柯舊巢拙
惜野煙斷續橫翠微
多謝故人訪臘日
生蒼：暮靄增嚴寒
惠春色却還
花開陌兩高頭白峯
插雲惜鳳林踵促歸舟發

癸亥二月任海門舟中

海上神山縹緲中
花朝重到御天風
青：島嶼雲在下
浩：潮音浪往東
清淨壑岩來佛土
參差樓閣盡
梵言不登彼岸
休怡悵逝水傷懷
任壞空

賀余堯衢通副

梁孟當年挽鹿車，寧惟金石共編書。
古來稀有能偕老，玉樹滿階誰得如。

西湖雜詠

昨日扁舟放西湖，一抹橫山瀉青綠。
今朝登樓望西湖，羣山一夕換白玉。
龍百萬戰修羅，敗鱗跳躍飛相屬。
天時人事固多變，皓皓高陵與修谷。
白銀世界

現突兀。琉璃天中來寄宿。

雨夜宿白雲觀竟夕聞泉聲

白雲峯下松青。白雲觀路綠陰冥。白雲上天化成
雨竟夕風泉滿枕聽。

華陽洞口碧桃熟霞飛海上暮山青。壞瓦頽垣夕陽
落朝天壇上且談經。

久作神仙化鶴歸。人民城郭是耶非。吾生今亦感桑

海徒倚丁岩對落暉

連峯尚有鷓輪迹丹井難尋抱朴菴欲問昭明讀書處捫霞磴道盡山嵐

石山聳秀奮嶠口道祖峯頭接上元占飲青山萬松碧吾行種口徧西園

飛來石果自何來上下有縫誰斷開獨立嵯峨積金頂俛看人世徧塵埃

碧玉池邊碧玉祠
山顛祀帝欲通天
拳龍未欲乘龍
去竒石如林宜上仙

哭沈寐叟尚書

黃亭丹旆駐江干
四海弥天七尺棺
莊惠談辭從此
已牙期琴調不湏彈
平生空復思風義
國事誰同籌
險口花雪打船鳴咽水人天
揮涕淚難乾

哭寐叟四兄尚書哀詞

浙水涌洪災龍蛇遺竒厄哲人嘆竟萎有識咸歎詫
三十五年交於我尤心惻罷宴制服哭天風號悽急
先生天人姿神鋒照太白無量世劫來夙已植功德
高僧歷幾生閻浮偶來客示現士夫身吉祥生虛白
位業本真靈大慧自在得衣鉢過來人獅吼慣棒喝
樓閣現華嚴淨穢土不擇油：與人偕清任乃獨絕
百學窮其源九流攬其別博聞而強記鐘扣必應節

北江文雅麗樊榭詩奧潔餘事作書家蹉跎揚風轍
蘇黃應遜謝鄧張同撇裂冠歲攝高第郎官屈伏櫬
一麾守南昌遺愛匡廬碧提學而布政徽皖班春色
知才不大用頗為南皮惜開府達弘猷嗟我不兩月
北朝道失網國政日糝僻疆吏以賄進大賢遭棄擲
挂冠拂神武坐視天日黑玉步改藍章孤忠自憫默
杜鵑泣望帝血淚歌浦側吾壯遊京華遇黃仲弢家

珠巢遂相謗抵掌高雲擊人天窮混茫文學辨抄差
翰墨互攻守莊惠時調誇相與憂國危深宵同歎呀
戊子初上書變法樹齒牙先生助相之舉國大驚譁
恤傳下刑部紛來求譽瑕君力勸括囊金石窮幽遐
公車吾再來論文縱天葩乙未割遼臺力爭漁陽樞
復爭割旅大鼓翼式民訛創會開強學大道騁驂駟
一一與公謀宵々相鈞爬丁酉公喪母金臺吾走驟

昂公之孤艱憂國之薦瘼是時德攘膠國人禁不訶
公力勸吾言再下馮婦車萬言書既上請師曰法俄
德宗大感奮雷動揮天戈維新救中國掃蕩舊向科
公又貽短書半簡字無多唐順宗實錄請吾讀一過
蓋公料事變憂我蒙網羅我竟邁大難海外跨龜鼉
別公十六年危亭尚風波癸丑重握手黃浦客禮渣
昔者相對憂恐國步蹉跎今者相對泣見荆棘銅駝

公勸留滬屠國事得切磋巨君謀帝制假堯衣帝位
與公謀覆之日夕同畫沙借公被密捕頭顱巨萬賒
竟能夷大盜久已備刀鞞覆衣既慘淡結張乃協和
摩燕鳥集闕復口黃髮皤變典樂教胃卿雲爛暮霞
良謀未見聽一敗為蟲沙勿謂秦無人豎子奈爾何
吾避戴南冠公歸老東坡從茲號寐叟猶為醒時歌
賣文活生計鬻字相觀摩解脫無染捨堅白聽涅磨

吾好說諸相相見笑羲娥化人託曼殊歸心婆迦婆
或入播耨迦或遊難圃那袁安念王室流涕仍滂沱
七十能偕老年來苦病魔九月：將望西湖吾載過
前夕視君疾神明談婆娑豈意成永訣長隔安樂窩
埋此大圓鏡七尺棺空槩悼碩學孤忠睿題深歎嗟
賜葬金二千哀卹恩優嘉追思數十年謀國對山河
吾若喪手足天呪豈有加銀河傾為淚哀：惻暮笳

此豈為吾私珍瘁邦國教

輓張子晉同年

宰官現州載政化記班春易學有遺說墨家存宿因
衆仙大羅夢兩度汴梁塵酒話猶如昨驚傷隔世人

中茅

龍池瀾茗壽泉家百里山川俛晚霞欲覓陶公眠醉
石玉門何處問丹砂

洞天百里入華陽窮探地肺訪仙鄉可憐金錄拔龍
簡誰得朝真謁上皇

句曲最佳金箔山玄妙受籙有遺壇九層臺上上清
處玉宇蕭條高且寒

天外三茅騰蹕來鬱岡黃峯愧仙才靈山長被隱居
占木筆猶同真誥開

採藥橫過紅碧澗排雲但見金銀臺三層高閣吾來

卧日聽松濤忘世哉

宿茅山之鬱岡陶隱居松風閣

早挂衣冠神武回避梁不仕隱居來山中若尚倚梁
相貞白先生汚甚哉

瞿文慎公哀詞

淨土熏修者重來是我生長齋屏葷肉無難到公卿
房瑄稱名德楊彪耻墜聲一生惟謹慎哀謚是真評

公路曾同相，鋤奸奮至忠。
不成歎天命，歸去泣蒼穹。
大盜傷移口，孤臣自匪躬。
痛心杜鵑血，灑徧滿江紅。
謬承推國士，欲以救時艱。
三薦天難問，廿年人乃還。
網繆詩酒會，省識畫圖間。
沅流難歇無言竹，已斑

敬題瞿文慎公像

清癯風骨過來人，巖電光芒爛有神。
風度樓前頻仰望，長沙如見曲江春。

十年黃閣事艱關，去佞之難遇拔山。
若使劾袁功得就，豈看龍劫血斑。

三犯龍鱗敢舉仇，愛才愛國有深憂。
頻年綠野陪談

讌，遺像清高感未

酬 西狩後壬癸間公三舉鄙人觸
后怒謂公舉其仇幾不測

白葭居士屬題精忠柏斷片圖

世道交相喪，萬方同一貫。
偷生事仇敵，精忠反見誣。
氣節掃地盡，豈有表忠觀。
片松同鐵石，昔殉武穆難。

不枯亦不榮
天壤垂異撰
富貴皆臭腐
此木不朽爛
長照西湖濱
南枝同讚歎
嗟爾檜媚仇
跪像千秋扮
觀此柏盡節
題詠萬年看

題余穉花鳥圖寄同徵

幽蘭寫向水仙叢
片石如雲苔點濃
不識何時供奉
畫黃鸝花上唱東風

無題

萬木森：磴道迴桂花影裏記徘徊然燈列佛笑迎
我似為破煩招憶來

贈張伯英

叠嶂危崖在目前烟霞三日似登仙已忘鐵索登臨
苦但欲騎龍上碧天
岑巖羊角倚坡陀滾：黃河舟楫過秋色危城蒼翠
滿居然表裏壯山河

太行山勢轟岩堯俯攬河流萬里遙岳色河聲得雄
壯峭函關令厚相招

山為城郭倚池臺萬里黃河槎艤回北望太行雄巖
嶺河聲岳色日飛來

贈朗夫

回天力已痛無成十族株連汝險驚張祿變名出關
去趙岐誰保入山行數年無信疑汝死一月銜杯喜

共生老客諸侯居北曲喜逢嚴武舊同盟

龐公能以目代耳居德淳和物不櫻翠竹青桐階下
立瑤環瑜珥眼前明不憂不懼樂天性全受全歸觀
我生安樂空中入非想天游光裏聽天聲

贈張扶萬陝西人

講學追思戊戌年黨鉤十族恐株連紅劫久經沒桑
海青山同夢見神仙新知舊學思傳鉢周道唐京嘆

逝川弥月勞君勤立雪深霄與我共游天

興善寺勝寶泉泉甚佳色極潔有僧印潭寫玄
秘塔極清勁印潭四川人卒於光緒十五年
禪行清高

山半臨流勝寶泉寺能淨潔水能清印潭衣鉢有文
行書寫誠懸最渾堅

竹林寺五福間有古槐大數抱高十餘丈必唐

前物比泰山唐槐尤大

竹林寺上古槐樹：身兩抱上參天飛燕玉環蓋摩
撫美人黃土幾千年

火龍洞

火龍洞石最雄竒數丈高臨萬壑卑無數樓臺麗峰
頂上環峭壁萬松枝

紫竹林

群峭環屏松滿巔
俛看衆嶺現秦川
此是終南峯頂
寺水嵐山翠豁晴天

紫竹林後再上二里為興隆寺甚高上為四天

門

萬木蒼崖落葉多
四天門上壁嵯峨
百盤磴道千餘
級紫竹深：鸞鳳和

絕頂雙峰峭壁懸
翠崖丹磴萬松喧
下臨茅庵真面

壁爭先一覺法方圓

終南絕頂圓光寺五頂羣巒亦五台
俛瞰漢城八川
走背看秦嶺萬山堆

月明太白連峯出雲接崑崙太蹇回
最是雪峯：頂
白萬松天籟跨鸞回

遊山

崑崙雲氣接蒼茫星宿海頭起隴岡
中走太白巒霄

蒼面對終南開明堂龍吟回頭成帝鄉南山插天何
雄哉峯巒五頂亦五台樓閣高下壓崔嵬沿崖四十
八寺觀排雲但見金銀瓏五度天門羣峯上樓閣華
嚴屬相望溪迴松風水潺：蒼鼠竄瓦墜碧鬢此是
漢唐離宮與別館抗山常傍南山間五步一樓十步
一閣阿房宮殿至此聲漢武長楊與五柞上林作苑
囿南山當時馳道時來還至今御宿近樊川霓旌避

暑頻行幸排雲但見金露盤
鐘鼓不移帷帳具飛燕
玉環梳洗處只今為四十八
寺禪寂朝香游憇住回
生大頂一何許

昨宵望月高卧

萬松鬱：蔽諸峯落葉滿
磴撥雲霧天半真人不可
攀但聽溪泉出山去

內子張夫人大祥忌日欲草銘墓文未得泫然

思舊得詩二首

夢斷魂銷又兩年
茅山元祚託荒阡
追思香潑倚樓日
蒙難糟糠只泫然

欲為表墓魏城君
舊事哀思入斷魂
酹酒行文猶未得
左家嬌女告阿芬

遊陝西登太行山感賦

陝城形勢天下雄
河流滾滾與天通
巍樓翼翼崑崙函

關時有舟楫泛其中北望太行勢崇隆千里疊嶽望
不窮九秋萬里起長風城頭蒼翠極太空衙池沼
倚高墉河聲岳色自雄濛朝暉夕靄應接同老夫七
十意興濃東望崑崙函漢關封西顧桃林秦塞空喟嘆
河山心有忡

遊陝西紀盛

騎士四十先騰驥累百步卒背荷鎗將校戎服劍佩

鏘官士生徒郊迎將笳鼓震地旌旗揚燦爛彩棚燈
燦煌夾道聚觀如堵墻整肅不譁靜以翔長途數里
士女昌屏氣無聲立相望皆若銜枚登戰場敬若神
明共祈禳傳呼聖人何以當謬竊虛譽悚恧惶入止
學校登黌堂懸旗置酒樂未央弘農古澗牧馬場桃
林放牛田可疆棉花滿野棗林香惜經亂後生計荒
去年城破驚慘口搜括千萬滋吾傷萬民飢溺何可

懣吁嗟物質宜改良

癸亥三月十四遊河南開封禹王臺

萬里河流儗碧蕪芒碭雲去不能呼
吹臺高處遠觀集授簡而今感大天

三月既望為梁欽侯左丞題吳子玉將軍畫竹

示善伯

參：伍：自成行跡密安排費較量上將揮來有神

筆似聞風雨戰瀟湘

三月望日遊開封龍亭

遠觀高寒俛汴州繁臺鐵塔與雲浮萬家無樹無宮
闕但見黃河滾滾流

題吳玉帥畫竹示善伯

風枝雨葉最離披風雨交加臨野池願報平安天與
壽青：永保歲寒姿

癸亥三月同年張省長鳴岐邀張督理子衡餞
于古吹臺賦詩以報之

將軍勒馬出郊關前車百騎走材官植暮都廬夾道
瀟馬蹄沓々揚飛塵省長同乘度城闐吏民環堵塞
衢觀遠上吹臺餞行人灑掃檜柏陳花薰將軍先候
立於門登高萬里來風雲苦碣雲去不可聞大呼極
目雁鷺群桑柘欲雨陰靄紛同遊農圃覽耕耘短槐

高柳綠皆新長沿圓亭澤似春碑前拓影留後因鸚
鷓解語花馥芬松下行厨洗玉盤花邊班劍酌衢尊
酒酣揮毫感殷勤歸視山河日未曛

三月三十日遊南京清涼山偕同年陳敬原聯

句

清涼山色在夢寐姓夢罇一逢携雨至散散原老人
霜鶴姿高卧金陵賢避世去歲古稀行地仙我約遊

後視哽噎姓曾寵名篇獎衰朽更共雄談豁蒙翳散
冒雨同登掃葉樓湖山萬綠醉春氣姓明滅湖水城
郭外參差雁影烟霧際散山樓粉堞隔晚靄茂林修
竹臨水溪姓飛落鐘聲欄楯前僧飯不辨南朝寺散三
山冥濛落天外莫愁柳波猶烟媚姓吾儕間行作閒
客睥睨萬古為灑涕散長江不見無南北龍盤虎據
亦何意姓塵埋宮闕曠花區席卷英豪但酣睡散偉

人灑血苦生民霸王高視嘆兒戲尚賴霖雨洗甲兵
還我江山巖淨地姓危樓暫倚銷百憂坐看暝色翻
寒吹散清涼本在阿耨上雪山冷侵無人跡與君天游
阿耨邊再得遠遊詩作記姓

訪梁文忠廬酌酒其墓感賦

種樹廬園曾寄來酒澆坏土我心哀摩娑羣木忠魂
在長傍崇陵樹影來

癸亥三月恭謁泰陵昌陵草木葱鬱佳氣猶在

喜賦二詩

鳳閣龍樓如□來二陵鬱：氣佳我滿山松柏葱萬
綠嗟爾王孫且莫哀

諸陵御道夾長楊遙望山中殿瓦黃金水橋瞻寶城
頂五雲松柏鬱蒼：

昌陵儉德規模減寶城不作不雕梁小殿三間無藻

繪幸留遺像見先皇

輓翁張夫布政

碧山學士富文采一別驚心戊戌時
孔李通家經累世韋平蘊德自多奇
婆娑生意東陽盡搖落長年宋玉悲
豈意與君成永訣共傷世異與時移

癸亥三月廿五日在保定乘飛機空中御風神
為天游口占示善伯

飄：乎我今日又上青天升騰虛空凌跨紫烟俛視
人世臨睨山川迴旋霄漢翱翔碧落若羽化而登仙
松林若芥苗人馬若蟻旋峻嶺若丘垤長河若虫涎
下觀保定十里之大城若一方器之在埏其中崇樓
傑閣若覆杯市廛壠畝若井田乘雲乍抑揚御風更
上仙忽逍遙夫月宮乃巡歷夫木土火金水之星躔
登太陽口天子之殿同太微紫微天市之垣入北極

之辰而四眺乃升晃昱而窮遊太元之元回盼吾地
之渺小曾不逮□巢蚊睫螭螟之末孫乃為爭蝸角
之微末日弄蠻觸之兵鋌自爾王霸而高視甚于南
柯蟻鬪之夢焉吾非斯人之徒與而誰與哀生民而
救旃不願居天上仍遠處人間忽颺墜于吾地遂轉
輪於人寰迴望諸天遊戲事世界無量劫經賢

豐台道上與鄭昆池別感賦

豐台垂柳萬千絲
客裡揮巾傷別離
送自洛陽二千里
情深誰似鄭昆池

豐台車上口占贈陸繡山

繡山性至考求忠
即其門才名久
秀發沉勇自不言
鷹隼翔雲霄
驂騑出風塵
相期走雷霆
精銳救國民
林畏老自京來
津慰問感深
高義贈以詩

數年不見最相思
七十老翁來贈詩
相見無多情已

至凄然祇語謁陵時

題文定公五同會圖

君九世兄為嵩隱先生哲嗣文行俱美克亢其宗國

變躬耕高蹈遇於天津出其

先文定公五同會圖屬題

面目猶存五老峯鄉閭文行又相同祇今土室藏遺像如肅清高九老中

題王文敏公遺筆

王文敏公論交于卅六年前當時吾館于盛祭

酒伯希意園公日來遇從談金石品書畫至樂
庚子余在海外聞公從容就義余哀之有句曰
節義惟聞兩祭酒事閱數十年漢章世况乃以
公遺筆屬題追思故人既哀既敬乃題此詩

儒雅風流國子師意園品畫憶當時聯茵永失論文

友

戊子吾初上書公見吾文于意園即推贈扇猶懷
許為京師所無且為點定數字改數句

送別詩

乙未冬出京公以詩扇贈行有五嶺山頭月
半灣照人今古幾來還句其餘今忘矣此扇

珍藏之後封
沒子戊戌
數字君臣存大義
百年交舊有餘悲
應同乃木留遺筆
長挂辟雍松柏枝

題子銘都護御筆三秋圖

冷艷寒香五色斑
遙從天上下人間
百經霜露猶開
放玉宇瓊樓高處遠

游大明湖登歷下亭

城牆一角水拖藍
畫艇穿蘆垂柳鬢
歷下亭前湖水

瑟濟南風景似江南

游千佛山

積石巖：擁碧鬢無言千佛忘
人間齊烟九點河水曲
泰岱北行來華山

十年前贈王豹帥詩
湄午世兄裝成再題

班春廿載徧邊荒
斬佞封章請上方
拚捨臣身真味死
莫迴天聽竟崩亡
使君樓艦遺民滿
故國山河涕

淚長把酒來看須磨月當求寶劍壓歸裝

題湖洲墨竹六幘

雨葉風枝生氣動渭川千畝欲吞胸淨因緣傳可
處一枝跋尾化為龍

五月十四日遊青島月夜驅車繞島一周口占

二首

海不揚波夜月妍齊人歸我汶陽田輿輪徐動周青

島燈火滿山林滿烟

島嶼幽深是會泉海山樓閣似羣仙月明穿過櫻花
路尚想花開感往年

題岳武穆寫扇二詩贈吳子玉

古者將在外君命有所不受春秋大夫出疆有
可以安國家定社稷者專之可也惜武穆不知
之

金陀舊史合重編遺印傳今八百年團扇寄將吳子
玉揚風應合洗青天

報國精忠善用軍金牌十二對斜曛可憐不飲黃龍
酒二聖迎還集大勛

青島會泉石磯望海觀潮高至數丈異觀也

海水冥濛望石磯怒濤高拍入雲飛飛帆渺：和雲
水島嶼青：日落時

六月廿七日暮再觀潮

濤頭撞石涌成雲浩：懷山不可分萬馬奔騰飛雪
走千龍轟鬪震雷聞白旂引隊爭先上縞甲登陣奏
大勳忽現雪山在頃刻如遊冰海對斜曛

癸亥六月北戴河望海

山徑迴環縱馬蹄槐花香夾路東西登山立馬望東
海碧浪如膏□樹齊

癸亥秋九月登華山頂作

太華峯頭踏碧髮餐霞三日不思還帝釋岩高謝世
路蓮華界妙豈人間騎龍青天覽日月聞鶴碧夜撫
河山即未成仙樂長隱石泉齒：松柏頑

癸亥除夕遠遊歸滬作

太華終南踏窈蒼漢唐舊蹟入詩囊青嵩遠訪箕穎
讓黃鶴俯臨江漢湯波撼君山吸雲夢雪封岳麓渡

瀟湘九華廬阜雲中望除夕還家夢一場

題鎮江北固山下太史慈墓

盪決衝圍救孔融神亭擲戟氣何雄報恩萬死耐知
已擇主終身效至忠一代英姿似公瑾千秋信義類
臧洪我題君子延陵墓長照江流豈論功

去歲蒙上恩賞御書天游堂三字頃來青島甚
願移來

化人夙昔作天游想入乾坤到十洲
睿藻留題草堂上欲移海島五雲浮

遊青島謁恭王殿下則已遷大連以青島風景
極佳盛暑不熱因租房避暑殿下以家具什
器假我遂得安居感賦

東平去後我方來再入梁園頻溯洄
青島海山萬千綠懷人落日更登臺

家居豈可付纖兒借與鄰枚好護持
隱几聽濤望東海
紫頭授簡想當時

偕龍積之訪陶隱居墳草間三斷石翻之磨洗
得文認為唐碑

落日荒蕪踏錦墩無碑人道隱居墳
神仙亦死空遺跡
曠有頽垣對玉晨

草間斷石得殘碑
頻煩磨洗認唐時
額篆楷文千載

物應同寶衆寶存之

十三日偕積之弟訪華陽洞

地肺山中路幾千華陽洞口訪神仙洞門已閉仙人
渺落盡碧桃幾年

十四日夕與錢凝踏月上茅山自印宮至白雲
觀橫過積金峯月色佳絕

暮靄歸來月上峯兩山烟合隱蒼松飛泉落：馬蹄

得一路烟中聽晚鐘

夜度雲關過印宮
頽垣壞殿月明中
騎驢直過積金頂
曉視山河煙霧濛

甲子元旦徽女與諸孫度歲于游存廬壁女與諸孫亦歸

華嵩歸來已除夕
六十七翁垂古稀
淑氣雨薰花竹醉
歲朝烟擁栢松飛
中原甲子天心復
外史庚申國

事非更喜立春遇元日相逢吉語在璇璣

甲子元夕一天園山巔無障礙壇放煙火與同
璧同凝同倏及昌婚僖俸邦鳳四孫飲酒傳
花惜薇不來

無障礙壇高幾層中元甲子上元燈酒籌羯鼓花無
賴火樹金枝電迸騰兒女園林離竟合微塵世界愛
無憎同薇去歲曾來此今話團圓猶未能

重游青島示佳曾孫

海氣蒼蒼島嶼迴山巔樓閣抗崔嵬茂林峻嶺百馳
道重入仙山畫裏來

重陽懷薑齋時在港

菊滿東籬作畫圖太平山下問潛夫重陽登望無高
處薇蕨無多可餓無

孟符賢兄為戊戌同難至交累其久錮每念惻

惻遠離十七年重見滬上話舊悽惻承贈詩
即步原韻送入都

豈圖重見話觚稜尚記同舟託李膺鈞黨石交相累
錮年時玉几共傷憑滅亡從古嗟衰如不用于今老
范增感蓋涕洟談戊戌送君落日哭崇陵

丙寅八月十一日遊香山靜宜園

采青軒闕自金時千載離宮松柏披臺殿抗山今據

盡只餘古塔綠琉璃

游頤和園

七里長廊到石船排雲層殿上通天
龍漉涼作昆明水游客傷心宮樹烟

仁壽殿卅年早朝地感賦

御床蟠嶼抗丹青銀燭當年記早朝
卅載重來仁壽殿黃簾不捲柏蕭蕭

游玉瀾堂昔幽德宗所德菱云德宗談我輒言
不受官只為救國是俠士五十餘次

玉瀾堂裏昔囚堯欄檻摩：久寂寥俠士頻呼為救
國微臣感痛望青霄

丙寅八月十二遊北海感賦

五龍亭下盪輕舟把酒漪瀾堂上遊誰識金人仙掌
露金仙當日淚曾流

十四日游湯山

垂楊甃：夾御堤十橋三島
故宮淒湯泉仍沸無黃
瓦蓮滿荷塘雲水迷

游豐澤園

玉宇廊前春藕齋瓊樓玉宇五雲排
豈知天上神仙
關踏徧人間士女鞋

丙寅中秋登白塔感賦

碧照樓前打槩行秋高白塔氣澄清宮城烟樹西山
影留與行人看月明

丁卯二月五日七十覽揆承恩賜壽紀事述懷

七章

海王星現十年時道光二十八年西一八四六年始發現海王星在我生十年日地

春迴覽揆期出世可曾大事為行年竟得古人稀易
終未濟仍無悶書創大同誰見知無量諸天八千返

衆生不救欲何之

童稚嬉游嘆白鬚杖朝豈意到潛夫

正月十三日赴行在祝嘏優詔

命免塵：世界愛憎遇劫：人天成壞徂播耨迎觀

奚足感

播耨迎為天

維摩詰病豈能無

半月來

金身

萬億隨時現壽者短長何喜吁

萬木扶疏講舍居憂時七上萬言書公車抗疏爭連

軫上相虛懷枉傲廬

馬江敗後第一上書以日圍高麗俄窺遼東請變法急救翁常

熟不肯代遞及東敗吾合公車十餘人上書車馬塞
 達常熟親來南海館謝過謂舉朝無一人言者故不
 敢信不代遞然後之推穀謂過也百學勵自強聯俊
 倍即由此然戊戌事亦自此始也
 又會開保國盛冠裾乙未後與朝士有志者沈子培
陳次亮諸公開強學會張文襄
 袁世凱等全國名士咸集既開保國會于京師一日
 集者數百若開不纏足會于上海吾女同儕與幼博
 弟主之行維新變法先皇業戊戌無成罪在余
 于六省
 四州百國徧輶軒海外奔亡十六年車馬轍環天下
 迹甄甄樂採地中仙滄溟忽竭龍無六華表歸來鶴

化煙恢復空思丁巳事美森幽處十年前

丁巳十
督聯盟後

復口浙督楊善德力請吾自為總理乃可成將合各
督聯盟我吾力辭惟擬立憲民權詔書五十道中有
所有文武百官各仍其任十字而忠武左右不能安
反側誤易疆帥遂令今萬劫弥深先為印度內爭名曰
俄亂事敗吾避居美使館高
木幽陰名曰美森館凡半歲

既來斯世皆吾與未免多情惻我心乘願救人甘滅
溺驚魂憂國墮幽陰吉凶不忍同民患憂樂何先恐
陸沉我是化人亦煩惱雲中臨眺怵深：

壽人笙磬想韶讌廣樂模糊可得聽烈士剩携如意
舞愚公志欲山淵平醉天似欲剪鶉首避地終須學
管寧七十年中提影事霞雲滅幻月空明
滿地干戈慘：民乾坤毀矣痛蒙塵天乎人間是何
世命也我生逢不辰兒女索離幸懼聚文章頌禱感
交親自天賜壽喜為食芋木達場興有神

人必有代，逝往才無古。今蓋人天歷劫，朱壞
奇常，國土興亡，盛衰有數，不觀乎寶壺百
二，燔為灰燼，文豈柯坎。自古為然，其能留存於
世者，不徒以吟詠見長，必也學行氣節，識
見志趣，為世所景仰，乃能懸日月而不
磨。此杜詩所以光燦千古也。戊戌之禍，先君身

當乎衝以改家室流亡或乎完卵二十餘
年家離瑣尾道亡海外艱苦備嘗而救國
救民之心乎時或已於晚在所作詩得採風
尚儻而外多借引列強新進之思潮以喚
起國人之迷夢怨憤之詞有似少陵蓋際遇
及環境皆多相類也先君一生以治除天人

之學外即以國計民生為重詞章之學其能
行耳每有詩作雖小鍾岳而沉鬱鬱淋漓快
乎如海波之渺乎歷險但迭經受亂遷徙
身常縲紲已矣度陵散矣果君啟超
為手寫四卷夙以於世成以必詩作詩多
詩散失殊堪痛惜壁不敏雖能述焉方而也

庭園訓深恐青箱不傳遺篇湮沒是以搜
集遺章考為十五卷倩崔君斯哲錄寫刊
行於世世之讀其詩者作中國維新史觀可
也作世界風俗詩觀亦可也

乙亥臘月女康同璧敬跋

詩曰伐木丁丁鳥鳴嚶嚶即易言聲相應氣相求也
南海先生講學萬木草堂聲出羊石全國景之哲生
也晚每以未獲執弟子禮爲恨然而公沙穆之遊太
學也定交在杵臼之間孔文舉之勵風義也忘年結
爾汝之友古人如詔我矣民元後先生自海外歸時
哲領廣州地方審判廳事得友人之介獲謁于香島
藉聞經史金石之訓不啻及門也民六年秋哲移官

江蘇退食之下學吟詠習臨池初業無方知先生遷
滬趨而請教先生不以爲不可教而不教也凡尊碑
卑唐之旨平腕豎鋒虛掌實指之理一一晰論之其
於詩也曰取法貴上詩經騷選漢晉古詩多讀多擬
焉久之當有進也余性雖拙而頗知恒逾年抄所詠
古風寄呈教正先生覆曰詩才高妙絕少瑕處若再
取煉於大謝取幽於山谷取難於昌黎取艷於玉溪

浸淫於騷選濃郁於子史則大成矣民九元旦哲贈
先生詩中有側身杜甫空懷古障面元規別有塵之
句先生貽書曰惠書及詩感慨激昂元規障面杜甫
側身想見高懷遠志也側望不任莊子所謂父母豈
欲我如是我天地豈欲我如是我然而至於此者命
也夫順受其正安之而已先生雖連年不得志而胸
襟曠達毫無怨懟真天游化人哉余他業屢遷唯學

書則十年如一日曾以所寫真書請正先生曰書極
樸厚後補以柔和專學鄭文公可也逾年將隸書行
草寄先生教正則謂書法日進以隸爲佳行草板着
宜取聖教序及閣帖之妙美者臨三四月然後示我
當有以進君也昔周德純就學陽明子陽明子詔以
歸足火力吾將儲儋石之水以俟再見噫先生之進
之也豈謂是哉十一年春哲調山右過滬謁先生先

生謂哲篆書力頗透紙有毛公鼎石鼓風再致力於
瑯琊西漢分合篆隸陶鑄爲之奇態異變雜沓筆端
斯成家云是又望道而未之見不得不重勞他山錯
此頑石也自後東西萬里親炙爲艱加以歲月不居
道山空仰沉沉旦夢渺渺文琴不禁神往者久矣今
寫先生詩未得新理異態寧不自知然既不克叩在
天之靈從而就正而憶懷前緒又寧忘警效之如新

我至索續迫人浚對時忙難免訖脫則讀者諒之耳
中華民國二十五年歲次丙子十二月後學崔斯哲
跋於端州

門人張鵬一初校
門人羅惇夏校
後學何天柱校
女同薇編校
同璧

康南海詩集補遺

保皇會歌五章

我皇之仁聖兮，舍身變法以救民。維百日之新政兮，冠千古而聳萬國人。

痛奸賊之篡廢聖主兮，盡撤新政而守舊。日賣地而賣民兮，嗟吾四萬萬人，其將爲奴絕種而罔後。

哀瀛臺之幽囚，渺海波之浩隔。痛衣帶詔之求救兮，伊中外而求索。望忠愛之壯士兮，念舍身救民之恩澤。共洒血以救聖主兮，乃可以新吾國。

皇上之不變法兮，可以不廢。皇上之救民兮，遂喪寶位。皇上之舍身爲我民兮，胡不隕涕。

皇上之不復權兮，中國必亡。皇上之復權兮，大地莫強。同志憤起兮，誓共復夫我皇。

中華帝國憲政會歌四章

惟天生民兮，賦才與權。俾自營衛兮，羣族乃存，合羣之道，衆議是尊。舍私從公，憲政攸傳。

惟諸聖之救民兮，除苦患而求樂利。雖君長之愛民兮，豈如吾民之自治。雖一人之仁聖兮，未若

合衆之智，好惡從之衆兮，自大公而無偏袒。

我有議院，總章合宮。我尊堯舜，天下爲公。選賢與能，衆議是從。國人皆曰，是協大同。孔子作春秋，君民在法中。名分各當，憲法之宗。

惟列國之安榮兮，賴憲法之制定。散四萬萬人則愚兮，合四萬人則聖。憲法立兮，君民同慶。騁民獻於明堂兮，惟抗議之中正。觀中華之復旦兮，颺龍旗而莫競。

輓崔編修舜球四詩

光緒十二年作

風骨崔稜峻，天河隕此人。三年嗟契濶，一病竟酸辛。挂劍難通冥，焚書益愴神。飄搖丹旆返，珠海不成春。

猶憶壚頭醉，云何宿草悲。玉堂都冷夢，銀字孰題碑。尚有敬姜哭，難忘范式期。鄰家哀笛起，淒絕夕陽時。

嶺海論人士，如今未易才。菊坡期不遠，惠景遽先摧。南紀凋喬木，西清冷舊苔。涼風動虛帳，不爲故交哀。

壬子二月自須磨雙濤園遷近月見山下須磨寺側公園前桃櫻滿山居有小園適吾覽揆門人梁啓超等十餘人連日爲壽且作詩會相慰藉賦三章

月見山前海有痕，須磨寺裏佛仍尊。劫灰飛散知何世，逋客孤羈得小園。蠟屐遊頻思曙墅，桃花開

徧或逢源。一枝棲託聊隨喜，豹虎中原何處村？

念亂哀時觀我生，東華舊夢憶承平。滿園桃李誰爲主，去國衣冠變盡行。賓客解爲文字飲，竹絲難寫樂哀聲。白鬚四海歸無日，碧血三私劫盡兵。

我比古賢壽已永幼訝衰翁今與參。絕域蘇卿人老矣，書空殷浩事何堪。婆娑槐樹傷身世，爛熳櫻花照壑巖。故國于今易朝市，惟將悽愴問江潭。

與旃理行覓得須磨湖前宅僻地幽徑忽豁大園備林池山石澗泉花木之勝老夫得此俛仰山海飽飫煙霞足以遺世忘憂矣園舊名長懶別庄吾因其舊卽名長懶園賦十五章旣以自怡後之論世者或有感焉

我本餐霞人，憂國捨神仙。臨睨我舊鄉，去之十五年。人民皆非故，渺莽齊州煙。吾生本無住，樂土尤所便。

長懶園

任甫請改之後
名爲奮豫

地僻宜幽棲，雲臥占一壑。懶殘芋可熟，稽康鍛亦樂。長鑿鋤黃獨，所勤草木學。身世長此忘，松風睡未覺。

松嶺

白雲常戀岫，青松橫蔽嶺。嶺崎帶巖壑，窅深出人境。突兀數百步，登望煙雲冥。扶筇日一周，莓苔穿秋徑。

天籟亭

松嶺最高頂，松杪露簷翼。仰望翠崖上，鬱然雲翠偪。把卷倚危闌，看月至深夕。松籟吹不盡，天人了性識。

積翠臺

林壑俛下游，松塔據宗丘。形勢據半島，蒼翠盈雙眸。松下白木場，枕書送春秋。坐覺日月沒，平視雲霧浮。

柳澗

紫茸菖蒲花青綠，菖蒲葉。澗水不厭澗，涓導山泉潔。磊砢石齒齒，橫亘橋截截。可能遇安期，復此生九節。

東錦塹西錦塹

兩塹若兩手。高拱成揖讓。嬌紅點崖路，影綠臨池上。羣木列蔽虧，兩塔相掩映。垂釣憑錦磯，坐嘯娛林莽。

沮澤谷

兩塹蟠其外，屈曲內藏谷。沮洳漫水澤，草木爛紅綠。大波起暗溜，引泉成洄洑。陰陽備地性，玄化可以畜。

上池下池

上池環屋前，下池通澗鱗。釣磯垂絲綸，略約橫低亞。蓮芡蕩清漪，菖蒲濃嬌姹。育育者大魚，知樂游多暇。

第一石橋第二木橋第三第四土橋

吾園多池澗，橫跨作四橋。石橋跨蒲澗，老梅扶行驕。木橋穹如虹，上池度逍遙。雙橋亘下池，雜樹曳紅綃。

雜花坡

蒙茸漫陵坡，草樹何離離。羣花相間植，紅素雜紛披。遮我屋前路，石塔欹橫枝。色相我未忘，芳馨且自怡。

雨瀑澗

絕壑帶深林，遠望若無際。但聞瀉溜聲，暗水瀟瀟逝。松嶺竟夜雨，晨見玉簾墜。盈丈懸崖石，歔雪聲清厲。

菜香圃

疎畦倚松嶺，桔梗臨蒲池。分行作豆棚，削竹植瓜籬。椰菜與蘿蔔，清甘吾愛之。英雄老閉門，種菜吾所宜。

卻曲徑

蟠嶺既登頓，循澗復側欹。叢樹枝蔽影，狹路草濕衣。尺步不平直，陟降多顛危。扶杖且樂行，

世路尤險巖。

忘憂館

龍蛇起大陸，風雲擾中原。西顧望禹域，沉沉我憂煎。欲度無舟梁，頭痛心煩冤。高齋餐煙霞，忽忘人世言。

感櫻花落

櫻花風雨落天涯，欲覓東陵學種瓜。故老江湖可垂涕，冬青無樹掩風沙。

須磨春日櫻杏桃梅李牡丹鶻花皆極鬧次第開落至夏初則梅子綠陰落紅飛盡爲之感慨時事同之也

草長鶯飛已暮春，櫻花雲鬪盡飄茵。杏花又逐桃花落，梅子生同李子酸。幾日繁華憐歷劫，看人車馬自欷巾。杜鵑紅徧空山老，世事濃枯笑轉輪。

水滿池塘樹滿陰，萬紅飛盡綠沉沉。雨雲朝暮黃梅熟，邱壑榛蕪紅藥深。茗芽銷長日磬，壺蘆本擱忽雷琴。清泉白石還吾願，僻地枯禪證佛心。

調某俠者

紅拂應歸李藥師，英雄兒女兩心知。虬髯側臥看梳髮，可有楊裘來下棋。

明末朱舜水先生避地日本德川儒學之盛自此傳焉今二百五十年德川公因順舉改碑祭名侯士夫集而行禮者四百餘人吾在須磨不能預盛典附以五詩以寄思仰

儒學東流二百年，派支盛大溯河先。生王難比死土壠，日本千秋思大賢。
上續王仁傳論語，隱同箕子訪明夷。先生浮海能傳教，却望神州應大悲。
孔子已無丁祭拜，學風掃地喪斯文。我遊印度佛教絕，一綫儒傳或賴君。
德川儒業世昌豐，楠社看碑訪落紅。十五年來重避地，每懷舜水庶高風。
未隨袞屐拜遺碑，僅自圖文寄夢思。他日海雲訪水戶，先從阡墓植松枝。

長懶園早起觀荷花放花乃朝開午合

疊嶂雲嵐態萬千，松杉樓閣擁輕煙。烏啼花放山池曉，辜負荷花事晏眠。

游存篴夏日時自粵新寄到荔枝

繩床高臥綠陰圍，摘盡枇杷試荔枝。斜日繞行松嶺路。雜花生樹蝶紛飛。

種菜

茄花已紫豆棚青，廿種瓜薯未識名。老大英雄惟種菜，日斜長鑿伴園丁。

須磨游存篴夏日即事六首

北嶺屏開翠，東溟浪打藍。吾廬足邱壑，秋色滿松杉。撫石行攤卷，鋤花命託鑿。亂離滿天地，
搖落日江潭。

浴髮改吾短，園幽得日長。閉門惟種菜，因樹且懸床。觀化養生主，無名安樂方。疎鐘送晚雨，山翠
撲人涼。

晏坐松林冥，觀時日月深。落花厚盈寸，積雨殫層陰。有欲頻觀妙，無言自證心。入遊非想定，天地聽飛沉。

曳杖蒼苔徑，柴扉晝不開。海風吹作凍，山雨歇還來。我佛蓮花淨，故侯瓜蔓栽。葵黃好顏色，向日復何哉。

異蘭高數尺，移植美洲來。大瓣青紅艷，連珠爛漫開。照人好顏色，舊夢醉樓臺。未忘前因事，吾園復此栽。

邱壑紆迴曲，周行作壯遊。崖危試垂足，花亞故低頭。魚樂知誰得，蛙鳴私是謀。化人亦煩惱，迴睨望神州。

八月十三日祭六君子于游存移舉素月已上追念戊戌英艦還港時月色感慨徘徊
舊時月色霧難開，海外驚看十五回。偶免朝衣赴東市，忽經灰劫哭西臺。永傷白首同歸日，怕見黃圖改色來。救國殺身誰念爾，驚濤拍海夜堪哀。

送門人梁任公歸國

去國同奔日，蒼茫十五年。乾坤憂隕裂，桑海幾推遷。白髮看征雁，青山泣杜鵑。八年久離索，幾月得同圓。

去去看雲氣，神州可鬱葱。山河仍故國，涕淚灑秋風。化鶴看遺郭，飛龍話舊宮。崇陵松柏路，爲我弔殘紅。

任甫到京再寄

萬死奔亡後，生還入國門。去時緹騎急，歸日鼓笳繁。朝市于今易，人民猶有存。淒涼華表鶴，哽咽欲何言。

重九箕面觀紅葉看瀑竟夕宿瀑前錦瀧菴客舍

千山深夜人踪絕，百尺飛流獨對清。落月斜明飛雪影，寒雲掩半隱雷聲。崖高天窄星辰少，樹密潭深巖石傾。如是我聞生淨樂，坐忘虛白證無生。

來日大難

五解

香山爲淺易之語欲人人可解焉

其一 憂庫蒙也

來日大難，策馬登山，涉長城而望，瀚海迴環。天穹低野，沙飛草乾。黑雲亂飛，蔽空漫漫。似聞鼓鑿，庫倫南千。吾鼓聲不起，吁嗟萬里之塞垣。蹈藉戈壁，空思天山。夜夢燕晉秦隴之郊，俄馬入關。

其二 憂西藏也

來日大難，瞻我西天。拉薩金瓦寺，佛雨黯然，我吏我徒，血胥磨邏。川隻輪不返，陣雲莽邊。易樹三獅幟，徧藏翩翮。嗟我舊藩，王會百年。片馬茫茫，蒙自連連。載危載懾，西望川滇。

其三 憂瓜分也

來日大難，恐爲波蘭。利益均沾，載在約言。俄既吞蒙，英取藏焉。三遠何有，東封肆邊。德窺

齊魯。法問桂滇，意奧與美，豈不分一瓣。我萬里之中華，從此瓜分。我五千年之中華，從此沉淪。哀我四萬萬華胄兮，危涕而心酸。

其四 憂割據也

來日大難，出國門而南行，割據縱橫。聯省自立，各控函關。武騎蒼頭，競聘齊秦。喜怒生殺，徧樹私人。頡頏作氣勢。旅距中原。政府不敢令。令則拒還。魚爛瓦解，豆剖瓜分。恐爲印度之分國兮，哀我生民。

其五 哀民生也

來日大難，哀民多艱，有田不耕。罷蠶織而寒，有塘不畜魚。有屋毀瓦而拆壞。富者走盡，老弱守關，工商無業，待死而盤桓。問何以故：曰大黨爲官。入黨可橫行，奪劫虜殺過諸蠻。勞苦作業。徒供強梁之饕殮。薄言往愬，鎗斃辛酸。窮無所呼，仰天不敢訴冤。若再彌年，死人可二萬萬。誰實致禍？哀哉永歎。萬國人皆得營生兮，吾人罷業祈死無後艱。哀我生民，涕下泫瀾。

與伍憲子觀神戶雌雄瀑還浴諏訪山溫泉夜飲酒樓送憲子遊加拿大聯句

曾閱蕭格姊妹島，今觀神戶雌雄瀧。更橫絕東西兩大海，憲蕭格瀑勢吞湖江。大瀑不見小亦妙，更清冷激瀉我心降。楓葉秋山蕭撼冷，憲磴道盤曲折屐雙。白石齒齒瀝飛雪，更浪花擊搏散石幢。雄者居高雌伏下，大氣傾瀉穿浮杠。憲山月照空海風蕩，寒雲隱隱聽雷撞。巖林深悶洞雲閉，水亭對坐忘身世。更汝身本來清淨身，乃投濁流爲誰計。憲未忘蒼生國民患，蘊蓄終爲出山勢。

更 諏訪山下導溫泉，萬家燈火海雲霽。憲 滿腔熱血澆洗難，入無垢地亦何喟。更 獨憐世濁忍獨清，天下滔滔痛長逝。憲 菊花正美魚羹滑，醉上酒樓且聯袂。更 燒雉燿鸕玫瑰酒，饜士炙牛更兼味。憲 君辦大事且痛飲，龍服久爲螻蟻制。送君汗漫萬里游，太平洋深慎揭厲。加美若觀鷲格瀑，大觀無忘今小試。更

十月登日光山頂道遠日落中夜乃至山頂中禪寺湖山道盤曲雪月交輝泉瀑競響光景奇絕聞春秋時櫻花紅葉滿山開徧惜來非時也

疊嶂危崖雲表橫，羊腸蟻磨萬盤行。星辰漸看與人近，山雪橫封爭月明。落木衆峯寒露骨，激泉千澗競飛聲。忽登絕頂看水湖，落月橫波山勢平。

櫻花億樹漫山坂，紅葉千崖點碧峯。人艷春秋山谷色，今非時運槁枯容。卅里飛瀧聲不絕，一湖絕頂碧偏濃。晃山勝絕天人備，百里連陰夾道松。山有德川廟華勝冠日本廟前松杉夾路三百里參雲蔽日扶杖徐行至佳勝

日光山頂觀華嚴瀧爲日本第一大瀑

華嚴瀧下華嚴現，白日光中射日光。三百尺流廣長舌，空山說法證空王。

偕犬養毅木堂浴湯河原與阮紫陽觀弘法大師清瀧步月夜行秉燭穿林犬養木堂後至倚橋口占詩

木堂請書

山廟幽幽月似銀，峭崖曲徑倚橋頻。蕭蕭飛瀑照山月，說法聲聲清淨身。

摩崖剔藓捫山徑，秉燭穿林照樹陰。見兩白龍直飛下，雷聲大吼海潮音。

偕犬養毅木堂阮鑑光紫陽遊湯河原不動瀧木堂請題詩

飛瀑轟雷響振林，風濤搏石激潮音。天驚地裂皆搖動，證取如如不動心。

壬子除夕扶病繞行游存別墅松徑示陳遜宜

是日立春

亂雲又得度殘年，萬里中原接素煙。物換星移嗟運往，天荒地老望春憐。行穿松樹故人外，笑折梅花入酒邊。風物緊淒人病在，蕭騷生意菜畦前。

冬春間久病月餘正月上元與旃理訪清友園梅花

不堪風緊又冰堅，日撥殘灰度歲年。臥病時經新舊曆，出門山帶暖寒煙。聞香索笑巡林下，踏雪穿花繞水邊。百樹梅花一逋客，鬢絲禪榻忘人天。

藏又割地矣

壬辰

須彌今又譯作喜馬來

喜馬來山雲四飛，山河舉目淚沾衣。此通藏衛無多路，萬里中原有是非

三月三十日自須磨依山行遊清友園百花落矣惟紅躑躅滿山感賦

躑躅連山碧素菲，百花凋謝牡丹稀。孤芳落落殘紅秀，亂木陰陰衆綠肥。白奈欽塘人獨立，紫藤遮路蝶紛飛。天涯春盡增悵悵，時序遷流人事非。

遇前日本使矢野文雄龍溪于犬養君酒筵君爲戊戌舊交文學深雅嘗贈我牡丹櫻花握手圖難後介

紹于日相大隈伯重信而電招居日者久別重逢話戊戌舊事感愴慨然即席賦贈

十四年前旌節使，牡丹握手與櫻花。頗藉提携渡東海，徒爲汗漫賦南華。故人再見眞如夢，灰海重談感散沙。燈火樓臺客頭白，銜杯且勸舊盟加。

再遊箱根山頂蘆之湖望富士山

湖水澄清似舊時，碧山迴合碧漣漪。萬重塔島離宮路，嶽影樓中又酒卮。富士雲開見碧巒，昔年白首浸波間。而今富士年翻少，舊客重來白髮斑。

浴蘆之湯

疊壑叢巒攢碧天，樓前葱綠一峯圓。衆生有病吾仍病，日浴蘆之三斛泉。

遊玉簾瀧在箱根山脚

溪橋散雪薄寒添，山翠幽幽垂玉簾。清淨身中廣長舌，又聞說法現華嚴。

辛亥除夕前六日在日本箱根環翠樓閱報適看玉簾瀧選感賦

絕域深山看瀑雲，故京禪讓寫移文。玉棺未掩長陵土，版宇空歸望帝魂。三百年終土氣盡，億千界遍劫灰焚。逋臣黨錮隨朝運，袖手河山白日曛。

同錢兒貌似我生三周晬矣吾五十始生錢老母八十非錢不權聞能誦詩三十首喜寄縮機汽車與之錢兒吾所愛，五十子生初。風骨凝端秀，神明得靜舒。嘉名錫延壽，佳氣喜充閭。隔歲方摩頂，吾家得貳儲。老夫願似我，大母最憐渠。戲綵爲天舞，含飴送月諸。能行騎竹馬，學語賣漁魚。嬉笑多陳俎，追隨解整裾。讓梨呼姊弟，懷橘落庭除。犢舐情傷老，牛牽齒折予。豈惟覓棗栗，頗

解好文書。誦我詩三十，知名字百餘。驥子好非癖，衰師嬌不如。大賢猶望汝，天意可從余。欲以青箱託，深驚白髮疎。逋臣猶瑣尾，愛子竟離居。顧復何從及，殷勤亦只且。他時學禮過，猶望帶經鋤。所愧爲人父，飛行寄汽車。

寄長女同薇

久別四年矣昔以僞左傳本出國語今同薇緝還原本成其緒矣望其畢業

文備最孝謹，念汝四年餘。天地風塵隔，關山父子疎。窮愁兒女累，事變別離居。國語宜終業，千秋續漢書。

壬戌年正月十四夜，自滬來杭，道過戲園，有告以今夕演光緒皇帝痛史者。下車觀之，甫入場，即見扮現老夫冠帶在臺上，觀客指而議論歎息，不知老夫之在場也。感歎傷心，口占得十八章記之，後之讀者應有感也。

一

君臣魚水庶明良，戊戌維新事可傷。廿五年來忘舊夢，無端傀儡又登場。

二

九天閭闔夜燈低，袍袴宮人望欲迷。成住壞空經幾劫，不堪舊事更重提。

三

猶存痛史懷先帝，更復現身牽老夫。優孟衣冠臺上戲，豈知臺下有真吾。

四

老夫入座倚闌觀，化身冠帶正登壇。嗚嗚萬首咸傾動，共指鯁生歎息看。

五

事無成敗過雲煙，劇裏君臣歎逝川。太息諸人皆拱木，天遺一老我生存。

六

聖主憂民變新法，爲行立憲捨君權。竟緣救國遭囚弑，蒙難哀哀十二年。

七

呂布本知爲反覆，東之希範奈無人。本初告變成圍篡，洪憲從生種種因。

八

楊銳傳來籌救諭，位幾不保望諸臣。當時讀詔泣涕下，南海館內徐菊人。

九

復生走覓大刀王，

王五爲大俠，世號大刀王五，復生熟之。欲覓十餘壯士，跳入南苑，救出，未及而復生蒙難。

欲入瀛臺跳苑牆。北望堯城不能

救，孤臣負罪最神傷。

十

閉城大索止車舟，千電紛飛萬像搜。若使逋人南就戮，瀛臺北弑亦無囚。

十一

詔書竟引紅丸案，謂毒今皇已大行。英領登舟先問我，可因謀弒去京城。

吾由英重慶船至滬，英總領事璧利南遣濮蘭德登舟，持

吾像見吾入房曰：「汝弒皇上乎？」吾曰：「安得有此怪問？吾憂特達之知，變法天下皆知，感激知遇，至愚亦無弒理。」乃出上諭相示曰：「已革某官康有爲進丸毒弒大行皇帝，着即就地正法，欽此。」吾聞畢流涕曰：「上已大行乎？」即投海。濮蘭德抱吾曰：「消息不確，聞皇上猶在，汝宜少待。」乃以兵輪渡吾還港。蓋證明紅丸案以進丸毒弒，歸罪于我，若吾一殺，即在北弒上，特印吾像，遍發全國，舟車皆有搜，持像對照，徧電郡縣拿辦我，實爲弒上也。及詭謀不行，吾不能戮，無從行弒，乃更備團頤和國，十日中僞旨數變，吾之蒙天幸者，以上天命也。

十二

爲撓新政謀幽廢，遂至通拳召敵兵。溥隽癡狂寫生似，如斯朝議亦庚庾。

十三

紅衣拳匪照紅燈，排外居然殺氣騰。朝貴如狂盡誅敵，似忘海外有軍興。

十四

八國聯軍砲震京，蒙塵又唱雨淋鈴。傷心最是景陽井，南內迴鑿對月明。

十五

爾朱權謫世無倫，杜斷房謀能弒君。竟有成功作天柱，其如亡國集奇勛。

十六

亡清罪在兩那拉，隆裕驕橫劇本差。塗炭生民魚爛國，怒嬉笑罵說朝家。

十七

僞名共和招共營，已難統一日分崩。一從戊戌傷心後，展轉皆由禍水騰。

十八

電燈樓閣鬧梨園，茄鼓喧天萬衆繁。誰識當年場上客，今宵在座痛無言。

鬼谷子

六鯨搖動海山傾，誰入滄溟斬巨鯨。括地無書思補著，倚天有劍欲長征。抗章北闕知無用，納履南山恐不成。我欲青溪尋鬼谷，不論禮樂但談兵。

聞報墨鐵路數十萬被封示任甫並示覺頓嘉博曼宣擊一

百萬金錢一掃中，殺淫貪孽並誣攻。似聞怨敵飛章上，又報田園割地空。李廣數奇應宿業，臧倉力阻亦天功。安危出處關中國，日月光明貫白虹。

金光夢詞

亡暖何旃理女士，既逝十日，十二月之望，中夕就寢，矇矓忽見金光滿室，照灼閃爍，中現尊神，金身盈丈，峨冠廣披，皆金光燦爛，莊嚴不可迫視。漸見榻前漸小如常人，對吾俛首歛衽三肅，妙嚴璀璨，髣髴省識，則女士也，遂驚寤。惟女士彌留神識清定，但頰言吾今非我。生

一子一女，皆數齡，臨終不一語及，亦不一問，視目瞑而去，無少眷留，徧體溫軟，二時乃變，豈所謂自神道貶謫來耶！與我何因緣短至此。海外流亡，形影相伴，歸踐國土，卽已捨去天上人間，至可感矣。我亦億劫薰修，從此頓悟，爲金光夢詞以記之。

中宵室生白，金光耀天地。晃蕩而震爍，忽現尊神至。金身半丈六，冠帔製瓊異。金光四噴射，莊嚴難迫視。非復人世裝，但覺照眼麗。邈迤近視小，髣髴認似是。低首檢衽前，三肅向吾致。驚聞卿神耶，警振寤不寐。金蕤散有無，異香留芳膩。吾神猶愴恍，真人想天際。他化與欲摩，下降偶遊戲。妙光及化樂，上騰還前記。諸天多天女，豈卿能自記。金光別世界，或彼佛來暨。胡不樂天上，墜向人間試。濁世塵苦辛，女身苦甚矣。何以不畏來，又不且長住。或者已得度，不染亦不避。爲何不帝后，爲何不將吏。爲何不牯牛，爲何不囚隸。爲何不貴胄，而降位賤貳。海外長相共，歸國去何以。與我何因緣，爲有業報蒞。天女多凡心，卿或不謹此。匆匆廿四年，鬱鬱想謫置。凡心爲幾動，降貶不赦爾。目下兩淚痕，累卿煩惱備。今茲超度去，可還本來位。命終生兜率，示現見效例。人間共七年，天上七日耳。空中打磨陀，曾何足計只。醫藥竟致悞，永訣從此已。卿生美洲非土那，我生亞洲南海波。渺爾風馬牛不及，何因相遇附女蘿。辛卯我刻僞經考，卿乃墮地生之初。卿年十七我五十，豈意婚合耶輸羅。生長園圃娛花木，從我汗漫游娑婆。英德法奧瑞丹瑞，還居板嶼及星坡。王公卿士皆習見，王宮名都皆臨摩。百國寶器與百戲，古今大觀目網羅。受學美國妙才慧，窺竊來賤宜室家。寫畫鼓琴用娛悅，誦詩習禮善舞歌。晚居

日本櫻花開，東西京俗頌考遠。日光箱根覽絕頂，湖光激灑憶金波。四國之語通鞆譯，諸教之旨識別差。贊吾改制商立教，靈魂不死信無訛。其年雖短識神永，人間閱盡留無他。中國女子廿齡者，知識閱歷誰卿多。現身數奇忘賤貴，謫世命受聽偏頗，瑞典惱怒有他意，當是他業同發科。一子一女亦緣業，緣既已了戀復那。彌留神識完清定，但言容毀失山河。吾喪我者還神我，猶發狐裘與姪荷。未嘗一言囑子女，須臾目瞑歸山阿。緣盡即行不少眷，來去無滯豈有渣。昔言地獄亦可入，今茲天界可散華。萬華七寶光爛爛，妙嚴世界逾恒沙。吾乃文度多傷者，觸我慧想度愛海。薰此億劫聞聲聞，證他世界婆伽婆。偶來閻浮下臨睨，哀我衆生度楞伽。雖現此身不垢淨，喫肉邊菜其無訶。不離淫癡仍作業，可有來生安樂窩。顯示淨土豈見導，神遊諸天意云何。華嚴妙證現彈指，非非想入吾所家。